

# NCHAA NÀCUÁA NÍ QUIDE CUE TÉE NÍ TÁÚCHÍÚ<sup>n</sup> JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáá-gá sá quíxí Espíritú Yă Ndiöxí cundecu ndihi ñáyiu*

<sup>1</sup> Te duha ní cáhá<sup>n</sup> té Lùcá ní xíi-dé té Tëofilú: Yúhú sa ní chídó tnùnì-í núú librú ndéé díhna nchaa sá ñí quide Jèsús, ndihi nchaa sá ñí dácuáhá-gă ñáyiu. Te ní chídó tnùnì-í nchaa sá ñí quide-gá ndéé nduu ñí quesaha-gă quidé chìu<sup>n</sup>-gá, <sup>2</sup> ndihi nchaa sá ñí quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue tée ní cáhá<sup>n</sup>-gá dacuàha ñaha xii ñáyiu tnúhu-gá, te mee Espíritú Yă Ndiöxí ní chindee ñaha-xi xii-gá ní xáha<sup>n</sup>-gă nàcuáa cada-güedé. <sup>3</sup> Te sátá ñí xíhí-gá te ní ndoto-gá, te ní xíndecu-gá údico nduu. Te titní xito ní sáhá<sup>n</sup>-gá núú ñí xíndecu-güedé, te duca<sup>n</sup> ñí quide-gá cuendá quiní-güedé sá ndáá ní ndoto-gá, te ní xáha<sup>n</sup>-gă nàcuáa quide Yă Ndiöxí ndíhu ndaha-gă ñáyiu.

<sup>4</sup> Te ì<sup>n</sup> nduu ndècu ndihi ñaha-gá xii-güedé, te ní xáha<sup>n</sup>-gă:

—Vá quéé-ní-ndó ñùú Jerusàlén, chi cundet-ndo quixi Espíritú Yă Ndiöxí cundecu ndihi-ndo, chi sa ní cachí tnúhu-í sá dúcá<sup>n</sup> ñí cáhá<sup>n</sup> Tătá-ó Dütú Ndiöxí Yaá ndécú àndiu nacuáa cunduu. <sup>5</sup> Te ndáá sá ndí Juàá ní dácuándùte ñaha

ndíi xii-ndo, dico vitna ñá túú-gă cuéhé nduu, te quexìo Espíritú Yă Ndiǒxí cundecu ndihì-ndo —càchí-gá xáha<sup>n</sup>-gă xii-güedé.

*Jèsús cuándaa-gá andïu*

<sup>6</sup> Te òré ní xíndecu-güedé ndihì Jèsús, te ní xáha<sup>n</sup>-güedě xii-gá:

—Mèstrú, cuíní-ndí cachí tnúhu-n nũu sa ta cùyatni nduu chindee-n ñăyiu ñuú Isràél cuèndá taxi tnùnì tucú-yu ñuú-yu —càchí-güedé xáha<sup>n</sup>-güedě xii-gá.

<sup>7</sup> Te ní xáha<sup>n</sup> Jèsús xii-güedé:

—Ñá túú xìni ñuhu-xì cunaha nchohó xíă<sup>n</sup>, chi Tătá-ó Dütú Ndiǒxí nánhá-gă ná nduu càda-gá nchaa sá ñì cáhá<sup>n</sup>-gá. <sup>8</sup> Te òré quexìo Espíritú Yă Ndiǒxí cundecu ndihì-ndo, te cuyì-ndo ñì yuhu ñì iní-ndó quǐhí<sup>n</sup>-ndó cáhá<sup>n</sup>-ndó tnũhu-í núú ñăyiu ñuú Jerusálén ndihì núú ñăyiu distritú Jùdeá ndihì núú ñăyiu distritú Sàmariá. Te duca<sup>n</sup>-ni cáhá<sup>n</sup>-ndó quǐhí<sup>n</sup>-ndó ñì caxico ñuyú —càchí-gá xáha<sup>n</sup>-gă xii-güedé.

<sup>9</sup> Te sátá dúcá<sup>n</sup> ñì cáhá<sup>n</sup>-gá, te ndèhe-güedé ní ndanchita-gá cuándaa-gá andïu cuăndihü-gá xití vícò, te ñá túú-gă ní xìní nánhá-güedě xii-gá.

<sup>10</sup> Te ndèhe vihi-güedé andïu núu ndéè quini ñánhá-güedě xii-gá yòtnúhu, te ní quexìo cunu úú cue téè ñihnu dóó cuìxí<sup>n</sup> núú ndécú-güedě. <sup>11</sup> Te xáha<sup>n</sup>-güedě:

—Nchòhó cue téè Galileá, ¿ná cuèndá ndéhé-ndó àndïu? Te dàtná-ni càa Jesús cuándaa-gá andïu vitna, te duca<sup>n</sup>-ni cùnduu-gá quixi tucu-gá —càchí cue téè ñihnu dóó cuìxí<sup>n</sup>-á<sup>n</sup> xáha<sup>n</sup>-güedě.

*Cuendá sá ñà túú-gă ndii Jùdás ñũu ní nan-  
ducu-güedě té Mātiá ní nucúnutñi-dé núú ndĩ*

12 Te ní ndee-güedé yucu Òlívú cuánuhú-güedé ñúú Jerusálén, te ní xúhu<sup>n</sup>-güedé cuèdicó cuádava òré ichi. 13 Te òré ní ndexìo-güedé ñúú-á<sup>n</sup>, te cuándaa-güedé cuàrtú ndéé núú ñĩnu, chi vehe yòdo tnahà ndecu-güedé. Te ní naníhí tñáhá-güedě nchaa-güedé té Pèlú, té Jàcobó, té Juàá, té Ndrìxí, té Lìpé, té Mǎxí, té Bartolòmé, té Mâteú, té Jàcobó déhe té Àlfeú, ndihì té Xímú téé ní cundihì cue téé canànistá, ndihì té Jùdás ñanì té Jàcobó. 14 Te ní naníhí tñáhá-güedě nchaa-güedé yàcá<sup>n</sup> ndihì tá Màriá nǎná Jèsús, ndihì cue ñanì-gá ndihì dava-gá cue ñáyiu dǐhí. Te ñ<sup>n</sup>-ni ñĩ cuú-yu ní cáhá<sup>n</sup> ndihí-yu Yá Ndiǒxí.

15 Te ñ<sup>n</sup> nduu ní xíndecu dàtná ñ<sup>n</sup> cièndú ócò mee-ni ñáyiu sàndáá iní tñúhu Jèsús, te ní ngúnutñi té Pèlú núú-yu, te ní xáha<sup>n</sup>-dě xií-yu:

16-17 —Nchòhó cue ñáyiu ndècu ndihì-í ichi Xítóhó Jesucristú, na càni-í cuèndú núú-ndó nàcuáa ní chídó tñunì ndii Dàvíí téé ní xíndecu ndéé sanaha nàcuáa ní cáhá<sup>n</sup> Espíritú Yá Ndiǒxí cuendá té Jùdás. Te dacuitíí dùca<sup>n</sup> ní cuu, chi tñáhá té Jùdás ní xíndecu ndihì-o, te ní xinu cuechi-o ndihì-dé núú-gă sá dǐhna, te duca<sup>n</sup> ñĩ quide-dé ní sáha cuendá-dé Jèsús núú cuè téé cùu úhú iní ñáhá xii-gá. 18 Te ní cháhu ñaha-güedě xii-dé cuendá sá ñĩ sáha cuendá ñáhá-dě xii-gá. Te ní sáhá<sup>n</sup>-dé ñ<sup>n</sup> xichì ní sata caa-dé méé-dě, te ní ngava-dé, te ní cahndí duu<sup>n</sup> xití-dé te xiá<sup>n</sup> ñĩ xihí-dé. Te ní naquehe<sup>n</sup>-güedé díhú<sup>n</sup> sǎ ñĩ cháhu-güedé ndii, te ní nacuaa<sup>n</sup>-güedé ñuhu núú ñĩ ngava ndii-á<sup>n</sup>.

19 Te nchaa ñáyiú Jerusàlén ní níhĩ-yu tnúhu, te ní dánánĩ-yu ñuhu-á<sup>n</sup> Acèldamá. Te tnúhu mèé-yu quèe-xi: Ñuhu núú nĩ sati níñí. 20 Te duha ní cáhá<sup>n</sup> ndíi Dàvíí ní chídó tnùní ndíi núú librú Sălmú ní dándóo ndíi: “Nà ndóo nahi vèhe-dé, vá yóo ì<sup>n</sup> quíhí<sup>n</sup> cundecu”, duha ní cáhá<sup>n</sup> ndíi. Te ìngá tucu tnúhu ní cachí ndíi: “Na nànducu-güedé ìngá tée nucúnutnĩ<sup>n</sup> núú ndíi”, duha ní cáhá<sup>n</sup> ndíi Dàvíí — cächí té Pèlú xăha<sup>n</sup>-dë xii-yu.

21-22 Te ní xăha<sup>n</sup> tucu-dé:

—Te duca<sup>n</sup> nĩ cáhá<sup>n</sup> ndíi Dàvíí, te vitna xini ñuhu-xi nanducu-o ì<sup>n</sup> tée nucúnutnĩ<sup>n</sup>-dé núú ndíi Jùdás, te xini ñuhu-xi diu-ni ì<sup>n</sup> tée ní xica cuu ndihi Xítóhó Jesucristú cútnàhá ní xica cuu-o ndihi-gá, ì<sup>n</sup> tée ní xiní ndéé òré ní dácuándute ñaha ndíi Juáa xii-gá, te ndéé òré cuánda-gá andiu. Te tée nanducu-o cundecu-dé cáhá<sup>n</sup>-dé năcuáa ní cuu ní ndoto-gá — cächí té Pèlú xăha<sup>n</sup>-dë xii-yu.

23 Te ní cacunehe-güedé úú tnàhá-güedé nũu ndëdacàa-güedé nduu táhú-güedé nucúnutnĩ<sup>n</sup>-güedé núú ndíi. Te ì<sup>n</sup>-dé nání-dë Chèè Barsàbás, àdi Justú chi úú diu-dé, te ìngá-dé nání-dë Mاتیá. 24 Te ní cáhá<sup>n</sup> ndihi-güedé Yă Ndiöxí, te xăha<sup>n</sup>-güedé xii-gá:

—Yòhó Dútú Ndiöxí xini-n ìní nchaa ñáyiú, te mee-n nàha-n núu ndëda càa núú úú cue tée-a tnàhá iní-n 25 cáhá<sup>n</sup>-güedé tnúhu-n nũú ñáyiú, te tée-á<sup>n</sup> nucúnutnĩ<sup>n</sup>-dé núú ndíi Jùdás, chi cuáhá<sup>n</sup> ndíi núú ùhú núú ndàhú núú tàú-xi quíhí<sup>n</sup> ndíi — cächí-güedé xăha<sup>n</sup>-güedé xii-gá.

26 Te ní xito ndéé-güedé, te ní cutnùní sá tée nàni Mاتیá quendóo-dé ndihi úxí ì<sup>n</sup> cue tée ní

táuchíu<sup>n</sup>-gã dacuàha ñaha xii ñáyiú tnúhu-gá.

## 2

*Ní quexìo Espíritú Yă Ndiõxí cundecu ndihì ñáyiú*

<sup>1</sup> Te ní sáá nduu còo vico Pentecostés te xĩndecu nchaa ñáyiú ñ<sup>n</sup>-ni xìchi. <sup>2</sup> Te ní tecú dóho-yu uu<sup>n</sup>ni ní ñihì andiú, dàtná quidé ñ<sup>n</sup> táchí ñihì v̄hì ní quide-xi, te duca<sup>n</sup> ñ cuu ndéé xití vehe núú ndécũ-yu nchaá-yu. <sup>3</sup> Te ní xiní-yu dàtná cáá itá ñuhú cáá sã ndécú xití vehe, te ní xité nuu-xi ní ngoyo ndodo-xi díquĩ-yu nchaá-yu. <sup>4</sup> Te duca<sup>n</sup> ñ quide-xi òré ní quexìo Espíritú Yă Ndiõxí ní ngúndecu ndihí-yu nchaá-yu. Te ní ngüíta-yu ní cáhá<sup>n</sup>-yu tnúhu cue ñáyiú ñá túú cùu ñáyiú isràél, te nchaa xíã<sup>n</sup> ní quide Espíritú Yă Ndiõxí.

<sup>5</sup> Te v̄ai ñáyiú isràél xĩndecu nchaa dava-gá ñuú ní tacá-yu ñuú Jerusàlén, te ñáyiú-á<sup>n</sup> ño ndùcu ndeé-yu dàcuahá-yu nchaa ndudú sá dácuaàha tnahí-yu. <sup>6</sup> Te òré ní tecú dóho-yu ñihì, te ní sáhá<sup>n</sup>-yu ní xíndedóho-yu tnúhu càhá<sup>n</sup> mée-yu ñ<sup>n</sup> ñ<sup>n</sup> ñuú-yu, chi ndì díí<sup>n</sup> ndì díí<sup>n</sup> tñuhu càhá<sup>n</sup> ñáyiú ndècu-á<sup>n</sup>. <sup>7</sup> Te xíã<sup>n</sup> ío ní cuñúhu ñáyiú véxi dava-gá ñuú, te ní xítnàhá-yu:

—Ñáyiú duca<sup>n</sup> xícáhá<sup>n</sup> cúú-yu ñáyiú distritú Galileá. <sup>8</sup> ¿Te nása ní quidé-yu ní cutúha-yu nàcuáa càhá<sup>n</sup>-ó ñ<sup>n</sup> ñ<sup>n</sup>-o ndéé lĩhli-o? <sup>9</sup> Te iha véxi ñáyiú dava nació<sup>n</sup>, chi véxi ñáyiú Pàrtiá, véxi ñáyiú Mèdiá, véxi ñáyiú Èlám, véxi ñáyiú Mesopòtamiá, véxi ñáyiú Jùdeá, véxi ñáyiú Capàdociá, véxi ñáyiú Pòntó, véxi ñáyiú Àsiá, <sup>10</sup> véxi ñáyiú Frigiá, véxi ñáyiú Pànfilíá, véxi ñáyiú Ègiptú, véxi ñáyiú Áfricá ñáyiú

ndècu ndéé núú-gă-xi ñuú Cirené. Te tnàhá ñáyiú ñuú Rómá véxi, te ñáyiú-án chi ñá díú mèe-ni ñáyiú israél cúŷ-yu nchaá-yu, dico ñ-ni cùu sá dácuahá-yu. <sup>11</sup> Te véxi ñáyiú Crětá, véxi ñáyiú Àrabiá. Te nchaa-o sa ndèdóho-o càhá<sup>n</sup>-yu nàcuáa cuáhá<sup>n</sup> tnúhu mee-o ñ<sup>n</sup> ñ<sup>n</sup>-o. Te nchaa ñáyiú xíchá<sup>n</sup> tnúhu-o càhá<sup>n</sup>-yu cuendá nchaa sá vǎ yǒo tnàhí ndàcu cada ní quide Yá Ndiǒxí –càchí-yu xǐtnàhá-yu.

<sup>12</sup> Te ní cuñúhu vǐhí-yu, te ñá ná sàá iní-yu nása ní cuu, te xǐtnàhá-yu:

—¿Nása ní cuu duha càhá<sup>n</sup>-yu tnúhu-o? —  
càchí-yu xǐtnàhá-yu.

<sup>13</sup> Te davá-yu ní sácú ndeé yíchí ñáhǎ-yu, te xǐtnàhá-yu:

—Xǐxíni ñáyiú-án nǔu ñá náhǎ-yu tnúhu càhá<sup>n</sup>-yu  
—càchí-yu xǐtnàhá-yu.

### *Tnúhu ní xáha<sup>n</sup> tǎ Pèlú xii cue ñáyiú*

<sup>14</sup> Te ní ngúnutnǐi té Pèlú ndihí úxí ñ<sup>n</sup> cue téé ní táuchíú<sup>n</sup> Jèsús dacuaà ñaha xii ñáyiú tnúhu-gá, te níhi ní cáhá<sup>n</sup>-dé, te xǎha<sup>n</sup>-dě xii-yu:

—Nchaa nchòhó ñáyiú distritú Jùdeá ndihí nchòhó ñáyiú ñuú Jerusalén, cundedóho váha-ndo tnúhu na càhá<sup>n</sup>-í-a. <sup>15</sup> Ñá ndàá tnúhu càhá<sup>n</sup>-ndó, chi ñá túú xǐni-ndí te duca<sup>n</sup> càhá<sup>n</sup>-ndó, chi davitna cùu-xi caá ñ<sup>n</sup> dátneé, vátá tnàhá-gá òré coho ñáyiú ndidí. <sup>16</sup> Te yúhú ná càchí tnúhu-í xii-ndo vitna nacuaá ní xáha<sup>n</sup> Yǎ Ndiǒxí xii ndíi Jòél téé ní xóo cáhá<sup>n</sup> tnúhu-gá ndéé sanaha nàcuáa cada ñaha-gǎ xii ñáyiú, te ndíi-án ñǐ chídó tnùnǐ ndíi nàcuáa ní cáhá<sup>n</sup>-gá. <sup>17</sup> Te duha ní xáha<sup>n</sup>-gǎ xii ndíi:

Cùmání-gǎ sǎá nduu nàa ñuyíú, te cuǎñaha-ǎ  
Espíritú-í cundecu ndihí nchaa ñáyiú na  
quìndáá iní ñáhá xii-í.

Te cue déhe-yu cáhá<sup>n</sup>-yu tnúhu-í,  
te cue téé cuechi dacòto núú ñáhá-xí xii-güedé,  
te duca<sup>n</sup>-ní cuè téé ní sàhnu cáhá<sup>n</sup> saní-güedé,  
te diu-ni cuèndá nchaa sá quidè-í duca<sup>n</sup> dàcoto núú  
ñáhá-xí xii-güedé.

18 Te nchaa ñáyiú xinu cuechi núú-í cáhá<sup>n</sup>-yu  
tnúhu-í, te cuǎñaha-ǎ Espíritú-í cundecu  
ndihí-yu.

19 Te ndéé andiu, yàcá<sup>n</sup> vǎi sá cáda-í nàcuáa cuñúhu  
vìhí-yu,

te núú ñùyíú-a cada-í #<sup>n</sup> sá vǎtá quìní tnàhí-gá-yu,  
te ngoyo níñí te ngoyo ñuhú te quene vìhi ñúhmá.

20 Te vǎ dáyèhé-gá nchícanhii,  
cuu nee ñuyíú te cuu ticuèhé núú yóó dàtná ticuèhé  
níñí.

Te dàvá-á<sup>n</sup> sǎá nduu quìxi Yáá cúú Xìtohó-yu,  
te nduu-á<sup>n</sup> cuu-xi #<sup>n</sup> nduu càhnu vìhi, chí cada-gá  
nchaa sá ñà túú xini-yu, te cuñúhu vìhí-yu.

21 Te òré xíá<sup>n</sup> te nchaa ñáyiú càhá<sup>n</sup> ndihí ñaha xii Yáá  
cúú Xìtohó-yu-á<sup>n</sup> naníhí tǎhú-yu.

Duha ní xáha<sup>n</sup> Yǎ Ndiǒxí xii ndí Jòél ní chídó tnùní  
ndí.

22 Te nchòhó ñáyiú isràél, cundedóho váha-ndo  
tnúhu na càhá<sup>n</sup>-í-a cuèndá Jèsús téé ñuú Nazàrét.  
Te Jèsús ní quide-gá chi<sup>n</sup> Yǎ Ndiǒxí, chí mee Yǎ  
Ndiǒxí ní chindee ñàha-gá ní quide Jèsús ná daha  
núú chi<sup>n</sup>, núu xíá<sup>n</sup> ní ndacu-gá ní quide-gá nchaa  
sá vǎ yóo tnàhí ndàcu cada, te xíá<sup>n</sup> ní cuñúhu  
vìhi-ndo. Te sa nàha-ndo nacuáa ní quide-gá

cútnàhá ní xica cuu-gá ñuyíú. <sup>23</sup> Te ndíi Jùdás ní taxi cuèndá ñáhá ndíi Jèsús xii nchòhó cue tée ní cuu úhú iní ñáhá xii-gá, te ní ndúcú-ndó cuè tée úhú iní-xi ní tñi ñaha-güedě xii-gá te ní sata caa ñaha-güedě núú cùrúxí, te núú cùrúxí-á<sup>n</sup> ñí xíhí-gá. Dico sa ní cutnùní iní Yă Ndiöxí sá dúcá<sup>n</sup> càda-ndo Jèsús, te mee Yă Ndiöxí ní cachí-gá sá dúcá<sup>n</sup> ndòho Jèsús. <sup>24</sup> Te ñu-ni mee Yă Ndiöxí ní dándótó-gă Jèsús, chi sa ní cáhá<sup>n</sup>-gá sá òré cuú-gá te vá cuú dúcá<sup>n</sup>-gă. <sup>25</sup> Te ndíi Dàvií tée ní xíndaha ñaha xii cue ñaní tnáhá-ó ñí xíndecu ndéé sanaha ñí chídó tnùní ndíi nàcuáa ní cáhá<sup>n</sup> Jèsús, te duha ní cáhá<sup>n</sup>-gá:

Cùtnuní iní-í sá ncháá ndùu ndecu ndíhi-í Yă Ndiöxí, te ío chìndee ñaha-gá xii-í,  
te ñá túú tnàhí sá yùhú-í.

<sup>26</sup> Te ío ndàcá<sup>n</sup> táhù-í núú Yă Ndiöxí chi cùdǎí iní-í,  
chi sa nàha-í sá cùú-í dico ndoto-í,

<sup>27</sup> chi vá dáñá-gă quíhí<sup>n</sup> dúcá<sup>n</sup> àlmá-í núú ndécú ñăyiu ní xíhí,

te vá dáñá-gă téhyú yiqui cùñú-í chi cùu-í Déhe-gá,  
te yúhú sa nàha-í sá cúú iní ñáhá-gă xii-í.

<sup>28</sup> Te sa ní cachí tnúhu-gá nàcuáa cada-í cundecu-í  
ichi váha, te cuèndá sá ndécú ndíhi ñaha-gá  
xii-í nùu ío cùdǎí iní-í.

Duha ní cáhá<sup>n</sup> Jèsús, te duca<sup>n</sup> ñí chídó tnùní ndíi Dàvií.

<sup>29</sup> Te nchòhó cue ñaní tnáhà-í, na càchí tnúhu ndáá-í xii-ndo cuèndá ndíi Dàvií tée ní xíndecu ndéé sanaha vîhi, chi ní xíhí-dé, te ní chindúxi ñaha-güedě, te nàha-o tnavíí núú ñí chindúxi ñaha-güedě. <sup>30</sup> Te ndíi Dàvií ní xóo cáhá<sup>n</sup> ndíi tnúhu Yă Ndiöxí, te sa nàha ndíi sá Yă Ndiöxí ní cáhá<sup>n</sup>



ndáá cuiti-gá sá díú-ní ì<sup>n</sup> tnaha ndíi taxi tnùní-dé ñáyiú isràél ndéé cuèé-gá dàtná ní xóo taxi tnùní méé ndíi cútnàhá ní xíndecu ndíi, te téé taxi tnùní-á<sup>n</sup> cúú Crístú chi cùu-gá ì<sup>n</sup> tnàha ndíi. <sup>31</sup> Te sa ní cutnùní iní ndíi sá ndótó Crístú, núu xíã<sup>n</sup> ní chídó tnùní ndíi sá vǎ dáñá Yǎ Ndiǒxí sá quíhí<sup>n</sup> dúcá<sup>n</sup> àlmá-gá cundecu-xi núú ndécú ñáyiú ní xíhí, te vǎ dáñá-gǎ téhyú yiqui cùñú-gá.

<sup>32</sup> Te ndáá chi Yá Ndiǒxí ní dándótó-gǎ Jèsús, te nchúhú ní xiní-ndí sá ñí ndoto-gá. <sup>33</sup> Te ní xáha<sup>n</sup> Yǎ Ndiǒxí xii Jèsús sá cùndecu ndíhi ñaha-gá, te taxi tnùní Jèsús ni caa ni quíhí<sup>n</sup>. Te Yá Ndiǒxí ní sáñaha-gǎ Espíritú-gá ní ngúndecu ndíhi-gá nàcuáa ní xáha<sup>n</sup>-gǎ, te ñu Jèsús ní quide-gá nchaa sá ñí xiní-ndó vǐtna ndíhi nchaa sá ñí xíndedóho-ndo. <sup>34</sup> Te ndíi Dàvíí ñǎ túú ní ndàa túu ndíi andíu ndíhi yiqui cuñú ndíi, te òré ndécú-gǎ ndíi ñuyú-a ní cachí ndíi:

Dútú Ndiǒxí ní xáha<sup>n</sup>-gǎ xii Yaá cúú Xǐtohó-í:

“Ngóo xio cùha-í,

<sup>35</sup> te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dútú Ndiǒxí xii Yaá cúú Xǐtohó-í cachí ndíi.

<sup>36</sup> Te nchòhó ñáyiú isràél cùu-ndo ndí mee-í, te cuíní-í cundedóho váha-ndo ì<sup>n</sup> tnúhu na càhá<sup>n</sup>-í-a. Jèsús ní sata caa-ndo-gǎ núú cùrúxí, dico Yá Ndiǒxí ní cachí-gá sá Jèsús dacăcu nihnu-gǎ ñáyiú, te vǎ cání ì<sup>n</sup> caní úú iní-ndó, chi ñu-gǎ cùnùu-gǎ núú nchàa ñáyiú —càhí té Pèlú xáha<sup>n</sup>-dǎ xii-yu.

<sup>37</sup> Te ñáyiú ní xíndedóho tnúhu ní cáhá<sup>n</sup> té Pèlú ní ndixi túu iní-yu nàcuáa quidé-yu ndécú-yu, te ní

xáhă<sup>n</sup>-yu xii-dé ndihî dava-gá cue téé ní táúchíú<sup>n</sup>  
Jèsús dacuàha ñaha xií-yu tnúhu-gá:

—Nchaa nchòhó cue ñaní tnáhá-ndĩ, ¿nása cachí-ndó cùnduu, nása cada-ndí vitna? —càchí-yu xáhă<sup>n</sup>-yu xii-güedé.

<sup>38</sup> Te ní xáha<sup>n</sup> tē Pèlú xií-yu:

—Daña-ndo nchàa sá cuèhé sá dúhá quide-ndo, te cada càhnu iní Yă Ndiõxí nchaa yícá cuèchi-ndo. Te cuandute-ndo cuendá quiní-yu sá ñí natuha-ndo ìchi Jesús, te duca<sup>n</sup> te taxi Yă Ndiõxí Espíritú-gá cundecu ndihî-ndo, <sup>39</sup> chi cuiní-gá taxi-gá Espíritú-gá xii mee-ndo ndihî déhe-ndo, te cuañaha-gă Espíritú-gá xii nchaa ñáyiu ñí càa xico ñuyíú, ñáyiu cáhá<sup>n</sup>-gá cundecu ichi-gá ndéé idá-gá —càchí té Pèlú xáha<sup>n</sup>-dē xií-yu.

<sup>40</sup> Te titní-gá tnúhu ní xáha<sup>n</sup>-dē nàcuáa cadá-yu, te xáha<sup>n</sup> tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sá quidé dâva-gá-yu —càchí-dé xáha<sup>n</sup>-dē.

<sup>41</sup> Te nchaa ñáyiu ní sándáá iní-xi tnúhu ní cáhá<sup>n</sup> té Pèlú ní sanduté-yu, te ñiu-ni nduu-ă<sup>n</sup> ñí cuu dàtná úní mîl ñáyiu ní sándáá iní-xi ní xíndecu ndihî ñáyiu xídácuáhá tnúhu Yă Ndiõxí. <sup>42</sup> Te ío ní xíndedóho-yu tnúhu ní cáhá<sup>n</sup> cue téé ní táúchíú<sup>n</sup> Jèsús dacuàha ñaha xií-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuendá náhá-yu sá dúcá<sup>n</sup> ñí quide Jèsús cútnàhá vátá cáhni ñàha-gá-güedé xii-gá, te ní xóo cáhá<sup>n</sup> ndihî-yu Yă Ndiõxí.

*Nàcuáa ní quide nchaa ñáyiu ní sándáá iní tnúhu  
Jèsús ndéé díhna nuu*

<sup>43</sup> Te nchaá-yu ní cuñúhu vîhî-yu, chi cue tée ní táuchíú<sup>n</sup>-gã dacuàha ñaha xii-yu tnúhu-gá ní quide-güedé titní núú sã vã yõo tnàhí ndàcu cada, te xíã<sup>n</sup> ní cutnùní iní-yu sá méé Yã Ndiõxí chindèe ñaha-gá xii-güedé. <sup>44</sup> Te nchaa ñáyiu sàndáá iní tnúhu Jèsús càhá<sup>n</sup> ndihî tnàha váha-yu, te cuëi-ni nchaa ndachìu<sup>n</sup> nandíhi-yu ndècu cahnu. <sup>45</sup> Te ní dícõ-yu nchaa ndachìu<sup>n</sup> sá ñà túú xìni ñuhú-yu, te ní níhî-yu díhú<sup>n</sup> te ní sãñàhá-yu xii nchaa ñáyiu ñã ñihî. <sup>46</sup> Te ì<sup>n</sup> nduu ì<sup>n</sup> nduu ní xóo quíhî<sup>n</sup> ndihî tnàhá-yu veñúhu càhnu sá ïo cùnuu. Te ní xexi ndihî tnàhá-yu vehé-yu. Te ío ní cudíí iní-yu chi ì<sup>n</sup>-ni ní cuú-yu nchaá-yu. <sup>47</sup> Te ío ní ndacá<sup>n</sup> táhû-yu núú Yã Ndiõxí, te nchaa dava-gá ñáyiu ní cáhá<sup>n</sup> váha-yu cuendá ñáyiu-á<sup>n</sup>. Te mee Yã Ndiõxí ní quide-gá ní sándáá iní vai-gá ñáyiu, te ní xíndecú-yu ndihî dava-gá ñáyiu xídacuahá tnúhu-gá.

### 3

#### *Quide tátna-güedé ì<sup>n</sup> tée yacua*

<sup>1</sup> Te ì<sup>n</sup> nduu òré caá úní sacuaa, òré xícáhá<sup>n</sup>-yu ndihî Yã Ndiõxí cuáhá<sup>n</sup> té Pèlú ndihî té Juáá veñúhu càhnu sá ïo cùnuu sácúú-xí ñáyiu isràél. <sup>2</sup> Te ndècu ì<sup>n</sup> tée yacua, te duca<sup>n</sup>-ni càa-dé ní cacu-dé. Te sàhá<sup>n</sup> ndihî ñàhá-yu veñúhu càhnu sá ïo cùnuu, te sácóo-dé ì<sup>n</sup> xio yuyèhe veñúhu sá nání Yèhe Vii Caa, chi duca<sup>n</sup> nàni-xi, te xicá<sup>n</sup> ndàhú-dé núú nchàa ñáyiu sàhá<sup>n</sup> veñúhu. <sup>3</sup> Te ní xiní-dé té Pèlú ndihî té Juáá cuánguìhu-güedé veñúhu, te xicá<sup>n</sup> ndàhú-dé núú-güedé. <sup>4</sup> Te ní ndacoto-güedé núú-dé, te ní xáha<sup>n</sup> tẽ Pèlú xii tée yacua-ã<sup>n</sup>:

—Cundehe ñàha xii-ndí —càchí té Pèlú xǎha<sup>n</sup>-dě xii-dé.

<sup>5</sup> Te ní xíndéhé ñàha-dé xii-güedé, chi ní cáhá<sup>n</sup>-dě sá íó ñ<sup>n</sup> sá cuǎñaha-güedé. <sup>6</sup> Te ní xáha<sup>n</sup> tǎ Pèlú:

—Ñá túú tnàhí díhú<sup>n</sup> néhè-í dico chindee ñàha-í xii-n, te Xítóhó Jesucrístú Yaá ní xíndecu ñúú Nazàrét, ndacu-gá cada tátna ñàha-gǎ xii-n, ndacuíñí te caca-n —càchí-dé xǎha<sup>n</sup>-dě.

<sup>7</sup> Te té Pèlú ní tñi-dé ndaha cùha tée yacua-ǎ<sup>n</sup>, te ní ngüíta-dé ndàcàni ñàha-dé, te òré xiá<sup>n</sup> nǐ naníhí ndéé-dé, te ní ndúha sáhá-dé. <sup>8</sup> Te ní ndacuíñí cunu mee-dé te ní xica-dé, te ní cachí-dé sá ío càhnu cuu Yá Ndiǒxí cuendá sá nǐ ndúha-dé, te ta sǎndava-dé cuánguihu ndíhi ñàha-güedé veñúhu. <sup>9</sup> Te nchaa ñáyiú xíndecu-á<sup>n</sup> nǐ xiní-yu sá nǐ nduu váha-dé, te ndéhé-yu ndàcá<sup>n</sup> táhú-dé núú Yǎ Ndiǒxí. <sup>10</sup> Te ní naquiní ñǎhǎ-yu xii-dé sá díú tǎe xicá<sup>n</sup> ndàhú tée ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vǐhí-yu sá nǐ ndúha-dé.

*Té Pèlú ní cáhá<sup>n</sup>-dé corrèdór sá néhé ñúú ndí Salòmón*

<sup>11</sup> Te sátá veñúhu càa corrèdór sá néhé ñúú ndí Salòmón. Yàcá<sup>n</sup> ndécú tǎ Pèlú ndíhi té Juàá ndíhi tée ní ndúha sáhá-xi, te ñá cuìní tée ní ndúha sáhá-xi-á<sup>n</sup> dañá-dé quíhí<sup>n</sup>-güedé dandóo ñàha-güedé xii-dé. Te chítú-yu ní quexìo coyó-yu núú ndécú-güedé, te ní cuñúhu vǐhí-yu sá nǐ ndúha sáhá tǎe cùhú-á<sup>n</sup>. <sup>12</sup> Te té Pèlú ní xiní-dé ní quexìo coyó-yu, te ní xáha<sup>n</sup>-dě xii-yu:

—Nchòhó ñáyiú isràèl, ¿ná cuendá ndéé dúcá<sup>n</sup> ndèhe ñàha-ndo xii-ndí te cùñúhu-ndo sǎ nǐ ndúha tée yacua-ái<sup>n</sup>? Nchòhó cáhá<sup>n</sup>-ndó sǎ méé-ndí

ní quide tátna-ndí-dé sá ïo váha iní-ndí, dico ñáhá chi ñá díú mèe-ndí ní quide tátna-ndí-dé. <sup>13</sup> Chi Yá Ndiöxí ní ndadúha ñaha-gã xii-dé, chi ðiu-gá cúú Ndiöxí ndíi Àbrahám ndíi ndíi Isàác ndíi ndíi Jácób, te ðiu-ni cue téé-á<sup>n</sup> cúú ñàní tnáhá-ó ní xíndecu ndéé sanaha vîhi. Te ðiu-ni Ndiöxí-á<sup>n</sup> ní xáha<sup>n</sup>-gã xii Déhe-gá Jèsús sá táxí tnùní-gá nchaa sá ìo andíu ndíi nchaa ñáyíu ndècu ñuyíú-a, dico mee-ndo ní sáha cuendá-ndó Jèsús núú tée cùchiu<sup>n</sup>. Te té Pilatú ní cuiní-dé dacăcu-dé Jèsús ní cùu, te mee-ndo ñã ní cuiní-ndó. <sup>14</sup> Te Yá Ndiöxí ní cachí-gá sá ïo váha iní Jèsús te ñá túú tnàhí cuéchi-gá. Te mee-ndo ñà túú ní cuiní-ndó căcu-gá ñúu ní xáha<sup>n</sup>-ndo xii té Pilatú sá vâha-gá dacăcu-dé ï<sup>n</sup> téé ndècu vihi cuéchi-xi, te vá dăcăcu-dé Jèsús. <sup>15</sup> Te ní xáha<sup>n</sup>-ndo sã cáhni-güedé Jèsús Yaá quidé nchito-o ndecu-o, dico Yá Ndiöxí ní dándótó ñaha-gá, te ní xiní-ndí sá ndàá ní ndoto-gá. <sup>16</sup> Te nchúhú sa nàha-ndí sá díú Xítohó Jesucrístú ní ndadúha-gá téé yacua, te náí-dé nútnî-a. Te duca<sup>n</sup> ní quide-gá chi ní sándáá iní ñáhá-dè xii-gá, te vitna ní xiní-ndó sã ndàá ní ndúha-dé.

<sup>17</sup> Te nchòhó ndíi cue téé cùnuyú ní sahani-ndo Xítohó Jesucrístú, chi ñá ní cùtnumí iní-ndó sã ní quide-ndo. <sup>18</sup> Te cue téé ní xóo cáhá<sup>n</sup> tnúhu Yá Ndiöxí ndéé sanaha ní chídó tnùní-güedé năcuáa ní xáha<sup>n</sup> Yă Ndiöxí xii-güedé sá Crístú quixi-gá ñuyíú-a, te ndoho vîhi-gá, te xíá<sup>n</sup> ñúu duca<sup>n</sup> ní cuu ïo ní ndoho-gá. <sup>19</sup> Te vitna te dañá-ndo nchàa sá cuèhé sá dúhá quide-ndo. Te quindáá iní-ndó Yă Ndiöxí, te duca<sup>n</sup> te cada càhnu iní-gá nchaa sá ñà túú vâha ní quide-ndo ñuyíú-a, te canu ichi

ñaha-gă xii-ndo ì<sup>n</sup> ichi váha. <sup>20</sup> Te ní tendaha-gă Crìstú ní quixi-gă ñuyíú-a, chi mee Yă Ndiöxí ní cachí-gă sá díú Crìstú taunihnu ñaha-gă xii-ndo. <sup>21</sup> Te dacuití cùndecu-gă andi<sup>u</sup> ndéé ná sàá nduu nàtaxi ndecu-gă nchaa sá ndécú ñuyíú nàcuáa sàni iní méé-gă. Te di<sup>u</sup> duca<sup>n</sup> ní cáhá<sup>n</sup> Yă Ndiöxí nūu duca<sup>n</sup> ní chídó tnùní cue téé ní xóo cáhá<sup>n</sup> tnúhu-gă ndéé sanaha. <sup>22</sup> Te ndíi Moisés ní xáha<sup>n</sup> ndíi xii cue ñaní tnáhá-ó ní xíndecu ndéé sanaha: “Yă Ndiöxí tendaha-gă ì<sup>n</sup> téé quixi-dé cáhá<sup>n</sup>-dé tnúhu-gă dàtná cuìní-ndó ní quide ñaha-gă xii yúhú, te téé-á<sup>n</sup> cuu-dé ì<sup>n</sup> ñaní tnáhá-ndó. Te cund-edóho váha-ndo nchàa tnúhu cáhá<sup>n</sup>-dé. <sup>23</sup> Te nchaa ñáyíu vá quíndáá iní tnúhu cáhá<sup>n</sup>-dé, te cuíta ni-hnú-yu chi vá quíhí<sup>n</sup>-yu núú quíhí<sup>n</sup> ñáyíu sàndáá iní tnúhu Yă Ndiöxí”, duha ní xáha<sup>n</sup> ndíi Moisés xíi-yu —càchí té Pèlú xăha<sup>n</sup>-dě xíi-yu.

<sup>24</sup> Te ní xáha<sup>n</sup> tùcu té Pèlú xíi-yu:

—Ndíi Sàmúél ndíhi nchaa cue téé nchìcú<sup>n</sup>-gă ní xóo cáhá<sup>n</sup> tnúhu Yă Ndiöxí ndéé sanaha ní cáhá<sup>n</sup>-güedé nàcuáa cada-xi vitna. <sup>25</sup> Te Yă Ndiöxí ní cáhá<sup>n</sup>-gă ndíhi cue téé ní cáhá<sup>n</sup> tnúhu-gă ndéé sanaha. Te ní quide ndáá-gă ndíhi nchaa ñaní tnáhá-ó ní xíndecu ndéé sanaha nàcuáa cada-gă naníhí tãhú-ó. Te duha ní xáha<sup>n</sup>-gă xii ndíi Àbrahám: “Ìó nduu cacu ì<sup>n</sup> tnàha-n, te téé-á<sup>n</sup> cada-dé te naníhí tãhú ñáyíu ñuyíú-a”, duha ní xáha<sup>n</sup>-gă xii ndíi Àbrahám. <sup>26</sup> Núu xíá<sup>n</sup> ní tendaha-gă Déhe-gă ní quixi-gă núú ndécú-ndó cuèndá dañá-ndo nchàa sá cuèhé sá dúhá quide-ndo, te naníhí tãhú-ndó —càchí té Pèlú xăha<sup>n</sup>-dě xíi-yu.

## 4

*Té Pèlú ndihì té Juàá ndécú-güedě ndaha té cùchiu<sup>n</sup>*

<sup>1</sup> Te té Pèlú ndihì té Juàá càhá<sup>n</sup> dúcá<sup>n</sup>-ni-güedě ndihì ñáyi<sup>u</sup>, ní quexìo cue dútú ndihì té tãxi tnuní ñáhá xii cue té quide cuendá veñúhu càhnu sá ïo cùn<sup>uu</sup>, ndihì cue té cùu saducéú. <sup>2</sup> Te ní cudéé<sup>n</sup>-güedě nchaa-güedé núú tě Pèlú ndihì té Juàá sá xãha<sup>n</sup>-güedě xii ñáyi<sup>u</sup> sá ndótó ñáyi<sup>u</sup> ní xihí dàtná ní ndoto Jèsús. <sup>3</sup> Te ní tñi ñaha-güedě ní chihi ñaha-güedě vecaá xii-güedé, te ñá ní quide ndáá té cùchiu<sup>n</sup> cuèchi-güedé nduu-ã<sup>n</sup> chi sa ní cuaa. <sup>4</sup> Te ío vãi ñáyi<sup>u</sup> ní sándáá iní-yu tnúhu ní cáhá<sup>n</sup>-güedé, te ñáyi<sup>u</sup>-á<sup>n</sup> ndihì ñáyi<sup>u</sup> sa ní sándáá iní-xi ndéé cãni-gá ní xínu dàtná úhú<sup>n</sup> mĩl mee-ni cuè té, te dñ<sup>n</sup> ñáyi<sup>u</sup> dñí ndihì landú.

<sup>5</sup> Te nduu tněé-á<sup>n</sup> dñi-ni ñúú Jerusàlén-á<sup>n</sup> ñi tacá cue té yìndaha veñúhu, ndihì cue té cùu sacuéhé nñú ñáyi<sup>u</sup> isràél ndihì cue té dàcuaha ñaha xii-yu nchaa tnúhu ní chídó tnùn<sup>í</sup> ndí Moisés. <sup>6</sup> Te tnàhá dútú cùn<sup>uu</sup>-gá té nani Anás ndécú ndihì té Caifás, ndihì té Juàá, ndihì té Lìjandrú ndihì dava-gá ñaní tnáhá dútú cùn<sup>uu</sup>-gá-á<sup>n</sup> ndécú. <sup>7</sup> Te ní xãha<sup>n</sup>-güedě xii cue té xínu cuechi núú-güedě:

—Chí cuàhá<sup>n</sup> queñuhu-ndo tě Pèlú ndihì té Juàá vecaá, te na quixi-güedé iha —càchí-güedé xãha<sup>n</sup>-güedě.

Te ní quexìo té Pèlú ndihì té Juàá núú cuè té cùn<sup>uu</sup>, te cue té cùn<sup>uu</sup>-á<sup>n</sup> ñi xicá<sup>n</sup> tnúhú-güedě núú-güedě, te xãha<sup>n</sup>-güedě:

—¿Nása ní quide-ndo cuendá tée yacua-ǎn? ¿Yoo ní táuchíú<sup>n</sup> dùca<sup>n</sup> cada-ndo? —cachí-güedé xǎha<sup>n</sup>-güedě.

<sup>8</sup> Te ndècu ndihí té Pèlú Espiritú Yǎ Ndiǒxí, núu xǎǎ<sup>n</sup> ní xǎha<sup>n</sup>-dě xii-güedé:

—Nchòhó cue tée cùchiu<sup>n</sup> ndihí nchòhó cue tée cùu sacuéhé nùú ñǎyiu isràél, <sup>9</sup> te núu cuíní-ndó quíní-ndó nǎsa ní quide-ndí ní ndúha tée yacua-ǎn, <sup>10</sup> te cundedóho-ndo ì<sup>n</sup> tnúhu na càhá<sup>n</sup>-í-a. Xìni ñuhu-xi cundedóho nchaa ñáyiu isràél cuendá quíní-yu nàcuáa ní cuu ní ndúha tée-ǎn. Xítóhó Jesucristú Yaá ní xíndecu ñuú Nazàrét ní quide tátna-gá sáhá tée yacua ní ndúha, te ðiu-ni-gá ní sata caa-ndo nùú cùrúxí te núú cùrúxí-á<sup>n</sup> ñí xíhí-gá, te ní dándótó ñaha Yá Ndiǒxí xii-gá. <sup>11</sup> Te núú tütú Yǎ Ndiǒxí càchí-xi: “Cristú cúú-gǎ dàtná ì<sup>n</sup> yúú ndécú xǎquí ì<sup>n</sup> vehe. Te yúú càchí-yu sá ñà túú nàndíhi, te ðiu xǎǎ<sup>n</sup> ní nàndíhi-xi ní ngúnutní-ì<sup>n</sup> xíquí véhé”, duha càchí-xi núú tütú-gá. Te duca<sup>n</sup> sǎtnahá-xi cùu Jesús, chí càchí-ndó sǎ ñà túú nàndíhi-gá, <sup>12</sup> dico Yá Ndiǒxí ñà túú ndèé ní tàxi ndecu-gá ingá tée dàcácu nihnu ñaha xii-o núú ùhú núú ndàhú, chí ì<sup>n</sup> ðìi díi-ni Déhe-gá Xítóhó Jesucristú dacácu nihnu ñaha-gǎ xii-o —càchí té Pèlú xǎha<sup>n</sup>-dě xii-güedé.

<sup>13</sup> Te té Pèlú ndihí té Juàá ñà túú tǔha-güedé, te cùñúhu cue tée cùchiu<sup>n</sup> sá ìo ñí xǎndáa-güedé. Te ní cutnùní iní cue tée cùchiu<sup>n</sup>-á<sup>n</sup> sǎ Jèsús ní xica cuu ndihí-güedé, núu xǎǎ<sup>n</sup> ñà túú tnàhí yùhú-güedé càhá<sup>n</sup>-güedé. <sup>14</sup> Te cuendá ndécú ndihí té Pèlú ndihí té Juàá tée ní ndúha sáhá-xi, núu xǎǎ<sup>n</sup> ñà ní ñíhí cue tée cùchiu<sup>n</sup> tnúhu càhá<sup>n</sup>-güedé. <sup>15</sup> Te ní



xáha<sup>n</sup>-güedě xii té Pèlú ndihì té Juàá sá quée-güedě quehé cuendá ndóo mee-güedě ndatnúhu-güedé.  
 16 Te ní xítñaha-güedé:

—¿Nása cada-o úú cue téé-ǎ<sup>n</sup>?, chi nchaa ñáyiú ñúú Jerusálén náhă-yu sá ñi quide tátña-güedé ñ<sup>n</sup> téé yacua, te xíǎ<sup>n</sup> xícuñúhu vîhi ñáyiú. Te vá cúú càchí-ó sǎ ñǎ ndáá, chi vâi ñáyiú ní xiní nàcuáa ní cuu. 17 Te dayùhú-ó-güedě te cúñaha-o sǎ vǎ càhá<sup>n</sup>-gá-güedé tnúhu Jèsús, chi núu ñáhá te quindáá-gá iní-yu —càchí-güedé xítñaha-güedé.

18 Te ní cana tucu-güedé té Pèlú ndihì té Juàá, te xǎha<sup>n</sup>-güedě sá vǎ dǎcuàha-gá-güedé ñáyiú tnúhu Jèsús. 19 Te té Pèlú ndihì té Juàá ní xáha<sup>n</sup>-güedě:

—Chí cuǎha cuendá, te núu sá càchí nchòhó cada-ndí àdi sá càhá<sup>n</sup> Yǎ Ndiǒxí cada-ndí. Te cada càhnu iní-ndó chi vá cúú càda-ndí sá càchí-ndó, chi cada nahì-ni-ndí sá càchí Yǎ Ndiǒxí. 20 Chi dacuitíi càhá<sup>n</sup>-ndí nàcuáa ní càhá<sup>n</sup> Jèsús, te càhá<sup>n</sup>-ndí nchaa sá ñi xiní-ndí ní quide-gá —càchí-güedé xǎha<sup>n</sup>-güedě.

21 Te cue téé cùchiu<sup>n</sup> níhi-gá ní càhá<sup>n</sup>-güedé xǎha<sup>n</sup>-güedě sá cǎdá càstiú ñáhá-güedě núu vá dáñǎ-güedě sá dǎcuàha-güedé ñáyiú. Te duca<sup>n</sup> te ní dáñǎ ñaha-güedé cuánuhú-güedé, chi ñá ní ñihí-güedě nása cada-güedé cada castiú ñáhá-güedě, chi nchaá-yu ndàcá<sup>n</sup> táhǔ-yu núú Yǎ Ndiǒxí sá ñi ndúha téé yacua. 22 Te téé ní quide tátña-güedé-á<sup>n</sup> ndécú-dě vîhi-gá údico cuíá-dě, te ío ní cuñúhu-yu sá ñi ndúha-dé.

*Ñáyiú sàndáá iní tnúhu Jèsús xìcá<sup>n</sup> táhǔ-yu núú-gǎ sá vǎ yùhú-yu càhá<sup>n</sup>-yu tnúhu-gá*

<sup>23</sup> Te ní ndee té Pèlú ndihì té Juàá cuánuhú-güedé núú ndécú cue tée cùndihì-güedé, te ní nacani tnúhu-güedé nàcuáa ní xáha<sup>n</sup> cue dútú cúnùu ndihì cue tée cùu sacuéhé núú ñáyiú isràél. <sup>24</sup> Te sátá ñí xíndedóho-yu tnúhu ní cáhá<sup>n</sup>-güedé, te ì<sup>n</sup>-ni tnúhu ní cáhá<sup>n</sup>-yu ncháá-yu ndihì Yá Ndiöxí, te ní xáhá<sup>n</sup>-yu xii-gá:

—Yòhó Dútú Ndiöxí, ní cadúha-n àndiú, ní cadúha-n ñùyíú, ní cadúha-n làmár, ní cadúha-n nchàandi túhú sá íó ñuyíú. <sup>25</sup> Te ndí Dàvíí ní sándáá iní ndí tnúhu ní cáhá<sup>n</sup>-n, te ní chídó tnùnì ndí nàcuáa ní xáha<sup>n</sup>-n cáhá<sup>n</sup> ndí, te ñi-ni Espiritú-n ñí chindee ñàha-xi xii ndí ní chídó tnùnì ndí, te ñuha ní chídó tnùnì ndí:

Ñáyiú ñá túú cùu ñáyiú isràél ío cùdé<sup>ñ</sup>-yu núú Yá Ndiöxí,  
te cuñí-yu nàá-yu ndihì-gá, dico vá ndácü-yu chi mee-gã cúnùu-gá.

<sup>26</sup> Te cue tée yíndaha nació<sup>n</sup> ndihì cue tée cùchiu<sup>n</sup> tacá-güedé nàá-güedé ndihì Dútú Ndiöxí ndihì Crìstú Yaá ní quixi ñuyíú-a.

Duha ní chídó tnùnì ndí Dàvíí nàcuáa ndùu tnúhu ní cáhá<sup>n</sup>-n —càchí-yu xáhá<sup>n</sup>-yu xii Yá Ndiöxí.

<sup>27</sup> Te xáha<sup>n</sup> tùcú-yu xii-gá:

—Ndáá ní cáhá<sup>n</sup> ndí Dàvíí chi ñi-ni ñuú iha ní tacá té Hèrodés ndihì té Pònciú Pilatú ndihì ñáyiú ñá túú cùu ñáyiú isràél ndihì ñáyiú isràél ní cáhá<sup>n</sup> cuèhé-yu cuèndá Jèsús. Te Yòhó Dútú Ndiöxí, Déhe-n cùu Jesús núu ío váha iní-gá, te ní sáha chiú<sup>n</sup>-n-gá, te ío úhú ní cuu iní ñáhá ñáyiú xii-gá. <sup>28</sup> Te ní quidé-yu nàcuáa ní sani iní-n càdá-yu ndéé sanaha, ndéé cútñahá ní ngáva ñuyíú. <sup>29</sup> Te Yòhó Dútú Ndiöxí sa nàha-n nása

càhá<sup>n</sup> cue tée cuení cada úhú ñáhá xii-ndí. Te quide-ndí chiu<sup>n</sup> tahu-n, te vitna chindee ñaha-n xii-ndí cuendá sá vă yühú-ndí cáhá<sup>n</sup>-ndí tnúhu-n. <sup>30</sup> Te cada tátna-n ñăyiu cùhú, te chindee ñaha-n xii-ndí, te cada-ndí nchaá sá vă yõo tnàhí ndàcu cada nacuáa cuñúhu vîhí-yu. Te xini-ndí sá méé Jèsús chindee ñaha-gá xii-ndí, chi quide-gá chiu<sup>n</sup> tahu-n –cachí-yu xáhă<sup>n</sup>-yu xii Yá Ndiõxí.

<sup>31</sup> Te sátá ñí yáha ní cáhá<sup>n</sup>-yu ndihî Yá Ndiõxí, te ní quidi-xi vehe núú xĩndecú-yu, te òré-á<sup>n</sup> ñí cutáhú tucú-yu nchaá-yu Espiritú-gá. Te ní cáhá<sup>n</sup>-yu tnúhu Yá Ndiõxí, te ñá túú tnàhí ni yühú-yu.

*Cuendá nchaá ndachiu<sup>n</sup> cánehe chiú<sup>n</sup>-yu*

<sup>32</sup> Te nchaá ñáyiu ní sándáá iní tnúhu Yá Ndiõxí ñ<sup>n</sup>-ni tnúhu ní cáhá<sup>n</sup>-yu nchaá-yu. H<sup>n</sup>-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhă-yu nchaá sá xini ñühú-yu, te ni ñ<sup>n</sup>-yu ñá túú ní cáhă<sup>n</sup>-yu sá ndàchiú<sup>n</sup>-yu ñ<sup>n</sup>dii-ní-yu cùu nchaá sá ndécú ndihí-yu. <sup>33</sup> Te cue tée ní táuchíú<sup>n</sup> Jèsús dacuàha ñaha xií-yu tnúhu-gá ío váha ní cáhá<sup>n</sup>-güedé nàcuáa ní cuu ní ndoho Xítóhó Jesu-crístú. Te ío ní chindee ñaha Yá Ndiõxí ní cáhá<sup>n</sup>-yu tnúhu-gá, te ñá túú ní cáhă<sup>n</sup> cuèhé dava-gá-yu cuendá ñáyiu dàcuaha tnúhu-gá. <sup>34</sup> Te ñá túú tnàhí ni cùndahú-yu díhú<sup>n</sup>, chi nchaá ñáyiu ndècu ndihî ñuhu-xi, ndihî nchaá ñáyiu càa vehe-xi ní nadìcò-yu, te da ñ<sup>n</sup> da ñ<sup>n</sup> ndachíú<sup>n</sup>-yu ní nadìcò-yu òré xini ñühú-yu díhú<sup>n</sup>. <sup>35</sup> Te ní sáñahá-yu xii cue tée ní táuchíú<sup>n</sup> Jèsús dacuàha ñaha xií-yu tnúhu-gá, te cue tée-á<sup>n</sup> ñí dácăhñu-güedé nchaá ñáyiu xini ñuhu. <sup>36</sup> Te distritú Chìpré ndécú ñ<sup>n</sup> tée nàni-dé

Chèè ñaní tnáhá ndïi Lèví, te ní xóo cunu cuechi-dě veñúhu ñáyíu isràèl. Te cuendá sá sãñaha-dě tnúhu ndee ìní xíí-yu, xíǎ<sup>n</sup> nũu ní dánání ñàha-güedé Vèè xii-dé. <sup>37</sup> Te téé-á<sup>n</sup> ñí nadico-dě luha ñuhu-dé, te nèhe-dé díhú<sup>n</sup> cuáhá<sup>n</sup> núú cuè téé ní táúchíú<sup>n</sup>-gã dacuàha ñaha xíí-yu tnúhu-gá.

## 5

### *Té Ananiás ndïhi tá Sàfirá ñá túú ní quide ndáá-yu*

<sup>1</sup> Te ndècu ì<sup>n</sup> téé nàni Ananiás, te ñadìhí-dé nání-á<sup>n</sup> Sàfirá, te ñáyíu-á<sup>n</sup> ñí nadicó-yu luha ñuhú-yu. <sup>2</sup> Te ní taxúha-dé sacú díhú<sup>n</sup>, te sacú-gá néhé-dě cuáhá<sup>n</sup> ní sãñaha-dě xii cue téé ní táúchíú<sup>n</sup> Jèsús dacuàha ñaha xii ñáyíu tnúhu-gá, te ní dándàhú ñáhá-dě xii-güedé, chi ní xáha<sup>n</sup>-dě sá ñìhíí ní sãñaha-dě, te nàha ñadìhí-dé sá dúcá<sup>n</sup> ñí quide-dé. <sup>3</sup> Te ní xáha<sup>n</sup> tẽ Pèlú xii-dé:

—Ananiás, ¿ná cuendá duca<sup>n</sup> ñí quide-n ñí dáñá-n ñí quíhu sácúíhná ìní-n? Te ní dácuándèhnde-n núú Espíritú Yã Ndiõxí, te ní taxúha-n sácú díhú<sup>n</sup> ñí níhí-n cuendá ñuhu-n. <sup>4</sup> ¿Te ñuhu-á<sup>n</sup> cuendá sá ñúhú mèe-n, àdi díhú<sup>n</sup>-ǎ<sup>n</sup> cuendá sá díhú<sup>n</sup> méé-n cùu-xi, te cuu-ni cada-n nàcuáa càchí ìní-n càha<sup>n</sup>-n ñá? ¿Ná cuendá duca<sup>n</sup> ñí quide-n? ¿Ná ní quide-xi ìní-n nũu ní dácuándèhnde-n núú Yã Ndiõxí? Chi ñá díú-ñí mèe-ni ñáyíu ní dándahú-n —càchí té Pèlú xáha<sup>n</sup>-dè xii-dé.

<sup>5</sup> Te òré ní ndïhi tnúhu ní xáha<sup>n</sup> tẽ Pèlú, te uu<sup>n</sup>ni ní nduá-dé te ní xíhí-ni-dé. Te nchaa ñáyíu ní níhí tnúhu sá ñí xíhí-dé, te ní yùhú víhí-yu. <sup>6</sup> Te ní quixi ì<sup>n</sup> ũú cue téé cuechi, te ní ndanehe ñaha-güedé ní sacá<sup>n</sup> ñáhá-güedé núú yuu, te ní ducu<sup>n</sup> nuu

ñaha-güedě yuu-án, te ní xido ñaha-güedě néhé ñaha-güedé cuáhá<sup>n</sup> chindúxi ñaha-güedé xii-dé.

<sup>7</sup> Te ní cuu úú uní òré, te ní quexìo ñadihí téé ní xíhí-án, te vátá quíní-gá-a<sup>n</sup> sá ñí xíhí yíi-a<sup>n</sup>. <sup>8</sup> Te ní xáha<sup>n</sup> tē Pèlú xii-a<sup>n</sup>:

—Cuíní-í cachí tnúhu ndáá-n. ¿Ndědau ní dícó-ndó ñuhu, ní dícó-ndó nàcuáa ní cachí yíi-n ãn? —càchí té Pèlú xáha<sup>n</sup>-dē xii-a<sup>n</sup>.

Te ní xáha<sup>n</sup>-a<sup>n</sup>:

—Ndáá sá díú-ní dùca<sup>n</sup> —cachí-a<sup>n</sup> xáha<sup>n</sup>-a<sup>n</sup>.

<sup>9</sup> Te ní xáha<sup>n</sup> tē Pèlú:

—¿Ná cuëndá duca<sup>n</sup> ñí chitnàha tnúhu-ndo dùca<sup>n</sup> ní quide-ndo ñí cuíní-ndó dándahú-ndó Espíritú Yá Ndiõxí? Quíní-n, chi sa cuándixi cue téé ní sáhá<sup>n</sup> ní chindúxi yíi-n, te yòhó tnàhá-n càndeca ñaha tucu-güedé xii-n quíhí<sup>n</sup> vitna —càchí-dé xáha<sup>n</sup>-dē xii-a<sup>n</sup>.

<sup>10</sup> Te òré-án ñí nduá-a<sup>n</sup> núú tē Pèlú, te ní xíhí-ni-a<sup>n</sup>. Te cuándihu cue téé cuechi-ã<sup>n</sup> xití vehe, te ní xiní-güedé sá sà ní xíhí-a<sup>n</sup>, núú ní xido ñaha tucu-güedé cuáhá<sup>n</sup> chindúxi-güedé-a<sup>n</sup> dñíi yíi-a<sup>n</sup>.

<sup>11</sup> Te ní yùhú víhí ñáyíu ní sándáá iní tnúhu Yá Ndiõxí, ndíhi dava-gá ñáyíu ní níhí tnúhu nàcuáa ní cuu.

*Ní quide-güedé titní núú sã vã yõ tnàhí ndàcu cada te ío ní cuñúhu ñáyíu*

<sup>12</sup> Te cue téé ní táúchíú<sup>n</sup> Jèsús dacuàha ñaha xii-yu tnúhu-gá titní víhí sã vã yõ tnàhí ndàcu cada ní quide-güedé, te ní cuñúhu vñí-yu. Te nchaa ñáyíu ní sándáá iní-xi tnúhu Jèsús ní xóo tacá-yu corrèdór néhé dñi ndíi Salòmón. <sup>13</sup> Te nchaa ñáyíu ñã túú dàcuaha tnúhu-gá ñã ní cùyí<sup>n</sup>-yu chitnahá-yu ñáyíu

ní sándáá iní-xi tnúhu-gá, dico nchaá-yu ní cáhá<sup>n</sup> váha-yu cuèndá ñáyiú ní sándáá iní-xi tnúhu-gá. <sup>14</sup> Te vâi téé, vâi ñadihí ní sándáá iní-yu tnúhu-gá. <sup>15</sup> Te cuèndá sá ñí ñihí-yu tnúhu sá quidé tãtna cue téé ní xica cuu ndihí Jèsús, núu xíã<sup>n</sup> ní queñuhú-yu nchaa ñáyiú cùhú ichi, te davá-yu ní quide túha-yu camá te davá-yu ní quide túha-yu yuu, núu núú nchaa xíã<sup>n</sup> tá sácá<sup>n</sup>-yu cue ñáyiú cùhú-á<sup>n</sup> cuáhá<sup>n</sup>, te xíã<sup>n</sup> cáã-yu ndètú-yu, chi ní sani iní-yu sá òré yáha té Pèlú te cuèdicó cuándáhú-dě yáha ndodo ñaha-xi xii-yu te ndúha-yu. <sup>16</sup> Te ní quixi ñáyiú ñúú yatni Jerusalén ndécã-yu ñáyiú cùhú, ndihí ñáyiú yihí ñaha espíritú cùndihí yucu ñávãha ní quixi, te nchaá-yu ní ndúha.

*Ío ní quide úhú-güedé té Pèlú ndihí té Juáá*

<sup>17-18</sup> Te dútú cùnù-gá ndihí cue téé cùu saducéú cue téé cùndihí-dé ní cudéé<sup>n</sup>-güedě sá ïo chitú-yu dàcuaha tnúhu Jèsús, núu xíã<sup>n</sup> ní tñi-güedé cue téé ní táuchíú<sup>n</sup> Jèsús dacuaha ñaha xii-yu tnúhu-gá ní chihí ñaha-güedě vecaá. <sup>19</sup> Te xití niú-á<sup>n</sup> ñí quexiò ï<sup>n</sup> espíritú xínú cuèchi núú Yã Ndiõxí ní nacaá<sup>n</sup>-xi yèhe vecaá ní quee-güedé, te ní xáha<sup>n</sup>-xi xii-güedé:

<sup>20</sup> —Quíhí<sup>n</sup>-ndó vèñúhu càhnu sá ïo cùnùu te cúñaha-ndo xii ñáyiú nàcuáa cadá-yu nanihí tãhú-yu —càchí espíritú-á<sup>n</sup> xãha<sup>n</sup>-xi xii-güedé.

<sup>21</sup> Te sá dúcá<sup>n</sup> ñí xáha<sup>n</sup>-xi núu sátá ñí túndaá, te ní sáhá<sup>n</sup>-güedé veñúhu càhnu sá ïo cùnùu sá cúú-xí ñáyiú isràél ní dácuáhá ñaha-güedé xii-yu.

Te dútú cùnù-gá ndihí cue téé cùndihí-dé ní nadatácá tnáhá-güedě ndihí nchaa cue téé cùu sacuéhé núú ñáyiú isràél ndihí cue téé cùchiu<sup>n</sup>, te

ní tendaha-güedě sandàdú cuáhá<sup>n</sup> queñuhu-güedé cue téé yìhi vecaá ní cùu. <sup>22</sup> Te ní quexìo-güedé yèhe vecaá, te ní xiní-güedé sá nì ì<sup>n</sup>-gá cue téé dàcuaha ñaha xii ñáyiú tnúhu Jèsús ñá túú-gã-güedé yíhí. Te cuánuhú-güedé <sup>23</sup> ní xítñuhu-güedé cue téé cùchiu<sup>n</sup>, te xáha<sup>n</sup>-güedě:

—Ní sáhá<sup>n</sup>-ndí ní sándéhé-ndí vecaá, te ndèé chóo-ni, te xíndecu-ni sandàdú cue téé xíndeé yèhe vecaá. Te ní nacaá<sup>n</sup>-ndí vecaá, te vá yõ ì<sup>n</sup>-gá yíhí —càchí-güedé xáha<sup>n</sup>-güedě.

<sup>24</sup> Te sá dúcá<sup>n</sup> nì xáha<sup>n</sup>-güedě, te cuáhá<sup>n</sup> iní cue dútú cúnùu ndìhi téé tàxi tnuní cue téé xíndeé veñúhu càhnu sá ìo cùnùu, te ní xítñaha-güedé:

—¿Nása cada-xi vitna duha càa ní cuu ní xinu cue téé yìhi vecaá-i? —càchí-güedé xítñaha-güedé.

<sup>25</sup> Te ní quexìo ì<sup>n</sup> téé ní xáha<sup>n</sup>-dě:

—Cundedóho-ndo na càchí tnúhu-í ì<sup>n</sup> tnúhu. Cue téé ní chihi-ndo vècaá ndécú-güedě veñúhu càhnu sá ìo cùnùu dacuaha-güedé ñáyiú —càchí-dé xáha<sup>n</sup>-dě.

<sup>26</sup> Te cue téé ndèé veñúhu ndìhi téé tàxi tnuní ñáhá xii-güedé cuánguaca ñaha-güedě, te ñá túú ní quìde úhú ñáhá-güedě, chi ní yùhú-güedé cuáha yúú ñáhá ñáyiú dii ñùú-xi-á<sup>n</sup>. <sup>27</sup> Te ní ndexìo ndìhi ñaha-güedé núú cuè téé cùu sacuéhé ndìhi núú cuè téé cùchiu<sup>n</sup>. Te dútú cúnùu-gá ní ngúita-dé ténáá ñáhá-dě xii-güedé, te xáha<sup>n</sup>-dě:

<sup>28</sup> —Te náa ñá díú nì cachí-ndí sá vã dácuaaha-gá-ndó ñáyiú tnúhu Jèsús te dàcuaha-ni-ndó-yu, te vitna nchaa ñáyiú ñuú Jerusálén ní níhí-yu tnúhu nàcuáa càhá<sup>n</sup>-ndó. ¿Te ná cuèndá duca<sup>n</sup> quìde-ndo, te càchí-ndó sã

nchũhú ndècuéchi-ndí ní sahani-ndí Jèsús-i? —càchí dútú cúnùu-gá xãha<sup>n</sup>-dẽ xii-güedé.

29 Te té Pèlú ndihì dava-gá cue téé ní táuchíú<sup>n</sup> Jèsús dacuàha ñaha xií-yu ní xáha<sup>n</sup>-güedẽ xii cue téé cùchiu<sup>n</sup>:

—Nchúhú, Yá Ndiõxí cúnùu-gá sàndáá iní-ndí tnúhu càhá<sup>n</sup>-gá dàcúúxí tnũhu càhá<sup>n</sup> ñáyiu. 30 Te nchòhó ní sata caa-ndo Jèsús núú cùrúxí te núú cùrúxí-á<sup>n</sup> nì xíhí-gá, dico ní dándótó ñaha Yá Ndiõxí xii-gá. Te Yá Ndiõxí ní sàndáá iní cue ñaní tnáhá-ndí ní xíndecu ndéé sanaha. 31 Te Yá Ndiõxí ní xáha<sup>n</sup>-gá sá cùndècu Jèsús xio cùha-gá cuendá taxi tnùní-gá te dacácu nihnu-gá ñáyiu isràél núú ùhú núú ndàhú. Te duca<sup>n</sup>-ni dacácu nihnu-gá nchaa ñáyiu na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. 32 Te ní xiní-ndí nàcuáa ní quide-gá, núú xíã<sup>n</sup> cání-ndí cuendú núú nchàa ñáyiu, te Espíritú Yã Ndiõxí chíndèe ñaha-xi xii-ndí càhá<sup>n</sup>-ndí tnúhu-gá. Te ñu-ni Espíritú-gá ní sãñaha-gã xii nchaa ñáyiu ní sàndáá iní-xi tnúhu-gá —càchí té Pèlú ndihì dava-gá-güedé xãha<sup>n</sup>-güedẽ xii cue téé cùchiu<sup>n</sup>.

33 Te sátá dúcá<sup>n</sup> ñí xáha<sup>n</sup>-güedẽ xii cue téé cùchiu<sup>n</sup>, te ní cudéé<sup>n</sup>-güedè, te ní ndatnúhu-güedé sá cáhni ñaha-güedé. 34 Te ñ<sup>n</sup> téé cùu fariséú tnàha-dé cúú-dẽ chiu<sup>n</sup>, te nani-dé Gamaliél, te cùu-dé mèstrú dácua<sup>n</sup>-há-dé ñáyiu nàcuáa ní chídó tnùní ndí Moisés, te ío yíñùhu cahá<sup>n</sup> ndihì ñàhá-yu xii-dé. Te ní ngúnutní-dé, te ní xáha<sup>n</sup>-dẽ sá ná quèe tnaa té Pèlú ndihì dava-gá-güedé quehé. 35 Te ní xáha<sup>n</sup>-dẽ xii cue téé cùchiu<sup>n</sup>:



—Nchòhó cue téé isràél, xìni ñuhu-xi sá cání vǎha iní-ndó nǎsa cada-ndo ndìhi cue téé-ǎ<sup>n</sup>. <sup>36</sup> Chi ní cunaha ñí xíndecu ñ<sup>n</sup> téé ní xínani Tèudás, te ní cachí-dé sá cúnùu-dé, te ní cundìhi-dé dàtná cúmí cièndú cue téé, te ñá ní cuíní-güedé cuu ñ<sup>n</sup>nuu-güedě ndìhi cue téé cùchiu<sup>n</sup>. Te ní sahani ñaha cuè téé cùchiu<sup>n</sup>-á<sup>n</sup> xii téé Tèudás, te ní ndìhi cue téé ní xica cuu ndìhi-dé ní xíté nuu-güedé, te ñá túú-gǎ ní quide-güedé nàcuáa ní sani iní-güedé cada-güedé. <sup>37</sup> Te sátá nì xíhí téé-á<sup>n</sup>, te ní tnahá nduu nùcódó tnùní ñáyiú. Te dàvá-á<sup>n</sup> ñí xíndecu ñ<sup>n</sup> téé distrítú Galileá ní xínani-dě Jùdás. Te tìtní-güedé ní chitnahá ñáhá-güedě xii-dé. Te tnàhá-dé ní sahani ñaha tucu cue téé cùchiu<sup>n</sup>, te nchaa cue téé ní xica cuu ndìhi-dé ní xíté nuu-güedé. <sup>38</sup> Te na càchí tnúhu-í sá dáñá-ndó cuè téé-á<sup>n</sup>, te ni ñá túú nǎgá tnúhu cúñaha-ndo xì-güedé, chi núu chiú<sup>n</sup> mee-güedé quidé-güedě te cuíta-güedé, <sup>39</sup> dico núu chiú<sup>n</sup> Yá Ndiöxí quidé-güedě, te vá ndínihnu chiú<sup>n</sup> quide-güedé. Te núu quide-güedé chiú<sup>n</sup> Yá Ndiöxí, te vá nàá-ndó ndìhi-güedé, chi Yá Ndiöxí nàá ndìhi-ndo sǎ dúcá<sup>n</sup> xiquide-ndo —càchí té Gamàliél xǎha<sup>n</sup>-dě xii cue téé cùchiu<sup>n</sup>.

<sup>40</sup> Te nchaa-güedé ní cáhá<sup>n</sup> sá tnúhu ndáá càhá<sup>n</sup>-dé. Te dàtnùní ní nacana tucu-güedé té Pèlú ndìhi dava-gá-güedé te ní caniha-güedě, te ní cáhá<sup>n</sup> níhi-güedé, te xǎha<sup>n</sup>-güedé sá vá càhá<sup>n</sup>-gá-güedé tnúhu Jèsús, te dàtnùní ní dáñá ñàha-güedé cuánuhú-güedé. <sup>41</sup> Te ío ní cudíí iní-güedé, chi mee Yá Ndiöxí ní cachí-gá sá dúcá<sup>n</sup> ndòho-güedé dacuàha-güedé ñáyiú tnúhu Jèsús. <sup>42</sup> Te ñ<sup>n</sup> nduu ñ<sup>n</sup> nduu ní dácuáhá-güedě ñáyiú xití veñúhu càhnu sá

ïo cùnunu ndihî nchaa vehé-yu. Te ní xáha<sup>n</sup>-güedě xií-yu sá Jèsús cúú-gă Crìstú Yaa ní quixi ñuyíú-a.

## 6

*Ní ndúcú-güedě úsá cue tée cundecu dacăhñu sá cáxí ñăyiu*

<sup>1</sup> Te diu-ni dàvá-á<sup>n</sup> ñí sándáá iní vâi ñăyiu tnúhu Jèsús. Te cue ñăyiu griégú ní cáhá<sup>n</sup> cuèhé-yu cuendá ñăyiu isrâél, sá ñăyiu dîhî ñăyiu quèé ñăyiu càhá<sup>n</sup> tnúhu griégú ñá túú tnàhá sá cáxí-yu, chi ñá túú sãñaha ñ<sup>n</sup>nuu-güedé. <sup>2</sup> Te cue téé úxúú ní táúchíú<sup>n</sup> Jèsús dacuàha ñaha xií-yu tnúhu-gá, cue téé-ã<sup>n</sup> ñí cana-güedé nchaa ñăyiu sándáá iní tnúhu Jèsús. Te ní xáha<sup>n</sup>-güedě xií-yu:

—Nchúhú chi vá cúú dàcáhñu-ndí sá cáxí-yu, chi mee-ni tnúhu Yá Ndiöxí càhá<sup>n</sup>-ndí. <sup>3</sup> Te nchòhó cue téé ndècu ndihî-ndí ichi Xítohó Jesucristú cáhá<sup>n</sup> ndihî-ndo úsá cue téé xĩndecu iha, cue téé càhá<sup>n</sup> ndihî ñàhá-yu mee-ni tnúhu yíñùhu, cue téé ndècu ndihî Espíritú Yă Ndiöxí, mee-ni cuè téé cùtnuní váha iní-xi. Te cue téé-á<sup>n</sup> cuăha-ndí-güedé chiu<sup>n</sup> cada-güedé dacăhñu-güedé sá cáxí-yu. <sup>4</sup> Te nchúhú mee-ni Yă Ndiöxí cáhá<sup>n</sup> ndihî-ndí, te mee-ni tnúhu-gá dacuàha-ndí-yu —càchí-güedé xăha<sup>n</sup>-güedě xií-yu.

<sup>5</sup> Te ncháá-yu ní tñí-yu tnúhu ní cáhá<sup>n</sup>-güedé, núu ní ndúcú-yu cue téé cada chiu<sup>n</sup>-á<sup>n</sup>. Te ñ<sup>n</sup>-dé nání-dě Těvá, te ío váha sándáá iní-dé Yă Ndiöxí, te ndècu ndihî-dé Espíritú-gá. Te duha ní xínani dàva-gá-güedé: té Lípé, té Pröcoró, té Nicànor, té Tímón, té Pàrmenás, té Lăxí téé ñuú Antiòquía

tée ní sándáá iní-xi sá dácuaàha ñáyiu isràèl te vitna ní sándáá iní-dé tnúhu Jèsús. <sup>6</sup> Te úsá cue tée-á<sup>n</sup> ñí sáhá<sup>n</sup>-güedé núú cuè tée úxúú ní táúchíú<sup>n</sup> Jèsús dácuaàha ñaha xií-yu tnúhu-gá, te cue tée úxúú-á<sup>n</sup> ñí cáhá<sup>n</sup> ndihí-güedé Yă Ndiöxí, te ní sacá<sup>n</sup> ndodo-güedé ndaha-güedé díquí cuè tée úsá-á<sup>n</sup>.

<sup>7</sup> Te ñáyiu ní sándáá iní tnúhu Jèsús cuáhá<sup>n</sup>-yu titní xichi càhá<sup>n</sup>-yu tnúhu-gá. Te vài-gá ñáyiu ta sándáá iní-yu tnúhu-gá cuáhá<sup>n</sup>, te ní xíndecú-yu ndihí dava-gá ñáyiu dácuaaha tnúhu-gá ñuú Jerusálén. Te titní dútú ñí sándáá iní-güedé tnúhu-gá.

### *Ní tñi-güedé té Těvá*

<sup>8</sup> Te té Těvá ní quide-dé titní núú sã vã yõo tñahí ndàcu cada, te ní cuñúhu vñhí-yu sá dúcá<sup>n</sup> ñí quide-dé, te duca<sup>n</sup> ñí quide-dé chi ndècu ndihí-dé Yă Ndiöxí chíndèe ñaha-gá. <sup>9</sup> Te ní xíndecu cue tée ní xóo cunu cuechi núú ñí<sup>n</sup> tée tàxi tnuní, te tée tàxi tnuní-á<sup>n</sup> ñă ní xõo dañá tñahí-dé quee-güedé núú chíú<sup>n</sup>-dě, te ní xinu-ná-güedé. Te sátá xĩa<sup>n</sup>, te ní dácáá-güedé veñúhu-güedé, te veñúhu-á<sup>n</sup> sàhá<sup>n</sup> ñáyiu ñuú Cìrené, ñáyiu ñuú Alejándriá, ñáyiu ñuú Ciliciá, ndihí ñáyiu distritú Àsiá. Te nchaa ñáyiu-á<sup>n</sup> ñí nàá ndihí-yu té Těvá. <sup>10</sup> Te ñá ní ñihí-yu tnúhu cáhá<sup>n</sup>-yu, chi ío váha ní sáá díquí-dě nàcuáa ní xáha<sup>n</sup>-dě xií-yu, chi Espíritú Yă Ndiöxí ní chindee ñàha-xi xii-dé. <sup>11</sup> Te ní cháhu-yu cue tée ní dácuaándèhnde tnúhu ní cáhá<sup>n</sup> té Těvá núu-yu. Te ní xáha<sup>n</sup>-güedé sá càhá<sup>n</sup> cuèhé-dé cuendá ndíi Moisés ndihí cuendá Yă Ndiöxí. <sup>12</sup> Te cuendá sá dúcá<sup>n</sup> ñí dácuaándèhnde-güedé núu ní sándáá iní-yu,

te ní cudéè<sup>n</sup>-yu núú tǎ Těvá. Te ní cudéè<sup>n</sup> cue téé cùu sacuéhé, te tnàhá cue téé dàcuaha ñaha xii-yu nchaa tnúhu ní chídó tnùní ndíi Moisés ní cudéè<sup>n</sup>-güedě. Te ní sáhá<sup>n</sup>-güedé ní tñii-güedé té Těvá ndécá ñaha-güedé cuáhá<sup>n</sup> núú quidé cuè téé cùchiu<sup>n</sup> jundá, ndihi cue téé cùu sacuéhé. <sup>13</sup> Te ndécá-yu cue téé dàcuandehnde cuáhá<sup>n</sup> núú quidé-güedě jundá, te ní quesaha-ni tùcu-güedé càhá<sup>n</sup> cuèhé-güedé, te xǎha<sup>n</sup>-güedě:

—Tée-a mee-ni càhá<sup>n</sup> cuèhé-dé cuendá veñúhu sá ïo cùnuu, veñúhu ní cuu íí, te càhá<sup>n</sup> cuèhé-dé cuendá nchaa sá ní chídó tnùní ndíi Moisés. <sup>14</sup> Te ní tecú dóho-ndí càchí-dé sá Jèsús téé ñuú Nazàrét dangòyo-dé veñúhu càhnu sá ïo cùnuu te vá dáñá-gǎ-dé cada-ndí nàcuáa ní cachí ndíi Moisés cada-ndí —càchí-güedé xǎha<sup>n</sup>-güedě.

<sup>15</sup> Te nchaa cue téé ndècu jundá ní ndacoto váha-güedé núú tǎ Těvá. Te ní dáyèhé-xi núú-dě dàtná quidé-xí núú espíritú xínú cuèchi núú Yǎ Ndiöxí.

## 7

### *Té Těvá xǎha<sup>n</sup>-dě sá ñà túú cuèchi-dé*

<sup>1</sup> Te ní xǎha<sup>n</sup> dùtú cùnùu-gǎ xii-dé:

—¿Ndáá tnúhu càhá<sup>n</sup>-güedé cuendá-n-ǎ<sup>n</sup>? —  
càchí-dé xǎha<sup>n</sup>-dě.

<sup>2</sup> Te té Těvá ní xáha<sup>n</sup>-dě xii-güedé:

—Nchòhó cue ñaní tnáhà-í ndihi nchòhó cue téé cùu sacuéhé, cundedóho-ndo ì<sup>n</sup> tnúhu na càhá<sup>n</sup>-í-a. Yá Ndiöxí ío cùnuu-gǎ, te ní cáhá<sup>n</sup> ndihi-gǎ ndíi Àbrahám nàció<sup>n</sup> Mesopòtamiá cútnàhá vátá quìhí<sup>n</sup>-gǎ ndíi cundecu ndíi ñuú Hàrán. <sup>3</sup> Te ní xǎha<sup>n</sup>-gǎ xii ndíi: “Daña-n nchàa ñaní tnáhà-n,

te dañà-n ñùhu-n, te quíhí<sup>n</sup>-n ñí<sup>n</sup> xichi núú dánèhé ñhà-í cundecu-n”, duha ní xáha<sup>n</sup> Yă Ndiöxí xii ndíi Àbrahám. <sup>4</sup> Te sátá dúcá<sup>n</sup> ñí xáha<sup>n</sup> Yă Ndiöxí xii ndíi Àbrahám, te ní ndee ndíi ñuú Cáldeá, te cuáhá<sup>n</sup> ndíi cundecu ndíi ñuú Hārán. Te sátá ñí xihí tātá ndíi, te ní xáha<sup>n</sup> Yă Ndiöxí quixi ndíi cundecu ndíi núú ndécú-ó vītna. <sup>5</sup> Te Yá Ndiöxí ñá túú ñí sãñaha-gã ñí lùha ñuhu cuu cuendá ndíi núú ñí xíndecu ndíi. Te ní xáha<sup>n</sup> ndǎá Yă Ndiöxí xii ndíi sá cuãñaha-gã ñuhu cuu cuendá ndíi, te na cuú ndíi, te ndóo ndihí nchaa ñaní tnáhá ndíi cacu túu ndéé cuéé-gá. Te duca<sup>n</sup> ñí xáha<sup>n</sup>-gã cuéi vátá cúndecu-gã ñí ñí<sup>n</sup> déhe ndíi. <sup>6</sup> Te ní xáha<sup>n</sup> tùcu Yá Ndiöxí xii ndíi Àbrahám sá díú-ñí ñaní tnáhá ndíi quíhí<sup>n</sup>-yu núú xicá cúndecu-yu cúmí cièndú cuíá, te vá dañă-yu queé-yu núú chíũ<sup>n</sup>-yu, te ío dandòho ñaha-güedé núú cúndécú-yu. Duha ní xáha<sup>n</sup> Yă Ndiöxí xii ndíi, te ndáá duca<sup>n</sup> ñí cuu. <sup>7</sup> Te ní xáha<sup>n</sup> tùcu Yá Ndiöxí xii ndíi Àbrahám: “Yúhú dandòho-í nchaa ñáyíu na dándòho ñaha xii cue ñaní tnáhá-n. Te dàvǎ-án te ndee cue ñaní tnáhá-n núú cúndécú-yu, te quixí-yu chiñuhu ñahá-yu xii-í iha”, duha ní xáha<sup>n</sup> Yă Ndiöxí xii ndíi Àbrahám, te ndáá duca<sup>n</sup> ñí cuu. <sup>8</sup> Te Yá Ndiöxí ní quide ndáá-gá ndihí ndíi Àbrahám, te ní xáha<sup>n</sup>-gã xii ndíi sá cuãha-güedé sēñá ñí<sup>n</sup> nchaa landú té cuendá cunáhá-yu nàcuáa ndúu sá ñí quide ndáá-gá ndihí ndíi Àbrahám. Núu xíǎ<sup>n</sup> núú ùná nduu sá ñí cacu té Isàac déhe ndíi Àbrahám, te ní sáha ndíi sēñá ñí<sup>n</sup>-dé. Te ñíu-ñí duca<sup>n</sup> ñí quide tucu té Isàac déhe-dé té Jàcób, te ñíu-ñí duca<sup>n</sup> ñí quide té Jàcób, chi úxúú déhe-dé ní xíndecu, te nchaa-güedé duca<sup>n</sup> ñí quide-dé. Te ndíi ùxúú cue téé-á<sup>n</sup> ñí cuu-güedé ñaní tnáhá-ó.

9 'Te ìn déhe té Jàcób ní xínani-dě Chèé. Te ñá ní cùu váha iní cue ñaní-dé núú-dě, núu ní dícó ñàha-güedé ní quehe<sup>n</sup> ñaha cuè téé cuáhá<sup>n</sup> nàció<sup>n</sup> Ègiptú, te Yá Ndiöxí ñá ní dàña ñaha-gá xii-dé cuíta nihnu-dé. 10 Te ní chindee ñàha-gá xii-dé ní cácu-dé cútnàhá ní ndoho vìhi-dé. Te téé yìndaha Egiptú ío ní cudíí ìní-dé té Chèé, te ní cutnùní iní-dé sá ìo váha túha té Chèé, te duca<sup>n</sup> ñí cutnùní iní-dé, chí Yá Ndiöxí ní chindee ñàha-gá xii té Chèé. Te ní xáha<sup>n</sup> tée yìndaha Egiptú xii té Chèé sá díú tē Chèé coo-dé gobièrnú Ègiptú, te taxi tnùní-dé nchaa ñáyíu xìnu cuechi núú tē yìndaha Egiptú-án.

11 'Te ní quíhu tnamá nihí nàció<sup>n</sup> Ègiptú ndihí nàció<sup>n</sup> Cànaá, te ío ní ndohó-yu. Te nchaa ñaní tnáhá-ó ñí xíndecu ndéé sanaña ñá ní xõo níhí-gá-yu sá cáxí-yu. 12 Te ní níhí tē Jàcób tnúhu sá ío triù Ègiptú, núu ní tendaha-dě cue déhe-dé ní sáhá<sup>n</sup>-güedé ní sânguaa<sup>n</sup>-güedé triú-án, te dàvá-án ñí sáhá<sup>n</sup> cue ñaní tnáhá-ó xìto díhna nuu nàció<sup>n</sup> Ègiptú. 13 Te xito cùu uú cuáhá<sup>n</sup>-güedé, te ní xáha<sup>n</sup> tē Chèé sá ñaní-dé cúú-güedě. Te téé yìndaha Egiptú ní cutnùní iní-dé sá díú-ní ñàní té Chèé cúú-güedě. 14-15 Te ní cana té Chèé tātá-dě té Jàcób ndihí nchaa ñaní tnáhá-dě. Te cùu-xi datná únídico sáhú<sup>n</sup>-yu ndèca té Jàcób cuáhá<sup>n</sup> nàció<sup>n</sup> Ègiptú núú ndécú tē Chèé, te xía<sup>n</sup> ñí quexió-yu ní ngóo-yu. Te yàcá<sup>n</sup> ní xíhí té Jàcób ndihí nchaa déhe-dé cue ñaní tnáhá-ó. 16 Te sátá ñí cuu titní cuía, te ní natava-güedé yiqui ndíi Jàcób ndihí nchaa déhe ndíi nchìdo-güedé cuáhá<sup>n</sup> ñuú Siquém. Te ndíi Àbrahám sa ní cuu titní-gá cuía sã ñí nacuaa<sup>n</sup> ndíi ñuhu núú cuè déhe

ndíi Hà mòr. Te xía<sup>n</sup> nchìi yaú ní nachindúxi-güedé yiqui-á<sup>n</sup>.

<sup>17</sup> Te cútnàhá vátá nátàva-gá-güedé yiqui cue ndíi, te sa ta tnàhá yatni cada Yá Ndiöxí nàcuáa ní xáha<sup>n</sup>-gã xii ndíi Àbrahám cada-gá sá cúú-xí ñãyiu isràél ndécú Ègiptú, te ta cãyá víhĩ-yu cuáhá<sup>n</sup>. <sup>18</sup> Te dàvá-á<sup>n</sup> chi ìngá téé yìndaha nació<sup>n</sup> Ègiptú, te ñá túú-gã ní xìní-dé nása ní xóo cada ndíi Chèé. <sup>19</sup> Te téé yìndaha Egiptú ñá ní quìde ndáá-dé, chi ío ní dándóhó-dě ñaní tnáhá-ó ñí xíndecu dàvá-á<sup>n</sup>. Te ní táúchíú<sup>n</sup>-dě sá xócuñí-yu dándóo-yu déhe yiqui<sup>n</sup> cuendá ndihĩ-güexi cuú. <sup>20</sup> Te dàvá-á<sup>n</sup> ñí cacu té Moisés, te ío ní cudíí ìní ñáhá Yá Ndiöxí xii-dé. Te ní xíndecu ndihĩ ñaha ñaná-dě ndihĩ tãtá-dě úní-ni yóó. <sup>21</sup> Te ndèca ñahá-yu cuáhá<sup>n</sup> ìngá xichĩ, te yàcá<sup>n</sup> ní dándóo ñahá-yu xii-dé, te ní naníhí ñáhá dèhe yoco téé yìndaha Egiptú, te ní xito-xi-dé dàtná xító-xí ì<sup>n</sup> déhe mee-xi ñí xito-xi-dé ndéé ní sahnú-dé. <sup>22</sup> Te ní cutúha-dé nchaa sá xìní cue téé ègiptú, te ío váha ní sáá díquí-dě tnúhu cáhá<sup>n</sup>-dé ndihĩ nchaa sá cádá-dě.

<sup>23</sup> Te cútnàhá ndécú-dě údico cuía-dě, te ní cachí-dé sá quihí<sup>n</sup>-dé cáhá<sup>n</sup> ndihĩ-dé cue ñaní tnáhá-dě ñáyiu isràél. <sup>24</sup> Te ní xìní-dé ní caniha ì<sup>n</sup> téé ègiptú xii ì<sup>n</sup> téé isràél, te ñá ní cùndee iní-dé cundehe-dě ñúu ní sáhá<sup>n</sup>-dé ní chindee-dě téé isràél, te ní sahní-dé téé ègiptú, <sup>25</sup> chi ní cachí Yá Ndiöxí sá díú-dě dacăcu-dé ñaní tnáhá-dě ñáyiu isràél núú cuè téé ègiptú. Te ní sani iní-dé sá cútnuní iní-yu nàcuáa ní xáha<sup>n</sup> Yá Ndiöxí xii-dé, dico ñá túú ní cùtnuní iní-yu. <sup>26</sup> Te nduu tnèé ní xìní-dé nàá úú cue téé isràél, te ñá túú ní tnàhá

iní-dé nàá-güedé nŭu ní xáha<sup>n</sup>-dě xii-güedé: “¿Ná cuèndá duca<sup>n</sup> xĩnàá-ndó? ¿Náa ñá díú ndĩmee-ndo núu duca<sup>n</sup> xĩnàá-ndó?” Duha ní xáha<sup>n</sup> tē Moisés xii-güedé. <sup>27</sup> Te tēe ndècuéchi ní sáhá<sup>n</sup>-dé ní chin-daha nihnu-dé té Moisés ì<sup>n</sup> xio, te ní xáha<sup>n</sup>-dē: “¿Ná cúú yòhó nŭu véxi-n tàxi tnuní ñáhá-n? <sup>28</sup> Te tnàhá-ni tucu yúhú cahni-n dàtná ní sahani-n tēe ègiptú icu càha<sup>n</sup>-n á”, duha ní xáha<sup>n</sup>-dē xii té Moisés. <sup>29</sup> Te sá dúcá<sup>n</sup> ñĩ cáhá<sup>n</sup> tēe isràèl nŭu ní yùhú té Moisés ní xĩnu-dé cuáhá<sup>n</sup>-dé ní sáá-dé nàció<sup>n</sup> Mèdián. Yàcá<sup>n</sup> ñĩ ngóo-dé, te yàcá<sup>n</sup> ñĩ tnándaha-dé, te ní cacu úú déhe tēe-dé.

<sup>30</sup> Te sátá ñĩ xĩnu údico cuía, te ní sáhá<sup>n</sup> té Moisés ì<sup>n</sup> xio yucu Sinái. Te yàcá<sup>n</sup> ní xiní-dé ì<sup>n</sup> tnutàú nchìcú<sup>n</sup> ñuhú, te xití itá ñuhú-á<sup>n</sup> ñĩ xiní-dé yíhí ì<sup>n</sup> espíritú xínú cuèchi núú Yă Ndiöxí. <sup>31</sup> Te òré ní xiní-dé sá yíhí-xí xití itá ñuhú-á<sup>n</sup>, te ní cuñúhu vîhi-dé sá ñĩ xiní-dé espíritú-á<sup>n</sup> xití itá ñuhú-á<sup>n</sup>, te ní sândehe-gá-dé, te ní xíndéhé vâha-dé. Te ní tecú dóho-dé ní cáhá<sup>n</sup> Yă Ndiöxí, te xáha<sup>n</sup>-gă xii-dé: <sup>32</sup> “Yúhú cúú-í Ndiöxí ní cáhá<sup>n</sup> ndihí cue ñaní tnáhá-n ndéé sanaha, ndíi Àbrahám ndihí ndíi Isàác ndihí ndíi Jàcób, ndihí dava-gá cue ñaní tnáhá-n. Nchaa cue ndíi-á<sup>n</sup> ñĩ xóo cáhá<sup>n</sup> ndihí-í.” Duha ní xáha<sup>n</sup>-gă xii té Moisés. Te ní quidi ñaha-xi xii té Moisés sá ñĩ yùhú-dé, te ñá ní cùyi-gá-dé cundehe-dē tnutàú nchìcú<sup>n</sup> ñuhú-á<sup>n</sup>. <sup>33</sup> Te Yă Ndiöxí ní xáha<sup>n</sup>-gă xii-dé: “Queñuhu chàu-n, chi núú ñuhú ñĩ cuu íí nútñi-n. <sup>34</sup> Te yúhú ndéhè-í sá ïo ndòho nchaa ñáyiu cùu cuendá-í, ñáyiu ndècu nació<sup>n</sup> Ègiptú. Te ní tecú dóho-í sá ïo ndàhú xicáhá<sup>n</sup>-yu, núu xiă<sup>n</sup> véxi-í càchí tnúhu-í sá nùhú-n nàció<sup>n</sup> Ègiptú



cuendá ndeñùhú-n-yu yàcá<sup>n</sup>.” Duha ní xáha<sup>n</sup> Yá Ndiõxí xii té Moisés.

<sup>35</sup> Te ñá ní sàndáá iní-yu té Moisés ndéé díhna, chi ní xáhã<sup>n</sup>-yu: “¿Ná cuendá véxi-n tàxi tnuní ñáhã-n xii-ndí?” Duha ní xáhã<sup>n</sup>-yu xii té Moisés. Te ñu-ni té Moisés ní tendaha ñàha Yá Ndiõxí ní sáhã<sup>n</sup>-dé dacãcu-dé ñáyiu isràél nàció<sup>n</sup> Ègiptú cuèi ñá ní sàndáá iní ñáhã-yu xii-dé. Dico ní taxi tnùnì-dé-yu, chi duca<sup>n</sup> ñí xáha<sup>n</sup>-gã òré ní xiní-dé espíritú xínú cuèchi núú-gã xití tnutàú nchìcú<sup>n</sup> ñuhú. <sup>36</sup> Te té Moisés ní ngüíta-dé ní quide-dé sá vã yõ tnàhí ndàcu cada, te ní cuñúhu vîhí-yu sá dúcã<sup>n</sup> ñí quide-dé, te duca<sup>n</sup> ñí quide-dé Ègiptú ndihî Lãmár Tícuèhé. Te ní ngódó núú-dé núũ-yu ní queé-yu Ègiptú cuáhã<sup>n</sup>-yu ì<sup>n</sup> ichi xití yucu núú vã yõ tnàhí ndècu, te ní xihî-yu údico cuiá xití yucu-á<sup>n</sup>, te xiá<sup>n</sup> ñí xóo cada-dé sá vã yõ tnàhí ndàcu cada. <sup>37</sup> Te ñu-ni té Moisés ní xáha<sup>n</sup>-dẽ xii cue ñanî tnáhã-dẽ dàvã-á<sup>n</sup>: “Yá Ndiõxí cada-gã te coo ì<sup>n</sup> ñanî tnáhã-ndó ndéé cuéé-gã, te téé-á<sup>n</sup> cãhá<sup>n</sup>-dé tnúhu-gã núú-ndó dàtná cuinî-ndó ñí cachí-gã quidé yũhú, te ío xini ñuhu-xi cundedóho-ndo tnúhu cáhá<sup>n</sup>-dé”, duha ní xáha<sup>n</sup> tẽ Moisés xií-yu dàvã-á<sup>n</sup>. <sup>38</sup> Te ñu-ni té Moisés ní xindecu ndihî-dé ñáyiu isràél xití yucu, te ní sáá-dé yucu Sinài, te xiá<sup>n</sup> ñí quixi ì<sup>n</sup> espíritú xínú cuèchi núú Yá Ndiõxí ní cáhá<sup>n</sup> ndihî ñaha-xi xii-dé, te yàcã<sup>n</sup> ní dácuahã ñàha-xi tnúhu-gã, te ñu-ni tnúhu-á<sup>n</sup> ñí ndóo dàcuaha-o.

<sup>39</sup> Te cue ñanî tnáhã-ó ñí xindecu ndéé sanaha ñã ní sàndáá iní-yu té Moisés, te ñá ní ndéé iní ñáhã-yu xii-dé, chi ní cuinî-yu nuhú tucú-yu ñuú

Ègiptú cundecú-yu. <sup>40</sup> Te òré ndécú tẽ Moisés yucu ní xáhã<sup>n</sup>-yu xii ñaní-dé té Àrón: “Cadúha-n ñ<sup>n</sup> úú ndiõxí díhú<sup>n</sup> cuàá<sup>n</sup> codonùu núú-ó cùhu<sup>n</sup>-o ichi, chi ñá túú cùtnuní iní-ó ndèé ichi cuáhá<sup>n</sup> té Moisés, téé yòdo nuu núú-ó ndùu ní quee-o Ègiptú”, duha ní xĩ-yu té Àrón. <sup>41</sup> Te dàvã-á<sup>n</sup> ñĩ cadúha-güedé ñ<sup>n</sup> chẽhlu mee-ni dĩhú<sup>n</sup> cuàá<sup>n</sup>, te ní sahani-güedé ñ<sup>n</sup> úú quiti nchìto ní quide càhnu-güedé chẽhlu-á<sup>n</sup>. Te ío ní cudíí iní-yu quiti-á<sup>n</sup>, chi ní cachí-yu sá díú-ní ndiõxí cúú-dí. <sup>42</sup> Te sá dúcã<sup>n</sup> ñĩ quidé-yu, xĩã<sup>n</sup> ní dáñã ñàha Yá Ndiõxí xii-yu. Te ní dáñã-gã ní xóo cada càhnú-yu nchícanhii, ndihí yóó, ndihí nchaa chódíní. Te duha ní chídó tnùní ñ<sup>n</sup> téé ní xóo cáhá<sup>n</sup> tnúhu Yá Ndiõxí ndéé sanaha nàcuáa ní xáha<sup>n</sup>-gã xii ñáyiú dàvã-á<sup>n</sup>:

Nchòhó ñáyiú isràél, ní cuu údico cuíá yíhí-ndó yùcu,

te ní sahani-ndo quiti-ndo ní quide càhnu ñaha-ndo xii-í cáhá<sup>n</sup>-ndó, dico ñáhã chi ní sahani-ndo-güèdì ní quide càhnu-ndo sã ñĩ cadúha mee-ndo.

<sup>43</sup> Te ní cadúha-ndo ñ<sup>n</sup> veñúhu líhli,

te ní sanutnĩ-ndo Mòlóc sã càchí-ndó cùu ndiõxí-ndó xìca nchido-ndo xití yucu,

te ní cadúha-ndo ñ<sup>n</sup> chódíní, te quiti-ã<sup>n</sup> càchí-ndó sã cúú-dí ndiõxí Rènfan,

te ndi ndùú sã ñĩ cadúha-ndo-ã<sup>n</sup> ñĩ quide càhnu-ndo.

Te cuèndã sã dúcã<sup>n</sup> ñĩ quide-ndo te yúhú queñuhu ñaha-ĩ xii-ndo quĩhí<sup>n</sup>-ndó cùndecu-ndo ñngã xio nàció<sup>n</sup> Babiloniá.

Duha ní xáha<sup>n</sup> Yă Ndiöxí xií-yu, te duca<sup>n</sup> nĩ chídó tnùní téé ní xóo cáhá<sup>n</sup> tnúhu-gá.

44 "Te xití yucu-á<sup>n</sup> nĩ dácáá-güedě ì<sup>n</sup> veñúhu vehe dóó. Te vehe-á<sup>n</sup> nĩ cuu-xi ì<sup>n</sup> sá cútnùní iní-yu sá Yă Ndiöxí ndécú ndìhì ñaha-gá xií-yu. Te vehe-á<sup>n</sup> nĩ dácáá-güedě nàcuáa ní xáha<sup>n</sup> Yă Ndiöxí xii té Moisés, chi ní dánèhé ñáhá-gă xii-dé nàcuáa dacàa-güedé. 45 Te sátá nĩ xíhí nchaa cue téé-á<sup>n</sup>, te ní ndóo ndìhì nchaa déhe-güedé veñúhu-á<sup>n</sup>. Te ní xido tucu-güedé veñúhu-güedé cuáhá<sup>n</sup>-güedé, te cuáhá<sup>n</sup> ndìhì-güedé té Jòsué núú cündécú-yu. Te sátá nĩ quexió-yu, te ní dácúnŭ-yu ñáyiu dii ñùú-xi-á<sup>n</sup> chi mee Yă Ndiöxí ní chindee ñàha-gá xií-yu. Te sátá nĩ ndìhì nchaa ñáyiu ní xica nchido veñúhu dóó-ă<sup>n</sup> nĩ xíhí, te ní ndóo ndìhì dava-gá-yu. Te duca<sup>n</sup>-ni ndècu-xi ní cacu té Dàvií, téé ní xíndaha ñàha xií-yu. 46 Te Yá Ndiöxí ní cudíí víhí iní-gá té Dàvií. Te ní xícá<sup>n</sup> tnúhú-dě núú-gă nŭu cuu dacàa-dé veñúhu cuu cuèndá-gá, chi ì<sup>n</sup>-ni Yá Ndiöxí ní xóo cada càhŋu té Dàvií ndìhì té Jàcób, ñaní tnáhá-ó nĩ xíndecu ndéé sanaha vîhi-gá. 47 Te Yá Ndiöxí ñá ní dàña-gá dacàa té Dàvií veñúhu-gá dico déhe-dé té Salòmón, chi ní dáña-gă ní dácáá-dě veñúhu cuu cuèndá-gá 48 cuèi ñá túú sàcúndecu-gá veñúhu dàcaa cue téé ñuyíú-a, chi ndèni xía<sup>n</sup> ndécú-gă chi espíritú cúú-gă. Te duha ní chídó tnùní téé ní xóo cáhá<sup>n</sup> tnúhu Yá Ndiöxí ndéé sanaha nàcuáa ní cáhá<sup>n</sup>-gá:

49 Yúhú táxí tnùní-í andiŋu ndìhì ñuyíú,  
te xía<sup>n</sup> nŭu nchòhó vá ndácú-ndó chìhì ñaha-ndo  
xití veñúhu dàtná quídě-yu sá càchí-yu cùu  
ndiöxí-yu ní cadúha-yu.

Te ñá túú xìni ñuhu-í núú ndétátú-í,

<sup>50</sup> chi yúhú ní cadúha-í nchaa sá ió ñuyíú-a.

Duha ní cáhá<sup>n</sup> Yă Ndiöxí, te ñu-ni duca<sup>n</sup> ñi chídó tñùní téé ní xóo cáhá<sup>n</sup> tñúhu-gá –duha ndùu nchaa tñúhu ní xáha<sup>n</sup> tē Těvá xii-güedé.

<sup>51</sup> Te ní xáha<sup>n</sup> tùcu-dé:

–Nchòhó, ío sàá iní-ndó chi quide-ndo datná quidé ñáyiú ñá túú cùu ñáyiú isràél chi ñá túú tédóho-ndo tñúhu càhá<sup>n</sup> Yă Ndiöxí, chi ñá cuìní-ndó quìndáá iní-ndó tñúhu-gá, mee-ni cùu úhú iní-ndó Espíritú-gá dàtná ní xóo cada cue ñaní tñáhá-ndó ñi xíndecu ndéé sanaha. <sup>52</sup> Chi cue téé-á<sup>n</sup> ío ní xóo dandóho-güedé nchaa cue téé ní xóo cáhá<sup>n</sup> tñúhu Yă Ndiöxí ndéé sanaha. Te ní sahani-güedé nchaa cue téé ní cáhá<sup>n</sup> sá quíxí Crístú ñuyíú-a, te Yaá-á<sup>n</sup> ñà túú cuèchi-gá. Te ñu-ni duca<sup>n</sup> ñi quide-ndo Crístú cútnàhá ní quixi-gá ñuyíú-a, chi ní sáha cuendá-ndó-gă núú cuè téé ní cuu úhú iní ñáhá xii-gá ní sahani ñaha-güedé. <sup>53</sup> Te ndècu ndìhi-ndo tñúhu ní chídó tñùní ndíi Moisés nàcuáa ní xáha<sup>n</sup> espíritú xínú cuèchi núú Yă Ndiöxí xii ndíi, te ni ñuca<sup>n</sup> ñá túú sàndáá iní-ndó tñúhu-á<sup>n</sup> nùu ní sahani-ndo Jèsús. Te ñu-ni tñúhu-á<sup>n</sup> ndécú ndìhi-ndo ndéé vitna –càchí té Těvá xáha<sup>n</sup>-dē xii-güedé.

### *Ní sahani-güedé té Těvá*

<sup>54</sup> Te sá dúcá<sup>n</sup> ñi xáha<sup>n</sup> tē Těvá xii-güedé, te ní cudéé<sup>n</sup> víhí-güedē núú-dē, núú ní quide rúhñú-güedē núhu-güedé sá sàtú iní-güedé. <sup>55</sup> Te té Těvá ndécú ndìhi-dé Espíritú Yă Ndiöxí, te ní ndacoto váha-dé andíu, te ní xiní-dé súúni dàtása<sup>n</sup>-xi núú ndécú Yă Ndiöxí, te ní xiní-dé

Xítóhó Jesucrìstú nútnǎ-gá xio cùha Yá Ndiöxí.  
 56 Te ní xáha<sup>n</sup> tě Těvá xii-güedé:

—Chí cündèhe andiu chi yúhú ndéhè-í Xítóhó Jesucrìstú nútnǎ-gá xio cùha Yá Ndiöxí, te diu-gá cúú-gǎ ñaní tnáhá-ndó nchàa-ndo —cachí-dé xǎha<sup>n</sup>-dě.

57 Te ní sadí-güedé dóho-güedé cuendá sá ñǎ ní tnáhá iní-güedé cundedóho-güedé tnúhu cǎhá<sup>n</sup>-dé, te uu<sup>n</sup>ni ní cuáá-güedé, te ní taxi ndaha ñàha-güedé xii-dé 58 ndécá ñàha-güedé cuáhá<sup>n</sup> ndéé ì<sup>n</sup> xio yuhu ñúú, te yàcá<sup>n</sup> ní sǎñaha-güedě yúú xii-dé. Te ndècu ì<sup>n</sup> tée cuechi nàni-dé Sàulú, te té-á<sup>n</sup> nǎ quide cuendá-dé dóó-güedé cuendá ní nune ndaha-güedé ní sǎñaha-güedě yúú xii té Těvá. 59 Te òré sǎñaha-güedě yúú, te ní cǎhá<sup>n</sup> ndihí-dé Xítóhó Jesucrìstú te xǎha<sup>n</sup>-dě:

—Yòhó Xítóhó Jesucrìstú, naquehe<sup>n</sup>-n iní-í —càchí-dé xǎha<sup>n</sup>-dě xii-gá.

60 Te ní ngüíñí xítí-dě, te níhi ní cǎhá<sup>n</sup>-dé, te xǎha<sup>n</sup>-dě:

—Yòhó Xítóhó Jesucrìstú, vá técuèchi-n cuè té-a sá dúhá quide ñaha-güedé xii-í —càchí-dé xǎha<sup>n</sup>-dě xii-gá.

Te xǎ<sup>n</sup>-nǎ ní cǎhá<sup>n</sup>-dé, te ní xíhí-dé.

## 8

*Té Sàulú chíhí-dě ñáyiu sàndáá iní-xi tnúhu Jèsús vecáá*

1 Te té Sàulú ní nduu vétú iní-dé sá nǎ sahní-güedé té Těvá.

Te diu-ni nduu-ǎ<sup>n</sup> nǎ cuu níhi cuendá nchaa ñáyiu sàndáá iní-xi tnúhu Jèsús ñuú Jerusálén. Te ní ndihí-yu ní xité nuu cuáhá<sup>n</sup>-yu distritú Jùdeá

ndihí distritú Sàmariá. Te cue téé ní táuchíú<sup>n</sup> Jèsús dácuàha ñaha xií-yu tnúhu-gá ní ndóo-güedé ñuú Jerusàlén. <sup>2</sup> Te nchaa cue téé càhá<sup>n</sup> ndihí Yá Ndiöxí ní chindúxi-güedé ndí Těvá. Te ío ní ndáhyú ñáyiu ní sándáá iní tnúhu Jèsús sá ñí xihí ndí. <sup>3</sup> Te té Sàulú ío dándoho-dé-yu, chi ndí vehe ndí vehe cuáhá<sup>n</sup>-dé cuátnii-dé cuëi téé cuëi ñadhí ndécá-dě cuáhá<sup>n</sup> vecaá.

### *Càhá<sup>n</sup>-yu tnúhu Yá Ndiöxí distritú Sàmariá*

<sup>4</sup> Te nchaa ñáyiu ní xité nuu cuáhá<sup>n</sup>-yu càhá<sup>n</sup>-yu tnúhu Jèsús nchaa núú quéxió-yu. <sup>5</sup> Te té Lìpé cuáhá<sup>n</sup>-dé distritú Sàmariá càhá<sup>n</sup>-dé tnúhu Xítohó Jesucristú Yaá ní tendaha Yă Ndiöxí ní quixi ñuyúú-a. <sup>6</sup> Te ío vâi núú sã vã yõo tnàhí ndàcu cada ní quide-dé, te ní cuñúhu vîhí-yu, te ní xíndedóho váha-yu nchaa tnúhu ní cáhá<sup>n</sup>-dé. <sup>7</sup> Te vâi ñáyiu yîhí ñaha espíritú cündîhí yucu ñávãha ní queñuhu-dé nchaa espíritú-á<sup>n</sup> yiqui cùñú-yu, te ní cana saa-xi òré ní ndee-xi yiqui cùñú-yu cuáhá<sup>n</sup>-xi, te ní ndúha-yu. Te vâi ñáyiu cùhú ñá cúú-gă candá nihnú-yu ndihí ñáyiu yacua ní quide tátna-dé, te ní ndúha-yu. <sup>8</sup> Te sá dúcá<sup>n</sup> ñí cáhá<sup>n</sup>-dé tnúhu Jèsús te ní quide tátna-dé-yu, xíă<sup>n</sup> ío ní cudîî iní ñáyiu ñuú-á<sup>n</sup>.

<sup>9</sup> Te diu-ni ñuú-á<sup>n</sup> ndécú ì<sup>n</sup> téé nàni Xímú, te téé-á<sup>n</sup> xîní-dé cada ndùu-dé, te ní cuu naha dùca<sup>n</sup> quide-dé, te ní xóo cuñúhu ñáyiu distritú Sàmariá sá dúcá<sup>n</sup> quide-dé, te ní cachí-dé sá díú-ní-dě cúnùu. <sup>10</sup> Te nchaa ñáyiu cuëi ñáyiu cuica te cuëi ñáyiu ndàhú ío nèhé-yu sá yîñùhu núú-dě, te xîtnàhá-yu:

—Tée-ǎ<sup>n</sup> ío chindee ñaha Yá Ndiöxí xii-dé nõu vai núú sǎ quidé-dě —càchí-yu xitnàhá-yu.

11 Te ní sándáá iní-yu nàcuáa ní xóo cada ndùu-dé, te ní xóo cuñúhu vîhí-yu, te ní cuu naha dùca<sup>n</sup>-ni dandahú ñáhá-dě xii-yu. 12 Te té Lìpé ní cáhá<sup>n</sup>-dé tnúhu Xítóhó Jesucrìstú, te ní xáha<sup>n</sup>-dě xii-yu sá Yǎ Ndiöxí cuiní-gá ndíhu ndaha ñàha-gá xii-yu. Te cuëi téé cuëi ñadìhí ní sándáá iní-yu tnúhu-gá, te ní sanduté-yu. 13 Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núú sǎ vǎ yõo tnàhí ndàcu cada ní quide té Lìpé, te ní cuñúhu vîhi nchaa ñáyiu.

14 Te dava-gá cue téé ní táuchíú<sup>n</sup> Jèsús dacuàha ñaha xii ñáyiu tnúhu-gá ní níhí-güedě tnúhu sá ñáyiu distritú Sàmariá ní sándáá iní-yu tnúhu Yá Ndiöxí. Te ní tendaha-güedě té Pèlú ndihí té Juáa cuáhá<sup>n</sup>-güedé distritú Sàmariá. 15 Te ní quexìo-güedé, te ní cáhá<sup>n</sup> ndihí-güedé Yǎ Ndiöxí ní xicá<sup>n</sup>-güedé Espiritú-gá quixi cundecu ndihí-yu. 16 Chi ni ñ<sup>n</sup>-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. 17 Te òré ní sacá<sup>n</sup> ndodo-güedé ndaha-güedé díquǎ-yu, te ní quexìo Espiritú-gá ní ngúndecu ndihí-yu.

18 Te ní xiní té Xímú nàcuáa ní quide-güedé ní quexìo Espiritú-gá ní ngúndecu ndihí-yu, te cuiní-dé cuañaha-dě díhú<sup>n</sup> xii té Pèlú ndihí té Juáa ní cùu. 19 Te ní xáha<sup>n</sup>-dě:

—Chindee ñàha-ndo cuendá nděda-ni càá-yu cacá<sup>n</sup> ndodo-í ndaha-í díquǎ-yu, te níhí-yu Espiritú

Yă Ndiöxí cundecu ndihí-yu –càchí-dé xăha<sup>n</sup>-dě xii-güedé.

<sup>20</sup> Te té Pèlú ní xáha<sup>n</sup>-dě xii-dé:

–Yòhó cuíta nihnu-n ndihí díhú<sup>n</sup>-n, chi cuíní-n cuàa<sup>n</sup>-n sá văha quide Yă Ndiöxí. <sup>21</sup> Yòhó vá cúú càda-n chiu<sup>n</sup> quide-ndí, chi ñá túú ndècu váha iní-n nűú Yă Ndiöxí. <sup>22</sup> Te vá dúcá<sup>n</sup> căhá<sup>n</sup>-n, chi ío nèhé căhá<sup>n</sup>-n să dúcá<sup>n</sup> căhá<sup>n</sup>-n. Te căhá<sup>n</sup> ndàhú-n nűú Yă Ndiöxí sá ná cádá căhnu iní-gá tnúhu ní căhá<sup>n</sup>-n. <sup>23</sup> Te yúhú sa xíní-í sá ío úhú iní-n, chi mee-ni să cuèhé sá dúhá chido nuu-n quide-n –cachí té Pèlú xăha<sup>n</sup>-dě xii té Xímú.

<sup>24</sup> Te ní xáha<sup>n</sup> tē Xímú xii-güedé:

–Căhá<sup>n</sup> ndàhú-ndó nűú Yă Ndiöxí sá ñà túú nă tnahá-í sá dúcá<sup>n</sup> nì căhá<sup>n</sup>-í –càchí-dé xăha<sup>n</sup>-dě.

<sup>25</sup> Te té Pèlú ndihí té Juàá ní căhá<sup>n</sup>-güedé tnúhu Yă Ndiöxí núú ñăyiu ñuú-á<sup>n</sup>. Te ní xáha<sup>n</sup>-güedé nchaa năcuáa ní quide Jèsús ní xíní-güedé òré ní xica cuu-gá ñuyú-a. Te ní tni-güedé ichi cuánuhú-güedé ñuú Jerusálén, te ní yáha-güedé titní ñuú yíndèhu distritú Sàmariá, te ní căhá<sup>n</sup>-güedé tnúhu-gá.

### *Té Lìpé ndihí ì<sup>n</sup> tée ñuú Etiòpiá*

<sup>26</sup> Te ì<sup>n</sup> espíritú xínú cuèchi núú Yă Ndiöxí ní quexìo-xi ñuú Jerusálén ní xáha<sup>n</sup>-xi xì té Lìpé:

–Cada túha-n chi quée nuu-n ñuú Gázá, dico mee-ni xítí yucu cuáhá<sup>n</sup> ichi –càchí-xi xăha<sup>n</sup>-xi xì-dé.

<sup>27</sup> Te ní xica-dé cuáhá<sup>n</sup>-dé, te ní natnahá-dé ì<sup>n</sup> tée nació<sup>n</sup> Etiòpiá ñúhú-dé ichi. Te cùu-dé tesorèrú xínú cuèchi-dé núú ì<sup>n</sup> ñadìhí ñaha yíndaha nació<sup>n</sup> Etiòpiá, te ñaha-á<sup>n</sup> nání-á<sup>n</sup> Cándacé. <sup>28</sup> Te



tée etiòpiá-á<sup>n</sup> nĩ sáhá<sup>n</sup>-dé ñuú Jerusalén ní cáhá<sup>n</sup> ndihi-dé Yă Ndiöxí, te ñuhu-dé ichi cuánuhú-dé ñuú-dé ñúhú-dě carretà, te dàcuaha-dé tnúhu ní chídó tnùnĩ ndí Chàíá tée ní xóo cáhá<sup>n</sup> tnúhu Yă Ndiöxí ndéé sanaha. <sup>29</sup> Te ní xáha<sup>n</sup> Espíritú Yă Ndiöxí xii té Lìpé:

—Quíhí<sup>n</sup> tuha-n càrretá-ă<sup>n</sup> —càchí Espíritú-gá xăha<sup>n</sup>-xi xii-dé.

<sup>30</sup> Te té Lìpé ní sátuha-dé carretà-á<sup>n</sup>, te ní tecú dóho-dé nàcuáa càhá<sup>n</sup> tée etiòpiá-á<sup>n</sup>, tée ñuhu carretà-á<sup>n</sup> dăcuaha-dé nàcuáa ní chídó tnùnĩ ndí Chàíá. Te ní xáha<sup>n</sup> tē Lìpé xii tē etiòpiá-á<sup>n</sup>:

—¿Tècú tnùnĩ-n nchàa tnúhu dàcuaha-n-á<sup>n</sup>? —càchí té Lìpé xăha<sup>n</sup>-dě xii-dé.

<sup>31</sup> Te ní xáha<sup>n</sup> tē etiòpiá:

—¿Nása tecú tnùnĩ-í te vá yõo dānehé ñáhá xii-í? Ta quène iha coo-n chi danèhé ñáhá-n —càchí-dé xăha<sup>n</sup>-dě xii té Lìpé.

Te cuásaá té Lìpé núu carretà ní ngóo-dé. <sup>32</sup> Te ndèdóho-dé nàcuáa dàcuaha tée etiòpiá-á<sup>n</sup> nàcuáa ní chídó tnùnĩ ndí Chàíá núu tùtú Yă Ndiöxí núu càchí-xi:

Dàtná quídé ì<sup>n</sup> mbéé cada-dé òré candeca ñaha-güedě xii-dé quíhí<sup>n</sup> cahni ñaha-güedě chi ñá túú nă cada-dé,  
dàtná cuñí-ndó quide mbéé òré dèté-di ñá túú ndàhí-di duca<sup>n</sup> càda-dé òré cahni ñaha-güedě chi ni vă càhá<sup>n</sup>-dé.

<sup>33</sup> Te mee-ni cùdiquí ndéé ñáhá-güedě xii-dé, te ni vă ndúcú tnúhu-güedé núu-dě nũu ndáá ndècuéchi-dé.

Te ío cuu nduu cuihna ìní cue ñaní tnáhá-dě, chi cahni ñaha-güedě xii-dé ñuyíú-a.

Duha càhá<sup>n</sup> tutú ní dáciuáhá t̃e etiòpiá ní xíndedóho té Lìpé.

<sup>34</sup> Te ní xáha<sup>n</sup> tùcu tée Etiòpiá xii té Lìpé:

—Cundee ìní-n càchí tnúhu-n yò cacunehe tée ní cáhá<sup>n</sup> tnúhu Yá Ndiõxí ndéé sanaha, núu càhá<sup>n</sup>-dé cuendá méé-dě àdi cahá<sup>n</sup>-dé cuendá ingá ñáyiu — càchí tée etiòpiá-á<sup>n</sup> xãha<sup>n</sup>-dě xii té Lìpé.

<sup>35</sup> Te té Lìpé ní cani-dé cuèndú núú t̃e etiòpiá nàcuáa ní cáhá<sup>n</sup> ndí Chàíá nàcuáa cada Jèsús òré quixi-gá ñuyíú-a. Te ní xáha<sup>n</sup>-dě nàcuáa ndùu tnúhu Jèsús ndihí nàcuáa ní quide-gá. <sup>36</sup> Te ñùhu-güedé ichi cuáhá<sup>n</sup>-güedé ní naníhí-güedé ì<sup>n</sup> xichi núú ñúhú ndute, te ní xáha<sup>n</sup> t̃e etiòpiá:

—Iha ñùhu ndute, ¿te vá cúú cuàndute-í iha-ã<sup>n</sup>? — càchí-dé xãha<sup>n</sup>-dě xii té Lìpé.

<sup>37</sup> Te xãha<sup>n</sup> t̃e Lìpé:

—Te núu sàndáá ndisa iní-n Jèsús, te cuu cuandute-n —càchí-dé xãha<sup>n</sup>-dě.

Te ní xáha<sup>n</sup> t̃e etiòpiá:

—Sàndáá ndisa iní-í sá D̃ehe Yá Ndiõxí cúú Xìtohó Jesucristú —càchí-dé xãha<sup>n</sup>-dě.

<sup>38</sup> Te ní ngani-dé carretà, te ní nuu-güedé ndi ndùú-güedé, te cuánguee-güedé xití ndute, te ní dáciuàndute ñaha té Lìpé xii-dé. <sup>39</sup> Te òré ní nene-güedé xití ndute, te ndèca ñaha Espiritú Yá Ndiõxí xii té Lìpé cuáhá<sup>n</sup>. Te ñá túú ní xíní tée ní sandute-á<sup>n</sup> ndéé ichi cuáhá<sup>n</sup> té Lìpé. Te ío ní cudíí ìní-dé sá ñí natuha-dé ichi Yá Ndiõxí, te cuàndaa-dé núú carretà-dé cuánuhú-dé. <sup>40</sup> Te ní quexìo té Lìpé ñuú Àzotó, te ndi tnahá ñuú ndi tnahá ñuú cuáhá<sup>n</sup>-dé càhá<sup>n</sup>-dé tnúhu Yá Ndiõxí, te ní yáha-dé cuáhá<sup>n</sup>-dé ní quexìo-dé ndéé ñuú Cèsareá.

## 9

*Té Sàulú ní tuha-dé ichi Xítóhó Jesucrìstú  
(Hch. 22:6-16; 26:12-18)*

<sup>1</sup> Te té Sàulú mee-ni càhá<sup>n</sup> cuèhé-dé cuèndá ñáyiú ní sándáá iní tnúhu Jèsús, te cuìní-dé cahni ñaha-dě xii-yu. Te ní sáhá<sup>n</sup>-dé núú dütú cúnùu-gá, <sup>2</sup> te ní xáha<sup>n</sup>-dě sá cádüha dütú-ă<sup>n</sup> ì<sup>n</sup> tutú canehe-dé quíhí<sup>n</sup> cuáha-dé cue téé xíndeé nchito veñúhu ñúú Dàmascú, chi cuìní-dé tñi-dé nchaa ñáyiú dàcuaha tnúhu Xítóhó Jesucrìstú candeca ñaha-dě quíhí<sup>n</sup> ñúú Jerusalén. <sup>3</sup> Te ní xica-dé cuáhá<sup>n</sup>-dé tá cùyatni-dé ñúú Dàmascú, te uu<sup>n</sup>ni ní quee ñuhú andiú, te ní dáyèhé-xi ndéé núú nútñi-dé. <sup>4</sup> Te ní nduá-dé ndéé ñuhu, te ní tecú dóho-dé càhá<sup>n</sup> ì<sup>n</sup> sá càhá<sup>n</sup> núú ñinu, te xáha<sup>n</sup>-xi xii-dé:

—Yòhó Sàulú, ¿ná cuèndá cúú ùhú iní ñáhá-n xii-í te dándoho ñaha-n? —cachí sá càhá<sup>n</sup>-án xáha<sup>n</sup>-xi xii-dé.

<sup>5</sup> Te ni xáha<sup>n</sup>-dě:

—¿Ná cúú yòhó sá càhá<sup>n</sup>-án-i? —càchí-dé xáha<sup>n</sup>-dě.

Te ní xáha<sup>n</sup> sá càhá<sup>n</sup> xii-dé:

—Yúhú cúú-í Jèsús téé cùu úhú iní-n. Te ío dándoho-n mee-n, chi dàtná quidé ndìcutu quide-n, chi quiti-á<sup>n</sup> nùu na cùxi-güedé-di püyá te sáha-di patadá núú-xi, te quide úhú-di mee-di. Te duca<sup>n</sup> sátnahá-xi cùu yohó chi ñá túú sándáá iní ñáhá-n xii-í —càchí sá càhá<sup>n</sup>-án xáha<sup>n</sup>-xi xii-dé.

<sup>6</sup> Te té Sàulú ní quidi ñaha-xi xii-dé sá ñi yùhú-dé, te ní xáha<sup>n</sup>-dě:

—Xítóhó Jesucrìstú, ¿te ná cuìní-n càda-í-i? —càchí-dé xáha<sup>n</sup>-dě.

Te Jèsús ní xáha<sup>n</sup>-gă xii-dé:

—Ndacóo, te quíhí<sup>n</sup>-n ñùú-ǎ<sup>n</sup>, te yàcá<sup>n</sup> tecú tnúhu-n nǎ cúú sǎ cádá-n —càchí-gá xáha<sup>n</sup>-gǎ xii-dé.

<sup>7</sup> Te cue tée cuáhá<sup>n</sup> ndihí té Sàulú ní tecú dóho-güedé càhá<sup>n</sup> ì<sup>n</sup> sá càhá<sup>n</sup>, dico vá yõo tnahí ní xíní-güedé, te ní yùhú víhí-güedé, te ñá túú tnahí ní càhá<sup>n</sup>-güedé. <sup>8</sup> Te ní ndacóo té Sàulú, te ñá ní cùu-gá cundehe-dě, chi ní cuaa-dé, te ní tñi-güedé ndaha-dé ndécá ñàha-güedé cuáhá<sup>n</sup> ñuú Dàmascú. <sup>9</sup> Te yàcá<sup>n</sup> ní xíndecu-dé úní nduu, te ñá ní cùu tnahí cundehe-dě, te ñá túú nǎ ní xèxi-dé, te ñá túú ní xìhi-dé ndute.

<sup>10</sup> Te ndècu tée sàndáá iní tnúhu Jèsús ñuú Dàmascú, nání-dě Anàniás, te ní sáhá<sup>n</sup> Jèsús núú sàní-dé, te ní xáha<sup>n</sup>-gǎ xii-dé:

—¡Anàniás! —càchí-gá xáha<sup>n</sup>-gǎ.

Te ní xáha<sup>n</sup>-dě:

—¿Yùhú càhá<sup>n</sup> ndihí-n-ǎ<sup>n</sup>? —càchí-dé xáha<sup>n</sup>-dě.

<sup>11</sup> Te ní xáha<sup>n</sup>-gǎ:

—Ndacuíñí, te quíhí<sup>n</sup>-n ì<sup>n</sup> chiu<sup>n</sup> ichi núú dánàni-güedé Ichi Ndáá, te yàcá<sup>n</sup> nanducu-n vehe té Jùdás, chi vehe té-á<sup>n</sup> ndécú ì<sup>n</sup> té ñuú Tàrsú nání-dě Sàulú, te té-á<sup>n</sup> sa càhá<sup>n</sup> ndihí ñaha-dě xii-í. <sup>12</sup> Te té-á<sup>n</sup> ní dácótó ñàha-xi sá ní xíní ñáhá-dě xii-n ní quexìo-n núú ndécú-dé, te ní sacá<sup>n</sup> ndodo-n ndàha-n díquí-dě, te duca<sup>n</sup> te ní nacaá<sup>n</sup> núú-dě ní dácótó ñàha-xi xii-dé —càchí-gá xáha<sup>n</sup>-gǎ.

<sup>13</sup> Te té Anàniás ní xáha<sup>n</sup>-dě:

—Yòhó Xítóhó Jesucristú, càchí tnúhu-í xii-n sǎ nǐ níhí-í tnúhu nàcuáa quide-dé sá ìo quide úhú-dé ñáyiú càhá<sup>n</sup> ndihí-n ñuú Jerusalén. <sup>14</sup> Chi nèhe-dé tutú ní sáñaha cuè dútú cúnùu cuendá níhí-dě

nàcuáa cada-dé tñi-dé nchaa ñáyiù sàndáá iní ñáhá xii-n —cachí-dé xáha<sup>n</sup>-dě xii-gá.

<sup>15</sup> Te Jèsús ní xáha<sup>n</sup>-gă xii-dé:

—Quíhí<sup>n</sup>-n ndàtnúhu-n ndihí-dé, chi cuiní-í cada-dé chiu<sup>n</sup>-í, quíhí<sup>n</sup>-dé cáhá<sup>n</sup>-dé tnúhu-í núú cuè ñáyiù isràél, ndihí núú cuè ñáyiù ñá túú cùu ñáyiù isràél, ndihí núú cuè téé yìndaha ñaha xií-yu.

<sup>16</sup> Te yúhú cúñaha-í xii-dé sá ndóhó vîhi-dé cuendá-í —càchí-gá xáha<sup>n</sup>-gă xii té Anàniás.

<sup>17</sup> Te cuáhá<sup>n</sup> té Anàniás vehe núú ndécú tē Sàulú te ní sacá<sup>n</sup> ndodo-dé ndaha-dé díquí tē Sàulú, te ní xáha<sup>n</sup>-dě:

—Yòhó té Sàulú té ndècu ndihí-í ichi Xítóhó Jesu-crístú, ñi-ni Xítóhó Jesu-crístú Yaá ní cáhá<sup>n</sup> ndihí ñaha xii-n ichi ní tendaha ñàha-gá véxi-í cuendá cacá<sup>n</sup> táhù-í núú-gă cuendá-n te ndúha núú-n, te dàtnùní quixi Espíritú-gá cundecu ndihí-n —càchí-dé xáha<sup>n</sup>-dě.

<sup>18</sup> Te dàtná sá ñí xócání-ó ì<sup>n</sup> sá ndèdí núú-dě ní quide ñaha-xi xii-dé, te ní nacaá<sup>n</sup> núú-dě, te ní sandute-dé. <sup>19</sup> Te ní xexi-dé, te ní naníhí ndéé-dě, te titní nduu ní xíndecu ndihí-dé ñáyiù ní sàndáá iní tnúhu-gá ñuú Dàmascú.

*Té Sàulú dácuàha-dé ñáyiù tnúhu Yá Ndiõxí ñuú Dàmascú*

<sup>20</sup> Te sátá ñí ndúha núú-dě, te ní sáhá<sup>n</sup>-dé veñúhu cue ñáyiù isràél ní xáha<sup>n</sup>-dě sá Jèsús cúú-gă Déhe Yá Ndiõxí. <sup>21</sup> Te nchaa ñáyiù ní xíndedóho tnúhu ní cáhá<sup>n</sup>-dé, te ní cuñúhu vîhí-yu, te ní xítñahá-yu:

—Ñiú téé-ã<sup>n</sup> ní sahani-dé ñáyiù ní xóo chiñuhu ñaha xii Jesús ñuú Jerusalén. Te ní quixi-dé iha ní

cuiní-dé tñi ñaha-dě xií-yu candeca ñaha-dě quíhí<sup>n</sup>  
núu cuè dútú cúnùu ni cuu —cachí-yu xitnàhá-yu.

<sup>22</sup> Te ió iní-gá té Sàulú xăha<sup>n</sup>-dě xií-yu sá díú Jèsús  
cúu-gă Crístú Yaá ní tendaha Yă Ndiöxí ní quixi  
ñuyíu-a, te xă<sup>n</sup> ñá ní ñhí ñăyiu isràél ndécú ñúu  
Dàmascú tnúhu cáhá<sup>n</sup>-yu, te ní cuñúhu vihí-yu.

### *Té Sàulú ní dáxió-dě núu ñăyiu isràél*

<sup>23</sup> Te sátá ñi cuu titní nduu, te ní ndatnúhu  
cue téé isràél sá cáhni-güedě té Sàulú. <sup>24</sup> Te té  
Sàulú ní ñhí-dě tnúhu nàcuáa càhá<sup>n</sup>-güedé cada  
ñaha-güedě xii-dé, te cuèi nduu cuèi niú néhé  
cuendá-güedé yuyèhe núu ñúdòco ndóho yuhu ñúu  
cuendá cuiní-güedé tñi ñaha-güedě xii-dé te cahni  
ñaha-güedě. <sup>25</sup> Te ï<sup>n</sup> niú ndécá ñàha cue téé ní  
sándáá iní-xi tnúhu Jèsús cuáhá<sup>n</sup> ndéé núu ñúdòco  
ndóho yuhu ñúu. Te ní sáá-güedé núu ndóho, te  
ní chihi ñaha-güedě xii-dé xití tídihi te ní dándèe  
ñaha-güedě núu ñúhú, te ní quene-dé cuáhá<sup>n</sup>-dé.

### *Te Sàulú ndécú-dě ñúu Jerusàlén*

<sup>26</sup> Te té Sàulú ní nasáá-dé ñúu Jerusàlén, te  
cuiní-dé chitnahá-dé ñăyiu sándáá iní tnúhu Jèsús,  
te ní yùhú-yu chi ní cáhă<sup>n</sup>-yu sá dándàhú ñáhá-dě  
sá sándáá iní-dé Jèsús. <sup>27</sup> Te té Bèé ndécá-dě té  
Sàulú cuáhá<sup>n</sup> núu ndécú cuè téé ní táuchíú<sup>n</sup> Jèsús  
dacuàha ñaha xií-yu tnúhu-gá. Te ní caní té Bèé  
cuendú núu-güedé nàcuáa ní cuu ní naníhí tnáhá  
të Sàulú ndíhi Jèsús ichi, te ní cáhá<sup>n</sup> ndíhi ñaha-gă  
xii-dé. Te ní xáha<sup>n</sup> tùcu té Bèé nàcuáa ní cáhá<sup>n</sup>  
té Sàulú tnúhu Jèsús núu ñăyiu Dàmascú, te ñá  
túu tnàhí ni yùhú-dé ní cáhá<sup>n</sup>-dé, càchí té Bèé  
xăha<sup>n</sup>-dě xii-güedé. <sup>28</sup> Te ní xíndecu té Sàulú ndíhi

ñáyiú xídácuáhá tñhu-gá ñuú Jerusálén. Te ní ndicuu ndicuu-dé ní cáhá<sup>n</sup>-dé tñhu Jèsús, te ñá túú tñhí ní yùhú-dé <sup>29</sup> ní cáhá<sup>n</sup> ndihí-dé ñáyiú isràél ñáyiú càhá<sup>n</sup> tñhu grìégú. Te ñáyiú-á<sup>n</sup> ñí ngüíta-yu ndàtñhu-yu sá cáhni ñàhá-yu xii-dé. <sup>30</sup> Te ñáyiú sàndáá iní tñhu-gá ní níhí-yu tñhu nàcuáa cuìní ñáyiú càhá<sup>n</sup> tñhu grìégú cada ñàhá-yu xii té Sàulú, núu ní sàndeca ñàhá-yu xii-dé ñuú Cèsareá, te yàcá<sup>n</sup> ní tendaha ñàhá-yu cuánuhú-dé ñuú Tàrsú.

<sup>31</sup> Te sáta xíá<sup>n</sup> te ní sanaá-yu ñá túú-gã ní xõo cada úhú-yu nchaa ñáyiú sàndáá iní tñhu Jèsús nihí distritú Jùdeá, ndihí distritú Galileá, ndihí distritú Sàmariá. Te ní níhí ndéé-yu ní quidé-yu nàcuáa ní xáha<sup>n</sup> Yá Ndiõxí cadá-yu, te ío ní xíndecu yiñhú-yu núú-gã, te Espiritú-gá ní chindee ñàha-xi xií-yu, te vài-gá ñáyiú ní sàndáá iní-yu tñhu-gá.

### *Té Pèlú ní quide tátna-dé té Èneás*

<sup>32</sup> Títní xichi ní sáhá<sup>n</sup> té Pèlú ní cáhá<sup>n</sup>-dé tñhu Yá Ndiõxí. Te ñ<sup>n</sup> nduu ní sáhá<sup>n</sup>-dé ñuú Lìdá ní cáhá<sup>n</sup> ndihí-dé ñáyiú sàndáá iní ñàhá xii Jèsús. <sup>33</sup> Te yàcá<sup>n</sup> ní naníhí-dé ñ<sup>n</sup> té nàni Èneás, te ní cuu úná cuía cùhú-dé, te ni lùha ñá cúú-gã candá nihnu-dé. <sup>34</sup> Te ní xáha<sup>n</sup> té Pèlú xii-dé:

—Èneás, Xítohó Jesucristú cada tátna ñàha-gã xii-n tñavíí. Ndacóo te ndocani-n yùu-n —cachí-dé xàha<sup>n</sup>-dè.

Te òré-ni ní ndacóo-dé. <sup>35</sup> Te nchaa ñáyiú ñuú Lìdá ndihí ñáyiú ñuú Sàrón ní xiní-yu sá ñí ndúha-dé, te ní sàndáá víhí iní-yu Xítohó Jesucristú.

### *Ní ndoto tá Dòrcás*

<sup>36</sup> Te ñuú Jòpé ndécú ññ ñadihí sàndáá iní-a<sup>n</sup> tnúhu Jèsús, te nàni-a<sup>n</sup> Tabitá, te tnúhu grìégú xǎhǎ<sup>n</sup>-yu Dòrcás, te ío váha ní xóo cada-a<sup>n</sup> chí ío váha iní-a<sup>n</sup>, te ní xóo chindee-a<sup>n</sup> ñǎyiu ndàhú. <sup>37</sup> Te váha-ni ndècu-a<sup>n</sup> ni cuu, te ní tññ ñaha cuéhé ñí xíhí-a<sup>n</sup>, te ní nadacùchi ñahá-yu, te ní chihi ñàhà-yu ññ cuàrtú ndécú ndéé núú ññu. <sup>38</sup> Te ñáyiu ní sàndáá iní tnúhu Jèsús ñuú Jòpé ní níhí-yu tnúhu sá ndécú tǎ Pèlú ñuú Lìdá. Te yatni-ni càa ñuú-á<sup>n</sup>, te ní tendàhà-yu úú cue tée cuáhà<sup>n</sup>-güedé núú ndécú-dě cuèndá cúñaha-güedě candeca ñaha-güedě xii-dé quíhí<sup>n</sup> núú ndécü-yu. Te ní xáha<sup>n</sup>-güedě xii té Pèlú:

—Yáchí ná quíhí<sup>n</sup>-ó ñuú-ndí, chí yàcá<sup>n</sup> cáná ñàhà-yu quíhí<sup>n</sup>-n tnàvíí —càchí-güedé xǎha<sup>n</sup>-güedě xii té Pèlú.

<sup>39</sup> Te té Pèlú ní xica-dé cuáhà<sup>n</sup>-dé ndihí cue tée-á<sup>n</sup> ñuú Jòpé, te òré ní quexìo-güedé ndihí-dé, te cuásaá ndihí ñaha-güedě cuàrtú ndéé núú ññu. Te nchaa ñáyiu dñhí ñáyiu quèé ní tacá ndéé ñàhà xii ndíyi-á<sup>n</sup> xǐndáhyú-yu, te ní dánèhé ñáhǎ-yu nchaa dóó ñí cadúha ñaha ní xíhí-á<sup>n</sup>. Chí ní xóo cadúha-a<sup>n</sup> dícú<sup>n</sup>, te ní xóo cadúha-a<sup>n</sup> dío òré ní xíndecu-a<sup>n</sup> ñuyíú-a, te nchaa xǐá<sup>n</sup> ní dánèhé ñáhǎ-yu xii té Pèlú. <sup>40</sup> Te té Pèlú ní xáha<sup>n</sup>-dě sá quèé-yu nchaá-yu quehé, te ní queé-yu. Te ní ngüíñí xítí-dě te ní cáhà<sup>n</sup> ndihí-dé Yǎ Ndiòxí, te dàtnùní ní ndacoto-dé núú cándòdo ndíyi-á<sup>n</sup>, te ní xáha<sup>n</sup>-dě:

—Tàbitá, ndacóo —càchí-dé xǎha<sup>n</sup>-dě.

Te ní ndacoto-a<sup>n</sup> núú tǎ Pèlú te ní ndacóo-a<sup>n</sup>. <sup>41</sup> Te ní tññ-dé ndaha-a<sup>n</sup> ní nacanutññ ñaha-dě. Te ní cana-dé nchaa ñáyiu dñhí ñáyiu quèé ndihí nchaa ñáyiu sàndáá iní tnúhu Jèsús cuèndá quíní-yu sá ñí



ndoto-a<sup>n</sup>. <sup>42</sup> Te nchaa ñáyiú ñuú Jòpé ní níhǐ-yu tnúhu nàcuáa ní quide té Pèlú ní ndoto ñaha ní xíhí-á<sup>n</sup>, te vái-yu ní sándáá iní-yu Xítohó Jesucrístú. <sup>43</sup> Te titní nduu ní xíndecu té Pèlú vehe té Xímú té dàcuitá ñii.

## 10

### *Té Pèlú ndihi té Còrneliú*

<sup>1</sup> Te ndècu ñ<sup>n</sup> té nàni-dé Còrneliú ñuú Cèsareá te cùu-dé capitá<sup>n</sup>, te ndècu ndihi-dé ñ<sup>n</sup> ciendú sandàdú. Te cue té-á<sup>n</sup> nání-güedě Sandàdú Itàliánú. <sup>2</sup> Te té cùu capitá<sup>n</sup> ío váha iní-dé, te mee-dě ndihi ñadìhí-dé ndihi nchaa landú-dé ío nèhé-yu sá yíñùhu núú Yă Ndiöxí, te sáha-dé ñáyiú ndàhú ñáyiú isràél díhú<sup>n</sup>, te ío càhá<sup>n</sup> ndihi-dé Yă Ndiöxí. <sup>3</sup> Te ñ<sup>n</sup> nduu dàtná òré caá úní sacuaa ní dácótó núú ñáhá-xí xì-dé sá ni sáhá<sup>n</sup> ñ<sup>n</sup> espíritú xínú cuèchi núú Yă Ndiöxí núú-dě, te ní xáha<sup>n</sup>-xi:

—Còrneliú —càchí-xi xăha<sup>n</sup>-xi xì-dé.

<sup>4</sup> Te ní xiní-dé ndi ndùú xio núú-dě espíritú-á<sup>n</sup>. Te ío ní yùhú-dé. Te ní xáha<sup>n</sup>-dě:

—¿Ná chíú<sup>n</sup> vëxi-n? —càchí-dé xăha<sup>n</sup>-dě.

Te xăha<sup>n</sup>-xi:

—Ío càhá<sup>n</sup> ndihi-n Yă Ndiöxí, te ñáyiú ndàhú sãñaha-n díhú<sup>n</sup>-n, te nchaa xíă<sup>n</sup> sa nàha-gá. <sup>5</sup> Te vitna tendaha-n cuè té na quihí<sup>n</sup>-güedé ñuú Jòpé quíngana-güedé ñ<sup>n</sup> té nàni Xímú, àdi Pelú chí úú dìu-dé, te candeca ñaha-güedě quixi. <sup>6</sup> Te òré quexìo-dé te cachí tnúhu-dé nchaa dava-gá sá cuíní Yă Ndiöxí cada-n. Te ndècu-dé vehe ingá tucu té nàni Xímú té dàcuitá ñii, te vehe té-á<sup>n</sup> caá ñ<sup>n</sup> xio yuhu lamár —càchí-xi xáha<sup>n</sup>-xi xì-dé.

7 Te sáta cuáhá<sup>n</sup> espíritú-á<sup>n</sup>, te té Còrneliú ní cana-dé úú tnhá<sup>n</sup> cue téé xínu cuechi núú-dě ndihí ì<sup>n</sup> sandàdú xínú cuèchi tucu núú-dě, te tnhá<sup>n</sup> sandàdú-á<sup>n</sup> ìo càhá<sup>n</sup> ndihí-dé Yă Ndiöxí. 8 Te té Còrneliú ní cani-dé cuëndú núú-güedě nàcuáa ní cáhá<sup>n</sup> espíritú xínú cuèchi núú Yă Ndiöxí. Te ní tendaha ñàha-dé xii-güedé cuáhá<sup>n</sup>-güedé ñuú Jòpé.

9 Te nduu tnéé-á<sup>n</sup> ñúhú-ní-güedě ichi cuáhá<sup>n</sup>-güedé, te cùu-xi datná òré caúxúú nduu ta cùyatni-güedé ñuú-á<sup>n</sup>, te òré-á<sup>n</sup> ñí sáá té Pèlú díquí véhé càhá<sup>n</sup> ndihí-dé Yă Ndiöxí. 10 Te òré-á<sup>n</sup> sa xihí-dé docó cuíní-dé caxi-dé, te ñini càdúha-yu sá caxí-dě ní dácótó núú ñáhá-xí 11 sã ñí xiní-dé ì<sup>n</sup> sá ndécú àndiú, te càa datná cáá ì<sup>n</sup> dóó cáhnú nchícú<sup>n</sup> yoho ndi cùmí xíquí-xi véxi cuu<sup>n</sup> núú ñúhú. 12 Te núú dđó-ã<sup>n</sup> yódó cõó ndihí quiti ndàva ndihí nchaa núú quiti ndéé cùmí sãhá-xi. 13 Te ní tecú dóho-dé càhá<sup>n</sup> ì<sup>n</sup> sá càhá<sup>n</sup>, te xãhá<sup>n</sup> sã càhá<sup>n</sup>-á<sup>n</sup> xii-dé:

—Pèlú, ndacuíñí cahni-n nděda-ni càa quiti-a caxi-n-di —cachí sá càhá<sup>n</sup>-á<sup>n</sup> xãhá<sup>n</sup>-xi xii-dé.

14 Te té Pèlú ní xãhá<sup>n</sup>-dě:

—Vá cáhni-í-di chi càchí tnúhu sá sánú ichi ñaha xii nchúhú ñáyiu isràél sá vã cúú càxi-ndí nchaa quiti-a chi cuu cuéchi, te vátá caxí-gã-í-di ni ì<sup>n</sup> xito —cachí-dé xãhá<sup>n</sup>-dě.

15 Te ní cáhá<sup>n</sup> tucu sá ñí cáhá<sup>n</sup>-á<sup>n</sup>, te xãhá<sup>n</sup>-xi:

—Vá cúú càchí-n sã vã cúú càxi-n-di, chi mee Yă Ndiöxí ní cachí-gá sá díú nchaa quiti-a cuu caxi-o vitna —cachí sá ñí cáhá<sup>n</sup>-á<sup>n</sup> xãhá<sup>n</sup>-xi xii-dé.

16 Te duca<sup>n</sup> ñí cáhá<sup>n</sup> sá ñí cáhá<sup>n</sup>-á<sup>n</sup> ùní xito, te dătnuní cuánda tucu dóó-ã<sup>n</sup> andiú. 17 Te té Pèlú ñá ní cùtnuní iní-dé ná cuènda duca<sup>n</sup> ñí dácótó núú ñáhá-xí xii-dé, núu xiã<sup>n</sup> ìo cuéhé ñí sani iní-dé. Te òré-á<sup>n</sup> ñí quexìo cue téé ní tendaha té Còrneliú

ndéé yuyèhe, chi ndi vehe ndi vehe cuáhá<sup>n</sup>-güedé ndúcú tnùhu-güedé ndèé cáá vèhe té Xímú téé dii vèhe-xi ndecu té Pèlú. <sup>18</sup> Te ní cáhá<sup>n</sup> níhi-güedé, te xáha<sup>n</sup>-güedé:

—Ñá túú cùdana iha ndecu ì<sup>n</sup> téé nànducu-ndí nání-dě Xímú, àdi Pelú chi úú ñiu-dé —càchí-güedé xáha<sup>n</sup>-güedé.

<sup>19</sup> Te té Pèlú vai sani iní-dé sá ñi dácótó nùú ñáhá-xí xii-dé. Te òré-á<sup>n</sup> ñi xáha<sup>n</sup> Espíritú Yá Ndiòxí xii-dé:

—Cundedóho-n ì<sup>n</sup> tnúhu na càhá<sup>n</sup>-í-a. Ní quexìo úní cue téé nànducu ñaha xii-n. <sup>20</sup> Yáchí, cuandèe chi quíhí<sup>n</sup>-n ndìhi-güedé, te vá yùhú-n chi yùhú ní xáha<sup>n</sup>-í véxi cuaca ñaha-güedé xii-n —càchí Espíritú-gá xáha<sup>n</sup>-xi xii té Pèlú.

<sup>21</sup> Te ní xica-dé cuánde-dé núú ndécú cuè téé xica nanducu ñaha xii-dé, te xáha<sup>n</sup>-dè xii-güedé:

—Yùhú cúú tée nànducu-ndo-á<sup>n</sup>. Náú-í-a núú ná chíú<sup>n</sup> cuíní ñáhá-ndó —càchí-dé xáha<sup>n</sup>-dè xii-güedé.

<sup>22</sup> Te xáha<sup>n</sup>-güedé:

—Tée cùu capitá<sup>n</sup> téé nàni Corneliú ní tendaha ñaha-dé véxi-ndí, te téé-á<sup>n</sup> ño váha iní-dé, chi ío sàndáá iní-dé Yá Ndiòxí, te nchaa ñáyiú isràél ío váha càhá<sup>n</sup>-yu cuendá-dé. Te ì<sup>n</sup> espíritú xínú cuèchi núú Yá Ndiòxí ní xáha<sup>n</sup>-xi xii-dé sá cáná ñaha-dé xii-n quíhí<sup>n</sup>-n vèhe-dé dacuàha-n-dé tnúhu Yá Ndiòxí —càchí cue téé ní tendaha té Còrneliú xáha<sup>n</sup>-güedé xii té Pèlú.

<sup>23</sup> Te ní xáha<sup>n</sup> tē Pèlú sá quíhu-güedé vehe-dé, te candeca tnàha-güedé ndìhi-dé quíhí<sup>n</sup> ndéé nduu tnéé. Te nduu tnéé-á<sup>n</sup> ñi xica-güedé ndécá tnàha-güedé ndìhi té Pèlú cuáhá<sup>n</sup>, te tnàhá ì<sup>n</sup> úú cue

tée sàndáá iní tnúhu Jèsús ñuú Jòpé cuáhá<sup>n</sup> ndihi ñaha-güedě xii-dé.

<sup>24</sup> Te ndéé ingá nduu ní quexìo-güedé ñuú Cèsareá. Te té Còrneliú ndétú ñàha-dé xii-güedé vehe-dé te sa ndècu túha-dé ndihi ñadhí-dé ndihi nchaa landú-dé ndihi cue tée ío váha tnàhá tnúhu ndihi-dé, chi ní cana ñaha-dě ní nítnáhã-yu ndihi-dé cundetú-yu té Pèlú. <sup>25</sup> Te sátá ñí quèxio té Pèlú vehe té Còrneliú, te ní quee-dé quehé, te ní ngüñí xítí-dě núú tẽ Pèlú chíñùhu ñaha-dé ní cùu.

<sup>26</sup> Te té Pèlú ní xáha<sup>n</sup>-dě:

—Ndacuíñí vá ngüñí xítí-n nũu-í chi ñá díú Ndiõxí cùu-í, dìcò ñ<sup>n</sup> tée ñuyíú-a cùu-í —càchí té Pèlú xáha<sup>n</sup>-dě xii-dé.

<sup>27</sup> Te ta cãhá<sup>n</sup> té Pèlú ndihi té Còrneliú cuánguihu-güedé xítí vehe, te chitu ñáyiu xìxíhi xítí vehe. <sup>28</sup> Te ní xáha<sup>n</sup> tẽ Pèlú xií-yu:

—Sa ñaha-ndo sá càchí tnúhu sá sánú ìchi ñaha xii nchúhú ñáyiu isràél sá vã cúú quixi-ndí vehe ni ñ<sup>n</sup> nchohó ñáyiu ñá túú cùu ñáyiu isràél te ni vã cúú tnàhá tnúhu ndihi ñaha-ndí xii-ndo. Dico Yá Ndiõxí ní cachí-gá sá vã cúú cãhá<sup>n</sup>-í sá vã cúú cãhá<sup>n</sup> ndihi-í ñáyiu ñá túú cùu ñáyiu isràél, chi cuu cuéchi.

<sup>29</sup> Núu xíá<sup>n</sup> ndíhi-ni véxi-í òré ní quexìo tnúhu sá cáná ñaha-ndo. Te cachí tnúhu-ndo ñã cuendá cáná ñaha-ndo —cachí té Pèlú xáha<sup>n</sup>-dě xií-yu.

<sup>30</sup> Te té Còrneliú ní xáha<sup>n</sup>-dě:

—Ní cuu cúmí nduu, te ñiu-ni dàtná òré iha cùu-xi, te yúhú ndècu-í ñiu-ni vehe-í, te ñá túú tnàhí ná xéxi-í cãhá<sup>n</sup> ndihi-í Yã Ndiõxí, te òré-á<sup>n</sup> ñí quexìo ñ<sup>n</sup> espíritú xínú cuèchi núú-gã níhnú-xí dõó cuixí<sup>n</sup> dóó chàhnchí. <sup>31</sup> Te càchí-xi: “Còrneliú, ní xíndedóho Yá Ndiõxí tnúhu ní cãhá<sup>n</sup>-n ndihi-gá,

te xìní-gá sá sãñaha-n dǐhú<sup>n</sup> xii ñáyíu ndàhú. <sup>32</sup> Te ñuú Jòpé ndécú ì<sup>n</sup> téé nàni Xímú, àdi Pelú chi úú dǐu-dé, te ndècu-dé vehe ì<sup>n</sup> téé nàni tucu Xímú téé dàcuitá ñìi, te càa vehe-dé ì<sup>n</sup> xio yuhu làmár, te cana-n-dě ná quìxi-dé ndatnúhu-n ndìhi-dé”, duha ní cáhá<sup>n</sup> espíritú xínú cuèchi núú Yă Ndiöxí. <sup>33</sup> Núu xǐá<sup>n</sup> ndìhi-ni ní cana ñaha-ǐ xii-n. Te táxăhu xii-n sǎ vëxi-n chi iha ndècu-ndí nchaa-ndí ndétú ñàha-ndí xii-n cùndedóho-ndí tnúhu Yá Ndiöxí, te cuìní-ndí cachí tnúhu-n nchàa tnúhu ní cachí Yă Ndiöxí cáhá<sup>n</sup>-n —càchí té Còrneliú xăha<sup>n</sup>-dě.

*Té Pèlú ní ndatnúhu-dé ndìhi ñáyíu ní tacá vehe té Còrneliú*

<sup>34</sup> Te té Pèlú xăha<sup>n</sup>-dě xíi-yu:

—Vitna ní xìní-í sá Yă Ndiöxí càhá<sup>n</sup> ndìhi-gá ñáyíu cuèi ndèda-ni càa ñuú, te ì<sup>n</sup>-ni quìde-gá ndìhi nchaa-yu. <sup>35</sup> Te nchaa ñáyíu nèhe sá yǐñùhu núú Yă Ndiöxí, te xǐquide váha-yu, te nchaa-yu cùu váha iní ñáhá-gă xíi-yu. Te ñá túú quìde cuendá-gá cuèi ná ñáyíu ñuú cúŷ-yu. <sup>36</sup> Te Yá Ndiöxí ní tendaha-gă Xítóhó Jesucrístú ní sáhá<sup>n</sup>-gá ní xíndecu-gá nació<sup>n</sup> Isràél, te ní xăha<sup>n</sup>-gă xíi-yu ì<sup>n</sup> tnúhu váha nàcuáa cuu váha iní-yu. Te dǐu-ni mee Jèsús cúnùu-gá núú ñáyíu ni càa xico ñuyú. <sup>37</sup> Te nàha-ndo sá dǐhna-gá ndíi Juáa ní cáhá<sup>n</sup> ndíi tnúhu Yá Ndiöxí núú ñáyíu, te ní dácúándùte ñaha ndíi xíi-yu. Te dǎtnùní ní ngúita Jèsús ní cáhá<sup>n</sup>-gá tnúhu-gá distritú Galileá, te dǎtnùní ní sáhá<sup>n</sup>-gá ñìhì nació<sup>n</sup> Isràél ní cáhá<sup>n</sup>-gá tnúhu-gá núú ñáyíu. <sup>38</sup> Te sa nàha-ndo sá Yă Ndiöxí ní sãñaha-gă Espíritú-gá xii Jèsús téé ñuú Nazàrét ndécú ndìhi-dé chíndèe ñaha-xi xii-dé. Te nàha-ndo sá ñí xica cuu Jèsús ní quide tátna-gá nchaa ñáyíu

yìhi ñaha espíritú cùndìhi yucu ñávãha. Te ío vài-gá sá vãha ní quide ñaha-gã xií-yu, te duca<sup>n</sup> ñi quide-gá, chi Yá Ndiõxí ní chindee ñaha-gá. <sup>39</sup> Te mee-ndí ní xiní-ndí nàcuáa ní quide Jèsús ñúú Jerusàlén ndihi ñhìí nàció<sup>n</sup> Isràél. Te ní sata caa ñaha-güedë xii-gá núú cùrúxí te yacá<sup>n</sup> ní xihí-gá. <sup>40</sup> Te núú ùní nduu ní dándótó ñaha Yá Ndiõxí xii-gá. Te ní cuiní-gá sá cùndècu Xitohó Jesucristú titní nduu sátá ñi ndoto-gá cuèndá cáhá<sup>n</sup> ndihi ñaha-gã xii-ndí nchaa-ndí nàcuáa ní xica cuu-ndí ndihi-gá. <sup>41</sup> Te ñá ncháá ñáyiu ñi xini ñáhá xii-gá, chi mee-ñi nchùhú cue téé ní cachí-gá sá càhá<sup>n</sup> ndáá-ndí sá ñi ndoto-gá, chi ní xindecu ndihi-ndí-gá, te ní xihí ní xexi-ndí ndihi-gá, núú càhá<sup>n</sup> ndáá-ndí sá ñi ndoto-gá. <sup>42</sup> Te ní cachí-gá sá nchùhú quihí<sup>n</sup>-ndí cúñaha-ndí xii ñáyiu sá méé Yá Ndiõxí ní táuchíú<sup>n</sup>-gã sá Jèsús cada ndáá-gá cuéchi nchaa ñáyiu ndècu vívú ndihi cuéchi nchaa ñáyiu ní xihí. Te duca<sup>n</sup> ñi xáha<sup>n</sup> Yá Ndiõxí xii Jèsús, te ñi-ñi duca<sup>n</sup> ñi cachí Jèsús cáhá<sup>n</sup>-ndí. <sup>43</sup> Te cue téé ní cáhá<sup>n</sup> tnúhu Yá Ndiõxí ndéé sanaha ñi cáhá<sup>n</sup>-güedé sá quíxí Jèsús, te ní cachí-güedé sá ncháá ñáyiu na quíndáá iní ñáhá xii Jèsús, te cada càhnu iní-gá nchaa cuéchi-yu –càchí té Pèlú xáha<sup>n</sup>-dë xií-yu.

*Ní quexìo Espíritú Yá Ndiõxí ní ngúndecu ndihi cue ñáyiu ñá túú cùú ñáyiu isràél*

<sup>44</sup> Te mei òré càhá<sup>n</sup>-dë ndèdóho-yu ní quexìo Espíritú Yá Ndiõxí ní ngúndecu ndihi nchaa ñáyiu-á<sup>n</sup>. <sup>45</sup> Te cue téé isràél cuáhá<sup>n</sup> ndihi té Pèlú, cue téé ní sándáá iní tnúhu Jèsús ní cuñúhu víhi-güedé sá ñi quexìo Espíritú Yá Ndiõxí ní

ngúndecu ndihí-yu, chi cuendá sá ñà díú ñăyiu israél cúŷ-yu núu xiǎ<sup>n</sup> ní cuñúhu-güedé. <sup>46</sup> Te ní cutnùní sá ñí quexìo Espíritú Yă Ndiǒxí ní ngúndecu ndihí-yu, chi ní ngüíta-yu càhá<sup>n</sup>-yu tnúhu sá dácàhu iní ñáhá Espíritú-gá, tnúhu sá ñà túú xìní-yu cáhá<sup>n</sup>-yu. Te ní ndacá<sup>n</sup> táhŷ-yu núú Yă Ndiǒxí cuendá nchaa sá ñí quide-gá. <sup>47</sup> Te dătnùní ní xáha<sup>n</sup> tĕ Pèlú:

—Vitna te cuandute ñáyiu ní natuha ichi Xítóhó Jesucrístú chi sa ndècu ndihí-yu Espíritú Yă Ndiǒxí dătná cuìní-ndó ndècu ndihí nchoo, núu xiǎ<sup>n</sup> vá cúú càchí dava-gá ñáyiu sá vă cúú cuànduté-yu —càchí-dé xăha<sup>n</sup>-dĕ xií-yu.

<sup>48</sup> Te dătnùní ní xáha<sup>n</sup>-dĕ xii ñáyiu:

—Vitna te cuandute-ndo, te òré-á<sup>n</sup> te cacunehe-ndo Xítóhó Jesucrístú —càchí-dé xăha<sup>n</sup>-dĕ xií-yu.

Te dătnùní ní cáhá<sup>n</sup> ndàhú-yu núú tĕ Pèlú cun-decu ndihí ñaha-dĕ xií-yu #<sup>n</sup> ŷú nduu.

## 11

*Té Pèlú ní cani-dé cuendú núú ñăyiu sândáá iní tnúhu Jèsús ñuú Jerusàlén*

<sup>1</sup> Te cue tée ní táuchíú<sup>n</sup> Jèsús dacuàha ñaha xii ñáyiu tnúhu-gá, ndihí cue ñáyiu ní sândáá iní tnúhu-gá, ñáyiu ndècu distritú Júdeá ní níhí-yu tnúhu sá ñáyiu ñá túú cùu ñáyiu israél ní sândáá iní-yu tnúhu Yă Ndiǒxí. <sup>2</sup> Te òré ní ndexìo té Pèlú ñuú Jerusàlén, te ñáyiu israél ñáyiu ní cachí sá cádá nchàa nacuáa ní cáhá<sup>n</sup> ndíi Moisés ní satnuhu ñáhá-yu xii-dé. <sup>3</sup> Te ní xáhă<sup>n</sup>-yu xii té Pèlú:

—¿Ná cuendá ní sáhá<sup>n</sup>-n ndéé ndiáçă<sup>n</sup> ní cáhá<sup>n</sup> ndihí-n ñăyiu-ă<sup>n</sup>, te ñá túú quidé-yu dàtná quidé nchòo-i? Te ní sáhá<sup>n</sup>-n yàcá<sup>n</sup> ní xexi-n ndihí-yu — cächí-yu xăhă<sup>n</sup>-yu xii-dé.

<sup>4</sup> Te té Pèlú ní cani-dé cuendú nàcuáa ní cuu núú nĩ sáhá<sup>n</sup>-dé, te xăha<sup>n</sup>-dě:

<sup>5</sup> —Ní xíndecu-í ñuú Jòpé. Te òré càhá<sup>n</sup> ndihí-í Yă Ndiöxí, te ní dácótó ñàha-xi xii-í sá vëxi cuu<sup>n</sup> ì<sup>n</sup> dóó cáhnú àndiū, te ndùtu ndi cumí xíquí-xi, te ní ngava-xi núú ndécù-í. <sup>6</sup> Te ní xíndéhé văha-í, te ní xiní-í nchaa quiti yòdo núú-xi. Te ì<sup>n</sup> xichi yòdo quiti cúmí sáhá-xi, te ì<sup>n</sup> xichi yòdo quiti déé<sup>n</sup>, te ì<sup>n</sup> xichi yòdo cóó, te ì<sup>n</sup> xichi yòdo quiti ndava. <sup>7</sup> Te ní tecú dóho-í càhá<sup>n</sup> ì<sup>n</sup> sá càhá<sup>n</sup>, te cächí-xi: “Pèlú, ndacuíñí cahni-n nděda-ni cãa quiti-a caxi-n-di”, cachí sá nĩ cáhá<sup>n</sup>-án. <sup>8</sup> Te ní xăha<sup>n</sup>-ĩ: “Vá cáhni-í-di chi cächí tnúhu sá sánú ìchi ñaha xii nchúhú ñáyiu isràél sá vă cúú cãxi-ndí nchaa quiti-a”, xăha<sup>n</sup>-ĩ. <sup>9</sup> Te ní tecú dóho-í càhá<sup>n</sup>-ni tucu núú nĩnu, te cächí sá cãhá<sup>n</sup>-án: “Vá cúú cächí-n sã vă cúú cãxi-n-di, chi mee Yă Ndiöxí ní cachí-gá sá díú nchãa quiti-án cuu caxi-o”, cächí sá cãhá<sup>n</sup>-án. <sup>10</sup> Te duca<sup>n</sup> nĩ cáhá<sup>n</sup> sá nĩ cáhá<sup>n</sup>-án ùní xito, te dàtnùní cuándaá dóó-ă<sup>n</sup> ndihí nchaa quiti-án andiū. <sup>11</sup> Te òré-ni ní quexìo ùní cue tée vehe núú ndécù-í. Te cue tée-án nĩ tendaha ñàha ì<sup>n</sup> tée ñuú Cèsareá nándücu ñaha-güedé xii-í. <sup>12</sup> Te mee Espiritú Yă Ndiöxí ní cachí-xi sá quihí<sup>n</sup>-í ndihí-güedé, te ní cachí-xi sá ñã túú nã cani iní-í. Te tnàhá íñú cue tée ndècu iha ní sáhá<sup>n</sup> ndihí ñaha-güedé xii-í, te nchaa-ndí ní sáhá<sup>n</sup>-ndí vehe té Còrneliú ñuú Cèsareá. <sup>13</sup> Te ní cani-dé cuendú nàcuáa ní cuu ní sáhá<sup>n</sup> ì<sup>n</sup> espíritú xínú cuèchi núú Yă Ndiöxí vehe-dé, te ní quíhu-xi



ndéé xítí vehe-dé, te ní xáha<sup>n</sup>-xi xì-dé: “Tendaha-n cuè téé na quihí<sup>n</sup>-güedé ñuú Jòpé quíngana-güedé ñ<sup>n</sup> téé nàni Xímú, àdi Pelú chi úú òu-dé. Te candeca ñaha-güedě quixi. <sup>14</sup> Te téé-á<sup>n</sup> cachí tnúhu-dé nása cada-n nàníhí tàhú-n ndihí ñadihí-n, ndihí landú-n, ndihí nchaa ñáyiu xínu cuechi vehe-n”, duha ní xáha<sup>n</sup> espíritú-á<sup>n</sup> xii té Còrneliú. <sup>15</sup> Te òré ní ngúíta-í càhá<sup>n</sup> ndihí-í-yu ní quexìo Espíritú Yá Ndiòxí ní ngúndecu ndihí-yu dàtná ní quide-xi cútnàhá ní taxi Yá Ndiòxí Espíritú-gá ndéé díhna ní ngúndecu ndihí nchoo. <sup>16</sup> Te ní ndacu iní-í nàcuáa ní càhá<sup>n</sup> Xítóhó Jesucristú, te duha ní cachí-gá: “Té Juáa ní xóo dacuàndute-dé ñáyiu, dico yúhú sãñaha-í Espíritú Yá Ndiòxí cundecu ndihí-yu”, duha ní cachí-gá. <sup>17</sup> Te Yá Ndiòxí ní sãñaha-gã Espíritú-gá cundecu ndihí ñáyiu ñá túú cùu ñáyiu isràél dàtná ní quide-gá cútnàhá ní sándáa iní-ó tnúhu Jèsús, núu xíá<sup>n</sup> vá càchí-í sá vã cúú càda-í ñ<sup>n</sup> sá cuíní Yá Ndiòxí cada-í —càchí té Pèlú xãha<sup>n</sup>-dě xii-yu.

<sup>18</sup> Te sátá dúcá<sup>n</sup> ñí xáha<sup>n</sup> tẽ Pèlú, te ñá túú-gã ná tnúhu ni càhá<sup>n</sup>-yu, te ío ní cudíí iní-yu nchaa nàcuáa ní quide Yá Ndiòxí, te ní xítnàhá-yu:

—Tnàhá nchaa ñáyiu ñá túú cùu ñáyiu isràél naníhí tàhú-yu núu na dàñá-yu nchaa sá cuèhé sá dúhá quidé-yu, chi duca<sup>n</sup> cuíní Yá Ndiòxí cunduu —càchí-yu xítnàhá-yu.

*Ñáyiu sándáa iní tnúhu Jèsús ñuú Antiòquia*

<sup>19</sup> Te sátá ñí sahani-güedé té Těvá, te ní cuíní-güedé cada úhú-güedé nchaa ñáyiu ní sándáa iní-xi tnúhu Jèsús, te ní xité nuú-yu ndi tnahá ñ<sup>n</sup> ñ<sup>n</sup> ñuú. Te davá-yu cuáhá<sup>n</sup>-yu ndéé distritú Fènicia ndihí distritú Chìpré ndihí ñuú Antiòquia. Te ní

cáhá<sup>n</sup>-yu tnúhu Jèsús núu mee-ni ñáiyu isràél, te ñá ní xǐtnúhu-yu dava-gá-yu. <sup>20</sup> Te dava-gá ñáiyu distritú Chìpré ndihì ñáiyu ñuú Cìrené ní sáhá<sup>n</sup>-yu ñuú Antiòquiá. Te ñá díú mèe-ni ñáiyu isràél ní cáhá<sup>n</sup> ndihì-yu, chi tnàhá ñáiyu ñá túú cùu ñáiyu isràél ní xáhá<sup>n</sup>-yu tnúhu Jèsús. <sup>21</sup> Te ní chindee ñàha-gá xii ñáiyu càhá<sup>n</sup> tnúhu-gá, te vài-gá-yu ní sándáá iní-yu-gá chi ní tuhá-yu ichi-gá.

<sup>22</sup> Te ñáiyu ndècu ñuú Jerusàlén ñáiyu ní sándáá iní tnúhu Jèsús ní níhì-yu tnúhu nàcuáa ní cuu, núu xǐá<sup>n</sup> ní tendàhá-yu té Bèé cuáhá<sup>n</sup>-dé ñuú Antiòquiá. <sup>23</sup> Te òré ní quexìo té Bèé, te ní xiní-dé nàcuáa ní quide ñàha-gá xií-yu sá ní naníhí tàhú-yu, núu xǐá<sup>n</sup> ío ní cudǐí iní-dé. Te ní dácáhú iní ñáhá-dě, te ní xáha<sup>n</sup>-dě:

—Ío nducu ndèe-ndo cada-ndo nchaa sá càchí Yă Ndiõxí cada-ndo —càchí-dé xáha<sup>n</sup>-dě xií-yu.

<sup>24</sup> Te té Bèé cúú-dě ì<sup>n</sup> tée váha iní-xi, te ndècu ndihì-dé Espíritú Yă Ndiõxí, te ío sándáá iní-dé tnúhu Jèsús. Te vài vihi ñáiyu ní tuhá-yu ichi-gá.

<sup>25</sup> Te dǎtnùní cuáhá<sup>n</sup> té Bèé ñuú Tàrsú cuánúndúcú-dě té Sàulú. <sup>26</sup> Te òré ní naníhí ñáhá-dě, te ndèca ñàha-dé cuáhá<sup>n</sup> ñuú Antiòquiá, te yàcá<sup>n</sup> ní xíndecu-güedé ì<sup>n</sup> cuíá ndihì ñáiyu ní sándáá iní tnúhu Jèsús, te vài-yu ní dácuahá ñàha-güedé tnúhu-gá. Te ñu-ni ñuú Antiòquiá ní dánání ñàhá-yu Cristiànú xii nchaa ñáiyu sándáá iní tnúhu Jèsús.

<sup>27</sup> Te ndéé dàvá-á<sup>n</sup> ní quee ì<sup>n</sup> úú cue tée càhá<sup>n</sup> tnúhu Yă Ndiõxí ñuú Jerusàlén cuáhá<sup>n</sup>-güedé ñuú Antiòquiá. <sup>28</sup> Te ì<sup>n</sup>-dé nání-dě Àgabú, te ní chindee ñàha Espíritú Yă Ndiõxí xii-dé, te ní sáhá<sup>n</sup>-dé núu

nchàa ñáyiu sàndáá iní tnúhu-gá, te ní xáha<sup>n</sup>-dě xii-yu sá quíxí ñ<sup>n</sup> tnamá ñihí ñuyíú. Te duca<sup>n</sup> ñi cuu sátá ñi ngúnutnii té Clàudiú tée yìndaha cuéhé nació<sup>n</sup>. <sup>29</sup> Núu xíá<sup>n</sup> nchaa ñáyiu sàndáá iní tnúhu Jèsús ñuu Antiòquia ní ndatnúhu-yu sá chíndèé-yu nchaa ñáyiu sàndáá iní tnúhu-gá ndécú dìstritú Jùdeá cuèndá vá ndóhó vîhí-yu docó. Te nàcuáa ní níhí-yu, te duca<sup>n</sup> ñi sacá<sup>n</sup> tnáhã-yu. <sup>30</sup> Te ní tacá díhú<sup>n</sup>-ã<sup>n</sup>, te nèhe té Bèé ndihí té Sàulú cuáhá<sup>n</sup>, cuáha-güedé cue tée yìndaha ñáyiu sàndáá iní tnúhu-gá.

## 12

### *Sátá ñi xíhí té Jàcobó, te ní ngava té Pèlú vecaá*

<sup>1</sup> Te ndéé dàvá-á<sup>n</sup> ñi ngúita té Hèrodés tée yìndaha ñaha xii ñáyiu isràél ní quide úhú-dé ñ<sup>n</sup> úú ñáyiu sàndáá iní tnúhu Yá Ndiõxí. <sup>2</sup> Te ní táuchíú<sup>n</sup>-dě ní tñi-güedé té Jàcobó ñani té Juáá, te ní sahani ñaha-güedé ndihí machití. <sup>3</sup> Te ío ní cudíi iní dava ñáyiu isràél cuèndá sá ñi sahani ñaha-güedé xii té Jàcobó, núu xíá<sup>n</sup> ní tendaha tucu té Hèrodés sandàdú-dé ní sáhá<sup>n</sup> tñi tucu-güedé té Pèlú. Te duca<sup>n</sup> ñi quide-dé cútnàhá ní xóo vico ní xexí-yu pàá sá ñà túú yìhí levadurá. <sup>4</sup> Te ní naníhí-güedé té Pèlú, te ní tñi ñaha-güedé ndécá ñaha-güedé cuáhá<sup>n</sup> vecaá. Te té Hèrodés ní táuchíú<sup>n</sup>-dě cuáhá<sup>n</sup> sáhú<sup>n</sup> ñi sandàdú cùndeé-güedé té Pèlú. Te ní xáha<sup>n</sup>-dě:

—Cundeé-ndó ndi cúmí ndi cúmí-ndó tõe-ã<sup>n</sup> —  
càchí-dé xáha<sup>n</sup>-dě xii-güedé.

Te té Hèrodés ní sani iní-dé queñuhu-dé té Pèlú vecaá òré ná yáha vico cuèndá cahni ñaha-güedé

cáhá<sup>n</sup>-dě ní cùu. <sup>5</sup> Te ní xíhi-ni té Pèlú vecaá, te ní xindeé cuaa ñaha sàndadú xii-dé. Te cue ñáyi u sàndáá iní tnúhu Yá Ndiõxí ío ní xicá<sup>n</sup> táhŭ-yu núú-gă cuëndá sá ñà túú nă cada ñaha-güedě xii-dé.

*Yá Ndiõxí ní dácăcu-gá té Pèlú vecaá*

<sup>6</sup> H<sup>n</sup> niú-gá quihi té Pèlú vecaá ní cùu, te nduu tnéé tauchìu<sup>n</sup> té Hèrodés quíhí<sup>n</sup> sandàdú queñuhu ñaha-güedě xii-dé vecaá cuëndá quini nchaa ñáyi u nása cada ñaha-güedě ní cùu. Te té Pèlú cáá-dě xidí-dé xití vecaá, te ndi ndúú dúcú<sup>n</sup> ndáhá-dě ndútú càdená, te xio xio dîñi-dé ndécú sàndadú, te dava-gá sandàdú xindeé-güedé yèhe vecaá. <sup>7</sup> Te ní quexìo ì<sup>n</sup> espíritú xínú cuèchi núú Yă Ndiõxí xití vecaá núú cáá tĕ Pèlú xidí-dé, te uu<sup>n</sup>ni ní dáyèhé-xi xití vecaá, te ní danguĩhi ñaha-xi xii-dé, te xăha<sup>n</sup>-xi xii-dé:

—Yáchí, ndácóo —càchí-xi xăha<sup>n</sup>-xi xii-dé.

Te ní ndacóo-dé, te nchaa cadèná ndútú dúcú<sup>n</sup> ndáhá-dě ní nandáxí. <sup>8</sup> Te ní xăha<sup>n</sup> tùcu espíritú-á<sup>n</sup> xii-dé:

—Yáchí, nucuíhnu dóo-n, te ndíhu-n chàu-n —càchí-xi xăha<sup>n</sup>-xi xii-dé.

Te ní ndíhu nuu-dé dóo-dě, te ní xăha<sup>n</sup> tùcu espíritú-á<sup>n</sup>:

—Candixi dóo-n, te na quíhí<sup>n</sup>-ó —càchí-xi xăha<sup>n</sup>-xi xii-dé.

<sup>9</sup> Te té Pèlú ní chinchícú<sup>n</sup>-dé espíritú-á<sup>n</sup>, te ñá ní cùtnuní iní-dé nŭu ndáá ì<sup>n</sup> espíritú xínú cuèchi núú Yă Ndiõxí duca<sup>n</sup> quide àdi ñáhá, te dàcoto ñaha-xi xii-dé ní saní iní-dé. <sup>10</sup> Te ndëndaha-ni-dě espíritú-á<sup>n</sup> cuăhá<sup>n</sup> ní yáha-dé năcuáa xĩnutní sandàdú, te ta yăha-gá-dé núú

ndécú dáva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáhá<sup>n</sup> ndéé xití ñuú, te ní nacaá<sup>n</sup> méé yèhe-á<sup>n</sup>, te ní quee-dé cuáhá<sup>n</sup>-dé ndihí espíritú-á<sup>n</sup>. Te ní tnahá-dé ñ<sup>n</sup> tnuú, te yàcá<sup>n</sup> ní dándóo ñaha espíritú-á<sup>n</sup> xii-dé. <sup>11</sup> Te dătnùní ní nene váha saní núú-dě, te ní cutnùní iní-dé, te ní cachí-dé:

—Ndáá sá Yă Ndiöxí ní tendaha-gă espíritú-ă<sup>n</sup> ní quixi-xi ní dácăcu ñaha-xi xì-í cuendá sá và cáhni ñaha té Hèrodés. Te dava ñáyiú isràél ío ní cudíí iní-yu cuendá sá ñ cuiní té Hèrodés cahni ñaha-dě xii-í —duha ní cachí-dé sátá ñ cutnùní iní-dé.

<sup>12</sup> Te sátá ñ cutnùní iní-dé sá ñ cácu-dé, te cuáhá<sup>n</sup>-dé vehe ñ<sup>n</sup> ñaha nàni Mariá năná tē Juáá, àdi Mácú chi úú dïu-dé, te xía<sup>n</sup> ndécú vâi-yu càhá<sup>n</sup> ndihí-yu Yă Ndiöxí. <sup>13</sup> Te té Pèlú ní quexiò-dé ndéé yuyèhe ní dácásá<sup>n</sup>-dě, te ní quixi ñ<sup>n</sup> xíchí nání Ròdé ní quixi ndehe-xi nă cúú ñăyiú dăcasa<sup>n</sup>. <sup>14</sup> Te ní nucúhu<sup>n</sup> ndudú-xi sá díú tē Pèlú, te ní cudíí víhí iní-xi, dico ñá ní nacaá<sup>n</sup>-xi yuyèhe. Te ní quene cunu-xi cuáhá<sup>n</sup> ngúñaha-xi xii-yu sá nútníí té Pèlú yuyèhe ndaa quehé. <sup>15</sup> Te ñá ní sàndáá iní-yu tnúhu ní cáhá<sup>n</sup>-xi, te xăhă<sup>n</sup>-yu xii-xi:

—jNá tnúhu vîhi cáhá<sup>n</sup>-ö<sup>n</sup> xíchí lùcú! —càchí-yu xăhă<sup>n</sup>-yu.

Te xăha<sup>n</sup>-xi să ndáá nútníí-dé, te xăhă<sup>n</sup>-yu:

—Ñá díú tē Pèlú chi espíritú sá xító ñaha xii-dé cúú să càhá<sup>n</sup> —càchí-yu xăhă<sup>n</sup>-yu xii-xi.

<sup>16</sup> Te òré duca<sup>n</sup> xïtnàhá-yu, te té Pèlú ní dácásá<sup>n</sup> tùcu-dé yuyèhe. Te ní sáhá<sup>n</sup>-yu ní nacaá<sup>n</sup>-yu yuyèhe, te ní xiní-yu sá díú tē Pèlú, te ní cuñúhu

vìhí-yu. <sup>17</sup> Te ní quide-dé ndaha-dé núũ-yu cuendá cadí-yu yuhú-yu. Te ní ngüíta-dé ní cani-dé cuendú nàcuáa ní quide ñaha Yă Ndiõxí xii-dé sá ñí dácăcu ñaha ñ<sup>n</sup> espíritú xínú cuèchi núú-gă xii-dé vecaá, te ní xáha<sup>n</sup>-dě xií-yu:

—Cúu-ndo tĕ Jàcobó ndihí dava-gá ñáyiu sàndáá iní tnúhu Jèsús nàcuáa ní quide ñaha Yă Ndiõxí xii-í —càchí-dé xăha<sup>n</sup>-dě xií-yu.

Te sátá dúcá<sup>n</sup> ñí xáha<sup>n</sup>-dě, te ní quee-dé cuáhá<sup>n</sup>-dé ingá xichi.

<sup>18</sup> Te sátá ñí túndaá, te ní ngüíta nchaa sandàdú càhá<sup>n</sup> ñ<sup>n</sup> càhá<sup>n</sup> ñ<sup>n</sup>-güedé, te xĭtnàha-güedé:

—Ñá túú-gă té Pèlú yíhí vècaá, ¿te nása cada-o-i? —càchí-güedé xĭtnàha-güedé.

<sup>19</sup> Te té Hèrodés ní tendaha-dĕ tĭtní sandàdú cuáhá<sup>n</sup>-güedé cuánúndúcú ñàha-güedé, te ñá ní nàníhí ñáhá-güedĕ xii-dé. Te dătnùní ní cana-dé sandàdú cue téé ní xindeé ñáhá xì té Pèlú, te ní tenàá ñáhá-dĕ xii-güedé, te ní xáha<sup>n</sup>-dě xii dava-gá cue sandàdú-dé:

—Cahni-ndo cuè téé-ă<sup>n</sup> —càchí té Hèrodés xăha<sup>n</sup>-dě.

Te dătnùní ní quee té Hèrodés distrítú Jùdeá cuáhá<sup>n</sup>-dé ñuú Cèsareá, yàcá<sup>n</sup> ní ngúndecu-dé.

### *Ní xĭhí té Hèrodés*

<sup>20</sup> Té Hèrodés ní cudéé<sup>n</sup>-dě núú ñáyiu ñuú Tírú ndihí núú ñáyiu ñuú Sìdón. Te xĭă<sup>n</sup> ní ndatnúhu-yu ní cuu ñ<sup>n</sup>nuu tnúhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndihí ñáhá-yu xii-dé, te ní ndatnúhu ndihí-yu té Blàstú. Te téé-á<sup>n</sup> cúú-dĕ chiu<sup>n</sup> quide-dé núú tĕ Hèrodés, te ní chindee tnúhu ñaha-dĕ xií-yu, chi ní cáhá<sup>n</sup> ndàhú-yu

núú tĕ Hèrodés sá vǎ cǎdá ũhú ñáhá-dĕ xií-yu. Te duca<sup>n</sup> ñí quidé-yu cuendá ñuú té Hèrodés-á<sup>n</sup> quée sǎ xéxǐ-yu. <sup>21</sup> Te ní xáha<sup>n</sup> tĕ Hèrodés ná nduu quǐhí<sup>n</sup>-yu ndatnúhu ndihí ñaha-dĕ xií-yu, te nduu-á<sup>n</sup> ñí quíunuu-dé ì<sup>n</sup> dóó vǎha, ì<sup>n</sup> sá sácuǐhnu tée tàxi tnuní. Te ní ngóo-dé núú xilé váha, xilé sá sácóo nchihi tée tàxi tnuní, te ní ngúíta-dé ní cǎhá<sup>n</sup> sǎhú-dé dóho-yu. <sup>22</sup> Te uu<sup>n</sup>i ní cuáá-yu te cǎchí-yu:

—¡Tée-a cǎhá<sup>n</sup>-dé dico ñá díú tĕe ñuyíú-a cùu-dé chi ndiǒxí cúú-dĕ! —cǎchí-yu xǐtnáhá-yu.

<sup>23</sup> Te ñu-ni òré-á<sup>n</sup> ñí yáha ì<sup>n</sup> espíritú xínú cuèchi núú Yá Ndiǒxí, te ní sǎñaha-xi cuéhé xii té Hèrodés. Te duca<sup>n</sup> ñí tnahá-dé chi mee-dĕ ñá ní xǎha<sup>n</sup>-dĕ sá ñáyiu cùu-dé, te ní cǎhá<sup>n</sup>-yu sá ndiǒxí cúú-dĕ. Te nchìto-gá-dé ní sanú ñáhá tǐndácú xii-dé, te dǎtnùní ní xǐhí-dé.

<sup>24</sup> Te ío tǐtní xichi ní sáhá<sup>n</sup> ñáyiu sándáá iní tnúhu Yá Ndiǒxí ní cǎhá<sup>n</sup>-yu tnúhu-gá, te ío chítú-yu ní sándáá iní-yu tnúhu-gá.

<sup>25</sup> Te té Bèé ndihí té Sàulú ní ndihí chìu<sup>n</sup>-güedé, te ní ndee-güedé ñuú Jerusàlén cuáhá<sup>n</sup>-güedé ndihí té Juáá, àdi Mácú chi úú ñu-dé.

## 13

*Té Bèé ndihí té Sàulú cuáhá<sup>n</sup>-güedé dácuàha-güedé ñáyiu tnúhu Yá Ndiǒxí nchaa ñuú xícá*

<sup>1</sup> Te ñuú Antiòquiá ndécú ì<sup>n</sup> úú cue tée cǎhá<sup>n</sup> tnúhu Yá Ndiǒxí núú nchàa ñáyiu ní sándáá iní-xi tnúhu-gá. Te ndècu tucu ì<sup>n</sup> úú cue tée cùu mestrú dácuàha ñaha-güedé xií-yu tnúhu-gá. Ì<sup>n</sup>-dé nání-dĕ Bèé, te ì<sup>n</sup>-dé nání-dĕ Xímú, te té Xímú-á<sup>n</sup>

xăha<sup>n</sup>-güedě Něgrú chi tnuu-dě. Te ingá-dé nání-dě Lùciú, te téé-án<sup>n</sup> cúú-dě téé ñúú Cirené. Te ingá-dé nání-dě Sàulú, te ingá tucu-dé nání-dě Manàén. Te té Manàén-án<sup>n</sup> ndihí té Hèrodés téé cùu gobiernú Galileá ío váha ní xóo cáhá<sup>n</sup> ndihí tnàha-güedé cútnàhá ní cuu lĩhli-güedé. <sup>2</sup> Te ñ<sup>n</sup> nduu ñá túú nă ní xèxi ñáyiú ní sándáá iní tnúhu Yá Ndiöxí cuendá mee-ni-gă ní cáhá<sup>n</sup> ndihí-yu, te ní xáha<sup>n</sup> Espíritú Yă Ndiöxí xií-yu:

—Tendaha-ndo tě Bèé ndihí té Sàulú quihí<sup>n</sup>-güedé dava-gá ñúú cada-güedé chù<sup>n</sup> tahu-í, chi duca<sup>n</sup> cuiní-í cunduu —càchí Espíritú-gá xăha<sup>n</sup>-xi xií-yu.

<sup>3</sup> Te ní cáhá<sup>n</sup> ndihí tucú-yu Yá Ndiöxí, te ñá túú tnàhí ná ní xèxi tucú-yu, te ní sacá<sup>n</sup> ndodo-güedé ndaha-güedé díquí tě Bèé ndihí té Sàulú. Te sátá dúcá<sup>n</sup> ñí quide-güedé, te ní quide ndee ìní ñáhă-yu xii-güedé.

*Té Bèé ndihí té Sàulú cuáhá<sup>n</sup>-güedé distritú Chìpré cáhá<sup>n</sup>-güedé tnúhu Yá Ndiöxí*

<sup>4</sup> Te té Bèé ndihí té Sàulú ní quee-güedé cuáhá<sup>n</sup>-güedé cuendá duca<sup>n</sup> cuiní Espíritú Yă Ndiöxí cunduu sá cáca cùu-güedé dava-gá ñúú, te ní quexìo-güedé ñúú Selèuciá, te yácá<sup>n</sup> ní quee-güedé bàrcú cuáhá<sup>n</sup>-güedé distritú Chìpré. Te ñúú-án<sup>n</sup> cáá xití làmár chi ndècu ñuhu yichí xití ndute. <sup>5</sup> Te ní quexìo-güedé mei ñúú Salaminá, te ní quene-güedé bàrcú, te ní xica-güedé cuáhá<sup>n</sup>-güedé nchaa veñúhu ñáyiú isràél càhá<sup>n</sup>-güedé tnúhu Yá Ndiöxí. Te cuáhá<sup>n</sup> ndihí-güedé té Juàá cuendá chindee ñàha-dé xii-güedé. <sup>6</sup> Te ní tñi-güedé ichi cuáhá<sup>n</sup>-güedé ñúú Pàfós cáá ndàa ingá xio Chìpré,



te yàcá<sup>n</sup> ní naníhí tnáhá-güedě ndihí ì<sup>n</sup> téé isràèl nání-dě Barjèsús, te téé-á<sup>n</sup> xìní-dé cada ndùu-dé, te càchí-dé sá càhá<sup>n</sup>-dé tnúhu Yá Ndiöxí dico ñá ndàá. <sup>7</sup> Te téé-á<sup>n</sup> quidé chiù<sup>n</sup>-dé ndihí té Sèrgiú, àdi Páblú chi úú dïu-dé, te cùu-dé gobièrnú Chìpré, te ío túha-dé. Te ní cana-dé té Bèé ndihí té Sàulú, chi cuìní-dé cundedóho-dé tnúhu Yá Ndiöxí. <sup>8</sup> Te téé quide nduu-á<sup>n</sup> ñá ní dàña-dé càhá<sup>n</sup>-güedé tnúhu-gá, chi ñá ní cuìní-dé sá tée cùu gobièrnú-á<sup>n</sup> tuha-dé ichi Yá Ndiöxí. Te duca<sup>n</sup> ñí quide té Barjèsús, téé xāha<sup>n</sup>-güedě Èlimás. <sup>9</sup> Te tnáhá tucu té Sàulú ndécú úú dïu-dé chi xāha<sup>n</sup> tùcu-güedé Páblú, te ndècu ndihí-dé Espiritú Yá Ndiöxí. Te ní xíndéhé ñí ñáhá-dě xii téé quide nduu-á<sup>n</sup>. <sup>10</sup> Te ní xáha<sup>n</sup>-dě:

—Yòhó, chi dàtná quidé yùcu ñávāha quide-n chi mee-ni dāndahú-n ñāyiu. Yòhó cúu-n dēhe sácúlná, chi nchaa tnúhu váha cuìní Yá Ndiöxí càhá<sup>n</sup>-yu, te yòhó ñá dáñá-n. <sup>11</sup> Te vitna quini-n nàcuāa cunduu, chi taxi Yá Ndiöxí ì<sup>n</sup> castiú xii-n chi vá cútnùní-gá núú-n càca cuu-n ì<sup>n</sup> úú nduu —càchí-dé xāha<sup>n</sup>-dě xii téé quide nduu-á<sup>n</sup>.

Te òré duca<sup>n</sup> ñí xáha<sup>n</sup> tē Páblú xii-dé, te òré-ni ní cuaa-dé, te ñá túú ní cùtnuní tnàhí-gá núú-dě, te ní xóo nducu-nā-dé ñāyiu ní xóo cuita nehe ñaha xii-dé. <sup>12</sup> Te téé cùu gobièrnú ní xìní-dé nàcuāa ní quide té Páblú, te ío ní cuñúhu-dé. Te ní tnahá iní-dé tnúhu Jèsús, núu xíá<sup>n</sup> ní sándáá iní-dé.

*Té Páblú ndihí té Bèé ndécú-güedě ñuú Antiòquia Pìsidiá*

<sup>13</sup> Te té Páblú ndihí dava-gá cue téé xica cuu ndihí-dé ní quee-güedé bàrcú, te ní quee-güedé ñuú Páfós cuáhá<sup>n</sup>-güedé ñuú Pèrgé, te ñuú-á<sup>n</sup> yíndèhu-xi

distritú Pànfilíá. Te té Juàá ní nacuico-dě ní dándõ ñaha-dě xii-güedé cuánuhú-dé ñuú Jerusalén.

<sup>14</sup> Te dava-gá-güedé ní quee-güedé ñuú Pèrgé cuáhá<sup>n</sup>-güedé ñuú Antiòquiá, te Pìsidiá yíndàha-xi ñuú-á<sup>n</sup>. Te nduu xíndetatú-yu, te ní sáhá<sup>n</sup>-güedé veñúhu ñáyiú isràél, te ní ngóo-güedé xití veñúhu.

<sup>15</sup> Te cue té ndècu veñúhu ní quehe<sup>n</sup>-güedé tutú yódó tnùní nchaa tnúhu sá ñí chídó tnùní ndíi Moisés ndíhi tutú yódó tnùní nchaa tnúhu sá ñí chídó tnùní dava-gá cue té ní xóo cáhá<sup>n</sup> tnúhu Yá Ndiòxí ndéé sanaha, te ní dácúáhá-güedé ní xíndedóho cue ñáyiú, te dǎtnùní cue té yíndaha veñúhu-á<sup>n</sup> ñí xáha<sup>n</sup>-güedé xii té Pǎblú ndíhi dava-gá-güedé:

—Nchòhó cue té cùu ñaní tnáhá-ndǎ, te núu cuìní-ndó cǎhá<sup>n</sup>-ndó tnúhu Yá Ndiòxí, te cuu cáhá<sup>n</sup>-ndó tnàvíí cuèndá cutúha-yu —cǎchí-güedé xáha<sup>n</sup>-güedé.

<sup>16</sup> Te té Pǎblú ní ndacuíñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáhá<sup>n</sup>-dé, te ní xáha<sup>n</sup>-dě:

—Te nchòhó ñáyiú quide nchaa nacuáa càhá<sup>n</sup> Yá Ndiòxí ndíhi nchaa nchòhó ñáyiú isràél, cund-edóho-ndo nchaa-ndo ñ<sup>n</sup> tnúhu na càhá<sup>n</sup>-í-a. <sup>17</sup> Te cuèi ndéé sanduu te cuèi vitna chìndee ñaha-ni Yá Ndiòxí xii nchaa ñáyiú isràél, te ní nacáxi ñaha-gǎ xií-yu te ní chìndee ñàha-gǎ cuèndá cáyá-yu, chi cuìní-gǎ sá cúú vǎi-yu, te duca<sup>n</sup> ñí quide-gǎ cútnàhá ní xíndecú-yu nàció<sup>n</sup> Ègíptú. Te dǎtnùní ní dácǎcu ñaha-gǎ xií-yu ñuú-á<sup>n</sup>, chi mee-gǎ nchaa ndàcu-gǎ quidé-gǎ. <sup>18</sup> Te ní xíndecú-yu ñ<sup>n</sup> xichi núú ñà túú tnàhí sàcúndecu ñáyiú údico cuíá, te

xítí údico cuía-ǎ<sup>n</sup> nǐ cundee ìní-gá nchaa sá nǐ quidé-yu. <sup>19</sup> Te Yá Ndiǒxí ní chindee ñàha-gá xii ñáyiu isràél, te ní dánáǎ-yu úsá nàció<sup>n</sup>, chi cuèndá ní cuiní-gá cuu cuèndá-yu ñuhú-á<sup>n</sup>. <sup>20</sup> Te dàtnùní ní cachí Yǎ Ndiǒxí sá díú-ní cuè téé cùchiu<sup>n</sup> taxi tñuní-güedé nchaa ñáyiu, te duca<sup>n</sup> nǐ quide-güedé dàtná cúmí cièndú dava cuía. Te sátá xǎ<sup>n</sup>, te ní xíndecu té Sàmuél téé ní cáhá<sup>n</sup> tñuhu Yá Ndiǒxí. <sup>21</sup> Te dàvá-á<sup>n</sup> nǐ cuiní ñáyiu isràél sá cúndecu ì<sup>n</sup> téé quíndaha ñàha-dé xii-yu, te Yá Ndiǒxí ní cachí-gá sá tǎ Sàúl quíndaha-dé-yu, te téé-á<sup>n</sup> nǐ cuu-dé déhe té Cís, te té Benjàmín téé ní xíndecu ndéé sanaha-gǎ ní cuu ñaní tñáhá-dě. Te té Sàúl ní xíndaha-dě ñáyiu údico cuía. <sup>22</sup> Te Yá Ndiǒxí ñá ní cuiní-gá cundecu-ni-dé quíndaha-dě ñáyiu, chi ní cuiní-gá sá tǎ Dàvíí ndíhu ndaha-dě cue ñáyiu isràél, te ní cachí-gá: “Ío váha ní tñahá ìní-í nàcuáa quide té Dàvíí déhe téé Isàí, te cada-dé nchaa nàcuáa cúñaha-í xii-dé”, duha ní cachí Yǎ Ndiǒxí —càchí té Pǎblú xǎha<sup>n</sup>-dě xii-yu.

<sup>23</sup> Te ní xáha<sup>n</sup> tùcu té Pǎblú:

—Díu-ni ñaní tñáhá tǎ Dàvíí cúú Jèsús. Te Yá Ndiǒxí ní tendaha-gǎ Jèsús ní quixi-gá ñuyíú-a cuèndá nchaa ñáyiu isràél ná quíndáá ìní ñáhá xii Jesús naníhí tàhú-yu, chi duca<sup>n</sup> nǐ cachí Yǎ Ndiǒxí cunduu. <sup>24</sup> Te cútnáhá vátá ngüíta-gá Jèsús cáhá<sup>n</sup>-gá tñuhu Yá Ndiǒxí, te ní cáhá<sup>n</sup> té Juáá núú ñáyiu isràél sá xíní ñuhu-xi dañá-yu nchaa sá cuèhé sá dúhá, te cuanduté-yu. <sup>25</sup> Te sa ta cùyatni-ni-gá cuú-dé, te ní xáha<sup>n</sup>-dě xii-yu: “Nchòhó càchí-ndó sǎ yǔhú cúú-í Crìstú Yaá ndétú-ndó dico ñáhá, chi ñá díú yǔhú cúú-í Crìstú, chi davitna quixi Crìstú Yaá

tendaha Yă Ndiöxí quixi ñuyíú-a. Te yúhú cúù-í ì<sup>n</sup> té duu<sup>n</sup> duu<sup>n</sup> ñá túú tàú nandaxi cuèdicó chàú-gá dico quide-í chiù<sup>n</sup>-gá”, duha ní cáhá<sup>n</sup> te Juáá —càchí té Păblú xăha<sup>n</sup>-dě xií-yu.

<sup>26</sup> Te ní xáha<sup>n</sup> tucu té Păblú:

—Cundedóho tucu-ndo ìngá tnúhu na càhá<sup>n</sup>-í. Nchòhó tnàhá-ndó cùu-ndo ñaní tnàhá ndii Ábrahám, te xìní-ndó sǎ Yă Ndiöxí cúnù-gá. Te diu-ni-gá cuíní-gá sá ncháá-ndó cundedóho-ndo tnúhu-gá, chi cùu-xi tnúhu sá càhá<sup>n</sup> nàcuáa naníhí tàhú-ndó. <sup>27</sup> Te nchaa ñáyiú ndècu ñuú Jerusàlén ndihi nchaa cue té cùnùu ñá ní cùtnuní iní-yu ndihi-güedé sá Yă Ndiöxí ní tendaha-gă Jèsús ní quixi-gá ñuyíú-a. Te ñá ní sàha-yu cuendá sá díú Jèsús ní cacunehe cue té ní cáhá<sup>n</sup> tnúhu Yá Ndiöxí ndéé sanaha cuèi ní dácuáhă-yu tnúhu-gá veñúhu-yu ndi tnahá úná nduu, nduu ndetàtú-yu. Te ní cachí-yu sá ndècuéchi Jèsús, te ní xáhă<sup>n</sup>-yu sá cáhní ñàha-güedé xii-gá. Te xǎ<sup>n</sup> sa nàha cue té ní xóo cáhá<sup>n</sup> tnúhu-gá ndéé sanaha sǎ dúcá<sup>n</sup> càhá<sup>n</sup>-yu. <sup>28</sup> Te cuèi ñá túú nǎ ní quide-gá te ní xáhă<sup>n</sup>-yu xii té Pilatú té cùu gobiernú sá táuchìu<sup>n</sup>-dé cahni ñaha-güedě xii-gá. <sup>29</sup> Te xǎ<sup>n</sup> nùu ní sata caa ñaha-güedě xii-gá núú cùrúxí. Te ní quide-güedé nchaa nàcuáa ní chídó tnùní cue té ní cáhá<sup>n</sup> tnúhu Yá Ndiöxí ndéé sanaha. Te sáta nì xíhí-gá, te ní nunehe ñaha-güedě xii-gá núú cùrúxí, te nchido ñaha-güedé cuáhá<sup>n</sup>, te ní chihi ñaha-güedě ì<sup>n</sup> xití yaú. <sup>30</sup> Te Yá Ndiöxí ní dándótó-gă Jèsús. <sup>31</sup> Te titní xito ní sáhá<sup>n</sup> Jèsús núú ndécú ñăyiú ní xica cuu ndihi-gá, ñăyiú ní quee distritú Galileá ní sáhá<sup>n</sup>-yu ndihi-gá ñuú Jerusàlén. Te vitna nchaa ñăyiú-á<sup>n</sup>

xăhă<sup>n</sup>-yu xii dava-gá ñăyiu isrâél nàcuáa ní cuu ní ndoto-gá.

<sup>32</sup> Te nchúhú cáhá<sup>n</sup>-ndí nàcuáa cada-ndo nàníhí tàhú-ndó, chi Yá Ndiöxí ní xáha<sup>n</sup>-gă xii cue ñaní tnáhá-ó ñí xíndecu ndéé sanaha sã téndàha-gá Déhe-gá Jèsús quixi-gá ñuyíú-a. <sup>33</sup> Te ní quixi-gá ní xíhí-gá, te ní dándótó ñàha Yá Ndiöxí xii-gá, te núu xíă<sup>n</sup> naníhí tàhú-ó núu na quìndáá iní-ó-gă. Te ì<sup>n</sup> téé ní cáhá<sup>n</sup> tnúhu Yá Ndiöxí ndéé sanaha ñí chídó tnùní-dé núú sàlmú cúú ùú nàcuáa ní cáhá<sup>n</sup> Yă Ndiöxí ní xáha<sup>n</sup>-gă xii Déhe-gá, te duha ní xáha<sup>n</sup>-gă: “Yòhó cúú-n Dêhe-í, te vitna cutnùní iní ñăyiu sá yŭhú cúú-í Tătá-n”, duha ní xáha<sup>n</sup>-gă xii Jèsús. Te ðu-ni duca<sup>n</sup> ñí chídó tnùní téé ní cáhá<sup>n</sup> tnúhu-gá ndéé sanaha. <sup>34</sup> Te ìngá xichi tucu núú tütú-gá ní chídó tnùní ì<sup>n</sup> téé ní xíndecu ndéé sanaha nàcuáa ní xáha<sup>n</sup>-gă xii Déhe-gá, te duha ní xáha<sup>n</sup>-gă: “Mee-ni sã vâha cada ñaha-ï dàtná ní xí-í té Dàvíí”, duha ní xáha<sup>n</sup>-gă. Te duca<sup>n</sup> ñí chídó tnùní téé ní xíndecu ndéé sanaha nàcuáa ní cáhá<sup>n</sup> Yă Ndiöxí, chi òré ní xíhí Jèsús te ní dándótó ñàha-gá cuendá sá vă tíú yìqui cuñú-gá. <sup>35</sup> Te núu xíă<sup>n</sup> duha ní chídó tnùní ì<sup>n</sup> téé ní xíndecu ndéé sanaha núú librú Sălmú nàcuáa ní xáha<sup>n</sup>-dê xii-gá: “Vă dáńá-n sã tíú yìqui cuñú Déhe-n chi ío vâha quide-gá”, duha ní chídó tnùní téé ní xíndecu ndéé sanaha —càchí té Păblú xăha<sup>n</sup>-dê xií-yu.

<sup>36</sup> Te xăha<sup>n</sup> tucu-dé:

—Te té Dàvíí ní quide-dé nchaa chù<sup>n</sup> ní táhú Yă Ndiöxí cada-dé, te dàtnùní ní xíhí-dé. Te ní chindúxi ñaha-güedê xii-dé yatni nàcuáa yîndúxi cue ñaní tnáhá-dê ndéé sanaha-gă, te xíă<sup>n</sup> ñí tēhyú yìqui cùñú-dé. <sup>37</sup> Te Jèsús chi ñá ní tēhyú yìqui

cũnú-gá, chi ní dándótó ñàha Yá Ndiõxí xii-gá.  
<sup>38</sup> Te cuìní-í cachí tnúhu-í xii-ndo cuendá cutnùní iní-ndó nchàa-ndo sá cáda càhnu iní Yá Ndiõxí nchaa cuéchi-o, chi ní xihí Jèsús cuendá naníhí tànhú-ó. <sup>39</sup> Te nchaa ñáyiu na quìndáá iní ñáhá xii Jèsús te cada càhnu iní-gá nchaa sá ñà túú vǎha ní quidé-yu, chi núu mee-ni tnúhu ní chídó tnùní ndíi Moisés ná quìndáá iní-yu te vá nánihí tànhú-yu.  
<sup>40-41</sup> Te ío coto-ndo mée-ndo cuendá sá vǎ yǎha-ndo dàtná ní cachí Yá Ndiõxí yáha cue ñáyiu ñá túú ní quide váha ní xíndecu ndéé sanaha. Te nàcuáa ní cáhá<sup>n</sup>-gá ní chídó tnùní ì<sup>n</sup> téé ní cáhá<sup>n</sup> tnúhu-gá ndéé sanaha, te duha ní xáha<sup>n</sup>-gǎ xií-yu dàvá-á<sup>n</sup>:  
 Cundedóho nchaa nchòhó ñáyiu cuèhé yuhu-xi na càhá<sup>n</sup>-í ì<sup>n</sup> tnúhu te quiní-ndó nǎ cuñúhu-ndo,  
 yúhú quidè-í vǎi núú sǎ ïo váha vitna ndècu-ndo ñuyíú-a,  
 te cuèi na còo ñáyiu cachí tnúhu xii-ndo nàcuáa ndùu nchaa sá vǎha-á<sup>n</sup>, dico nchòhó vá quìndáá iní-ndó,  
 te sá dúcá<sup>n</sup> càda-ndo vá quìndáá iní-ndó, te dàcuíta nihnu-ndo mée-ndo.  
 Duha ní xáha<sup>n</sup>-gǎ xií-yu te duca<sup>n</sup> nǎ chídó tnùní téé ní cáhá<sup>n</sup> tnúhu-gá ndéé sanaha —càchí té Pǎblú xǎha<sup>n</sup>-dè xií-yu.

<sup>42</sup> Te òré ní ndee té Pǎblú veñúhu ñáyiu isràél ndihí cue téé xica cuu ndihí-dé, te ní cáhá<sup>n</sup> ndàhú ñáyiu yihí veñúhu núú-dè sá quihí<sup>n</sup>-dé núú ùná nduu, te ñu-ni tnúhu ní cáhá<sup>n</sup>-dé cáhá<sup>n</sup> tucu-dé òré quexìo-dé. <sup>43</sup> Te sátá nǎ túhú veñúhu-yu, te vǎi ñáyiu isràél ndihí ñáyiu ní chitnahá ñáhá

xii-yu nchìcú<sup>n</sup> nihnu quìde nacuáa quìdé-yu càhá<sup>n</sup> ndihí-yu Yá Ndiöxí cuáhá<sup>n</sup> ndihí-yu té Páblú ndihí té Bèé. Te ní xáha<sup>n</sup>-güedě xií-yu sá vǎ dáñá ndèé-yu canchicú<sup>n</sup> nihnú-yu tnúhu sá càhá<sup>n</sup> nàcuáa quìde Yá Ndiöxí sá cúu-xí-yu.

<sup>44</sup> Te núú ùná nduu, nduu ndètatú-yu ní quexìo vai vihi ñáyiú, chi nihíí ñuú ní quexìo ndedóho-yu tnúhu Yá Ndiöxí. <sup>45</sup> Te cuèndá sá ïo vǎi ñáyiú ní quexìo, núu xǎ<sup>n</sup> ní cuu cuédú ínì ñáhá ñáyiú isràél xii té Páblú, te ní xícuèhé ñáhǎ-yu xii-dé. Te ní xáhá<sup>n</sup>-yu xii-dé sá dándàhú ñáhá-dě xii-yu ndihí tnúhu càhá<sup>n</sup>-dé. <sup>46</sup> Te té Páblú ndihí té Bèé ñá túú ní yùhú ñáhá-güedě xií-yu. Te ní xáha<sup>n</sup>-güedě:

—Xìni ñuhu-xi díhna-gá nchòhó ñáyiú isràél cáhá<sup>n</sup> ndihí-ndí tnúhu Yá Ndiöxí, te mee-ndo ñǎ cuínì-ndó cùndedóho-ndo. Te sá dúcá<sup>n</sup> quìde-ndo, te vǎ nánihí tàhú-ndó, te ni vǎ càhá<sup>n</sup>-gá-ndí tnúhu Yá Ndiöxí núú-ndó, dico cáhá<sup>n</sup>-ndí núú dǎva-gá ñáyiú cuèi ñá díú ñáyiú isràél cùú-yu, <sup>47</sup> chi duca<sup>n</sup> ñǎ táuchíú<sup>n</sup> Yǎ Ndiöxí cada-ndí. Te ní cachí-gá:

Cuínì-í cundecu-ndo dàtná ì<sup>n</sup> tée yòtnuú ñuhú cun-  
decu-ndo  
cǎhá<sup>n</sup>-ndó tnúhu-í núú nchàa ñáyiú ñá túú  
cùndihí-ndo ñáyiú ndècu nihíí ñuyíú, te  
naníhí tàhú-yu,  
duha ní cáhá<sup>n</sup>-gá —càchí té Páblú ndihí té Bèé  
xǎha<sup>n</sup>-güedě xií-yu.

<sup>48</sup> Te ñáyiú ñá túú cùu ñáyiú isràél ïo ní cudíí ínì-yu sá dúcá<sup>n</sup> ñǎ cáhá<sup>n</sup>-güedé, te ní xítناهá-yu sá ïo váha cuáhá<sup>n</sup> tnúhu Yá Ndiöxí. Te mee Yǎ Ndiöxí sa nàha-gá nándi cùu ñáyiú naníhí tàhú, te ñu-ni ñáyiú-á<sup>n</sup> ñǎ sándáá ínì-yu. <sup>49</sup> Te nchaa xichi

xía<sup>n</sup> ñí sáhá<sup>n</sup>-yu ní cáhá<sup>n</sup>-yu tnúhu-gá. <sup>50</sup> Te cue té isràél ní ndatnúhu-güedé ndihí cue té cùnunu, ndihí cue ñáyi dñí cùnunu, te ñáyi dñí-á<sup>n</sup> ñà túú tnàhí cùmání-yu veñúhu. Te ní xáha<sup>n</sup>-güedé sá cádá ùhú-yu té Páblú ndihí té Bèé, te dätñuní cuícú<sup>n</sup> ñáhã-yu xii-güedé, te duca<sup>n</sup> ñí quidé-yu. <sup>51</sup> Te ní casa<sup>n</sup> ñuhu té Páblú ndihí té Bèé sáhá-güedé ní naquidi-güedé tícá chúhmá ñí tní sáhá-güedé. Te duca<sup>n</sup> ñí quide-güedé cuendá cutñuní iní-yu sá ñà túú ní quide váha-yu. Te dätñuní ní quee-güedé cuáhá<sup>n</sup>-güedé ñuú Ìconiú. <sup>52</sup> Te ñáyi ní sándáá iní-xi tnúhu Jèsús ío váha ní cuu iní-yu cuendá sá ñí naníhí tàhú-yu, te ncháá-yu sa ndècu ndihí-yu Espíritú Yã Ndióxi.

## 14

### *Té Páblú ndihí té Bèé ndécú-güedé ñuú Ìconiú*

<sup>1</sup> Te ní quexìo té Páblú ndihí té Bèé ñuú Ìconiú. Te ní sáhá<sup>n</sup>-güedé veñúhu ñáyi isràél, te ío váha ní cáhá<sup>n</sup>-güedé tnúhu Yá Ndióxi, te vai ñáyi isràél ndihí ñáyi ñà túú cùu ñáyi isràél ní sándáá iní-yu tnúhu-gá. <sup>2</sup> Te dava ñáyi isràél ñà ní sándáá iní-yu, te ní cáhá<sup>n</sup> cuèhé-yu cuendá té Páblú ndihí té Bèé cuendá sá vã quìndáá iní ñáyi ñà túú cùu ñáyi isràél. <sup>3</sup> Te ní xíndecu-güedé títñí nduu, te ñà túú tnàhí ni yùhú-güedé ní dácuahá-güedé ñáyi tnúhu Yá Ndióxi. Te mee-gã ní chindee ñàha-gá ní quide-güedé títñí núú sã vã yõ tnàhí ndàcu cada, te ío ní cuñúhu-yu. Te duca<sup>n</sup> ñí quide-gá cuendá cutñuní iní-yu sá ndàá càhá<sup>n</sup>-güedé sá méé-gã ío cùu iní ñáhã-gã xií-yu, te naníhí tàhú-yu



núu na quìndáá iní-yu tnúhu-gá. <sup>4</sup> Te ní quee dava ñáyiu ñuú Ìconiú, davá-yu cùndihí-yu ñáyiu isràél ñáyiu ñá túú sàndáá iní tnúhu Jèsús. Te davá-yu cùndihí-yu cue téé ní táuchíú<sup>n</sup> Jèsús càhá<sup>n</sup> tnúhu-gá. <sup>5</sup> Te ñáyiu isràél ndihí dava-gá ñáyiu ñá túú sàndáá iní-xi ní cuu ì<sup>n</sup>núú-yu ndihí cue téé cùnuu sá cáni-yu-güedé, te cuáha yúú ñáhã-yu xii-güedé. <sup>6</sup> Te té Pãblú ndihí té Bèé ní níhí-güedé tnúhu sá cuení-yu canihá-yu, núu xíã<sup>n</sup> dayuhu ñí quee-güedé cuáhã<sup>n</sup>-güedé ñuú Lìstrá ndihí ñuú Dèrbé. Te ndi ndùú ñuú-á<sup>n</sup> yíndèhu-xi Licaoniá. Te ní sáhã<sup>n</sup>-güedé dava-gá ñuú lìhli càa yatni xíã<sup>n</sup>. <sup>7</sup> Te nchaa ñuú-á<sup>n</sup> ñí cáhá<sup>n</sup>-güedé tnúhu Jèsús.

*Ñuú Lìstrá ní sáha yúú ñáhã-yu xii té Pãblú*

<sup>8</sup> Te ñuú Lìstrá ndécú ì<sup>n</sup> téé yacua, mee-ni nùcòo-dé chi duca<sup>n</sup> tnàhí càa-dé ní cacu-dé. <sup>9</sup> Te ndèdóho-dé tnúhu càhá<sup>n</sup> té Pãblú, te ní cutnùní iní té Pãblú sá ìo sàndáá iní téé yacua-ã<sup>n</sup> sã Yã Ndiòxí cada tátna ñaha-gã xii-dé, núu xíã<sup>n</sup> ní xíndéhé ñaha váha té Pãblú xii-dé. <sup>10</sup> Te té Pãblú ní cáhá<sup>n</sup> níhi-dé, te ní xáha<sup>n</sup>-dè:

—Ndacuíñí cunutnii váha-n —càchí-dé xáha<sup>n</sup>-dè.

Te ní ndacuíñí cunu-dé te ní xica-ni-dé. <sup>11</sup> Te òré ní xiní-yu sá tẽ Pãblú ní quide tátna-dé téé yacua-ã<sup>n</sup>, te ncháa-yu ní cáhá<sup>n</sup>-yu tnúhu mèé-yu tnúhu Licàoniá. Te ní cáhá<sup>n</sup> níhi-yu, te xítnáhã-yu:

—Cue téé-ã<sup>n</sup> sànuu sá ñáyiu cùu-güedé dico ñáhã, chi ndiòxí cúu-güedé te ní quexìo-güedé ñuyíú-a —càchí-yu xítnáhã-yu.

<sup>12</sup> Te ní cachí-yu sá tẽ Bèé cúu-dè ndiòxí dánàní-yu Jüpitér, te té Pãblú cúu-dè ndiòxí dánàní-yu Mèrcuriú, chi cuèndá téé-á<sup>n</sup> cúu-dè

tée càhá<sup>n</sup>. <sup>13</sup> Te càa ì<sup>n</sup> veñúhu yuhu ñùú-á<sup>n</sup> núú quidé càhnú-yu ndiöxí sá dánàní-yu Jüpitér. Te dútú yíndàha veñúhu-á<sup>n</sup> ndécá-dě ì<sup>n</sup> úú ndicutu cuáhá<sup>n</sup> quehé veñúhu, te ñùhu itá dúcú<sup>n</sup>-güedi. Te cue quiti-á<sup>n</sup> cahni-dé cada càhnu-dé ndihí-yu té Bèé ndihí té Páblú ní cùu, chi duca<sup>n</sup> quidé-yu quide cahnú-yu ndiöxí-yu. <sup>14</sup> Te té Bèé ndihí té Páblú ní níhí-güedě tnúhu nàcuáa sàni iní-yu cadá-yu, te ní ndátá-güedě dóó-güedě cuendá cutnùní iní-yu sá ñă tnàhá iní-güedě nàcuáa sàni iní-yu cadá-yu. Te xínu-güedé cuánguihu-güedé tnuú-yu, te níhi ní cáhá<sup>n</sup>-güedé, te xăhá<sup>n</sup>-güedé:

<sup>15</sup> —¿Ná cuendá duca<sup>n</sup> cuiní-ndó càda-ndo? Te ñiu-ni tnàha ñáyiu-ndo cùu-ndí, dìcò-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vă cadá-gă-ndó nàcuáa quide-ndo, te quindáá iní-ndó Yă Ndiöxí, chi ì<sup>n</sup>dii-ni Yá Ndiöxí ndécú. Te ñiu-gá ní cadúha-gá andiu ndihí ñuyúú-a ndihí lâmár ndihí nchaandi túhú sá íó ñuyúú-a. <sup>16</sup> Te ndée sanaha ñí dáñá Yă Ndiöxí ní quidé-yu nàcuáa cuáhá<sup>n</sup> iní méě-yu. <sup>17</sup> Te ní xóo cada-gá sá văha cuendá cutnùní iní-yu sá ño váha iní-gá. Te ñiu-gá dácùu<sup>n</sup>-gá dáú, te tàxi-gá sá nchító-ó chi xìto-gá nchaa tatá xítú-ó, te xíá<sup>n</sup> cúdîî iní-ó ndècu-o ñuyúú-a —càchí té Páblú ndihí té Bèé xăhá<sup>n</sup>-güedě xií-yu.

<sup>18</sup> Te cuëi duca<sup>n</sup> ñí xăhá<sup>n</sup>-güedě nchaa tnúhu-á<sup>n</sup>, dico ío úhú ní sándáá iní-yu ñá ní sàhní-yu ndicutu-á<sup>n</sup> chi cuendá duca<sup>n</sup> tnàhí quidé-yu sàhní-yu ndicutu òré quidé càhnú-yu ndiöxí-yu.

<sup>19</sup> Te ñuú Antiòquia ndihí ñuú Ìconiú xíndecu dava ñáyiu isràél, te ní queé-yu cuáhá<sup>n</sup>-yu ñuú Lìstrá núú ndécú tē Páblú. Te xíá<sup>n</sup> ñí quexió-yu

te ní xáhă<sup>n</sup>-yu xii ñáyiú dii ñúú xía<sup>n</sup> sǎ cáhni-yu té Pǎblú. Te ní sáha yúú ñáhă-yu xii-dé, te ní cáhă<sup>n</sup>-yu sá ñi xihí-dé, te ní tni ñaha-güedě xii-dé, te tàñuhu ñaha-güedé xii-dé cuáhá<sup>n</sup> ñi<sup>n</sup> xio yuhu ñúú ní sá dáquéné ñàha-güedé. <sup>20</sup> Te ní quexiò cue ñáyiú sàndáá iní tñuhu Jèsús núú cātùu-dé-á<sup>n</sup>, te ní nadúcú<sup>n</sup> ndèè ñáhă-yu xii-dé, te ñini xĩnutni-yu-á<sup>n</sup> ñi ndacóo-dé cuánuhú ndihi ñaha tucu-dé xií-yu xití ñúú. Te nduu tñéé-á<sup>n</sup> ñi ndee-dé ndihi té Bèè cuáhá<sup>n</sup>-güedé ñúú Dèrbé.

<sup>21</sup> Te ní cáhá<sup>n</sup>-güedé tñuhu Yá Ndiöxí ñúú-á<sup>n</sup>, te ío vài ñáyiú ní sándáá iní-yu tñuhu-gá. Te dǎtnùní ní quee-güedé cuáhá<sup>n</sup> tucu-güedé ñúú Lìstrá, ndihi ñúú Ìconiú, ndihi ñúú Antiòquia. <sup>22</sup> Te ní xáha<sup>n</sup>-güedé xií-yu sá vǎ dáñá ñìhnú-yu tñuhu Jèsús. Te sá dúcá<sup>n</sup> ñi cáhá<sup>n</sup>-güedé, te vèhi-gá ní cudíí iní-yu cadá-yu nàcuáa cuèní Yá Ndiöxí cadá-yu, te ní xáha<sup>n</sup>-güedé:

—Dacuitíí cùndecu-o ñuyíú-a ndoho-o, te dǎtnùní duca<sup>n</sup> te nacuaca ñaha Yá Ndiöxí xii-o —càchí-güedé xáha<sup>n</sup>-güedé xií-yu.

<sup>23</sup> Te ní sáhá<sup>n</sup>-güedé ndi tnahá ñi<sup>n</sup> ñi<sup>n</sup> xichi núú ndécú ñáyiú dàcuaha tñuhu Yá Ndiöxí, te ní taxi ndecu-güedé cue téè quindaha ñàha xií-yu, te ní cáhá<sup>n</sup> ndihi-güedé Yá Ndiöxí, te ñá túú tñahí ná ní xèxi-güedé cuèndá sá ñi cáhá<sup>n</sup> ndihi-güedé-gá. Te ní xáha<sup>n</sup>-güedé sá Yá Ndiöxí coto ñaha-gǎ xií-yu chi ñi-ni-gá ní sándáá iní-yu.

*Té Pǎblú ndihi té Bèè cuáhá<sup>n</sup> tucu-güedé ñúú Antiòquia Síría*

24-25 Te dătnùní ní quee té Păblú ndihî té Bèé cuáhá<sup>n</sup>-güedé, ní yáha-güedé distrítú Pìsidiá. Te ní quexio-güedé ñuú Pèrgé, xíá<sup>n</sup> ñí cáhá<sup>n</sup>-güedé tnúhu Jèsús. Te ñuú-á<sup>n</sup> yíndèhu-xi Panfiliá. Te dătnùní cuáhá<sup>n</sup>-güedé ñuú Àtaliá. <sup>26</sup> Te yàcá<sup>n</sup> ní quée-güedé bàrcú cuánuhú tucu-güedé ñuú Antiòquiá. Te ñuú-á<sup>n</sup> cúu-xí ñùú núú ñí xícá<sup>n</sup> táhù-yu núú Yă Ndiõxí cuendá sá chíndèe ñaha-gá xii-güedé chù<sup>n</sup> quide-güedé. Te cuendá sá ñí ndihî chù<sup>n</sup>-güedé nchaa ñuú núú ñí sáhá<sup>n</sup>-güedé, núu xíá<sup>n</sup> cuánuhú-na-güedé. <sup>27</sup> Te ní ndexio-güedé ñuú-á<sup>n</sup>, te ní cana-güedé nchaa ñáyiu sàndáá iní tnúhu-gá, te ní cani-güedé cuendú núu-yu nchaa nàcuáa ní cuu núú ñí sáhá<sup>n</sup>-güedé, te xăha<sup>n</sup>-güedé: “Yă Ndiõxí ío ní chindee ñaha-gá xii-ndí ní cáhá<sup>n</sup>-ndí tnúhu-gá núú ñí sáhá<sup>n</sup>-ndí, te mee-gă ní quide sá tnàhá ñáyiu ñá túú cùu ñáyiu isràél ní xíndedóho-yu tnúhu-gá cuendá quíndáá iní-yu”, càchí-güedé xăha<sup>n</sup>-güedé xií-yu. <sup>28</sup> Te vâi nduu ní xíndecu-güedé ñuú Antiòquiá ndihî nchaa ñáyiu ní sàndáá iní tnúhu Jèsús.

## 15

*Ní natacá ñáyiu sàndáá iní tnúhu Jèsús ñuú Jerusàlén*

<sup>1</sup> Te ní quee ì<sup>n</sup> ùú cue té distrítú Jùdeá cuáhá<sup>n</sup>-güedé ñuú Antiòquiá, te ní sáa-güedé, te ní xáha<sup>n</sup>-güedé xii ñáyiu sàndáá iní tnúhu Jèsús sá nùu vá cuăha-güedé sèñá ñî nchaa cue té dâtná ní cachí ndíi Moisés, te vá nánhí tàhú-güedé. <sup>2</sup> Te sá dúcá<sup>n</sup> ñí cáhá<sup>n</sup> cue té-á<sup>n</sup>, te ní ngúita té Păblú ndihî té Bèé ní tenáa-güedé cue té-á<sup>n</sup>, chi

dandàhú ñáhá-güedě cuìní-güedé ní cùu. Te nchaa ñáyiú sàndáá iní tnúhu-gá ní cachí-yu sá quihí<sup>n</sup> té Páblú ndihí té Bèé ndihí ì<sup>n</sup> ùú-gá-güedé ñuú Jerusàlén. Te yàcá<sup>n</sup> cada-güedé ì<sup>n</sup> jùndá ndihí mee-ni cuè téé ní táuchíú<sup>n</sup> Jèsús càhá<sup>n</sup> tnúhu-gá, ndihí cue téé yìndaha ñáyiú sàndáá iní tnúhu-gá ñuú-á<sup>n</sup>, te jùndá-á<sup>n</sup> cada ndáá-güedé tnúhu ní cáhá<sup>n</sup> cue téé ní sáá ñuú Antiòquia.

<sup>3</sup> Te nchaa ñáyiú sàndáá iní tnúhu-gá ní quide ndee ìní ñáhà-yu xii-güedé, te ní tñi-güedé ichi cuáhá<sup>n</sup>-güedé. Te ní yáha-güedé distritú Fèniciá ndihí distritú Sàmariá, te yàcá<sup>n</sup> ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí ìní nchaa ñáyiú ní xíndedóho-á<sup>n</sup>.

<sup>4</sup> Te té Páblú ndihí té Bèé ní ndexìo-güedé ñuú Jerusàlén, te ío ní cudíí ìní-yu sá ñí ndexìo váha-güedé. Te ndècu dava-gá cue téé ní táuchíú<sup>n</sup> Jèsús dácuaàha ñaha xií-yu tnúhu-gá, ndihí cue téé yìndaha ñaha xií-yu, ndihí dava-gá ñáyiú sàndáá iní tnúhu-gá, te ní caní-güedé cuèndú núú-yu nàcuáa ní quide Yá Ndiòxí ní chindee ñaha-gá xii-güedé ní quide-güedé chiu<sup>n</sup>-gá. <sup>5</sup> Te ndècu ì<sup>n</sup> úú cue téé ní tuha ichi Yá Ndiòxí, te cue téé-á<sup>n</sup> cúú-güedě cue téé fariséú, te ní ndacuíñí-güedé, te ní xáha<sup>n</sup>-güedě:

—Dacuitíí xini ñuhu-xi sá cuàha-güedé sèñá ñií cue téé cùmání cue téé ñá túú cùu ñáyiú isràél, te cùñaha-ndo sã ná cádá-güedě nchaa nàcuáa ní chídó tnùnì ndí Moisés —càhí cue téé cùu fariséú-á<sup>n</sup> xáha<sup>n</sup>-güedé xii-güedé.

<sup>6</sup> Te cue téé ní táuchíú<sup>n</sup> Jèsús dácuaàha ñaha xii ñáyiú tnúhu-gá, ndihí cue téé yìndaha ñáyiú

sàndáá iní tnúhu-gá ní quide-güedé jùndá cuendá ní ndatnúhu-güedé nása cunduu. <sup>7</sup> Te vài vihi tnúhu ní cáhá<sup>n</sup>-güedé. Te té Pèlú ní ndacuíñí-dé, te ní xáha<sup>n</sup>-dě xii-güedé:

—Nchòhó cue téé ndècu ndihí-í ichi Xítohó Jesucristú, chí cùndèdóho ì<sup>n</sup> tnúhu na càhá<sup>n</sup>-í-a. Sa nàha-ndo sá nì cachí Yá Ndiöxí sá ñú-í cáhá<sup>n</sup>-í tnúhu Jèsús núú ñáyiú ñá túú cùu ñáyiú isràél cuendá sá quíndáá iní-yu, te naníhí tàhú-yu. <sup>8</sup> Dico Yá Ndiöxí sa nàha-gá nása càa iní ì<sup>n</sup> ì<sup>n</sup> ñáyiú. Te cùtnuní iní-ó sã cùú iní ñáhá-gã xii cue ñáyiú ñá túú cùu ñáyiú isràél, chí ní sáñaha-gã Espíritú-gá ndécú ndihí-yu dàtná cuìní-ndó nì taxi-gá ndécú ndihí nchoo. <sup>9</sup> Chí Yá Ndiöxí ì<sup>n</sup>nuu-ni cùu iní ñáhá-gã xii-o nchàa-o ndihí cue ñáyiú ñá túú cùu ñáyiú isràél, chí tnàhá-yu ní xócání-gã nchaa sá cuèhé sá dúhá nì xóo cadá-yu ndéé òré ní sándáá iní-yu Jèsús. <sup>10</sup> ¿Te ná cuendá nchòhó cuìní-ndó càda ñáyiú ní sándáá iní tnúhu-gá ì<sup>n</sup> sá ñá tnàhá iní-gá sá cadã-yu? Te cuìní-ndó dàndoho-ndó-yu. Te nì nchòo te nì cue ñaní tnáhá-ó nì xíndecu ndéé sanaha ñá ní ndàcú-yu cadá-yu nchaa xíá<sup>n</sup>. <sup>11</sup> Te vá dúcá<sup>n</sup> cãhá<sup>n</sup>-ndó, chí sa nàha-ndo sá Yá Ndiöxí ní cundàhú iní ñáhá-gã xii-o, te dió duca<sup>n</sup> nì quide-gá sá naníhí tàhú-ó nchàa-o. Te ñiu-ni duca<sup>n</sup> nì quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáha<sup>n</sup>-dě xii-güedé. <sup>12</sup> Te dàtnuní té Bèé ndihí té Pàblú ní ngüíta-güedé ní cáhá<sup>n</sup>-güedé, te ní xíndedóho-yu nchaa tnúhu ní cáhá<sup>n</sup>-güedé. Te ní xáha<sup>n</sup>-güedé xii-yu nàcuáa ní chindee ñàha Yá Ndiöxí xii-güedé, te ní quide-güedé vài núú sã vã yõo tnàhí ndàcu cada, te duca<sup>n</sup> te ní cutnùní iní ñáyiú ñá túú cùu

ñáyiú isràél sá ndàà càhá<sup>n</sup>-güedé. <sup>13</sup> Te òré ní ndihí cuèndú ní cáhá<sup>n</sup>-güedé, te té Jàcobó ní xàhá<sup>n</sup>-dě:

—Nchòhó cue téé ndècu ndihí-í ichi Xítóhó Jesucristú, chí cùndèdóho ì<sup>n</sup> tnúhu na càhá<sup>n</sup>-í-a.

<sup>14</sup> Té Xímú, àdi Pelú chí úú òú-dé, ní cani-dé cuèndú nàcuáa ní quide Yá Ndiòxí ndéé díhna ní dáquée ò<sup>n</sup>-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuèndá cuìní-gá chiñuhu ñàhá-yu xii-gá. <sup>15</sup> Te dàtnùní ní cáhá<sup>n</sup>-dé nàcuáa ní cáhá<sup>n</sup> Yá Ndiòxí ndéé sanaha. Te duha ní chídó tnùní cue téé ní xóo cáhá<sup>n</sup> tnúhu-gá ndéé sanaha nàcuáa ní cáhá<sup>n</sup>-gá, te duha ní cachí-gá:

<sup>16</sup> Dàtná cuìní-ndó cùu ì<sup>n</sup> vehe ní sáá te ní ngoyo te dàndaa-güedé xito cùu uú, duca<sup>n</sup> sàtnahá-xi cada-xi ì<sup>n</sup> nduu,

chí ñaní tnáhá ndíi Dàvíí ní xóo cáhá<sup>n</sup> ndihí ñàhá-yu xii-í ní cùu, te ní dáñá ndèé-yu ichi-í,

te na quèxi-í te natuha ñaha tùcú-yu.

<sup>17</sup> Te duca<sup>n</sup> te vài ñáyiú ñá túú cùu ñáyiú isràél nandùcú-yu ichi-í te cáhá<sup>n</sup> ndihí ñàhá-yu.

<sup>18</sup> Duha ní cáhá<sup>n</sup> Yá Ndiòxí, te duca<sup>n</sup> ní chídó tnùní cue téé ní xóo cáhá<sup>n</sup> tnúhu-gá ndéé sanaha —càchí té Jàcobó xàhá<sup>n</sup>-dě xii-güedé.

<sup>19</sup> Te xàhá<sup>n</sup> tùcu-dé:

—Yúhú càchí iní-í sá vǎ cúú dàsatú-ó iní nchaa ñáyiú ta sàndáá iní-xi tnúhu Yá Ndiòxí, ñáyiú ñá túú cùu ñáyiú isràél, te ì<sup>n</sup> ùú-ni tnúhu cúñaha-o nàcuáa cadá-yu. <sup>20</sup> Dico xini ñuhu-xi daquihí<sup>n</sup>-ó tütú cúñaha-o sǎ vǎ cáxí-gǎ-yu nchaa sá nchító-ó ndùu táhú nchaa sá càchí-yu cùu ndiòxí-yu. Te cúñaha-o sǎ vǎ càhá<sup>n</sup> ndihí cue téé ñadìhí te núu ñá díú ñadìhí-güedé cúú-yu, te ni cue ñáyiú dìhí vǎ càhá<sup>n</sup> ndihí-yu téé te núu ñá díú yǐ-yu cùu-güedé,

te vá cáxǐ-yu cuñú quiṭi cuèhné, te vá cáxǐ-yu níñí. <sup>21</sup> Te duca<sup>n</sup> cǔñaha-o, chi ndi tnahá ñuú núú ndécǔ-yu, te xǐndecu ñáyiu isràél dácuahá-yu tnúhu ní chídó tnùnǐ ndí Moisés, te ndi tnahá nduu ndètatú-yu dàcuahá-yu tnúhu ndí veñúhu-yu —càchí té Jàcobó xǎha<sup>n</sup>-dě xii-güedé.

<sup>22</sup> Te dǎtnùnǐ cue téé ní táuchíú<sup>n</sup> Jèsús dacuaḥa ñaha xii-yu tnúhu-gá, ndihǐ cue téé yǐndaha ñáyiu sàndáá iní tnúhu-gá ní cachí-güedé sá ndúcú-güedé ñ<sup>n</sup> úú-gá cue téé quihǐ<sup>n</sup> ndihǐ té Pǎblú ndihǐ té Bèé ñuú Antiòquiá, te diu-ni duca<sup>n</sup> ñǐ cáhá<sup>n</sup> dava-gá ñáyiu ndècu ichi-gá. Te úú cue téé ní ndúcú-güedé, ñ<sup>n</sup>-dé nání-dě Silás, te ñ<sup>n</sup>-dé nání-dě Jùdás, àdi Barsabás chi úú diu-dé, te cùnuu-güedé ndi ndùú-güedé. <sup>23</sup> Te ní cadúha nchaa cue téé cùnuu tutú canehe-güedé quihǐ<sup>n</sup>, te duha càhá<sup>n</sup>-xi:

“Cováha díí-ndó nchàa-ndo. Nchúhú cue téé ní táuchíú<sup>n</sup> Jèsús cáhá<sup>n</sup>-ndí tnúhu-gá, ndihǐ cue téé yǐndaha cue ñáyiu sàndáá iní tnúhu-gá quide ndee iní ñáhá-ndǐ xii nchòhó cue ñáyiu ndècu ndihǐ-ndí ichi-gá cuèi ñá díú ñáyiu isràél cúú-ndó. Te nchòhó ñáyiu xǐndecu ñuú Antiòquiá, ndihǐ nchòhó ñáyiu ndècu distritú Siriá, ndihǐ nchòhó ñáyiu ndècu distritú Cìliciá, càchí tnúhu-ndí xii-ndo sǎ <sup>24</sup> ñǐ níhǐ-ndǐ tnúhu sá ñ<sup>n</sup> úú cue téé ndècu iha ní quixi-güedé núú ndécú-ndó, te ñá túú chiu<sup>n</sup> ñǐ tahu-ndí quixi-güedé. Te sá ñ<sup>n</sup> tnúhu ní cáhá<sup>n</sup>-güedé ní xáha<sup>n</sup>-güedé xii-ndo sǎ ngǔndecu sèñá ñ<sup>n</sup>-ndo, te canchicú<sup>n</sup> nihnu-ndo nchàa nacuaá ní chídó tnùnǐ ndí Moisés, te xǐǎ<sup>n</sup> ní sani ñ<sup>n</sup> ní sani úú iní-ndó, chi ñá túú xìní-ndó nǔu ndáá tnúhu càhá<sup>n</sup>-güedé



àdi ñá ndàá. <sup>25</sup> Te ní ndatnúhu-ndí nàcuáa cunduu sá téndàha-ndí úú cue téé quixi-güedé ndihí té Bèé ndihí té Pàblú, cue téé ío cùu iní-ndí, te cue téé-án cáhán-güedé nàcuáa cáhán-ndí-a. <sup>26</sup> Te ñiu-ni té Bèé ndihí té Pàblú ní sáhán-güedé ní cáhán-güedé tnúhu Xítóhó Jesucristú nchaa xichi. Te ndi tnahá cuáhán-güedé cuíní-yu cahni ñàhá-yu xii-güedé. <sup>27</sup> Te tendaha-ndí té Jùdás ndihí té Silás quixi-güedé tnahá-güedé cachí tnúhu váha-güedé nàcuáa cuáhán tnúhu cáhán-ndí. <sup>28</sup> Te ñiu-ni duca<sup>n</sup> cáhán-ndí cächí tnúhu-ndí nàcuáa cáhán Espíritú Yă Ndiöxí cada-ndo, chi nchúhú vá cáhán-ndí sá cádá-ndó nchàa sá ñí cáhán ndí Moisés cada ñáyiú, chi ío úhú, te vá yôo ndacu cada. Te vitna na cáhán-ndí ñí ùú-ni tnúhu nàcuáa cada-ndo. <sup>29</sup> Vá cáxí-ndó sã nchító-ó ndùu táhú nchaa sá cächí ñáyiú cùu ndióxí-yu, te vá cáxí-ndó ñíí, te vá cáxí-ndó cùñú quití cuèhné, te vá cáhán ndihí cue téé ñàdihí te núu ñá díú ñàdihí-güedé cúú-yu, te ni cuè ñáyiú ñíí vá cáhán ndihí-yu téé te núu ñá díú yíí-yu cùu-güedé. Te núu na càda-ndo nchaa nacúáa cáhán-ndí-a, te cada váha-ndo. Te vitna ío cada ndee ñí-ndó nchàa-ndo-na.” Duha ní chídó tnúni-güedé núu tütú ní tendaha-güedé cuáhán.

<sup>30</sup> Te ní quide ndee ñí-yu cue téé quíhí<sup>n</sup> ñúú Antiòquia, te duca<sup>n</sup> te ní xica-güedé cuáhán-güedé. Te òré ní quexìo-güedé ñúú-án, te ní cana-güedé nchaa ñáyiú sàndáá iní tnúhu Jèsús, te ní sáñaha-güedé tutú xii-yu. <sup>31</sup> Te ní dácuáhã-yu tutú ní sáñaha-güedé-án, te ní cudíí víhí ñí-yu chi ío váha cáhán tutú-án. <sup>32</sup> Te té Jùdás ndihí té Silás

tnàhá-güedé ní nduu táhú-güedě cáhá<sup>n</sup>-güedé tnúhu sá dácàhu iní ñáhá Yă Ndiôxí. Te ní xáha<sup>n</sup>-güedě vâi tnúhu nàcuáa cadá-yu, te vîhi-gá ní cudíí iní-yu cadá-yu nàcuáa càhá<sup>n</sup> Yă Ndiôxí cadá-yu. <sup>33</sup> Te ní xíndecu-güedé ì<sup>n</sup> úú nduu ndihí-yu, te dâtnùní ní quide ndee iní ñáhă-yu xii-güedé cuendá sá nùhú-güedé núú vëxi-güedé, te mee-ni tē Jùdás cuánuhú-dé. <sup>34</sup> Te té Silás ní xáha<sup>n</sup>-dē sá vă nùhú-ni-dé. <sup>35</sup> Te té Păblú ndihî té Bèé ní ndóo-güedé ní cáhá<sup>n</sup>-güedé tnúhu Yă Ndiôxí ñúú Antiòquia, te vâi-gá tucu ñáyiú Antiòquia ní cáhá<sup>n</sup>-yu tnúhu-gá.

*Xito cùu uú cuáhá<sup>n</sup> té Păblú càhá<sup>n</sup>-dé tnúhu Yă Ndiôxí núú ñáyiú*

<sup>36</sup> Te sátá ñí cuu cuéhé nduu, te ní xáha<sup>n</sup> tē Păblú xii té Bèé:

—Na quihí<sup>n</sup>-ó nchàa ñúú núú ñí sáhá<sup>n</sup>-ó ñí cáhá<sup>n</sup>-ó tnúhu Yă Ndiôxí cáhá<sup>n</sup> ndihî-o nchàa ñáyiú ní tuha ichi-gá cuendá quiní-ó ñúú ndècu váha-yu —càchí-dé xáha<sup>n</sup>-dē.

<sup>37</sup> Te té Bèé ní xáha<sup>n</sup>-dē sá quihí<sup>n</sup> ndihî-güedé té Juàá, àdi Mácú chi úú dîu-dé. <sup>38</sup> Dico té Păblú ñá ní dàña-gá-dé quihí<sup>n</sup> té Juàá, chi ní dándôo ñaha-dē xii-güedé cútnáhá ní xíndecu-güedé Pànfiliá, te ní nacuico-dē cuánuhú-dé, te ñá túú-gă ní sáhá<sup>n</sup> ndihî ñaha-dē xii-güedé. <sup>39</sup> Xíá<sup>n</sup> ní cuu ní tenáa tnáhá tē Bèé ndihî té Păblú, te ichî càa ichi caa ní cuu-güedé. Te té Bèé ndihî té Mácú ní quée-güedé bàrcú cuáhá<sup>n</sup>-güedé Chìpré. <sup>40</sup> Te té Păblú ní xáha<sup>n</sup>-dē xii té Silás sá quihí<sup>n</sup> ndihî ñaha-dē, te ñáyiú sàndáá iní-xi tnúhu Jèsús ní cáhá<sup>n</sup> ndihí-yu Yă Ndiôxí sá chíndèe ñaha-gá xii-güedé. <sup>41</sup> Te ní xica-güedé

cuáhá<sup>n</sup>-güedé te ní yáha-güedé nihíi distritú Sìriá ndihí distritú Cìlicíá. Te ní cáhá<sup>n</sup>-güedé tnúhu Jèsús núu nchaa ñáyiú ní sándáá iní tnúhu-gá, núu xíá<sup>n</sup> ío-gá ní cudíi iní-yu cadá-yu nàcuáa càhá<sup>n</sup> Yá Ndiöxí.

## 16

*Tnàhá té Timùteú cuáhá<sup>n</sup> ndihí-dé té Päblú ndihí té Sìlás*

<sup>1</sup> Te té Päblú ndihí té Sìlás cuáhá<sup>n</sup>-güedé ñuú Dèrbé ndihí ñuú Lìstrá, te ñuú Lìstrá yàcá<sup>n</sup> ndécú ñi<sup>n</sup> téé nàni Timuteú. Te téé-á<sup>n</sup> sándáá iní-dé tnúhu Jèsús, te tnàhá náná-dě sándáá iní-a<sup>n</sup> tnúhu-gá, te ñaha isràél cúu-á<sup>n</sup>, te téé griégú cúu tătă-dě.

<sup>2</sup> Te nchaa ñáyiú ní sándáá iní tnúhu-gá ñáyiú ndècu ñuú Lìstrá, ndihí ñáyiú ñuú Ìconiú, nchaa ñáyiú-á<sup>n</sup> cudíi iní-yu nàcuáa quide-dé. <sup>3</sup> Te ní cuiní té Päblú sá tnàhá té Timùteú quíhí<sup>n</sup> ndihí-dé dava-gá ñuú, núu xíá<sup>n</sup> díhna-gá señá ní sáha té Päblú ñi<sup>n</sup> té Timùteú, chi ñá ní tnàhá iní té Päblú sá càhá<sup>n</sup> cuèhé ñáyiú isràél cuendá té Timùteú. Te nchaa ñáyiú isràél ndécú ñuú-á<sup>n</sup> xìní-yu sá tée griégú cúu tătă-dě, te ñá díú tée isràél cúu-dě, te xíá<sup>n</sup> ní sáha té Päblú señá ñi<sup>n</sup> té Timùteú. <sup>4</sup> Te ndi tnahá ñuú ndi tnahá ñuú cuáhá<sup>n</sup>-güedé càhá<sup>n</sup> ndihí-güedé nchaa ñáyiú ní sándáá iní tnúhu Jèsús. Te ní xáha<sup>n</sup>-güedé nàcuáa càhá<sup>n</sup> tutú ní cadúha cue téé ní táuchíú<sup>n</sup> Jèsús dacuàha ñaha xií-yu tnúhu-gá, ndihí cue téé yindaha ñáyiú sándáá iní tnúhu-gá ñuú Jerusàlén. <sup>5</sup> Te cuendá duca<sup>n</sup> ñi sáhá<sup>n</sup>-güedé nchaa ñuú núu ndécú ñáyiú sándáá iní tnúhu-gá ní dácuáhá ñaha-güedé xií-yu, núu xíá<sup>n</sup> tá cùu

túha-gá-yu tnúhu Yá Ndiöxí, te vai-gá-yu ní tuhá-yu ichi-gá.

*Ní dácótó ñàha-xi xii té Păblú sá nǐ xini-dé ì<sup>n</sup> té distritú Macèdoniá*

<sup>6</sup> Te ñá ní dàña Espíritú Yă Ndiöxí quíhí<sup>n</sup>-güedé cáhá<sup>n</sup>-güedé tnúhu-gá distritú Àsiá, núu ní sáhá<sup>n</sup>-güedé distritú Frigiá ndihí distritú Gàlaciá cáhá<sup>n</sup>-güedé tnúhu-gá. <sup>7</sup> Te ní sáá-güedé yuhu distritú Misiá. Te quíhí<sup>n</sup>-güedé distritú Bitiniá ní cùu, dico ñá ní dàña Espíritú Yă Ndiöxí quíhí<sup>n</sup>-güedé yàcá<sup>n</sup>. <sup>8</sup> Te ní yáha-güedé Misiá, te ní quexìo-güedé ñuu Tròás, te yàcá<sup>n</sup> ní nanítnáhá-ndí ndihí-dé. <sup>9</sup> Te ì<sup>n</sup> niú ní dácótó-xí nǔú tẹ Păblú sá nǐ xini-dé ì<sup>n</sup> té distritú Macèdoniá nútñi-dé, te ní xáha<sup>n</sup> tẹe-á<sup>n</sup> xii té Păblú: “Cada ndee iní-n quíhí<sup>n</sup>-n Macedoniá chi dacuàha ñaha-n nchaa sá xini-n”, càchí-dé xáha<sup>n</sup>-dẹ, ní dácótó ñàha-xi xii té Păblú. <sup>10</sup> Te cuendá sá dúcá<sup>n</sup> nǐ dácótó ñàha-xi xii té Păblú nǔu ní ndatnúhu-ndí quíhí<sup>n</sup>-ndí Macèdoniá, chi ní cutnùní iní-ndí sá cáná ñàha Yá Ndiöxí quíhí<sup>n</sup>-ndí cáhá<sup>n</sup>-ndí tnúhu-gá núú ñăyiu yàcá<sup>n</sup>.

*Té Păblú ndihí té Silás ndécú-güedě ñuu Filipú*

<sup>11</sup> Te ní quée-ndí bàrcú ñuu Tròás, te cuáhán ndáá-ndí ñuu Samòtraciá, te yàcá<sup>n</sup> ní quexìo-ndí, te ní yáha-ni-ndí cuáhán-ndí. Te nduu tněé ní quexìo-ndí ñuu Nèápolís. <sup>12</sup> Te yàcá<sup>n</sup> ní quene-ndí bàrcú, te xìca-na-ndí cuáhán-ndí ñuu Filipú te ñuu-á<sup>n</sup> yíndèhu-xi distritú Macèdoniá. Te yàcá<sup>n</sup> ní cudíi-ndí ní xíndecu tnaa-ndí. Te ñuu Filipú-á<sup>n</sup> ño cùnuu-xi, chi ío chitu ñăyiu ròma ní ngóo-yu. <sup>13</sup> Te

nduu ndetàtú-yu ní quee-ndí ñuú cuáhá<sup>n</sup>-ndí ñ<sup>n</sup> xio yuhu yũte, chí yàcá<sup>n</sup> sàhá<sup>n</sup>-yu càhá<sup>n</sup> ndihí-yu Yá Ndiöxí. Te òré ní quexìo-ndí, te ní naníhí tnáhá-ndí ndihí mee-ni ñáyiú ðihí, te ní cáhá<sup>n</sup>-ndí tnúhu Yá Ndiöxí ní xíndedóho-yu. <sup>14</sup> Te ndècu ñ<sup>n</sup> ñaha nani Lidiá ní xíndedóho-a<sup>n</sup> nàcuáa ní cáhá<sup>n</sup>-ndí, te ñaha ñuú Tiàtirá cúú-á<sup>n</sup>, te dico-a<sup>n</sup> dóo murádú, te ío càhá<sup>n</sup> ndihí-a<sup>n</sup> Yá Ndiöxí. Te ðiu-ni mee Yá Ndiöxí ní chindee ñaha-gá ní sándáá iní-a<sup>n</sup> tnúhu ní cáhá<sup>n</sup> té Páblú. <sup>15</sup> Te ní sandute-a<sup>n</sup> ndihí landú-a<sup>n</sup>, ndihí nchaa ñáyiú xínu cuechi núú-a<sup>n</sup>, te ní cachí-a<sup>n</sup> xii-ndí:

—Te núu ní cutnùnì iní-ndó sã ñí sándáá ndisa iní-í tnúhu Jèsús, te cundecu tnaa-ndo vèhe-í —càchí-a<sup>n</sup> xii-ndí.

Te ní quide yica-a<sup>n</sup> ñí xíndecu-ndí vèhe-a<sup>n</sup>.

<sup>16</sup> Te ñ<sup>n</sup> nduu ñùhu-ndí ichi cuáhá<sup>n</sup>-ndí núú càhá<sup>n</sup> ndihí-yu Yá Ndiöxí, te ní naníhí-ndí ñ<sup>n</sup> xíchí ñúhú ìchi, te yìhí ñaha espíritú cùndihí yucu ñávaha xii-xi. Te xíá<sup>n</sup> ní quide ní cáhá<sup>n</sup>-xi nchaa sá vã yõo tnáhí cùtnuní iní-xi núú nchaa ñáyiú ní sángándihí ñaha xii-xi. Te ñáyiú dii vèhe-xi xínu cuechi-xi ío vài díhú<sup>n</sup> ñí níhí-yu chí ní cháhu nchaa ñáyiú ní sángándihí ñaha xii-xi. <sup>17</sup> Te xíchí-á<sup>n</sup> ñí chinchícú<sup>n</sup> ñáhá-xí xii-ndí ndihí té Páblú ndëndaha ñaha-xi cuáhá<sup>n</sup>, te ní cáhá<sup>n</sup> níhi-xi xáha<sup>n</sup>-xi xii dava-gá ñáyiú:

—Cue téa-xi xínu cuechi-güedé núú Yá Ndiöxí, chí ío càhnu cuu-gá, te cachí tnúhu-güedé nása cada-ndo naníhí tàhú-ndó —càchí-xi xáha<sup>n</sup>-xi xii-yu.

18 Te titní xito ní yáha-ndí duca<sup>n</sup>-ni ní cáhá<sup>n</sup>-xi. Te ñá ní cùndee-gá iní té Păblú sá dúcá<sup>n</sup> càhá<sup>n</sup>-xi, núu ní nanchocuíhnu-dé núú nútnîi-xi, te ní xáha<sup>n</sup>-dě xii espíritú cùndîhi yucu ñávăha yîhi ñaha xii-xi:

—Ío càhnu cuu Xítohó Jesucrístú, núu xíă<sup>n</sup> càchí-í sá xócuîñî-n vă quíhí-gă-n yîqui cuñú xíchí-a — càchí-dé xăha<sup>n</sup>-dě.

Te òré-ni ní quee espíritú cùndîhi yucu ñávăha-á<sup>n</sup> yîqui cùñú-xi.

19-20 Te ñáyiú dii vèhe-xi xinu cuechi-xi-á<sup>n</sup> ní cutnùníní iní-yu sá vă nihí-gá-yu díhú<sup>n</sup> cuendá tnúhu càhá<sup>n</sup>-xi, núu ní tnií-yu té Păblú ndîhi té Silás ndécá ñàhá-yu cuáhá<sup>n</sup> núú cuè téé cùchiu<sup>n</sup> Romá, te xăhă<sup>n</sup>-yu xii-güedé:

—Cue téé-a cùu-güedé cue téé isràél, te ío dusa<sup>n</sup> xîquide-güedé ñuú-ó. 21 Te cuínî-güedé cada-o nàcuáa quide-güedé, te vá cúú dùca<sup>n</sup> cada-o chi ñáyiú nàció<sup>n</sup> Rómá cúú-ó —càchí-yu xăhă<sup>n</sup>-yu xii cue téé cùchiu<sup>n</sup>.

22 Te uu<sup>n</sup>ni ní cáhá<sup>n</sup> nchaá-yu, te xăhă<sup>n</sup>-yu sá ñà túú quide váha té Păblú ndîhi té Silás. Te cue téé cùchiu<sup>n</sup> ní cándeé-güedé dóó tē Păblú ndîhi dóó tē Silás ní ndátá-güedē, te ní táúchíú<sup>n</sup>-güedē caniha-güedē ndîhi tnudîi xii-güedé. 23 Te ní caniha-güedē, te dătnùníní ní chihi ñaha-güedē vecaá. Te ní xáha<sup>n</sup>-güedē xii téé ndēnchito vecaá sá cádá cuèdadú víhí-dē cuendá ná canú-güedé vecaá. 24 Te cuendá sá dúcá<sup>n</sup> ní cáhá<sup>n</sup>-güedé, núu téé ndēnchito vecaá ní dáyăha ñaha-dē ingá cuártú ndécú xití vecaá, te ní chihi-dé sáhá-güedē yaú nduhu, te ní quide tîi-dé.

25 Te dava niú ní cáhá<sup>n</sup> ndihí té Păblú ndihí té Silás Yă Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue téé yíhi ve-caá ní xíndedóho-güedé nàcuáa ní xita-güedé. 26 Te uu<sup>n</sup>ni níhi vîhi ní tnáa ní quidi-xi ndéé cimièntú ve-caá, te ní nacaá<sup>n</sup> nchaa yèhe ve-caá, te ní ndihí cadèná ndútú cuè téé yíhi ve-caá ní nandáxí. 27 Te ní ndiquíú cúnú ìní téé ndënchito ve-caá, te ní quide cuèndá-dé nchíí nchaa yèhe ve-caá. Te ní tava-dé machítí-dé cahni-dé méé-dě ní cùu, chi ní cáhá<sup>n</sup>-dě sá ñí ndihí cue téé yíhi ve-caá ní xinu ni cùu. 28 Te té Păblú ní cáhá<sup>n</sup> níhi-dé, te xăha<sup>n</sup>-dě xii téé ndënchito ve-caá:

—Vá dúcá<sup>n</sup> càda-n cahni-n mee-n, chi nchaa-ni-ndí yíhí —càchí-dé xăha<sup>n</sup>-dě xii téé ndënchito ve-caá.

29 Te dătnùní ní xícá<sup>n</sup> téé ndënchito ve-caá ñuhú, te xínu-dé cuánguihu xítí ve-caá núú yíhí tē Păblú ndihí té Silás, te quidi ñaha-ná-xi xii-dé ní quexìo-dé ní ngüñí xítí-dě núú-güedě. 30 Te dătnùní ndécá ñàha-dé xii-güedé ní ndee ve-caá, te ní xícá<sup>n</sup> tnúhú-dě núú-güedě, te xăha<sup>n</sup>-dě:

—Nchòhó cachí tnúhu-ndo năsa cada-í naníhí tàhú-í —càchí-dé xăha<sup>n</sup>-dě.

31 Te ní xăha<sup>n</sup>-güedě:

—Quindáá iní-n ndihí ñadihí-n, ndihí landú-n, ndihí nchaa ñáyiú xínu cuechi núú-n tnúhu càhá<sup>n</sup> Xítóhó Jesucrístú, te naníhí tàhú-ndó —càchí-güedé xăha<sup>n</sup>-güedě.

32 Te ní dăcuáhá ñàha-güedé xii téé ndënchito ve-caá ndihí nchaa ñáyiú ndècu vehe-dé tnúhu Yă Ndiöxí. 33 Te diu-ni òré-á<sup>n</sup> ñí naquete-dé

sátá-güedě núú nĩ ñáni, te dătnùnĩ ní sandute-dé ndihĩ-yu. <sup>34</sup> Te ndèca ñaha-dé cuáhá<sup>n</sup> vehe-dé ní sáñaha-dě sá nĩ xexi-güedé, te ní cudíí víhĩ ínĩ té ndēnchito vecaá ndihĩ nchaa-dé vehe-dé sá nĩ tuhá-yu ichi Yá Ndiõxí. Te cuándihu tucu té Păblú ndihĩ té Silás vecaá.

<sup>35</sup> Te nduu tněé ní xáha<sup>n</sup> cuè té cùchiu<sup>n</sup> xii poleciá cuáhá<sup>n</sup>-güedé cúu-güedé té ndēnchito vecaá queñuhu-dé úú cue té cuánguihu ndedí nduu ìcu núhú-güedé. <sup>36</sup> Te té ndēnchito vecaá ní xáha<sup>n</sup>-dě xii té Păblú ndihĩ té Silás:

—Cue té cùchiu<sup>n</sup> ní cachí-güedé sá queé-ndó nũhú-ndó, chi ñá túú-gă ná cada-güedé, chi sa ní yáha cuendá-ndó —cächí té ndēnchito vecaá xáha<sup>n</sup>-dě xii-güedé.

<sup>37</sup> Te té Păblú ní xáha<sup>n</sup>-dě xii cue té cùu poleciá:

—Tée ròmá cúú-ndĩ, te vá cúú dùca<sup>n</sup>-ni cundu, chi ní caniha-güedě tnudĩ xii-ndĩ, te ní xinĩ-yu nchaá-yu. Te ñá túú tnàhĩ ni xicá<sup>n</sup> tnúhú-güedě nũu ndáá ndècuéchi-ndĩ àdi ñáhá, chi cuendá-ni ní chihĩ ñaha-güedě vecaá xii-ndĩ. Te vitna cuinĩ-güedé dacăcu ñaha-güedě núhú-ndĩ cuendá sá vă yõo quinĩ ñáhá nũhú-ndĩ cáhá<sup>n</sup>-güedě, dico vá cúú dùca<sup>n</sup> cada ñaha-güedé xii-ndĩ. Chí cuáhá<sup>n</sup> cúñaha-ndo na quixi mee-güedé queñuhu ñaha-güedě —cächí té Păblú xii-dé cue poleciá.

<sup>38</sup> Te cue té cùu poleciá cuánuhú-güedé núú ndécú cuè té cùchiu<sup>n</sup>, te ní xáha<sup>n</sup>-güedé nàcuáa ní cáhá<sup>n</sup> té Păblú. Te sá dúcá<sup>n</sup> nĩ xáha<sup>n</sup> pòleciá sá tēe ròmá cúú-güedě, xĩá<sup>n</sup> ní yùhú-güedé. <sup>39</sup> Te ní sáhá<sup>n</sup> cue té cùchiu<sup>n</sup> yehe vecaá, te ní xáha<sup>n</sup>-güedě sá cádá cãhnu ínĩ-güedé sá nĩ chihĩ ñaha-güedě



vecaá, te ní ndeñuhu ñaha-güedě vecaá. Te ní cáhá<sup>n</sup> ndàhú-güedé núú cuè téé ní xíhi vecaá sá ndéé-güedě ñuú-á<sup>n</sup> nùhú-güedé. <sup>40</sup> Te ní ndee-güedé vecaá, te cuáhá<sup>n</sup>-güedé vehe tá Lìdiá, te ní ndatnúhu-güedé ndihi nchaa ñáyiú ní sándáá iní-xi tnúhu Jèsús, te ní xáha<sup>n</sup>-güedě xí-yu nàcuáa cadá-yu, te ío ní cudíí iní-yu, te duca<sup>n</sup> te ní xica-güedé cuáhá<sup>n</sup>-güedé.

## 17

### *Ío dusa<sup>n</sup> quide ñáyiú ñuú Tesalónica*

<sup>1</sup> Te ní yáha-güedé ñuú Ànfípolís ndihi ñuú Apòloniá, te ní quexìo-güedé ñuú Tesalónica, te yacá<sup>n</sup> cáá ñ<sup>n</sup> veñúhu ñáyiú isràél. <sup>2</sup> Te ní sáhá<sup>n</sup> té Páblú veñúhu-á<sup>n</sup>, chi duca<sup>n</sup> tnàhí quide-dé, te ndi tnahá nduu ndètatú-yu ní sáhá<sup>n</sup>-dé veñúhu-á<sup>n</sup> ùní xito. Te ní ndatnúhu ndihi ñaha-dě xí-yu nàcuáa ní chídó tnùnì cue téé ní xóo cáhá<sup>n</sup> tnúhu Yá Ndiòxí ndéé sanaha. <sup>3</sup> Te ní xítnùhu ñaha-dě nàcuáa ní cáhá<sup>n</sup> cue téé-á<sup>n</sup> sã Crìstú Yáá tendaha Yá Ndiòxí quixi ñuyíú-a ndoho vìhi-gá, te cuú-gá, te ndoto-gá, te xáha<sup>n</sup>-dě:

—Te diu Jèsús cúú Crìstú Yáá ní tendaha Yá Ndiòxí ní quixi ñuyíú-a, núú xíá<sup>n</sup> càchí tnúhu-í vitna —càchí té Páblú xáha<sup>n</sup>-dě xí-yu.

<sup>4</sup> Te dava ñáyiú isràél ní sándáá iní-yu tnúhu ní cáhá<sup>n</sup> té Páblú, te ní níhí tnáhă-yu ndihi-dé, ndihi té Silás. Te vai ñáyiú grìégú ñáyiú càhá<sup>n</sup> ndihi Yá Ndiòxí ní sándáá iní-yu tnúhu Jèsús. Te ndècu titní ñáyiú dìhí ñáyiú cùnuu, te ñáyiú-á<sup>n</sup> tnàhá-yu ní sándáá iní-yu tnúhu-gá. <sup>5</sup> Te dava ñáyiú isràél ñá túú ní cùu váha iní-yu núú tẽ Páblú nùu ní

ndúcũ-yu cue té cuihna ìní-xi tuhío-güedé cada chiu<sup>n</sup>-güedé, chi ndi cuihnu ndi cuihnu-ni-güedé, te nchaá-yu ndihí cue té-á<sup>n</sup> ndi coyo ndi coyó-yu xicuáá-yu. Te sátá ñi tecú dóho dava-gá-yu, te ní sáhá<sup>n</sup> tuhá-yu, te ío ní quide dùsá<sup>n</sup>-yu. Te nísáhá<sup>n</sup>-yu vehe té Jàsón, te ní quide yicá-yu ní quíhu-yu vehe-dé nándúcú-yu té Páblú ndihí té Silás cuendá queñuhu ñàhá-yu núú nchaa ñáiyu. <sup>6</sup> Te ñá ní nàníhí ñáhã-yu xii-güedé, núu xíá<sup>n</sup> ní tní<sup>n</sup>-yu té Jàsón ndihí ñ<sup>n</sup> úú-gá cue té sàndáá iní tnúhu Jèsús, te tañuhu ñahá-yu xii-güedé cuáhá<sup>n</sup> núú cuè té cùchiu<sup>n</sup>. Te òré ní quexió-yu núú ndécú cuè té cùchiu<sup>n</sup>, te ní ngüíta-yu ní cuáá-yu, te xähã<sup>n</sup>-yu xii-güedé:

—Ní quexío cue té-ã<sup>n</sup> ñuú-ó, te ío dusa<sup>n</sup> quide-güedé, te duca<sup>n</sup>-ni quide-güedé nchaa ñuú núú xicá cùu-güedé. <sup>7</sup> Te té Jàsón-ã<sup>n</sup> ní xáha<sup>n</sup>-dë sá cúú cùndecu-güedé vehe-dé, te ñá túú sàndáá iní-güedé nacuáa càhá<sup>n</sup> té Cèsár té yìndaha cuéhé nàció<sup>n</sup>, te càchí-güedé sá ndécú ìngá té cùnuu-gá tucu nani-dé Jèsús —càchí-yu xähã<sup>n</sup>-yu xii cue té cùchiu<sup>n</sup>.

<sup>8</sup> Te sátá dúcá<sup>n</sup> ñi càhá<sup>n</sup>-yu, te ní cudéé<sup>n</sup> víhí cuè té cùchiu<sup>n</sup> ndihí dava-gá ñáiyu ndèdóho. <sup>9</sup> Te vài díhú<sup>n</sup> ñi xicá<sup>n</sup> cue té cùchiu<sup>n</sup> núú tè Jàsón ndihí dava-gá cue té cuáhá<sup>n</sup> ndihí-dé cuendá té Páblú ndihí té Silás, te núu na ndè-güedé núhú-güedé, te nacuáñaha cuè té cùchiu<sup>n</sup> díhú<sup>n</sup>-güedé.

*Té Páblú ndihí té Silás ndécú-güedé ñuú Bèréá*

<sup>10</sup> Te òré ní cundiqui<sup>n</sup>, te ní quide ndee ìní ñáhá ñáiyu sàndáá iní tnúhu Jèsús xii té Páblú ndihí

té Silás, te ní xica-güedé cuáhá<sup>n</sup>-güedé ñuú Bèreá. Te ñu-ni nduu ñí sáá-güedé yàcá<sup>n</sup> ní sáhá<sup>n</sup>-güedé veñúhu ñáyíu isràél. <sup>11</sup> Te váha-gá iní ñáyíu ñuú Bèreá dàcúxí ñáyíu ñuú Tesàlónica, chi ío ní cudíí iní-yu ní xíndedóho-yu tnúhu Jèsús, te ñ<sup>n</sup> nduu ñ<sup>n</sup> nduu ní dácuáhã-yu tnúhu ní chidó tnùní cue téé ní xóo cáhá<sup>n</sup> tnúhu Yá Ndiöxí ndéé sanaha cuèndá cuini-yu quini-yu núu ndáá cáhá<sup>n</sup> té Páblú ndihí té Silás. <sup>12</sup> Te titní ñáyíu isràél ní sándáá iní-yu tnúhu-gá ndihí titní cue téé griégú ndihí ñáyíu ñíhí ñáyíu cùnuu ní sándáá iní-yu. <sup>13</sup> Te ñáva ñáyíu isràél ndécü-yu ñuú Tesàlónica, te ñáyíu-á<sup>n</sup> ñí níhí-yu tnúhu sá ndécú té Páblú ndihí té Silás ñuú Bèreá càhá<sup>n</sup>-güedé tnúhu Yá Ndiöxí, núu xíá<sup>n</sup> ní sáhá<sup>n</sup>-yu ñuú Bèreá ní dácuándèhndé-yu núu nchàa ñáyíu vátá dácuàha-gá. Te ñáyíu-á<sup>n</sup> ñí sándáá iní-yu tnúhu ndehnde te ní cudéé<sup>n</sup> víhí-yu núu-güedé. <sup>14</sup> Te òré-á<sup>n</sup> ñí xáha<sup>n</sup> ñáyíu sándáá iní tnúhu-gá xii té Páblú sá quíhí<sup>n</sup>-dé yuhu làmár, te ní xica-dé cuáhá<sup>n</sup>-dé, te té Silás ndihí té Timùteú ní quendóo-güedé ñuú Bèreá. <sup>15</sup> Te ñ<sup>n</sup> úü-güedé cuáhá<sup>n</sup> ndihí-güedé té Páblú, te ndèca ñaha-güedé cuáhá<sup>n</sup> ndéé ñuú Àtenás, te ní xáha<sup>n</sup> té Páblú xii-güedé:

—Núu na nùhú-ndó, te cúu-ndo té Silás ndihí té Timùteú ná quíxí ndíhí-ni-güedé nanítnáhá-ndí iha —càchí-dé xáha<sup>n</sup>-dè.

Te ní xica-güedé cuánuhú-güedé.

### *Té Páblú ndécú-dé ñuú Àtenás*

<sup>16</sup> Te ñuú Àtenás ndétú té Páblú quíhí<sup>n</sup> té Silás ndihí té Timùteú. Te yàcá<sup>n</sup> ní xiní-dé sá ío cuéhé

sǎ cǎchí-yu cùu ndiǒxǐ-yu ndècu te ñá ndáá sá díú ndiǒxǐ cúu-xí, te xǐǎñ ñá túú ní cùu váha iní-dé, chi ñá tnàhá iní-dé nàcuáa quidé-yu. <sup>17</sup> Te ní sáhá<sup>n</sup>-dé veñúhu ní cáhá<sup>n</sup> ndihí-dé ñáyiú isràél ndihí dava-gá ñáyiú cáhá<sup>n</sup> ndihí Yá Ndiǒxǐ. Te ì<sup>n</sup> nduu ì<sup>n</sup> nduu sáhá<sup>n</sup>-dé xití ñuú cáhá<sup>n</sup>-dé tnúhu-gá ndihí nchaa ñáyiú xìca cuu yacá<sup>n</sup>. <sup>18</sup> Te cue téé cùu epicureú ndihí cue téé cùu estoicú, cue téé-á<sup>n</sup> ñí ndatnúhu-güedé ndihí té Pǎblú, te dava-güedé xǐtnàha-güedé:

—¡Ná tnúhu vìhi cáhá<sup>n</sup> téé lùcú-ǎ<sup>n</sup>! —cǎchí-güedé xǐtnàha-güedé.

Te dava-güedé xǐtnàha-güedé:

—Sàni iní-ndí sá cáhá<sup>n</sup>-dé cuendá ndiǒxǐ sá vǎtá quíní-gá-ó —cǎchí-güedé xǐtnàha-güedé.

Te duca<sup>n</sup> xǐtnàha-güedé, chi cáhá<sup>n</sup> té Pǎblú tnúhu Jèsús, te ní cáhá<sup>n</sup>-dé nàcuáa ní dándótó ñàha Yá Ndiǒxǐ xii-gá, xǐǎñ núu duca<sup>n</sup> xǐtnàha-güedé. <sup>19</sup> Te ndèca ñaha-güedé xii té Pǎblú cuáhá<sup>n</sup> ì<sup>n</sup> xichi núú nání Àreópagú, te ní xáha<sup>n</sup>-güedé xii-dé:

—Cachí tnúhu ndáá-n ñása cuáhá<sup>n</sup> tnúhu cáhá<sup>n</sup>-n, chi na cùtnuní ndáá iní-ndí, <sup>20</sup> chi duca<sup>n</sup>-ni cáhá<sup>n</sup>-n tnúhu sá ñá túú sàcúndèdóho-ndí, te cuíní-ndí cachí tnúhu ndáá-n ñása ndùu tnúhu-á<sup>n</sup> cuendá cutnùní váha iní-ndí —cǎchí-güedé xǎha<sup>n</sup>-güedé xii-dé.

<sup>21</sup> Te nchaa ñáyiú ñuú Àtenás ndihí ñáyiú dava-gá ñuú, mee-ni tnúhu saa cuíní-yu cáhá<sup>n</sup>-yu, nchaa sá vǎtá cúndèdóho-gá-yu cuíní-yu cundedóho-yu.

<sup>22</sup> Te té Pǎblú ní ngúnutnǐ-dé núú xǐxúcu-yu ncháá-yu, te xǎha<sup>n</sup>-dè:

—Nchòhó cue ñáyiú ñuú Àtenás, cundedóho-ndo nchàa tnúhu na cáhá<sup>n</sup>-í-a. Ío quíde cahnu nchohó

sá cãchí-ndó cùu ndiõxí-ndó. <sup>23</sup> Te vitna ní quexìo-í ñuú-ndó, te ní xiní-í sá yàyacá<sup>n</sup> ndécú nchàa sá cãchí-ndó cùu ndiõxí-ndó cãhá<sup>n</sup> ndihí-ndo. Te ní xiní-í ì<sup>n</sup> xichi núú ndèé tnuní quidé cãhnu-ndo Yá Ndiõxí Yaá ñá túú xìní-ndó, te ñiu-ni duca<sup>n</sup> cãhá<sup>n</sup> lètrá ndèé tnuní xiá<sup>n</sup>, te cãchí-xi: “Tha quide cãhnu-ndí Ndiõxí sá ñà túú xìní-ndí”, duha cãhá<sup>n</sup> lètrá-á<sup>n</sup>. Te quide cãhnu-ndo Yá Ndiõxí cãhá<sup>n</sup>-ndó, dico ñá túú xìní-ndó ñãsa cãa-gá, te yúhú xìní ndáá-í nàcuáa cãa Yá Ndiõxí, chi ñiu-ni Yá Ndiõxí cãhá<sup>n</sup> ndihí-í, te ñiu tnúhu-gá cãhá<sup>n</sup>-í vitna.

<sup>24</sup> Te ñiu Yá Ndiõxí ní cadúha-gá ñuyíú-a ndihí nchaa sá ió, núu ñiu-gá cúú Xìtohó ñuyíú-a ndihí andíu. Te ñá túú xìní ñuhu-gá vehe dàcaa ñáyíu ñuyíú-a cundecu-gá. <sup>25</sup> Te ñá túú xìní ñuhu-gá ñáyíu chindee ñàhá-yu xii-gá, chi mee-gã quidé-gã nchító-ó ndècu-o te tàxi-gá yócó tãchí-ó ndihí nchaa sá xìní ñuhu-o.

<sup>26</sup> Te ndèé sanaha ñí cadúha-gá ì<sup>n</sup> ñi-ni téé, te ñiu-ni níñí-dě cúú ñáyíu ndècu ñicaxico ñuyíú. Te ñiu-ni mee Yá Ndiõxí ní xáha<sup>n</sup>-gã nchaa núú cùndécú-yu, te mee-gã ní cãhá<sup>n</sup>-gá ná daha cuía cudíi nchaa nàció<sup>n</sup> ndihí mèé-yu. <sup>27</sup> Te cùní-gá sá ncháá ñáyíu nanducu ñàhá-yu cãhá<sup>n</sup> ndihí ñàhá-yu xii-gá, te mee-gã ndécú túha-gá sá cãhá<sup>n</sup> ndihí ñàha-gã xií-yu ì<sup>n</sup> ì<sup>n</sup>-yu. <sup>28</sup> Te ñiu-ni Yá Ndiõxí xító ñàha-gá xií-yu núu cùdíi-yu ndécú-yu te cãndá-yu. Te duha ní cãhá<sup>n</sup> ì<sup>n</sup> ñaní tnáhá-ndó, téé ní cutnùní iní-xi ní xíndecu ndèé sanaha, te ní xáha<sup>n</sup>-dě xií-yu: “Nchaa-o cùu-o déhe Yá Ndiõxí”, duha ní xáha<sup>n</sup>-dě xií-yu. <sup>29</sup> Te núu déhe Yá Ndiõxí cúu-yu ncháá-yu, te vá cúú cãhá<sup>n</sup>-yu sá Yá Ndiõxí cúú sã ñí cadúha-yu ndahá-yu. Te sá ñí cadúha-yu

cùu ndiöxĩ-yu-án, dava cùu-xi díhú<sup>n</sup> cuàá<sup>n</sup>, dava cùu-xi díhú<sup>n</sup> cuixí<sup>n</sup>, dava cùu-xi yúú. Te mèé-yu ní cahu iní-yu nàcuáa cunduu sá cúú ndiöxĩ-yu. <sup>30</sup> Te cútnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xĩá<sup>n</sup>, te ñá túú ní quide cuendá Yă Ndiöxí sá dúcá<sup>n</sup> ñĩ quidé-yu. Te vitna cächí Yă Ndiöxí sá dáña nchàa ndi túhú-yu nchaa sá cuèhé sá dúhá quidé-yu. <sup>31</sup> Te Yá Ndiöxí nánhá-gă ná nduu cùndecu nchaa ñáyiu núú-gă, te mee-gă sa nàha-gá ndëndida càa ñáyiu ní quide váha, te ndëndida càa ñáyiu ñá túú ní quide váha. Te mee-gă ní xáha<sup>n</sup>-gă xii Déhe-gá Yaá nání Jèsús cúñaha-gă xii-yu núu ndëndida càa-yu ní quide váha te ndëndida càa-yu ñá túú ní quide váha. Te mee Jèsús cáhá<sup>n</sup> ndáá cuiti-gá, te sa nàha-o sá ncháá xĩá<sup>n</sup> cada Jèsús, chi diu cuendá-á<sup>n</sup> ñĩ dándótó ñàha Yá Ndiöxí xii-gá —cächí té Păblú xăha<sup>n</sup>-dě xii-yu.

<sup>32</sup> Te òré ní cáhá<sup>n</sup> té Păblú sá ñĩ ndoto Jèsús, te dava ñáyiu ñá ní tnàhá iní-xi tnúhu ní cáhá<sup>n</sup>-dé ní cáhá<sup>n</sup> yíchí-yu. Te davá-yu ní xáhă<sup>n</sup>-yu xii-dé:

—Te ingá xito quixi-n, te cáhá<sup>n</sup> tucu-n tnúhu ní cáhá<sup>n</sup>-n vitna —cachí-yu xáhă<sup>n</sup>-yu xii-dé.

<sup>33</sup> Te ní xica-dé cuáhá<sup>n</sup>-dé. <sup>34</sup> Te dava ñáyiu ní xíndedóho tnúhu ní cáhá<sup>n</sup> té Păblú ní sándáá iní-yu Jèsús, te ní chindee tnúhu ñánhá-yu xii-dé. Te ñ<sup>n</sup> té cùchiu<sup>n</sup> Areópagú nání-dě Nĩxú ndihí ñ<sup>n</sup> ñadìhí nání-á<sup>n</sup> Dămarís, tnàhá-yu ní sándáá iní-yu tnúhu-gá ndihí dava-gá-yu.

## 18

*Té Păblú ndécú-dě ñuú Còrintú*

1 Te té Păblú ní quee-dé ñuú Àtenás cuáhá<sup>n</sup>-dé ñuú Còrintú. 2 Te yàcá<sup>n</sup> ní naníhí tnáhá-dě ndihí ì<sup>n</sup> tée isràél nání-dě Àquilú, te tée-á<sup>n</sup> cúú-dě tée distritú Pòntó, te ní xíndecu-dé ndihí ñadìhí-dé tá Priscilá ñuú Rómá. Te té Cèsár tée yìndaha cuéhé nàció<sup>n</sup>, tée nàni Claudiú ní xáha<sup>n</sup>-dě sá vǎ cúú-gǎ cundecu ñáyiú isràél ñuú Rómá, te xǎ<sup>n</sup> nùu ní ndee té Àquilú ndihí ñadìhí-dé cuáhá<sup>n</sup>-yu ñuú Còrintú. Te sácú-ni nduu ní cuu sá nǐ quexìó-yu ñuú-á<sup>n</sup>, te ní sáhá<sup>n</sup> té Păblú ní ndatnúhu ndihí ñaha-dě xii-yu vehé-yu. 3 Te ní xáhǎ<sup>n</sup>-yu sá cùndècu-dé cada chiu<sup>n</sup> ndihí ñahá-yu, chi ì<sup>n</sup>-ni chiu<sup>n</sup> quide-dé ndihí-yu, te ní xóo dacáá-yu vehe dóó. Te núu xǎ<sup>n</sup> ní xíndecu ndihí ñaha tǐ Păblú ní quide chiu<sup>n</sup> ndihí ñaha-dé xii-yu. 4 Te núú ùná núú ùná nduu, nduu ndètátú-yu, ní xóo quíhí<sup>n</sup>-dé veñúhu ñáyiú isràél. Te ní ndatnúhu-dé ndihí ñáyiú isràél ndihí ñáyiú ñá túú cùu ñáyiú isràél, te ní xáha<sup>n</sup>-dě sá quìndáá iní-yu tnúhu Jèsús.

5 Te té Silás ndihí té Timùteú ní quee-güedé distritú Macèdoniá cuáhá<sup>n</sup>-güedé núú ndécú tǐ Păblú. Te òré ní quexìo-güedé, te ní cáhá<sup>n</sup>-ni té Păblú tnúhu Yá Ndiòxí núú ñáyiú isràél, te xáha<sup>n</sup>-dě xii-yu sá Jèsús cúú-gǎ Crìstú Yaá ní tendaha Yǎ Ndiòxí ní quixi ñuyíú-a. 6 Te sá dúcá<sup>n</sup> nǐ cáhá<sup>n</sup>-dé nùu ní nǎá ndihí ñahá-yu xii-dé, te ní cáhá<sup>n</sup> cuéhé-yu cuendá-dé, núu xǎ<sup>n</sup> ní naquidi-dé dóó-dě. Te duca<sup>n</sup> nǐ quide-dé cuendá sá cútnùní iní-yu sá ñǎ ní tnáhá iní-dé nàcuáa ní cáhá<sup>n</sup>-yu, te ní xáha<sup>n</sup>-dě xii-yu:

—Yúhú ñá túú cuèchi-í, te núu ní xíta nihnu-ndo, xǎ<sup>n</sup> quèndóo cuèchi mee-nǎ-ndó. Te vitna quíhí<sup>n</sup>-í cáhá<sup>n</sup> ndihí-í ñáyiú ñá túú cùu ñáyiú isràél, te vǎ

nánducu-gá-í nchòhó ñáyiú isràél cáhá<sup>n</sup> ndihí ñaha-ĩ xii-ndo —càchí-dé xăha<sup>n</sup>-dě xií-yu.

<sup>7</sup> Te ní xica-dé cuáhá<sup>n</sup>-dé vehe ì<sup>n</sup> téé nàni Justú, te téé-á<sup>n</sup> ndécú yàtni-dé núú cáá veñúhu, te tnàhá-dé càhá<sup>n</sup> ndihí-dé Yă Ndiöxí. <sup>8</sup> Te té Crispú téé yìndaha veñúhu-á<sup>n</sup> ñí sándáá iní-dé Jèsús ndihí ñadìhí-dé ndihí landú-dé. Te vâi ñáyiú ñuú Còrintú ní sáhá<sup>n</sup>-yu ní xíndedóho-yu tnúhu-gá, te ní sándáá iní ñáhă-yu xii-gá, te ní sanduté-yu. <sup>9</sup> Te ì<sup>n</sup> niú ní cáhá<sup>n</sup> saní té Păblú sá ñí xáha<sup>n</sup> Yă Ndiöxí xii-dé:

—Cáhá<sup>n</sup>-ni-n tnúhu-í, te vá yùhú-n nchàa tnúhu cuèhé tnúhu duha càhá<sup>n</sup> ñáyiú, <sup>10</sup> chi yúhú chindee ñàha-í xii-n, te vá yôo ì<sup>n</sup> cada úhú ñáhá xii-n, te vâi-gá ñáyiú ñuú-á<sup>n</sup> quìndáá iní-yu tnúhu-í —càchí-gá xáha<sup>n</sup>-gă núú sàní-dé.

<sup>11</sup> Te ñuú Còrintú ní xíndecu té Păblú ì<sup>n</sup> cuíá dava, te mee-ni tnúhu Yă Ndiöxí ní xóo dacuàha-dé ñáyiú.

<sup>12</sup> Te ndècu-gá-dé ñuú-á<sup>n</sup> ñí ngóo té Gàlìón chiú<sup>n</sup> taxi tnuní-dé distritú Acăyá. Te dàvá-á<sup>n</sup> ñí cudéé<sup>n</sup> ñáyiú isràél núú tē Păblú, te ní tnì ñàhá-yu xii-dé ndécá ñàhá-yu cuáhá<sup>n</sup> núú cuè téé cùchiu<sup>n</sup>. <sup>13</sup> Te ní xáhă<sup>n</sup>-yu xii té Gàlìón téé cùu gobiernú:

—Téé-a ní quexìo-dé ñuú-ó xica cuu-dé te cuìní-dé dandàhú ñáhá-dě chitnahá-ndí-dé cada-ndí nàcuáa quìde-dé quídé càhnu-dé Ndiöxí-dě, te dañá-ndí vá cádá-gă-ndí nàcuáa càhá<sup>n</sup> tnúhu sá sánú ìchi ñaha xii-o nacuáa cundecu-o cuìní-dé —càchí-yu xáhă<sup>n</sup>-yu xii téé cùu gobiernú.

<sup>14</sup> Te té Păblú cuìní-dé caní-dé cuèndú ní cùu, te ní ngúita té Gàlìón càhá<sup>n</sup>-dé, te xáha<sup>n</sup>-dě xií-yu:

—Nchòhó ñáyiú isràél, cundedóho-ndo tnúhu na càhá<sup>n</sup>-í-a. Te núu ndècu núú ì<sup>n</sup> cuéchi ní quide-dé



àdi ní sahani-dé ìḡ<sup>n</sup> ndíyì, te cuu cundáá-xi iha, te cáhá<sup>n</sup>-ndó nũu nándi cùu sá nĩ quide-dé, <sup>15</sup> àdi dico-ni sá ìḡ<sup>n</sup> tnũhu ní cáhá<sup>n</sup>-dé, te yáchí-gá chí cuáhá<sup>n</sup> yàcá<sup>n</sup> ndatnúhu-ndo nũú méé-ndó, chí mee-ni sã ñà túú quide-dé nàcuáa càhá<sup>n</sup> tnúhu sá sánú ìchi ñaha xii-ndo cahá<sup>n</sup>-ndó, te yúhú ñá túú tnàhá iní-í cada ndáá-í nchaa xíá<sup>n</sup> —càchí-dé xáha<sup>n</sup>-dè.

<sup>16</sup> Te ní cudéé<sup>n</sup>-dè, te ní ndeñuhu ñaha-dè xií-yu vechiù<sup>n</sup>. <sup>17</sup> Te ñáyiu ñá túú cùu ñáyiu isràél ní tñí-yu té Sòstenés té yìndaha veñúhu ñáyiu isràél, te ndèhe té Gàlìón té cùu gobiernú ní canihá-yu xii-dé, dico ñá túú tnàhí ná tnúhu ni cáhá<sup>n</sup>-dé taunihnu-dé té ní caní-yu-á<sup>n</sup>.

*Té Pàblú cuáhá<sup>n</sup> tucu-dé ñuú Antiòquia, te yàcá<sup>n</sup> ní xica tucu-dé cuáhá<sup>n</sup>-dé dava-gá ñuú càhá<sup>n</sup>-dé tnúhu Yá Ndiõxí*

<sup>18</sup> Te titní-gá nduu ní xíndecu té Pàblú ñuú Còrintú, te ní quide ndee iní-dé nchaa ñáyiu ní sándáá iní-xi tnúhu Jèsús, te ní tñí-dé ìchi cuáhá<sup>n</sup>-dé distritù Sìriá ndihì té Àquilú ndihì ñadìhí té Àquilú-á<sup>n</sup> tã Priscilá, te ní quexió-yu ñuú Cèncreá. Te cùmání-gã tñí-yu ìchi quíhí<sup>n</sup>-yu ñuú Éfesú, te ní dètè díquí tẽ Pàblú, chí duca<sup>n</sup> nĩ xáha<sup>n</sup>-dè xii Yá Ndiõxí sá ndèé xínu ìḡ<sup>n</sup> chiù<sup>n</sup> ní sani iní-dé cada-dé cuendá-gá, te dàtnùní dètè-dé. Te ní quée-yu bàrcú cuáhá<sup>n</sup>-yu. <sup>19</sup> Te ní quexió-yu ñuú Éfesú, te yàcá<sup>n</sup> ní xáha<sup>n</sup> tẽ Pàblú sá cùndècu té Àquilú ndihì ñadìhí-dé, te mee-dè quíhí<sup>n</sup>-dé dava-gá ñuú. Te cùmání-gã caca-dé quíhí<sup>n</sup>-dé, te ní sáhá<sup>n</sup>-dé veñúhu ñáyiu isràél ní ndatnúhu ndihì ñaha-dè xií-yu. <sup>20</sup> Te ní

xáhă<sup>n</sup>-yu sá cúndècu-dé títńí nduu, te ñá ní cuení-dé cundecu-dé. <sup>21</sup> Te ní xáha<sup>n</sup>-dě:

—Núhú-í chi dacuítí xini ñuhu-xi cundecu-í vico coo ñuú Jerusálén, te quixi tucu-í te núu Ndiöxí ná cächí-gá, te vitna chí cádá ndèe iní —cächí-dé xáha<sup>n</sup>-dě xii-yu.

Te ní quée-dé bàrcú cuáhá<sup>n</sup>-dé. <sup>22</sup> Te ní quexìo-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusálén, te ní ndexìo-dé, te ní dándácõ váha-dé ñáyi ndècu ichi Yá Ndiöxí, te dătnùní ní xica-dé cuáhá<sup>n</sup>-dé ñuú Antiòquia. <sup>23</sup> Te yàcá<sup>n</sup> ní xíndecu-dé títńí nduu, te dătnùní ní tńi-dé ichi cuáhá<sup>n</sup>-dé. Te ní sáhá<sup>n</sup>-dé nihi distritú Gàlaciá ndihi distritú Frigiá. Te ndi tnahá ñuú ní sáhá<sup>n</sup>-dé ní cáhá<sup>n</sup>-dé ndihi ñáyi sàndáá iní tnúhu Yá Ndiöxí, te ní ndúcú ndéé-gă-yu ní quidé-yu nchaa nàcuáa ní xáha<sup>n</sup>-dě cadá-yu.

### *Té Àpolós cáhá<sup>n</sup>-dé tnúhu Yá Ndiöxí ñuú Éfesú*

<sup>24</sup> Te dàvá-á<sup>n</sup> ñi quèxio i<sup>n</sup> tée isràél ñuú Éfesú, te nàni-dé Àpolós, te cùu-dé tée ñuú Alejandriá, te ío váha túha-dé tnúhu Yá Ndiöxí, te ío váha ñuhu díquí-dé nàcuáa cáhá<sup>n</sup>-dé, <sup>25</sup> chi sa xini-dé nàcuáa ní xóo cáhá<sup>n</sup> ndí Juáá cútnáhá ní xóo dacuàndute ndí ñáyi. Te ío ní cudí iní-dé ní cáhá<sup>n</sup>-dé nchaa nàcuáa ní cuu cuendá Jèsús, dico vátá dăcuàha-gá-dé nchaa tnúhu ní cáhá<sup>n</sup> méé Jèsús. <sup>26</sup> Te ní sáhá<sup>n</sup>-dé veñuhu ñáyi isràél, te yàcá<sup>n</sup> ní cáhá<sup>n</sup>-dé ni yùhu ni iní-dé. Te ndècu té Àquilú ndihi ñadihi-dé tá Priscilá ndedóho-yu tnúhu ní cáhá<sup>n</sup>-dé, te ní xáhă<sup>n</sup>-yu sá quihí<sup>n</sup>-dé vehé-yu, te ní sáhá<sup>n</sup>-dé, te ní xitnùhu ñáhá-yu xii-dé dava-gá tnúhu Yá Ndiöxí sá ñà túú

xìní-dé. <sup>27</sup> Te ní cachí té Àpolós sá quíhí<sup>n</sup>-dé dis-  
trítú Acâyá, núu xíá<sup>n</sup> ní cadúha ñáyiú ñuú Éfesú  
ñ tutú canehe-dé quíhí<sup>n</sup> ndaha ñáyiú sàndáá iní  
tnúhu-gá xĩndecu Acâyá. Te xăhă<sup>n</sup>-yu núú tütú-yu:  
“Cáhá<sup>n</sup> váha-ndo ndíhi té Àpolós nõu ní quexìo-dé”,  
càchí-yu xăhă<sup>n</sup>-yu núú tütú-yu. Te ní xica-dé  
cuáhá<sup>n</sup>-dé, te ní quexìo-dé Acâyá. Te nchaa ñáyiú  
sàndáá iní tnúhu-gá yàcá<sup>n</sup>, diu-ni mee Yă Ndiõxí  
ní chindee ñàha-gá ní sàndáá iní ñáhă-yu xii-gá.  
Te té Àpolós ío váha ní cáhá<sup>n</sup>-dé tnúhu Yă Ndiõxí  
núú-yu, te xíá<sup>n</sup> ío ní ndúcú ndéé-gă-yu ní quidé-yu  
chìu<sup>n</sup>-gá. <sup>28</sup> Te té Àpolós ní ndatnúhu-dé ndíhi ñáyiú  
isràél, te ní xĩndedóho dava-gá-yu. Te ío váha ní  
caní-dé cuendú nchaa nàcuáa ní xóo cáhá<sup>n</sup> cue téé  
ndéé sanaha sã quíxí Crìstú ñuyíú-a. Te ní cáhá<sup>n</sup>  
ndáá-dé ní xáha<sup>n</sup>-dě sá díú-ní Jèsús cúú-gă Crìstú  
Yaá ní tendaha Yă Ndiõxí ní quixi ñuyíú-a. Te ñáyiú  
isràél xĩndatnúhu-yu sá ñă ndáa nàcuáa càhá<sup>n</sup>-dé,  
dico ñá ní ñĩhĩ-yu tnúhu cúñhá-yu xii-dé, chi ío  
váha ñùhu díquí-dě tnúhu cáhá<sup>n</sup>-dé.

## 19

### *Té Păblú ndécú-dě ñuú Éfesú*

<sup>1</sup> Te cútnàhá ndécú-gă té Àpolós ñuú Còrintú, te  
ní xica té Păblú cuáhá<sup>n</sup>-dé tá yăha-dé mee-ni xití  
yucu cuáhá<sup>n</sup>, te ní sáá-dé ndéé ñuú Éfesú. Te ñuú-á<sup>n</sup>  
ñĩ naníhí tnáhá-dě ndíhi cue téé sàndáá iní tnúhu  
Jèsús. <sup>2</sup> Te ní xícá<sup>n</sup> tnúhú-dé núú-güedé, te xăha<sup>n</sup>-dě:  
—¿Sa ní quexìo Espíritú Yă Ndiõxí ní ngúndecu  
ndíhi-ndo ndéé òré ní sàndáá iní-ndó Jèsús-ă<sup>n</sup>? —  
càchí-dé xăha<sup>n</sup>-dě xii-güedé.

Te ní xáha<sup>n</sup>-güedě:

—Ñá túú xìní-ndí sá ió Espíritú Yá Ndiöxí —  
càchí-güedé xáha<sup>n</sup>-güedě xii-dé.

<sup>3</sup> Te ní xáha<sup>n</sup> tùcu-dé:

—¿Nása ní cáhá<sup>n</sup> téé ní dácúándùte ñaha xii-ndo-i?  
—cachí-dé xáha<sup>n</sup>-dě xii-güedé.

Te ní xáha<sup>n</sup>-güedě:

—Ní cáhá<sup>n</sup>-dé nàcuáa ní xóo cáhá<sup>n</sup> ndí Juáa —  
càchí-güedé xáha<sup>n</sup>-güedě xii-dé.

<sup>4</sup> Te ní xáha<sup>n</sup> tē Pāblú:

—Ndí Juáa ní dácúándùte ñaha ndí xii ñáyiú, chi  
ní cuiní-yu sá dáñá-yu nchaa sá cuèhé sá dúhá  
quidé-yu. Te ní xáha<sup>n</sup> ndí xií-yu: “Quindáa iní-ndó  
tnùhu Jèsús chi dacuítí quixi-gá ì<sup>n</sup> nduu”, duha  
ní xáha<sup>n</sup> ndí Juáa xií-yu —càchí té Pāblú xáha<sup>n</sup>-dě  
xii-güedé.

<sup>5</sup> Te sá dúcá<sup>n</sup> ñí cáhá<sup>n</sup> té Pāblú xáha<sup>n</sup>-dě xii-güedé,  
núu xiá<sup>n</sup> ní sandute-güedé nàcuáa ní dándõo tnúhu  
Jèsús. <sup>6</sup> Te ní sacá<sup>n</sup> ndodo té Pāblú ndahá-dé  
díquí-güedě, te òré-ni ní quexìo Espíritú Yá Ndiöxí  
ní ngündecu ndihi-güedé, te ní ngüíta-güedé ní  
cáhá<sup>n</sup>-güedé tnúhu sá dácàhu iní ñáhá Espíritú-gá,  
tnúhu sá ñà túú xìní-güedé cáhá<sup>n</sup>-güedé, te ní  
cáhá<sup>n</sup>-güedé tnúhu Yá Ndiöxí nàcuáa ní dácáhu iní  
ñáhá Espíritú-gá xii-güedé. <sup>7</sup> Te cùu datná úxúú  
tnàhá-güedé.

<sup>8</sup> Te té Pāblú ní sáhá<sup>n</sup>-dé veñúhu ñáyiú isràel  
ní cáhá<sup>n</sup> ndihi-dé-yu, te úní yóo ñí xínu ní xica  
cúu-dé veñúhu-yu. Te ío váha ñùhu díquí-dě  
tnúhu cáhá<sup>n</sup>-dé, núu xiá<sup>n</sup> ní cuyí-dě ní cáhá<sup>n</sup>-dé,  
te ní xáha<sup>n</sup>-dě sá quindáa iní-yu tnúhu Jèsús, te  
duca<sup>n</sup> te ndíhu ndaha ñàha Yá Ndiöxí xií-yu. <sup>9</sup> Te

davá-yu ío sàá iní-yu ñá ní cuení-yu quindáá iní-yu, te ío ní cáhá<sup>n</sup> cuèhé-yu cuendá Jèsús xití veñúhu núú dáva-gá-yu. Te té Páblú ní ndee-dé veñúhu cuáhá<sup>n</sup>-dé ndihí ñáyiú sàndáá iní tnúhu Jèsús. Te ì<sup>n</sup> nduu ì<sup>n</sup> nduu ní sáhá<sup>n</sup>-dé scuèlá té Tìranú ní dácuahá ñàha-dé xí-yu. <sup>10</sup> Te úú cuiá duca<sup>n</sup> ñí sáhá<sup>n</sup>-dé scuèlá ní dácuahá-dě ñáyiú. Te nchaa ñáyiú isràél ñáyiú ndècu ñihí distritú Àsiá ndihí nchaa ñáyiú ñá túú cùu ñáyiú isràél ní xíndedóho-yu tnúhu Jèsús. <sup>11</sup> Te té Páblú ío ní chindee ñàha Yá Ndiöxí xii-dé ní quide-dé vài núú sã vã yõo tnàhí ndàcu cada. <sup>12</sup> Te pãñú díquí-dě ndihí dóó cándèé núú yíquí-dě ní xícá<sup>n</sup>-yu nèhé-yu ní sáhá<sup>n</sup> núú ndécú ñáyiú cùhú, te xíã<sup>n</sup> ní tñií ñáyiú cùhú ndihí ñáyiú yìhí ñaha espíritú cúndihí yucu ñávãha, te ní ndúha-yu.

<sup>13</sup> Te ñuú Isràél véxi cue téé tatna xìca cuu-güedé quidé tãtna-güedé ñáyiú yìhí ñaha espíritú cúndihí yucu ñávãha. Te ní ngüíta-güedé ní cacu nèhe-güedé Jèsús cuendá quee espíritú-á<sup>n</sup> yiqui cùñú-yu, te ní xáha<sup>n</sup>-güedě:

—Xocuñí-n, chi càchí Jèsús sá vã cúndècu ndihí-gá-n tée-a. Te diu-ni Jèsús cacú nèhe té Páblú òré cáhá<sup>n</sup>-dé tnúhu-gá —càchí-güedé xãha<sup>n</sup>-güedě xii espíritú-á<sup>n</sup>.

<sup>14</sup> Te úsá tnàhá-güedé duca<sup>n</sup> ñí xóo cada-güedé. Te tãtá-güedě ní xínani-dě Èsevã, te téé-á<sup>n</sup> ñí cuu-dé dútú cúnù. <sup>15</sup> Te sá dúcã<sup>n</sup> ñí cáhá<sup>n</sup>-güedé, te ní xáha<sup>n</sup> espíritú cúndihí yucu ñávãha-á<sup>n</sup> xii-güedé:

—¿Te ná cúú nchòhó nñu dayùhú ñáhá-ndó? Te xìní-í Jèsús, te xìní-í yoo cùu té Páblú, te nchòhó ñá

túú xìní ñáhà-í xii-ndo —càchí espíritú-án xǎha<sup>n</sup>-xi xì-güedé.

16 Te téé yǎhi ñaha espíritú cúndǎhi yucu ñávǎha-án ñí ndanchita-dé ní tñi-dé cue téé quide tátna-án, te ní ndǎhi dóó-güedé ní ndátá-dě, te ní dánǐcuèhé ñáhá-dě xii-güedé, te ní xinu-güedé cuáhá<sup>n</sup>-güedé.

17 Te nchaa ñáyiú isràél ndécú ñùú Éfesú ndǎhi dava-gá ñáyiú ndècu dǐu-ni ñuú-án ñí níhǐ-yu tnúhu nàcuáa ní cuu, te ío ní yùhú-yu, te vǎi-yu ní cachí sá ïo càhnu cuu Xítóhó Jesucrístú.

18 Te dava ñáyiú ní sándáá iní-xi tnúhu Jèsús ní sáhá<sup>n</sup>-yu núú ndécú tǎ Pǎblú, ndǎhi núú ndécú nchàa ñáyiú ní sándáá iní tnúhu-gá ní náhmá-yu nàcuáa ní xóo cada-yu. 19 Te titní ñáyiú ni xóo cada ndùu nehé-yu tutú-yu ní sáhá<sup>n</sup> núú ndécú nchàa ñáyiú sándáá iní-xi tnúhu-gá, te yàcá<sup>n</sup> ní ndada cuendá-yu sá ïo yahu ní sáha-yu tutú-yu, chi ndéé údico úxí mǐl díhú<sup>n</sup> cuìxí<sup>n</sup> ní sáha-yu núú ncháá. Te ncháá-yu ní sahmí-yu tutú-yu. 20 Te sátá ñí cáyú nchaa tutú-án, te vǎi-gá ñáyiú ní tuhá-yu ichi Yá Ndiǒxí, te ní sáha-yu cuendá sá ïo xìni ñuhu tnúhu Yá Ndiǒxí.

21 Te ní cachí té Pǎblú sá quíhí<sup>n</sup>-dé distritú Macèdoniá ndǎhi distritú Acǎyá, te dǎtnùní núhú-dé ñuú Jerusalén, te duca<sup>n</sup> te dǎtnùní quíhí<sup>n</sup>-dé ñuú Rómá. 22 Te ndècu ndǎhi-dé té Timùteú ndǎhi té Èrastú cue téé chǐndee ñaha xii-dé. Te té Pǎblú ní xáha<sup>n</sup>-dě xii-güedé sá códó nùu-güedé quíhí<sup>n</sup> Macèdoniá, te ní xica-güedé cuáhá<sup>n</sup>-güedé, te mee-dě ní quendóo-dé.

*Ñáyiú Éfesú ío dusa<sup>n</sup> quidé-yu ñuú-yu*

23 Te dàvá-án̄ ìo ní cudéě<sup>n</sup>-yu núú nchàa ñáyiu ní tuha ichi Yá Ndiöxí. 24 Te ì<sup>n</sup> téé ñúú Éfesú nání-dě Demètriú. Te téé-án̄ ñí xóo canehe chiu<sup>n</sup>-dé mee-ni dǐhú<sup>n</sup> cuixí<sup>n</sup> ní xóo cadúha-dé veñúhu lǐhli, dàtná cuiní-ndó càa veñúhu Diàná sá cúú ndiöxí-yu. Te vài dǐhú<sup>n</sup> ñí xóo níhí-dě ndihí cue téé ní xóo cada chiu<sup>n</sup> ndihí-dé. 25 Te ní cana-dé cue téé quide chiu<sup>n</sup> ndihí-dé, ndihí nchaa cue téé quide chiu<sup>n</sup> ndihí dǐhú<sup>n</sup> cuixí<sup>n</sup>, te ní xáha<sup>n</sup>-dě xii-güedé:

—Nàha-ndo sá ìo váha ñihí-ó dǐhú<sup>n</sup> cuendá chiu<sup>n</sup> quide-o. 26 Te nàha-ndo sá càchí té Páblú sá ñà díú ndiöxí cúú sǎ ñí cadúha ñáyiu ñuyíú-a. Te duca<sup>n</sup> càhá<sup>n</sup>-dé ñúú-ó, te duca<sup>n</sup>-ni càhá<sup>n</sup>-dé ñihí distritú Àsiá, te ío-gá vài ñáyiu sàndáá iní tnúhu càhá<sup>n</sup>-dé. 27 Te ío úhú ñúu na cuíta chiu<sup>n</sup> quide-o, vá yóo-gá cuaa<sup>n</sup> sá cadúha-o. Te nguíta-yu càhá<sup>n</sup>-yu sá veñúhu Diàná ñá túú càváha, te vá cadá càhnu-gá-yu sàndú-ó. Te nàha-ndo sá ìo càhnu cuu Dianá, chi nchaa ñáyiu distritú Àsiá quidé càhnu ñahá-yu ndihí ñáyiu xǐndecu ñí càa xico ñuyíú — càchí té Demètriú xáha<sup>n</sup>-dě xii-güedé.

28 Te sá dúcá<sup>n</sup> ñí càhá<sup>n</sup> té Demètriú, xǐá<sup>n</sup> ní cudéě<sup>n</sup>-güedé núú tè Páblú, te uu<sup>n</sup>ni ní cuáá-güedé te càchí-güedé:

—¡Ío càhnu cuu Dianá sàndú ñáyiu Éfesú! — càchí-güedé.

29 Te nchaa ñáyiu ñúú Éfesú ndì coyo ndi coyo-yu xícáhá<sup>n</sup>-yu. Te tnàhá úú cue téé distritú Macèdoniá xícá cùu-güedé ndihí té Páblú, ì<sup>n</sup>-dé nání-dě Gáyú, te ì<sup>n</sup>-dé nání-dě Aristarcú. Te ní tnì-güedé úú cue téé-án̄, te cuánguihu coyo ndihí ñaha-güedé vehe núú quidé-güedé jùndá. 30 Te té Páblú cuiní-dé

quihu-dé tnàhá-dé vehe-á<sup>n</sup> cǎhá<sup>n</sup> ndihí ñaha-dě ní cùu, te ñá ní dàña cue téé ní sándáá iní tnúhu-gá.  
 31 Te ì<sup>n</sup> úú cue téé cùn<sup>uu</sup> distritú Àsiá ní cǎhá<sup>n</sup> váha-güedé cuendá té Pǎblú, te ní xáha<sup>n</sup>-güedě xii ì<sup>n</sup> téé xínu cuechi núú-güedě ní sáhá<sup>n</sup>-dé ní xáha<sup>n</sup>-dě xii té Pǎblú sá vǎ quihu-dé vehe núú quidé-güedě jündá. 32 Te uu<sup>ni</sup> ní cuáá-yu nchaá-yu, te ñá ì<sup>n</sup>-ní tnúhu ni cǎhá<sup>n</sup>-yu, chi ndi dí<sup>n</sup> tnúhu ní cǎhá<sup>n</sup>-yu ì<sup>n</sup> ì<sup>n</sup>-yu. Te chitu-gǎ ñáyiú ñá ní cùtnuní iní-yu ná cuendá ní dátacá ñáhá-güedě xití vehe-á<sup>n</sup>, chi ñá ì<sup>n</sup>-ní tnúhu ni cǎhá<sup>n</sup>-yu. 33 Te davá-yu ní cǎhá<sup>n</sup>-yu sá cuěchi té Lijandrú cúú-xí, chi ní xáha<sup>n</sup> ñǎyiú isràél xii-dé sá cǎhá<sup>n</sup>-dé yuhú-yu chindee tnúhu ñaha-dě xií-yu. Te ní quide-dé ndaha-dé núú-yu sá cùndedóho-yu tnúhu cǎhá<sup>n</sup>-dé chindee tnúhu ñaha-dě xií-yu yòtnúhu. 34 Te ní cutnùní iní-yu sá tēe isràél cúú-dě, te uu<sup>ni</sup> ní cuáá tucú-yu, ñá ní dàñá-yu cǎhá<sup>n</sup>-dé, te cǎchí-yu:

—¡Ío cùn<sup>uu</sup> Dianá sàndú ñuú Éfesú! —cǎchí-yu. Te dàtná úú òré ì<sup>n</sup>-ni tnúhu ní cǎhá<sup>n</sup>-yu.

35 Te téé cùu secretariú-ni-gá ní cǎhá<sup>n</sup>-dé, te dǎtnùní cuèé cuèé ní sadí-yu yuhú-yu. Te ní xáha<sup>n</sup>-dě xií-yu:

—Nchaa-ndo cùndedóho-ndo ì<sup>n</sup> tnúhu na cǎhá<sup>n</sup>-í-a. Ío cùn<sup>uu</sup> Dianá, te nchaandi túhú ñáyiú sa nàhá-yu sá ncháá-ó ío nèhe cuendá-ó venúhu-ǎ<sup>n</sup>. Te nàhá-yu sá néhé cuendá-ó sàndú-á<sup>n</sup>, chi véxi cuu<sup>n</sup>-gá andiú. 36 Te vá yóo ì<sup>n</sup> cǎchí sá ñǎ ndàá. Te coto-ndo mēe-ndo, te vá cuídó-ndó càda-ndo, te vá cuídó-ndó cǎhá<sup>n</sup>-ndó. 37 Te ná cuendá ndécá-ndó cuè téé-á<sup>n</sup> vèxi, te ñá túú nǎ ní



quide-güedé, te ñá túú nă ní dùhu-güedé veñúhu, te ñá túú càhá<sup>n</sup> cuèhé-güedé cuendá Dianá. <sup>38</sup> Te núu ío yoo nàá ndihí ñaha xii té Demètriú ndihí cue téé quide chiu<sup>n</sup> ndihí-dé, te quíhí<sup>n</sup>-güedé cacá<sup>n</sup> cuéchi-güedé núu cuè téé cùchiu<sup>n</sup>. Te cue téé cùchiu<sup>n</sup> na cundoho-güedé nũu quehdé-güedé cuéchi-yu àdi ñáhá. <sup>39</sup> Àdi ío-gá ná cuendú ñúhú ìní-ndó, te càhá<sup>n</sup>-ndó òré ná cóo jundá. <sup>40</sup> Te ío úhú nũu na nihí téé tàxi tnuní ñáhá xii-o tnúhu sá dúhá ïo quide dusa<sup>n</sup>-o, te cachí-dé sá ndècuéchi-o chi ñá túú sàndáá ìní-ó-dě quesaha-dě. Te ñá túú tnàhí ndùu váha-xi sá dúhá càda-o ni cuu, te vitna duha ní quide-o, te ñá cùtnùní ìní-ó nàsa cúñaha-o xii téé tàxi tnuní ñáhá xii-o núu na càna ñaha-dé —càchí téé cùu secretariú xàha<sup>n</sup>-dé xií-yu.

<sup>41</sup> Te ní xàha<sup>n</sup>-dě sá nùhú-yu te ní ndihí-yu cuánuhú.

## 20

*Té Păblú cuáhá<sup>n</sup>-dé distrítú Macèdoniá ndihí distrítú Grèciá*

<sup>1</sup> Te òré ñá túú-gă ní quide dusa<sup>n</sup>-yu, te ní cana ñaha tẽ Păblú xii nchaa ñáyiu sàndáá ìní tnúhu Jèsús ní càhá<sup>n</sup>-dé dóho-yu nàcuáa cadá-yu. Te ní quide ndee ìní ñáhá-dě xií-yu, te ní tnii-dé ichi cuáhá<sup>n</sup>-dé distrítú Macèdoniá. <sup>2</sup> Te tayăha-dé cuáhá<sup>n</sup> ì<sup>n</sup> ì<sup>n</sup> ñuú yíndèhu Macèdoniá. Te càhá<sup>n</sup>-dé dóho nchaa ñáyiu sàndáá ìní tnúhu Jèsús nàcuáa cadá-yu, te ní cudí<sup>n</sup> ìní-yu cadá-yu nàcuáa càhá<sup>n</sup> Yă Ndiõxí cadá-yu sá dúcá<sup>n</sup> ñí càhá<sup>n</sup>-dé dóho-yu. Té ní quexìo-dé distrítú Grèciá. <sup>3</sup> Te xíá<sup>n</sup> ñí xíndecu-dé úní yóó. Te xíá<sup>n</sup> quëe-dé bàrcú quíhí<sup>n</sup>-dé distrítú

Sìriá ní cùu, te ní níhí-dě tnúhu sá ndétú ñaha ìí<sup>n</sup> úú cue téé isràél cahni ñaha-güedě xii-dé ní cùu, núu xiǎ<sup>n</sup> ní tñi-dé ichi cuáhá<sup>n</sup>-dé ní yáha-dé ichi distritú Macèdoniá. <sup>4</sup> Te cuáhá<sup>n</sup> ndihí-dé té Sopàtér téé ñuú Bèrèá, ndihí té Aristarcú, ndihí ìí<sup>n</sup> téé nàni Segundú. Te ndi nduú cue téé-á<sup>n</sup> cúu-güedě cue téé ñuú Tesalónicá. Te tnàhá té Gǎyú téé ñuú Dèrbé, ndihí té Timùteú cuáhá<sup>n</sup> ndihí-dé, te tnàhá té Tìquicú ndihí té Tröfimú cuáhá<sup>n</sup> ndihí-dé, te úú cue téé-á<sup>n</sup> cúu-güedě cue téé distritú Àsiá. Te nchaa cue téé-á<sup>n</sup> cuáhá<sup>n</sup> ndihí-güedé té Pǎblú. <sup>5-6</sup> Te ní quexìo-güedé ñuú Fìlipú, te yàcá<sup>n</sup> ní naníhí ñáhá-güedé xii-ndí. Te té Pǎblú ní tendaha-dě cue téé ndihí-dé cuáhá<sup>n</sup>-güedé ñuú Tròás, te ní xáha<sup>n</sup>-dě sá díú-ní yàcá<sup>n</sup> cundetu ñaha-güedé xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhi levadurá. Te sátá ñí yáha vico, te ní quée-ndí bàrcú cuáhá<sup>n</sup>-ndí, te ní xúhu<sup>n</sup>-ndí ichi úhú<sup>n</sup> nduu, te ní quexìo-ndí ñuú-á<sup>n</sup>. Te yàcá<sup>n</sup> ní naníhí tnàhá-ndí ndihí cue téé yòdo nuu cuáhá<sup>n</sup> ní xíndecu-ndí úsá nduu.

*Té Pǎblú cuáhá<sup>n</sup> ngándihí-dé ñáyiu ñuú Tròás*

<sup>7</sup> Te ìí<sup>n</sup> nduu ndumìngú ní naníhí tnàhá-ndí ndihí nchaa ñáyiu ní sándáá iní-xi tnúhu Jèsús ní xexi-ndí pàá ndihí-yu. Te duca<sup>n</sup> ñí quide-ndí, chi ní cachí Jèsús sá dúcá<sup>n</sup> càda-o cuendá sá vǎ nácuànaa-o sá ñí xíhí-gá cuendá naníhí tǎhú-ó. Te té Pǎblú ní ngüíta-dé càhá<sup>n</sup>-dé tnúhu-gá, te càhá<sup>n</sup>-dé ní cuu dava niú, chi cuendá ná tũndaá ingá nduu-á<sup>n</sup>, te caca-dé quíhí<sup>n</sup>-dé ingá xichi. <sup>8</sup> Te ndècú-yu vehe

yòdo tnaha, te yìhí-yu ndéé cuàrtú cúú ùní núú nñnu, te càyú víhí ñùhú xití cuàrtú-án. <sup>9</sup> Te ìn tée sa ta cùu sacuéhé luha nàni-dé Eùticú núcõo-dé yèhe ventaná, cuìní-dé cúdú-dé, chi ní cunaha víhi cahá<sup>n</sup> té Păblú, te ní tnñ ñaha sàní xii-dé ní xídí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xíhí-dé, chi ío dùcú<sup>n</sup> ní ngava-dé. <sup>10</sup> Te tnàhá té Păblú nchìcú<sup>n</sup>-dé ní nuu. Te ní quexìo cunu-dé núú cátuu tée ní xíhí-án, te ní numi ñaha-ni-dě, te ní xáha<sup>n</sup>-dě xií-yu:

—Vá ndìhú iní-ndó, chi ní ndoto-dé —càchí-dé xăha<sup>n</sup>-dě xií-yu.

<sup>11</sup> Te dătnùní cuándaa ndihì ñaha tùcu-dé xií-yu cuàrtú núú yìhí-yu ni cùu, te yàcá<sup>n</sup> ní xexi ndihì ñaha-dě xií-yu, dătnùní ní ngüíta-dé vâi-gá tnúhu ní cáhá<sup>n</sup>-dé, te càhá<sup>n</sup>-ni-dé ní túndaá, te dătnùní ní xica-dé cuáhá<sup>n</sup>-dé. <sup>12</sup> Te tée ní ngava-án ní sánúndeca ñàhá-yu xii-dé ndéé vehe-dé, te ío ní cudíí ìní-yu sá nñ ndoto-dé.

*Ní quee-güedé ñuú Tròás cuáhá<sup>n</sup>-güedé ñuú Miletú*

<sup>13</sup> Te té Păblú ní cachí-dé sá quèhí<sup>n</sup>-ndí ndihì bàrcú ndéé ñuú Àsón, te mee-dě caca saha-dě, te yàcá<sup>n</sup> naníhí tnàhá-ndí ndihì-dé te quée-dé bàrcú, te ní quée-ndí bàrcú cuáhá<sup>n</sup>-ndí. <sup>14</sup> Te ní naníhí tnàhá-ndí ndihì-dé ñuú Àsón, te yàcá<sup>n</sup> ní quée-dé bàrcú tnàhá-dé cuáhá<sup>n</sup>-ndí ñuú Mitilené. <sup>15</sup> Te ní quexìo-ndí ndéé ìngá nduu yatni ñuú Quiú, te ndéé nduu tnée ní quexìo-ndí ñuú Sămú te yàcá<sup>n</sup> ní yáha-ndí, te ní quexìo-ndí ñuú Trògiliú. Te ndéé nduu ìdá ní quexìo-ndí ñuú Miletú. <sup>16</sup> Te té Păblú ñá

ní cuìní-dé yáha-ndí ñúú Éfesú, chi ñá túú ní tnàhá iní-dé cuyaa-dě ichi, chi ío ndìhi iní-dé cuendá cuìní-dé quíní-dé ñúu vá ndácú-dě ndexìo-dé ñúú Jerusàlén cundecu-dé vico Pentecòstés.

*Té Păblú càhá<sup>n</sup> ndìhi-dé cue tée yìndaha ñaha xii ñáyiú sàndáá iní tnúhu Jèsús ñúú Éfesú*

<sup>17</sup> Te òré ndécú tē Păblú ñúú Miletú, te ní cana-dé cue tée yìndaha ñaha xii ñáyiú sàndáá iní tnúhu Jèsús ñúú Éfesú sá quìhí<sup>n</sup>-güedé núú ndécú-dě. <sup>18</sup> Te sátá ñǎ quexìo-güedé, te ní xáha<sup>n</sup>-dě xii-güedé:

—Nàha-ndo nacuáa ní quide-í ndéé cútnàhá ní quexìo-í distritú Àsiá. <sup>19</sup> Chi ní quide-í nàcuáa ní càhá<sup>n</sup> Yă Ndiòxí cada-í, ñá túú ní tühío-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuìní ñáyiú isràél cahni ñàhá-yu xii-í ní cùu, te ío ní ndoho-í ní cácu-í. <sup>20</sup> Te sa nàha-ndo sá ncháándì túhú sa ní cachí tnúhu-í nàcuáa cada-ndo cuendá sá chíndèe ñaha Yă Ndiòxí xii-ndo. Te ní càhá<sup>n</sup>-í tnúhu-gá núú-ndó ncháa-ndo, te ñu-ni duca<sup>n</sup> ñǎ quixi-í ndì tnahá vehe-ndo ñǎ càhá<sup>n</sup>-í tnúhu-gá núú-ndó. <sup>21</sup> Te ní xáha<sup>n</sup>-í xii ñáyiú isràél ndìhi ñáyiú ñá túú cùu ñáyiú isràél sá dáñá-yu nchaa sá cuèhé sá dúhá quidé-yu te quíndáá iní-yu tnúhu Xítohó Jesucrìstú. <sup>22</sup> Te dacuítí quìhí<sup>n</sup>-í ñúú Jerusàlén, chi Espíritú Yă Ndiòxí ní cachí-xi sá dáí quìhí<sup>n</sup>-í, te ñá túú xìní-í nándì cada ñaha-güedě xii-í yàcá<sup>n</sup> te núu na quèxio-í. <sup>23</sup> Te ñǎ ñúú núú sàhá<sup>n</sup>-í càchí tnúhu Espíritú-gá sá chíhí ñàha-güedé vecaá, te cada úhú ñàhá-güedě. <sup>24</sup> Dico ñá túú tnàhí ná cuu cuèi na càhni ñaha-güedé xii-í, dico cuìní-í sá

dǐí iní dandǐhi-í nchaa sá nǐ cachí Xítóhó Jesucrístú cada-í. Te ní cachí Yă Ndiǒxí sá cǎhá<sup>n</sup>-í núú ñăyiu sá ǐo cùu iní ñáhá-gă xií-yu, te naníhí tǎhú-yu núu na quǐndáá iní-yu tnúhu-gá.

<sup>25</sup> Te sa ní cachí tnúhu-í xii-ndo nchàa-ndo sá núu na quǐndáá iní-ndó Yă Ndiǒxí, te ndǐhu ndaha ñàha-gá xii-ndo. Te na cǎchí tnúhu-í sá nì ì<sup>n</sup> nduu-gá vá quǐní ñáhá-ndó xii-í ñuyíú-a. <sup>26-27</sup> Te yúhú ñá túú cuěchi-í núu ǐó ñáyiu vá nánihí tǎhú, chi sa ní cachí tnúhu-í nchaa sá nǐ cǎhá<sup>n</sup> méé Yă Ndiǒxí cada-ndo. <sup>28</sup> Te coto-ndo mèe-ndo, te coto-ndo tnàhá ñáyiu sàndáá iní tnúhu-gá, chi Espíritú-gá ní cachí-xi sá cúnùu-ndo núŷ-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùú-yu, te mee-ndo cùu-ndo datná toli xító-ndó-yu duca<sup>n</sup> cǎda-ndo cuendá, chi nàha-ndo sá Jèsús ní sati níñí-gă, te ní xíhí-gá cuendá naníhí tǎhú-ó ndǐhí-yu. <sup>29</sup> Te yúhú sa cùtnuní iní-í sá òré ñá túú-gă-í ndécú, te quixi ñáyiu dandàhú ñáhá xii-ndo cuendá dañ-ndo tnúhu Yă Ndiǒxí, te cada ñáhá-yu xii-ndo dàtná quídé ñǎñá òré tníí-dí mbéé. <sup>30</sup> Te ñiu-ni ì<sup>n</sup> úú cue téé ndècu ndǐhi-ndo, cue téé-á<sup>n</sup> dacuàndehnde-güedé, te cudana davá-yu quǐndáá iní-yu chítnáhá ñáhă-yu xii-güedé. <sup>31</sup> Te xǎ<sup>n</sup> núu cǎchí tnúhu-í sá ǐo quihí iní-ndó cùndecu-ndo ndǐhi nchaa ñáyiu sàndáá iní tnúhu-gá. Te nàha-ndo sá yúhú ní xíndecu-í úní cuía nǐ cǎhá<sup>n</sup>-í tnúhu Jèsús núú ñăyiu cuěi nduu cuěi niú. Te áma ní xóo ndáhyú-í, chi ñá ní cuíní-yu quǐndáá iní-yu ncháá-yu tnúhu ní cǎhá<sup>n</sup>-í —cǎchí té Pǎblú xǎha<sup>n</sup>-dě xii-güedé.

<sup>32</sup> Te xǎha<sup>n</sup> tùcu-dé:

—Nchòhó cue téé ndècu ndihí-í ichi Xítóhó Jesucristú, ío cuíní-í sá méé Yă Ndiöxí chindee ñàha-gá xii-ndo. Te mee-gă ní cáhá<sup>n</sup>-gá sá ïo cùdíí ìní ñáhá-gă xii-ndo. Te naníhí tàhú-ndó ndihí nchaa ñáyiú cùu cuendá-gá, te chindee ñàha-gá xii-ndo cuendá cada-ndo nchàa sá càhá<sup>n</sup>-gá. <sup>33</sup> Te òré ní xíndecu ndihí ñaha-ï xii-ndo, te ní dǐhú<sup>n</sup> ní dǒó ñà túú ní cùdíí ìní-í. <sup>34</sup> Te mee-ndo sà naha-ndo sá yǔhú ní quide chiú<sup>n</sup>-í, te ní níhí-í nchaa sá ñí nandíhí-í ndihí cue téé xica cuu ndihí-í. <sup>35</sup> Te sa ní xíní-ndó nàcuáa ní quide-í ní quide chiú<sup>n</sup>-í, te diu-ni duca<sup>n</sup> càda chiú<sup>n</sup>-ndo cuendá chindee-ndo nchàa ñáyiú ndàhú, chi sa nàha-ndo nacuáa ní cachí Xítóhó Jesucristú, te duha ní cachí-gá: “Cùdíí-gă ìní-ó cuăha-o ñáyiú ndàhú sá xíní ñǔhú-yu dàcúúxí sǎ táxǐ-yu xii mee-o”, duha ní cachí-gá —càchí té Păblú xăha<sup>n</sup>-dě xii-güedé.

<sup>36</sup> Te sátá dúcá<sup>n</sup> ñí cáhá<sup>n</sup>-dé, te ní ngüíñí xítí-dě ndihí dava-gá-güedé, te ní cáhá<sup>n</sup> ndihí-dé Yă Ndiöxí. <sup>37</sup> Te sátá ñí túhú tnúhu ní cáhá<sup>n</sup>-dé ndihí Yá Ndiöxí, te ní ndáhyú víhí-güedě sá quihí<sup>n</sup>-dé, te ní numi ñaha-güedě, te ní teyuhu ñàha-güedé. <sup>38</sup> Te ní ndíhú víhí ìní-güedé, chi ní xáha<sup>n</sup> tǎ Păblú sá ñí ñ<sup>n</sup> nduu-gá vá náníhí tnáhá-güedě cáhá<sup>n</sup> ndihí tnàha-güedé. Te cuáhá<sup>n</sup> ndihí ñaha-güedě xii-dé núú ndécú bàrcú.

## 21

### *Té Păblú cuáhá<sup>n</sup>-dé ñuú Jerusàlén*

<sup>1</sup> Te ní quide ndee ìní-ndí nchaa cue téé cùnuu. Te ní quée-ndí bàrcú cuáhá<sup>n</sup> ndáá ichi-ndí ñuú Cös. Te nduu tnéé ní sáhá<sup>n</sup>-ndí ñuú Ròdás, te ní yáha-ndí

cuáhá<sup>n</sup>-ndí ñuú Pàtará. <sup>2</sup> Te yàcá<sup>n</sup> ní naníhí-ndí ì<sup>n</sup> bàrcú ñúhú ìchi-xi quíhí<sup>n</sup>-xi distritú Fèniciá, xíá<sup>n</sup> ní quée-ndí cuáhá<sup>n</sup>-ndí. <sup>3</sup> Te ichi cuáhá<sup>n</sup>-ndí ní xiní-ndí distritú Chìpré cáá cuădava xití làmár, te ní yáha-ndí, te ní quendóo ñuú-á<sup>n</sup> xio dàtni-ndí. Te cuáhá<sup>n</sup>-ndí ñuú Tìrú ì<sup>n</sup> ñuú yíndèhu distritú Sìriá cuendá yàcá<sup>n</sup> tava-güedé nchaa sá nchídó bàrcú. <sup>4</sup> Te yàcá<sup>n</sup> ní naníhí tnáhá-ndí ndihí ñáyiu ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáhă<sup>n</sup>-yu sá vă quíhí<sup>n</sup> té Păblú ñuú Jerusalén, chi Espiritú Yă Ndiöxí ní xáha<sup>n</sup>-xi xíí-yu sá ndóhó vîhi-dé ñu na quíhí<sup>n</sup>-dé. <sup>5</sup> Te sátá ñí yáha nduu úsá, te ní quee-ndí cuáhá<sup>n</sup>-ndí yuhu làmár. Te ní quee nchaa ñáyiu ní sándáá iní tnúhu-gá, té, ñadìhí, nchaa landú, nchaá-yu ní sándeca ñàhá-yu yuhu làmár, te òré ní quexìo-ndí, te ní ngüíñí xítí-ndí ní cáhá<sup>n</sup> ndihí-ndí Yă Ndiöxí. <sup>6</sup> Te ní quide ndee iní tnáhá-ndí ndihí-yu, te dătnùní ní quée-ndí bàrcú, te ní naquehé<sup>n</sup>-yu ichi cuánuhú-yu vehé-yu.

<sup>7</sup> Te ní xica bàrcú ñúhú-ndí ní quee-xi ñuú Tìrú cuáhá<sup>n</sup>-ndí ndihí-xi ñuú Tolèmaidá. Te xía<sup>n</sup> ñí sáá-xi te ní quene-ndí, te ní sáhá<sup>n</sup>-ndí ní cáhá<sup>n</sup> ndihí-ndí nchaa ñáyiu sándáá iní-xi tnúhu Jèsús, te ní xíndecu-ndí ndihí-yu ì<sup>n</sup> nduu. <sup>8</sup> Te nduu tnée ní ndée tucu-ndí bàrcú cuáhá<sup>n</sup>-ndí ñuú Cèsareá, te yàcá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lìpé cundecu-ndí ndihí-dé. Te téé-á<sup>n</sup> ñí xóo cada chù<sup>n</sup> ndihí-dé íñú-gá cue téé ní chindee ñàha xii ñáyiu sándáá iní tnúhu-gá ñuú Jerusalén ní

xóo cuãñaha-güedě sá nĩ xóo caxí-yu. Te dătnùní mee-nă tnúhu Yá Ndiõxí cãhá<sup>n</sup>-dé xícá cùu-dé. <sup>9</sup> Te té Lìpé-á<sup>n</sup> ndècu cúmí dēhe dīhí-dé, te ní ì<sup>n</sup>-yu vátá ndúcú ñàha-gá téé xii-yu, te nchaá-yu cãhá<sup>n</sup>-yu tnúhu Yá Ndiõxí tnúhu sá dácàhu iní ñáhá mēe-gá.

<sup>10</sup> Te xía<sup>n</sup> nĩ cuu títñí nduu ndècu-ndí, te ní quexìo ì<sup>n</sup> téé nàni Agabú ñuú-á<sup>n</sup>, véxi-dé distritú Jùdeá, te téé-á<sup>n</sup> tnàhá-dé cãhá<sup>n</sup>-dé tnúhu Yá Ndiõxí. <sup>11</sup> Te ní níhí-dě tnúhu núú ndécú-ndí nũu ní quixi-dé ní cãhá<sup>n</sup> ndihí ñaha-dě xii-ndí. Te ní xícá<sup>n</sup>-dé cìnchú té Păblú, te ní ngóo-dé, te ní ngúita-dé ní dácútú-dě sáhá-dě ndihí ndaha-dé, te ní cachí-dé xii-ndí:

—Espiritú Yá Ndiõxí ní cachí-xi sá tēe dii cìnchú-xi-a tñi ñaha cuè téé isràel ñuú Jerusalén, te duha dacutu ñaha-güedé xii-dé, te cuáha cuendá ñáhá-güedě xii-dé núú cuè téé ñuú Rómá. Duha ní cãhá<sup>n</sup> Espiritú-gá —cächí té Àgabú.

<sup>12</sup> Te sá dúcá<sup>n</sup> nĩ cãhá<sup>n</sup>-dé, te ní xáha<sup>n</sup>-ndí nchaa-ndí sá vă quihí<sup>n</sup> té Păblú ñuú Jerusalén. <sup>13</sup> Te té Păblú ní cachí-dé:

—¿Ná cuendá ndéé dúcá<sup>n</sup> ndàhyú-ndó dândihú iní ñáhá-ndó xii-í-í? Te ñá túú nă cuu cuèi na dàcutu ñaha-güedé, àdi cuèi na cãhni ñaha-güedé xii-í cuendá sá cãhá<sup>n</sup> ndihí-í Jèsús, chi sa ndècu túha-í sá cùú-í —cächí-dé.

<sup>14</sup> Te ñá túú ní sàndáá iní-dé sá dúcá<sup>n</sup> xãha<sup>n</sup>-ndí, núu xía<sup>n</sup> ñá túú-gá ná ní xãha<sup>n</sup>-ndí xii-dé sá vă quihí<sup>n</sup>-dé, te ní xítñàha-ndí:

—Mee-ni-gă Yá Ndiõxí ná cùnaha-gá nása sàni iní-gá cada-gá —xítñàha-na-ndí.

<sup>15</sup> Te ní quehe<sup>n</sup>-ndí ndàchiu<sup>n</sup>-ndí, te ní xica-ndí cuáhá<sup>n</sup>-ndí ñuú Jerusalén. <sup>16</sup> Te cuáhá<sup>n</sup> ndihí-ndí



ii<sup>n</sup> ũú cue té Cèsareá, cue té ní sándáá iní tnúhu Jèsús. Te ndèca ñaha-güedé xii-ndí cuáhá<sup>n</sup> vehe té Mnàson, te té-á<sup>n</sup> cúú-dè té distritú Chìpré, te ndècu-dé ñuú Jerusàlén, te sa ní cuu vài nduu ní sándáá iní-dé tnúhu-gá, te vehe té-á<sup>n</sup> ñí xíndecu-ndí.

*Té Pǎblú ndátnũhu-dé ndihí té Jàcobó*

17 Te òré ní quexìo-ndí ñuú Jerusàlén, te nchaa ñáyiu ní sándáá iní tnúhu Jèsús ní quixí-yu ní dándácõ váha ñàhá-yu, chi ní cudíí víhí iní-yu sá ñí quexìo-ndí. 18 Te nduu tnèé cuáhá<sup>n</sup> ndihí-ndí té Pǎblú cuendá cáhá<sup>n</sup> ndihí-ndí té Jàcobó, te òré ní quexìo-ndí núú ndécú-dě, te ndècu ndihí-dé nchaa cue té yìndaha ñaha xii ñáyiu sándáá iní tnúhu Jèsús. 19 Te té Pǎblú ní dándácõ váha ñaha-dě xii-güedé, te ní xáha<sup>n</sup>-dè nàcuáa ní quide Yá Ndiõxí ní chindee ñàha-gá xii-dé ní cáhá<sup>n</sup>-dé tnúhu-gá núú ñáyiu ñá túú cùu ñáyiu isràél. 20 Te sátá ñí yáha ní cáhá<sup>n</sup>-dé, te ní ndácá<sup>n</sup> táhũ-yu núú Yá Ndiõxí cuendá nchaa sá ñí quide-gá. Te dàtnùní ní xáha<sup>n</sup>-güedě xii té Pǎblú:

—Yòhó sa nàha-n sá ñí cuu titní mĩ ñáyiu isràél ní sándáá iní-yu tnúhu Jèsús, te cǎchí-yu sá ïo xìni ñuhu-xi cadá-yu nchaa nàcuáa cǎhá<sup>n</sup> tnúhu sá ñí chídó tnùní ndii Moisés. 21 Te ní níhĩ-yu tnúhu sá dǎcuàha-n ñáyiu isràél ñáyiu ndècu ñuú xícá cuendá sá vǎ cadá-gǎ-yu nàcuáa ní cachí ndii Moisés cadá-yu. Te xǎha<sup>n</sup>-n xii-yu sá vǎ cuǎha-gá-yu sèñá ñii landú-yu, te vǎ cadá-gǎ-yu dàtná ní xóo cada ñáyiu ndéé sanaha, duha dǎcuaha-n ñáyiu ní níhĩ-yu tnúhu. 22 Te na nihĩ-yu tnúhu sá

ndécú-n ìha, te tnàvíí ngüíta-yu cáhá<sup>n</sup> cuèhé-yu cuèndá-n. <sup>23</sup> Te na càchí tnúhu-ndí nàcuáa cada-n. Ndècu cúmí cue téé vátá cádá-gá-güedé nàcuáa ní cáhá<sup>n</sup> méé-güedé sá cádá-güedé cuèndá nduu vétú iní Yă Ndiǒxí. <sup>24</sup> Te quíhí<sup>n</sup>-n ndìhi-güedé te cada-n nchàa nacuáa ní xóo cada ñáyi ndéé sanaha cuèndá nduu vétú iní Yă Ndiǒxí. Te tava-n dǐhú<sup>n</sup> cuu núu-güedé cháhu-güedé veñúhu, te duca<sup>n</sup> te dǎtnùnǐ ndacu dèté díquí-güedé. Nchaa xiá<sup>n</sup> cada-n, te quiní ñáyi sá ñă ndáá tnúhu càhá<sup>n</sup> nchaa ñáyi càhá<sup>n</sup> cuèhé cuèndá-n. Te na cùtnùnǐ iní-yu sá tnàhá-n quide-n nchaa nacuáa ní chídó tnùnǐ ndí Moisés cadá-yu. <sup>25</sup> Te sa ní quide ndáá-ndí cuèndá nchaa ñáyi ñúú xícá, nchaa ñáyi ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyi-á<sup>n</sup> sǎ vǎ cáxi-yu nchaa sá nchító-ó ndúu táhú nchaa sá càchí-yu cùu ndiǒxí ní cadúha cue ñáyi ñuyú-a. Te ní xáha<sup>n</sup>-ndí sá vǎ cáxi-yu níñí, te vǎ cáxi-yu cuñú nchaa quití cuèhné. Te vǎ càhá<sup>n</sup> ndìhi cue téé ñadìhí te núu ñá díú ñàdìhí-güedé cúu-yu, te ni cuè ñáyi dìhí vǎ càhá<sup>n</sup> ndìhí-yu téé te núu ñá díú yǐ-yu cùu-güedé. Duha ní tee-ndí núu tütú cuáhá<sup>n</sup> —càchí-güedé xǎha<sup>n</sup>-güedé xii té Pǎblú.

*Ní tñi-güedé té Pǎblú xití veñúhu ñáyi isràél*

<sup>26</sup> Te nduu tñé cuáhá<sup>n</sup> té Pǎblú ndìhi cúmí cue téé veñúhu càhnu sá ïo cùnuu núu ñáyi isràél cada-güedé nàcuáa ní xóo cada ñáyi ndéé sanaha cuèndá nduu vétú iní Yă Ndiǒxí. Te ní quíhu-dé veñúhu càhnu sá ïo cùnuu-á<sup>n</sup> ní xáha<sup>n</sup>-dè ná daha-gá nduu cùmánǐ dandìhi-güedé nàcuáa ní xóo cada

ñáyiú ndéé sanaha, te dătnùní cànehe-güedé sá ndúú tăhú Yă Ndiöxí quíhí<sup>n</sup> veñúhu.

27 Te cùmání-gă cuu úsá nduu sá nǐ sáhá<sup>n</sup>-güedé veñúhu càhnu sá ïo cùnuu, te sa ndècu tucu té Păblú veñúhu. Te cue tée isràél véxi distritú Àsiá ní xiní-güedé té Păblú yíhí-dě veñúhu, te ní tniî ñaha-güedě xii-dé, te ío ní cáhá<sup>n</sup> cuèhé-güedé cuendá-dé núú dăva-gá ñáyiú yíhi veñúhu cuendá sá cúděě<sup>n</sup>-yu núú tĕ Păblú. 28 Te níhi ní cáhá<sup>n</sup>-güedé, te xăha<sup>n</sup>-güedě xii-yu:

—¡Nchòhó ñáyiú isràél, yáchí-ndó chî cuánundaha ñaha-ndo! Chi tée-a yayácá<sup>n</sup> cuáhá<sup>n</sup>-dé càhá<sup>n</sup>-dé sá ñà túú nândíhi-o, te càhá<sup>n</sup>-dé sá vă cadá-ó nchàa nacuáa càhá<sup>n</sup> tnúhu sá nǐ chídó tnùní ndíi Moisés, te càchí-dé sá ñà túú nândíhi veñúhu-a. Te ñá díú-ní xǐá<sup>n</sup> chi sa ní quíhu-dé veñúhu-a ndíhi cue tée ñà túú cùu ñáyiú isràél, te sá dúcá<sup>n</sup> nǐ quide-dé, te ñà túú-gă ní cănehe íi-dě xití veñúhu. Te veñúhu-a cùu-xi vehe Yă Ndiöxí —càchí-güedé xăha<sup>n</sup>-güedě xii-yu.

29 Te duca<sup>n</sup> nǐ cáhá<sup>n</sup>-güedé chi ní sani iní-güedé sá nǐ quíhu ndíhi-dé té Tröfimú veñúhu-güedé, chi ní xiní-güedé xícá cùu ndíhi ñaha-dé xití ñuú. Te tée-á<sup>n</sup> cúú-dě tée ñuú Éfesú, te ñá díú tĕe isràél cúú-dě.

30 Te chitu ñáyiú ñuú-á<sup>n</sup> nǐ tacá-yu ní tniî-yu té Păblú táñùhu ñahá-yu ní ndee veñúhu càhnu sá ïo cùnuu, te òré-ni ní nacadí-güedé yèhe veñúhu-á<sup>n</sup>.

31 Te sa cahní-yu té Păblú ní cùu, te ní sáhá<sup>n</sup> ìi<sup>n</sup> úú-güedé núú ndécú tĕe cùu capitá<sup>n</sup> cúnùu-gá, te ní xăha<sup>n</sup>-güedě xii-dé sá ncháá ñáyiú ñuú Jerusalén xǐnàá-yu. 32 Te òré-á<sup>n</sup> cuáhá<sup>n</sup> tĕe cùu capitá<sup>n</sup>

cúnùu-gá ndihì dava-gá cue tée nchìcún-gá ndihì sandàdú-dé. Te òré ní xiní-yu ní quexì coyo-güedé núú xǐxúcu-yu, te ní yùhú-yu ñá túú-gǎ ní càní-yu té Pǎblú. <sup>33</sup> Te tée cùu capitá<sup>n</sup> ní sátuha-dé té Pǎblú, te ní xáha<sup>n</sup>-dě xii cue sandàdú-dé sá tñí ñàha-güedé dacùtu ñaha-güedé úú cadená. Te dǎtnùní ní xícá<sup>n</sup> tñuhú-dě núú-yu, te xáha<sup>n</sup>-dě:

—¿Ná cúú tée-a? ¿Ná ní quide-dé? —càchí-dé xáha<sup>n</sup>-dě xii-yu.

<sup>34</sup> Te tée cùu capitá<sup>n</sup>-á<sup>n</sup> ñǎ ní cùtnuní iní-dé nùu ná cúú sǎ ñǐ quide té Pǎblú, chí uu<sup>n</sup>ni ní cuáá-yu. Te tucu càhá<sup>n</sup> ñ<sup>n</sup>, tucu càhá<sup>n</sup> ñ<sup>n</sup>-yu, núu xǐǎ<sup>n</sup> ní xáha<sup>n</sup>-dě cue sandàdú-dé sá cándèca ñaha-güedé xii-dé quíhí<sup>n</sup> cuàrtél núú ndécú-güedě. <sup>35-36</sup> Te nchìcún<sup>n</sup> ñáhǎ-yu cuáhá<sup>n</sup> ní quexì ndéé nàcuáa càa nchio cuíní-yu cahni ñàhá-yu xii-dé ni cùu. Te níhi ní cáhá<sup>n</sup>-yu xǎhǎ<sup>n</sup>-yu sá cáhni ñàha-güedé, te xǐǎ<sup>n</sup> ní ndacani ñaha-güedě ndécá ñàha-güedé cuásaá nchio-ǎ<sup>n</sup>.

*Té Pǎblú xáha<sup>n</sup>-dě xii-güedé sá ñà túú cuěchi-dé*

<sup>37</sup> Te cuánguihu-güedé cuàrtél ndihì té Pǎblú ní cùu, te ní xáha<sup>n</sup>-dě xii tée cùu capitá<sup>n</sup> cúnùu-gá:

—Càhá<sup>n</sup> ndàhú-í núú-n cùndetu-ñ na cúñaha-í ñ<sup>n</sup> úú tñuhu xii-yu —càchí-dé xáha<sup>n</sup>-dě.

Te tée tàxi tñuní-á<sup>n</sup> ñǐ xáha<sup>n</sup>-dě:

—¿Náa tñàhá yòhó càhá<sup>n</sup>-n tñuhu griégú? <sup>38</sup> Te ní cáhà<sup>n</sup>-í sá tée ègíptú cúú-n, chí dǐu-n ñǐ ndúcú-n cuè tée ní nǎá ndihì tée cùchiu<sup>n</sup> Cesár ní cáhà<sup>n</sup>-í, chí dǐu ñ<sup>n</sup> tée yàcá<sup>n</sup> ní ndúcú-dě cúmí mìl cue tée ní sahnì ndíyi. Te ndèca tñaha-güedé ní sáhá<sup>n</sup> xití yucu ní xíhi váha-güedé —càchí-dé xáha<sup>n</sup>-dě xii té Pǎblú.

<sup>39</sup> Te té Pǎblú ní xáha<sup>n</sup>-dě:

—Ñá díú tée ègiptú cúu-í, chi tée isràél cúu-í, chi ñu-ni tée isràél cúu tātà-í, te dícó-ni sá ñi cacu-í ñuú Tàrsú ñuú cáhnú, te ñuú-á<sup>n</sup> yíndèhu-xi distritú Cìliciá. Te cuìní-í cada ndee ìní-n dàña-n na cahá<sup>n</sup> ndihí-í-yu —càchí-dé xǎha<sup>n</sup>-dě.

<sup>40</sup> Te ní xáha<sup>n</sup> tée cùu capitá<sup>n</sup> cùnùu-gá sá cúu cǎhá<sup>n</sup> té Pǎblú, núu ní ngúnutnǎi-dé núu nchio, te ní quide-dé ndaha-dé sá cùndedóho-yu. Te ní sadí-yu yuhú-yu, te ní cáhá<sup>n</sup>-dé tnúhu ñáyiú isràél, te xǎha<sup>n</sup>-dě xií-yu:

## 22

<sup>1</sup> —Chí cádá càhnu iní nchòhó cue tée sa cuéhé ndihí nchòhó cue tée cuechi, na càhá<sup>n</sup>-í ñi<sup>n</sup> tnúhu cundedóho-ndo sǎ ñà túú cuéchi-í, chi ñà túú ñà ní quide-í, te ñi ñà túú ñà tnúhu càhá<sup>n</sup>-í —càchí-dé xǎha<sup>n</sup>-dě xii-güedé.

<sup>2</sup> Te cuendá sá dúcá<sup>n</sup> ñi cáhá<sup>n</sup>-dé tnúhu mée-yu núu tnàvii-ñà ní sadí-yu yuhú-yu ní xíndedóho-yu ní cáhá<sup>n</sup>-dé, te xǎha<sup>n</sup>-dě:

<sup>3</sup> —Yúhú cúu-í tée isràél, te ní cacu-í ñuú Tàrsú, te ñuú-á<sup>n</sup> yíndèhu-xi Cìliciá. Te davitna lǎhli-í cútnàhá ní quexìo-í ñuú Jerusàlén ní dácúáhà ñàha té Gamàliél. Te ní dácúáhà-í nchaa tnúhu ní chídó tnùnì nchaa cue tée ndée sanaha nacuáa cada ñáyiú. Te yúhú ní cahu iní-í ní quide-í titní núu chǎu<sup>n</sup> nacuáa cuu váha iní Yǎ Ndiöxí ní cáhá<sup>n</sup>-í, te ñu-ni duca<sup>n</sup> quide nchohó tucu. <sup>4</sup> Te ní sánú ndúcù-í nchaa ñáyiú sàndáá iní-xi tnúhu Jèsús, cuéi tée, cuéi ñáyiú ñihí ní dácútù-í-yu, te ní chihi-í-yu vecaá, te ní níhì-í tnúhu ndee ìní sá cáhní-ndǎ-yu. <sup>5</sup> Te dútú cùnùu-gá ndihí cue tée cùnùu núu-ndó nàha-güedé sá ndàá càhá<sup>n</sup>-í chi mee-güedé ní

taxi-güedé tutú cuáñaha-ĩ xii ñáyiú isràél ñáyiú ndècu ñuú Dàmascú cuèndá cutnùní iní-yu ná chíú<sup>n</sup> cuáhá<sup>n</sup>-í ní cùu. Te ñùhu-í ichi cuáhá<sup>n</sup>-í ñuú-á<sup>n</sup> cuánúndúcù-í ñáyiú ní sándáá iní-xi tnúhu Jèsús cuèndá dacùtu-í-yu te candeca-í-yu ndixi, te iha cada úhú ñáhá-güedé xií-yu ní cùu.

*Té Păblú xăha<sup>n</sup>-dě xii ñáyiú nàcuáa ní cuu ní tuha-dé ichi Jèsús*

*(Hch. 9:1-19; 26:12-18)*

<sup>6</sup> Te ta cùyatni-í ñuú Dàmascú cuáhá<sup>n</sup>-í, te cùu-xi datná òré caúxúú nduu, te uu<sup>n</sup>ni ní quee ñuhú andiú, te ní dáyèhé-xi ndéé núú nùtní-í. <sup>7</sup> Te ní quide nee-xi núù-í, xíá<sup>n</sup> ní nduá-í ndéé ñuhu. Te ní tecú dóho-í càhá<sup>n</sup> ì<sup>n</sup> sá càhá<sup>n</sup> andiú, te càchí-xi: “Yòhó té Sàulú, ¿ná cuèndá cúú ùhú iní ñáhá-n dándoho ñaha-n xii-í?”, càchí sá càhá<sup>n</sup>-á<sup>n</sup>. <sup>8</sup> Te ní xáha<sup>n</sup>-ĩ: “¿Ná cúú yòhó sá càhá<sup>n</sup>-ái<sup>n</sup>?”, xăha<sup>n</sup>-ĩ. Te ní cáhá<sup>n</sup> tucu ingá xito te càchí-xi: “Yúhú cúù-í Jèsús téé ní xíndecu ñuú Nazàrét, te duca<sup>n</sup> ïo dándoho ñaha-n xii-í”, càchí sá càhá<sup>n</sup>-á<sup>n</sup>. Te xíá<sup>n</sup> ní cutnùní iní-í sá díú Jèsús càhá<sup>n</sup>. <sup>9</sup> Te nchaa cue téé ndihí-í ní xiní-güedé ní dáyèhé ñuhú, te ní yùhú-güedé, dico ñá túú ní tècú dóho-güedé òré ní cáhá<sup>n</sup>-gá. <sup>10</sup> Te ní xáha<sup>n</sup>-ĩ xii-gá: “Yòhó Xítohó Jesucristú, ¿ná cuíní-n càda-í?”, xăha<sup>n</sup>-ĩ xii-gá. Te ní cachí-gá: “Ndacóo, te quíhí<sup>n</sup>-n ñuú Dàmascú, yacá<sup>n</sup> tecú tnúhu-n nchàa nacuáa cuíní Yă Ndiõxí cada-n”, càchí-gá —càchí té Păblú xăha<sup>n</sup>-dě xií-yu.

<sup>11</sup> Te ní xáha<sup>n</sup> tucu té Păblú:

—Te cuèndá sá ñí dăcuáá ñàha ñuhú xii-í ñuú ní tní cue téé ndihí-í ndaha-í ndécá ñàha-güedé cuáhá<sup>n</sup> ndéé ñuú Dàmascú.

12 Te yàcá<sup>n</sup> ndécú ì<sup>n</sup> té nàni Ananiás, te ío vài sá ñí chídó tnùní ndíi Moisés cadá-yu quide-dé. Te nchaa ñáyíu ñuú Dàmascú ío váha càhá<sup>n</sup> ndíhi ñàhá-yu xii-dé. 13 Te ní quexio-dé núú ndécù-í, te ní cachí-dé: “Yòhó té Sàulú, té ndècu ndíhi-í ichi Xítóhó Jesucrístú, ndúha núú-n”, càchí-dé. Te òré-ni ní nacaá<sup>n</sup> núú-í te ní xiní-í-dé. 14 Te dătnùní ní cachí-dé: “Yá Ndiòxí ní cáhá<sup>n</sup> ndíhi-gá ñaní tnáhá-ó ñí xíndecu ndéé sanaha. Te diu-gá ní cáxi ñaha-gă xii-n cuendá quiní-n nchàa sá vâha cuiní-gá cada-n. Te quiní-n Jèsús Yaá ñá túú cuèchi-xi, te diu-ni mee-gă cáhá<sup>n</sup> ndíhi ñaha-gă xii-n. 15 Te cáhá<sup>n</sup>-n tnũhu Jèsús núú nchàa ñáyíu, te cáhá<sup>n</sup>-n nchàa sá ñí xiní-n ndíhi nchaa sá ñí xíndedóho-n. 16 Tnàvíí, te quíhí<sup>n</sup>-n cuàndute-n, te cáhá<sup>n</sup> ndíhi-n Yá Ndiòxí cuendá cada càhnu iní-gá nchaa sá cuèhé sá dúhá ñí quide-n”, duha ní cachí té Ananiás xii-í —càchí té Păblú xăha<sup>n</sup>-dê xií-yu.

*Té Păblú ní cani-dé cuèndú nàcuáa ní xáha<sup>n</sup> Jèsús cada-dé quíhí<sup>n</sup>-dê ñuú núú xíndecu ñáyíu ñá túú cùu ñáyíu isrâél*

17 Te ní xáha<sup>n</sup> tùcu té Păblú:

—Te ní ndee-í cuándixi-í ñuú Jerusàlén. Te ní sáhá<sup>n</sup>-í veñúhu càhnu sá ìo cùnūu ní cáhá<sup>n</sup> ndíhi-í Yá Ndiòxí, te ní dácótó núú ñàhá-xí sá mée Jèsús ní xiní-í xítí veñúhu, 18 te ní cachí-gá: “Yáchí, quee-n ñuú Jerusàlén, chi ñáyíu-a vá quíndáá iní-yu nàcuáa ní cachí-í cúñaha-n xii-yu cuendá-í”, duha ní cachí-gá xii-í. 19 Te ní xáha<sup>n</sup>-í xii-gá: “Yòhó Xítóhó Jesucrístú, sa xìní-n sá ncháá ñáyíu nàhá-yu sá ñí sáhá<sup>n</sup>-í ndí tnahá ì<sup>n</sup> ndí tnahá ì<sup>n</sup> veñúhu nànducu-í ñáyíu sàndáá iní tnúhu-n, te ní tnií-í-yu,

ní chihi-í-yu vecaá, te ní táúchíù<sup>n</sup>-í ní caniha-güedě xií-yu. <sup>20</sup> Te cútnàhá ní sahani-güedé ndíi Těvá téé ní xóo cáhá<sup>n</sup> tnúhu-n, te tnàhá-í ndécú òré-á<sup>n</sup> te ní xindeé-í dóó cue téé ní sahani ñaha xii ndíi. Te yúhú ní cáhà<sup>n</sup>-í sá nǐ quide váha-güedé sá dúcá<sup>n</sup> nǐ quide-güedé”, duha ní xáha<sup>n</sup>-ǐ xii-gá. <sup>21</sup> Te ní cachí tnúhu-gá xii-í: “Cuàhá<sup>n</sup> chi cuíní-í quíhí<sup>n</sup>-n nchàa ñúú xícá nǔú xĩndecu cue ñáyiú ñá túú cùu ñáyiú isràél cáhá<sup>n</sup>-n tnúhu-í”, cächí-gá —cächí té Páblú xáha<sup>n</sup>-dě xií-yu.

*Te Páblú ndíhi téé tàxi tnuní ñáhá xii cue sandadú*

<sup>22</sup> Te sá dúcá<sup>n</sup> nǐ cáhá<sup>n</sup>-dě, te ñá ní tnàhá-gá iní-yu cundedóho-yu tnúhu càhá<sup>n</sup>-dě. Te ñ<sup>n</sup>-ni nǐ cuú-yu nchaá-yu, te ní cuáá-yu, te xǎhǎ<sup>n</sup>-yu:

—¡Chí cáhni-dě! ¡Ñá díú sǎ cundècu-dé ñuyíú-a! — cächí-yu xǎhǎ<sup>n</sup>-yu.

<sup>23</sup> Te mei òré duca<sup>n</sup> nǐ cáhá<sup>n</sup>-yu, te ní ndátǎ-yu dóo-yu, te ní dáquéně-yu núú nǐnu sá sàtú iní-yu. Te ní quéhnu-yu ñuhu, te ní dácácòyó-yu núú nǐnu sá ïo sàtú iní-yu. <sup>24</sup> Te téé cùu capitá<sup>n</sup> cúnùu-gá ní xáha<sup>n</sup>-dě xii cue sandadú-dé:

—Chí dítá-dě ná quǐhu-dé ndéé xití vehe, te cani-ndo-dě ñii, chi na quène yuhu-dé ná tnúhu ní cáhá<sup>n</sup>-dě nǔu ndéé dúcá<sup>n</sup> cùdèé<sup>n</sup>-yu núú-dě — cächí-dé xǎhǎ<sup>n</sup>-dě xii-güedé.

<sup>25</sup> Te sátá nǐ dácútú ñàha-güedé xii té Páblú sá cáni ñàha-güedé ní cùu, te ní xáha<sup>n</sup>-dě xii téé cùu capitá<sup>n</sup> ndécú-ǎ<sup>n</sup>:

—Te na cächí tnúhu-í sá vǎ cúú càniha-güedé ñii, chi téé ròmá cùu-í, te vátá quíní ndáá-gá-ndó nǔu ndècuéchi-í àdi ñáhá —cächí-dé xǎhǎ<sup>n</sup>-dě xii téé cùu capitá<sup>n</sup>.



26 Te sá dúcá<sup>n</sup> nǐ cáhá<sup>n</sup>-dé, te ní sáhá<sup>n</sup> téé cùu capitá<sup>n</sup> núu tée cùnūu-gá, te ní xáha<sup>n</sup>-dě:

—Vá cúu càni-o téé-ǎ<sup>n</sup>, chi téé ròmá cúú-dě — càchí-dé xǎha<sup>n</sup>-dě.

27 Te ní sáhá<sup>n</sup> téé cùu capitá<sup>n</sup> cùnūu-gá ndéé núu tē Pǎblú, te ní xáha<sup>n</sup>-dě:

—Cáhá<sup>n</sup> ndáá-n nūu ndisa téé ròmá cúú-n — càchí-dé xǎha<sup>n</sup>-dě.

Te ní xáha<sup>n</sup> tē Pǎblú:

—Ndáá sá tēe ròmá cúú-í —càchí té Pǎblú xǎha<sup>n</sup>-dě xii téé cùnūu-á<sup>n</sup>.

28 Te ní xáha<sup>n</sup> tēe cùnūu-á<sup>n</sup>:

—Yúhú tnàhá-í cúú-í téé ròmá, chi vài díhú<sup>n</sup> nǐ cháhu-í —càchí-dé xǎha<sup>n</sup>-dě.

Te té Pǎblú ní xáha<sup>n</sup>-dě:

—Tnàhá-í cúú-í téé yàcá<sup>n</sup> tucu, chi tǎtà-í cúú-dě téé ròmá —càchí té Pǎblú xǎha<sup>n</sup>-dě xii téé cùu capitá<sup>n</sup> cùnūu-gá.

29 Te uu<sup>n</sup>ni ní nacaca sata cuè téé cuáhá<sup>n</sup> caniha xii-dé ní cùu. Te ní yúhú téé tàxi tnuní sá dúcá<sup>n</sup> nǐ xáha<sup>n</sup> tē Pǎblú sá tēe ròmá cúú-dě, chi ní xáha<sup>n</sup>-dě ní dácútú ñàha-güedé xii-dé, núu xǎ<sup>n</sup> ní yùhu-dé.

*Té Pǎblú ní cáhá<sup>n</sup> ndíhi-dé cue téé cùnūu oré ní quide-güedé jündá*

30 Te téé tàxi tnuní sandàdú ñá ní xìní-dé ná cuéchi ní dácáá ñǎyiu isràél díquí tē Pǎblú, núu xǎ<sup>n</sup> nduu tnéé ní cana-dé cue dútú cùnūu, ndíhi cue téé cùchiu<sup>n</sup>, ndíhi cue téé cùu sacuéhé, te ní xáha<sup>n</sup>-dě sá cádá-güedé jündá cuèndá nducu tnūhu-güedé núu tē Pǎblú ná cuéchi ní dácáá-yu díquí-dě. Te ní xáha<sup>n</sup>-dě xii cue sandàdú sá nándàxi ñàha-güedé cadená ndútú-dě, te candeca ñàha-güedé quíhí<sup>n</sup> núu cádá-güedé jündá. Te ní sáhá<sup>n</sup>-güedé ní nandaxi ñàha-güedé xii-dé ndécá ñàha-güedé cuáhá<sup>n</sup>

jùndá, te ní quexìo-güedé, te ní ngúnutní-í-dé núú cuè té cùchiu<sup>n</sup>.

## 23

<sup>1</sup> Te yàcá<sup>n</sup> ní xíndéhé vǎha té Pǎblú núú nchàa-güedé, te ní xáha<sup>n</sup>-dě:

—Cada càhnu iní nchòhó cue té cùchiu<sup>n</sup>, te duca<sup>n</sup> nchòhó cue té cùu sacuéhé, véxi-í càchí tnúhu-í sá ñà túú cuèchi-í, chi mee Yǎ Ndiǒxí náhá-gǎ nása ndècu-í ñuyíú-a, te ñà túú cùcaha<sup>n</sup> núù-í núú-gǎ —càchí té Pǎblú xǎha<sup>n</sup>-dě xii-güedé.

<sup>2</sup> Te té Anàniás té cùu dútú cúnùu-gá ní xáha<sup>n</sup>-dě xii cue té nùtní yatni ñíni té Pǎblú sá cání-güedé déhndé yuhu-dé. <sup>3</sup> Te té Pǎblú ní xáha<sup>n</sup>-dě xii dútú-ǎ<sup>n</sup>:

—Yòhó, chi úhú tnàhí iní-n, chi ní ndúcú-n tée ní caniha xì-í, te ñà túú cuèchi-í, dico quiní-n nǎ cada ñaha Yǎ Ndiǒxí xii-n. Te yòhó ní cana ñaha-n ndùcu tnúhu-n nùu quide-í nchaa nàcuáa càhá<sup>n</sup> tnúhu sá ñí chídó tnùní ndí Moisés cada-o. Te mee-n ñí ndúcú-n tée ní caniha, te ñà túú dùca<sup>n</sup> ní càhá<sup>n</sup> ndí cada-o —càchí té Pǎblú xǎha<sup>n</sup>-dě xii dútú cúnùu-gá-á<sup>n</sup>.

<sup>4</sup> Te cue té xínutní ñíni té Pǎblú ní xáha<sup>n</sup>-güedé xii-dé:

—Nèhé ní quide-n chi ní xícuèhé-n dútú cúnùu-gá té xìnu cuechi núú Yǎ Ndiǒxí —càchí-güedé xǎha<sup>n</sup>-güedé xii té Pǎblú.

<sup>5</sup> Te té Pǎblú ní xáha<sup>n</sup>-dě xii-güedé:

—Cada càhnu iní-ndó chi ñà túú xìní-í sá dútú cúnùu-gá cúú-dé, chi núú tütú Yǎ Ndiǒxí càchí-xi sá vǎ cúú càhá<sup>n</sup> cuèhé-ó cuèndá ñ<sup>n</sup> té cùnùu ñuú-ó yòtnúhu. Te yúhú ñà túú xìní-í sá tée cùnùu cuu-dé

nũu ní sácóo-í ní cáhá<sup>n</sup>-í —càchí té Păblú xăha<sup>n</sup>-dě xii-güedé.

<sup>6</sup> Te òré-á<sup>n</sup> nĩ cutnùnı́ inı́ té Păblú sá dává-güedě cündı̂hi-güedé cue tée cùu saducéú, te dava-güedé cündı̂hi-güedé cue tée cùu fariséú, te níhi ní cáhá<sup>n</sup>-dé ní xăha<sup>n</sup>-dě xii-güedé:

—Yúhú cùu-ı́ tée fariséú, te tnàhá tătà-ı́ ndı̂hi xı̂-ı́ cúu-güedě cue tée fariséú tucu. Te tnàhá yúhú sàndáá inı́-ı́ sá ndótó nchàa ñáyıu ní xı̂hı́, te núu xı̂<sup>n</sup> cuını́-ndó ndùcu tnúhu-ndo nũu-ı́ cáná ñàha-ndo —cachı́-dé xăha<sup>n</sup>-dě xii-güedé.

<sup>7</sup> Te sá dúcá<sup>n</sup> nĩ cáhá<sup>n</sup>-dé xı̂<sup>n</sup> ní nàá ndı̂hi tnàha cue tée cùu fariséú ndı̂hi cue tée cùu saducéú, chi ñá ĩ<sup>n</sup>-ní tnúhu ni căhá<sup>n</sup>-güedé, chi ní ndı̂ quehe<sup>n</sup> ndı̂ quehe<sup>n</sup>-güedé sá nĩ cáhá<sup>n</sup>-güedé. <sup>8</sup> Te cue tée cùu saducéú càchı́-güedé sá vă ndótó cuè ñáyıu ní xı̂hı́, te cue tée cùu fariséú càchı́-güedé sá ndótö-yu. Te cue tée cùu saducéú càchı́-güedé sá ñà túú espı́ritú xı́nú cuèchi núú Yă Ndiöxı́, te cue tée cùu fariséú càchı́-güedé sá ió espı́ritú xı́nú cuèchi núú-gă. <sup>9</sup> Te ta cùdéé<sup>n</sup>-güedě cuáhá<sup>n</sup>, te níhi-gá cúu inı́-güedé cáhá<sup>n</sup>-güedé, te ĩ<sup>n</sup> ũú cue tée cùu fariséú cue tée dàcuaha ñaha xii ñáyıu nchaa tnúhu ní chídó tnùnı́ ndı̂i Moısés ní cáhá<sup>n</sup> níhi-güedé, te xăha<sup>n</sup>-güedě:

—Ñá túú cuèchi-dé, te cudana te ní cáhá<sup>n</sup> ndı̂hi-dé ĩ<sup>n</sup> espı́ritú xı́nú cuèchi núú Yă Ndiöxı́ te vá ngöo vá cúu văha inı́-ó nũú-gă —càchı́ cue tée cùu fariséú xăha<sup>n</sup>-güedě xii-güedé.

<sup>10</sup> Te cuendá sá ĩo xı̂nàá-güedé, xı̂<sup>n</sup> ní yùhú tée cùu capitá<sup>n</sup> cúnùu-gá sá cáhnı́-güedě té Păblú, núu xı̂<sup>n</sup> ní xăha<sup>n</sup>-dě sá quı̂hı́<sup>n</sup>-güedé cúnúcuaca ñaha-güedě candeca ñaha-güedě núhú cuàrtél.

11 Te ndéé niú cúú ùú ní quexìo Xítóhó Jesucrìstú núú ndécú tĕ Păblú, te ní xáha<sup>n</sup>-gă:

—Ñíí cunduu-n, vá yùhú-n, chi nàcuáa ní cáhá<sup>n</sup>-n nĭ cacunehe ñaha-n xii-í iha, te ñu-ni duca<sup>n</sup> cǎhá<sup>n</sup>-n càcunehe ñaha-n xii-í quíhí<sup>n</sup>-n ñùú Ròmá —càchí-gá xáha<sup>n</sup>-gă xii-dé.

### *Cahni-güedé té Păblú ní cùu*

12-13 Te nduu tnéé ní natacá vĭhi-gá údico cue tée isràél ní ndatnúhu-güedé sá cáhni-güedé té Păblú, te ní xitnáha-güedé:

—Ni dĭtá vǎ cáxí-ó te ni ndùte vá cóhó-ó ndéé ndacu-o càhni-o té Păblú, te dǎtnùní caxi-o dĭtá, te coho-o ndùte, chi sa ní sani iní-ó sǎ cǎdá-ó, te cuu cuéchi xii-o nŭu vá cǎdá-ó —càchí-güedé xitnáha-güedé.

14 Te ní sáhá<sup>n</sup>-güedé núú ndécú nchàa dútú cúnùu ndihì nchaa cue tée cùu sacuéhé, te ní xáha<sup>n</sup>-güedé:

—Ní cachí-ndí sá ni dĭtá vǎ cáxí-ndĭ ndéé nŭu ní ndacu-ndí ní sahani-ndí té Păblú, chi sa ní sani iní-ndĭ sá cǎdá-ndĭ, te cuu cuéchi núu vá cǎdá-ndĭ. 15 Te duha cada-ndo ndihì dava-gá cue tée cùnùu, chi cúñaha-ndo xii tée cùu capitá<sup>n</sup> cúnùu-gá: “Quixi ndihì-n tĕ Păblú núú ndécú-ndĭ cuendá ndatnúhu ndihì-ndĭ-dé, chi cuiní-ndĭ nducu tnŭhu váha-gá-ndĭ ná cúú sǎ nĭ quide-dé”, duha cúñaha-ndo xii tée tàxi tnuní sandàdú. Te duca<sup>n</sup>-ni cŭñaha-ndo dǎndahú-ndó-güedé cuendá quixi ndihì-güedé té Păblú, te nchúhú sa cundetú-ndĭ-güedé ichi, chi quiní té Păblú ná cahni-ndĭ-dé —càchí-güedé xǎha<sup>n</sup>-güedé xii cue tée cùchiu<sup>n</sup>.

16 Te déhe cúha té Păblú ní níhí-dě tnúhu nàcuáa cada-güedé ditó-dé. Te ní sáhá<sup>n</sup>-dé cuártél, te ní xáha<sup>n</sup>-dě xii ditó-dé nàcuáa càhá<sup>n</sup>-güedé cada ñaha-güedě. 17 Te ní cana té Păblú ñ<sup>n</sup> tée cùu capitá<sup>n</sup>, te ní xáha<sup>n</sup>-dě:

—Vá cündèe iní-n, quíhí<sup>n</sup> ndíhi-n tée-a na càhá<sup>n</sup> ndíhi-dé tée cùnuu-gá, chi ndècu ñ<sup>n</sup> cuendú cúñaha-dě cuiní-í —càchí té Păblú xăha<sup>n</sup>-dě xii tée cùu capitá<sup>n</sup>.

18 Te dătnùní ní xica tée cùu capitá<sup>n</sup> ndécá-dě dăxí<sup>n</sup> tē Păblú cuáhá<sup>n</sup> núú ndécú tēe cùnuu-gá, te òré ní quexìo-güedé núú-dě, te ní xáha<sup>n</sup> tēe cùu capitá<sup>n</sup> xii-dé:

—Té Păblú tée yíhi vecaá ní cana ñaha-dě xii-í, te ní cachí-dé véxi-í ndíhi tée-a cuendá cachí tnúhu-dé ñ<sup>n</sup> cuendú cuiní-dé —càchí-dé xăha<sup>n</sup>-dě xii tée cùnuu-gá.

19 Te tée cùnuu-á<sup>n</sup> ñ<sup>n</sup> tñi-dé ndaha dăxí<sup>n</sup> tē Păblú, te tànehe ñaha-dé cuáhá<sup>n</sup> ñ<sup>n</sup> xio, te ní xícá<sup>n</sup> tnúhú-dě núú-dě, te xăha<sup>n</sup>-dě:

—¿Ná cuendú cuiní-n cáhá<sup>n</sup>-n? —càchí-dé xăha<sup>n</sup>-dě xii dăxí<sup>n</sup> tē Păblú.

20 Te ní xáha<sup>n</sup>-dě xii tée cùnuu-á<sup>n</sup>:

—Cue tée isràél ní ndatnúhu ndáá-güedé sá quíxí-güedě tneé cáhá<sup>n</sup> ndàhú-güedé núú-n càndeca-n té Păblú quíhí<sup>n</sup> jùndá, te yàcá<sup>n</sup> cacă<sup>n</sup> tnúhú ndáá-güedé núú-dě ná cúú să ñ<sup>n</sup> quide-dé, càchí-güedé xítnàha-güedé. 21 Te vá quíndáá

iní-n chi dicó dandàhú ñáhá-güedě, chi vìhi-gá údico-güedé ndátnúhu-güedé cundedí-güedé ichi cahni ñaha-güedě. Te xítnàha-güedé sá ni dítá vă caxí-güedě, te ni ndùte vá cóhó-güedě ndéé ñuu ní ndacu-güedé ní sahani ñaha-güedě, te dătnùní

caxi-güedé dítá, te coho-güedé ndute, chi sa ní sani iní-güedé sá cádá-güedě, te cuu cuéchi núu vá cádá-güedě, cächí-güedé xitnáha-güedé. Te cundecu túha-ná-güedé cundetu ñaha-güedě tneé, te núu na quíndáá iní-n càndeca-n-dé quíhí<sup>n</sup> jundá —cächí-dé xáha<sup>n</sup>-dě xii té cùnuu-á<sup>n</sup>.

<sup>22</sup> Te té cùnuu-á<sup>n</sup> ñí xáha<sup>n</sup>-dě:

—Cuanùhú, te vá yõ tnàhí cúñaha-n sã ñí quixi-n ñí cachí tnúhu-n nàcuáa càhá<sup>n</sup>-güedé cada-güedé té Páblú —cächí-dé xáha<sup>n</sup>-dě.

*Ndèca-güedé té Páblú cuáhá<sup>n</sup> núú té Juélí té cùu gobiernú*

<sup>23</sup> Te té cùnuu-gá ní cana-dé úú cue té cùu capitá<sup>n</sup>, te xáha<sup>n</sup>-dě:

—Tava-ndo úú cièndú sandàdú cue té xica saha, ndihí únídico úxí sandàdú cue té yòdo cuayú, ndihí úú cièndú sandàdú mee-ni cuè té xínehe lànzá. Te cada túha-ndo chi caca-ndo òré caá íí<sup>n</sup> niú quíhí<sup>n</sup>-ndó ñúú Cèsareá ndihí té Páblú. <sup>24</sup> Te nducu-ndo cuèdicó íí<sup>n</sup> úú cuayú codo-dě ndihí cue té ndèé ñáhá xii-dé. Te cada cuedàdú-ndó-dě ichi, te candeca-ndo-dě quíhí<sup>n</sup> quíndeca-ndo-dě núú té cùu gobiernú —cächí té cùnuu-á<sup>n</sup> xáha<sup>n</sup>-dě xii cue té cùu capitá<sup>n</sup>.

<sup>25</sup> Te té cùnuu-á<sup>n</sup> ñí cadúha-dé tutú cuèndá quíhí<sup>n</sup> ndaha té Juélí té cùu gobiernú. Te duha ní chídó tnùní-dé núú tütú cuáhá<sup>n</sup>:

<sup>26</sup> “Cóvaha díí-n, tãtá gobernàdór. Ío cada càhnu iní, yúhú nánì-í Claudiú Lisiás. Yúhú ní tendaha-í íí<sup>n</sup> tutú véxi ndaha-n cuèndá quiní tnùní-n nàcuáa ní cuu iha. <sup>27</sup> Cue té isràél ní tní-güedé íí<sup>n</sup> té nàni Páblú cuìní-güedé cahni ñaha-güedě ní cùu, te ní níhì-í tnúhu sá té ròmá cúú-dě núu ní sáhá<sup>n</sup>-í

ndihì sandàdú-í ní dácăcu-ndí-dé. <sup>28</sup> Te ní cuiní-í quiní-í ná cuendá téé ñàha-güedé cuéchi xii-dé, núu xiá<sup>n</sup> ndécà-í-dé ní sáhá<sup>n</sup> núu ñí quide cue téé cùchiu<sup>n</sup> israél jùndá. <sup>29</sup> Te yàcá<sup>n</sup> ní níhì-í tnúhu sá ñà túú ñă cuéchi ni quide-dé, chi cuendá-ni sá ñí níhì-güedě tnúhu sá ñà túú sàndáá iní-dé cada-dé nchaa sá ñí xóo cada ñáyiu ní xíndecu ndéé sanaha nchìcú<sup>n</sup> nihnu-güedé quide-güedé, xiá<sup>n</sup> ní cudéé<sup>n</sup>-güedě núu-dě. Te ñà túú cuéchi càhnu ni quide-dé nùu quíhì<sup>n</sup>-dé vecaá àdi cahni-í-dé. <sup>30</sup> Te ní níhì-í tnúhu sá cuè téé isràél ndúcú-güedě nàcuáa cada-güedé cahni ñaha-güedě xii-dé, xiá<sup>n</sup> ní xáha<sup>n</sup>-í xii sandàdú-í sá cándèca ñaha-güedé quixi xiá<sup>n</sup>. Te ní xáha<sup>n</sup>-í xii cue téé tèe ñaha cuéchi sá quíxì-güedě ndéé xiá<sup>n</sup> cǎhá<sup>n</sup>-güedé nùu ná cuéchi ní quide-dé. Te cada càhnu iní-n chi duha-ni ndùu tnúhu càhá<sup>n</sup>-í, te cundee iní-n quèhe<sup>n</sup> cuendá-n-dě”, duha ní chídó tnùnì téé ní cadúha tutú cuáhá<sup>n</sup> ndaha té Juélí.

<sup>31</sup> Te cue sandàdú ní quide-güedé nàcuáa ní xáha<sup>n</sup> tèe tàxi tnunì ñáhá xii-güedé chi ní xica-güedé ndihì té Pǎblú òré caá íí<sup>n</sup> niú, te diu-ni niú-á<sup>n</sup> ñí quexìo-güedé ñuú Antipatrís. <sup>32</sup> Te sátá ñí túndaá, te ní nacuico cuè téé xínehe lánzá ndihì dava-gá sandàdú xícá sàha cuánuhú-güedé cuártél, te mee-ñă sandàdú cue téé yòdo cuayú cuáhá<sup>n</sup> ndihì té Pǎblú. <sup>33</sup> Te òré ní quexìo-güedé ñuú Cèsareá, te ní sàha-güedé téé cùu gobiernú tutú néhé-güedě cuáhá<sup>n</sup>. Te ní quehe<sup>n</sup> cuendá-dé té Pǎblú. <sup>34</sup> Te sátá ñí dácúáhá tèe cùu gobiernú-á<sup>n</sup> tutú-á<sup>n</sup> te ní xícá<sup>n</sup> tnúhú-dě núu tǎ Pǎblú, te xǎha<sup>n</sup>-dě:

—¿Ndèé téé cùu-n? —cachí-dé xǎha<sup>n</sup>-dě.

Te ní xáha<sup>n</sup> tē Pǎblú:

—Tée Cìlicíá cúu-í —càchí-dé xǎha<sup>n</sup>-dě.

<sup>35</sup> Te ní xáha<sup>n</sup> tēe cùu gobiernú-á<sup>n</sup>:

—Òré quexìo cue tēe tēe ñaha cuéchi xii-n, te cáhá<sup>n</sup>-n nása ní cuu, chi níhì-í nàcuáa cada ndáá-í cuèndá-n —càchí-dé xǎha<sup>n</sup>-dě xii té Pǎblú.

Te ní xáha<sup>n</sup>-dě xii sandàdú sá cùndèe-güedé té Pǎblú vehe càhnu té Hèrodés.

## 24

*Té Pǎblú xǎha<sup>n</sup>-dě xii té Juělí sá ñà túú cuéchi-dé*

<sup>1</sup> Te sátá nǐ cuu úhú<sup>n</sup> nduu, te té Anàniás dútú cùnù-gá cuáhá<sup>n</sup>-dé ñuú Cèsareá ndihì cue tēe cùu sacuéhé ndihì ì<sup>n</sup> tēe nàni Tértulú tēe càhá<sup>n</sup> yuhu-güedé. Te cuáhá<sup>n</sup>-güedé núú tēe cùu gobiernú cuáhá<sup>n</sup> dácúándèhnde-güedé núú-dě sá ndècuéchi té Pǎblú. <sup>2</sup> Te ní sǎnguaca-güedé té Pǎblú. Te òré ní quexìo-dé núú-güedé, te ní ngüíta té Tértulú xǎha<sup>n</sup>-dě xii té Juělí nàcuáa càa cuéchi tēe-güedé té Pǎblú:

—Ío càhnu cada iní tǎtá gobernàdór. Duha ndùu chiu<sup>n</sup> ndéé iní ñáhá-ndǐ xii-n vǎxi-ndí, núu nása cachí-n cùnduu. Táxǎhu xii-n, chi ío váha ndècu nchaa ñáyiu, te ñá túú nàá-yu chi ío váha quide-n. <sup>3</sup> Te ío cùdíí iní-yu chi nchaa-ni nduu xǐndecu váha-yu nchaá-yu, te ío táxǎhu Ndióxi xii-n sǎ dúcá<sup>n</sup> quide-n. <sup>4</sup> Te cada càhnu iní, cuíní-í ndatnúhu-o ì<sup>n</sup> úú-ni cuèndú cuèndá sá vǎ cùyàa-o dacuíta-í chiu<sup>n</sup>-n. <sup>5</sup> Te ì<sup>n</sup> tēe ìha ío dàsatú iní ñáhá-dě, chi ndèni ní cuu cuáhá<sup>n</sup>-dé ndátnúhu-dé ndihì ñáyiu isràél dánáá-dé-yu. Te nèhé quidé-dě chi cuáhá<sup>n</sup>-dé dácàhá<sup>n</sup>-dé nchaa ñáyiu cuèndá quíndáá iní-yu tnúhu tēe ní xǐndecu



ñuú Nazàrét. <sup>6</sup> Chi duca<sup>n</sup> càhá<sup>n</sup> cue téé iha sá ñí sáhá<sup>n</sup>-dé veñúhu càhnu sá ïo cùnuu, te cuìní-dé daquèe tíhú-dě veñúhu cuendá cuìní-dé xocàni-dé sá ïí ndécú, núu xǎ<sup>n</sup> ní tñi ñaha-güedě ndécá ñaha-güedé cuáhá<sup>n</sup> núu cuè téé cùchiu<sup>n</sup> cuendá cáca<sup>n</sup> tnúhú-güedě núu-dě ñuu ná cuendá duca<sup>n</sup> cuìní-dé cada-dé, chi duca<sup>n</sup> càa leí ndécú ndihi-güedé sá cadá ndǎá-güedé ñuu ná ñí sá cúu. <sup>7</sup> Te té Lìsiú téé cùu capitá<sup>n</sup> cùnùu-gá ní quexiò-dé ndihi sandàdú, te ní dácúnú-güedě nchaa cue téé nùtni ndihi té Pǎblú, te dǎtnùní ní tñi ñaha-güedě xii-dé ndécá ñaha-güedé cuáhá<sup>n</sup>. <sup>8</sup> Te sátá xǎ<sup>n</sup>, te ní xáha<sup>n</sup>-dě sá quíxí-güedě ndéé ndíha cundáa cuéchi-dé. Te yòhó cundee ìní-n càcá<sup>n</sup> tnúhú-n ñúu-dě, te núu ndáa duca<sup>n</sup> ñí quide-dé àdi ñáhá —càhí té Těrtulú xǎha<sup>n</sup>-dě xii té Juélí téé cùu gobiernú.

<sup>9</sup> Te dava-gá cue téé isràél xǎnutni xǎ<sup>n</sup> ñí cáhá<sup>n</sup>-güedé sá ndáa càhá<sup>n</sup> té Těrtulú. <sup>10</sup> Te téé cùu gobiernú ní quide-dé ndaha-dé núu tǎ Pǎblú cuendá cáhá<sup>n</sup>-dé, te té Pǎblú ní xáha<sup>n</sup>-dě:

—Yòhó sa ní cuu titní cuía ndécú-n iha xehndé-n cuéchi nchaa ñáyiú xǎnàá, núu xǎ<sup>n</sup> ïo cùdí ìní-í sá ndíha téhndé cuéchi tée ñaha-güedé xii-í. Te cundee ìní-n cùndedóho-n na càni-í cuendú nàcuáa ní cuu. <sup>11</sup> Te nducu tnúhu-n te quini-n nǎ càhá<sup>n</sup> ndáa-í, chi sa ní cuu úxúu nduu sá ñí sáhá<sup>n</sup>-í veñúhu càhnu sá ïo cùnuu ñuú Jerusálén ní cáhá<sup>n</sup> ndihi-í Yǎ Ndióxi. <sup>12</sup> Te ni ñà túú ní nàa-í ndihi ñáyiú xití veñúhu, te ñá túú ní xáha<sup>n</sup>-í nàa-yu ni ñí xichi, te ni ñí veñúhu líhli ní sáhá<sup>n</sup>-í ñá túú nǎ ní xáha<sup>n</sup>-í cadá-yu. <sup>13</sup> Te ni ñà túú quèñuhu-güedé cue téé cáhá<sup>n</sup> ndáa te núu

ndáá duca<sup>n</sup> nĩ quide-í. <sup>14</sup> Te yúhú càhá<sup>n</sup> ndáá-í sá càhá<sup>n</sup> ndihí-í Yă Ndiöxí, chi diu-ni Yă Ndiöxí ní xóo cáhá<sup>n</sup> ndihí ñáyiu ndéé sanaha, núu xíá<sup>n</sup> ní tuha-í ichi-gá. Te cue tée-a cächí-güedé sá ñà díú ñ<sup>n</sup> ichi váha ni tuha-í. Te yúhú sàndáá iní-í nchaa sá nĩ chídó tnùní ndíi Moisés ndihí dava-gá cue tée ní xóo cáhá<sup>n</sup> tnúhu Yă Ndiöxí ndéé sanaha. <sup>15</sup> Te sàndáá tucu iní-í sá ndótó nchàa ñáyiu ní xíhí, cuèi ñáyiu váha iní-xi, te cuèi ñáyiu úhú iní-xi, dico ndotó-yu. Te duca<sup>n</sup> nĩ xóo quindáá iní nchaa ñáyiu ní xíndecu ndéé sanaha. <sup>16</sup> Te yúhú ío ndùcu ndee-í quidè-í nchaa sá càhá<sup>n</sup> Yă Ndiöxí cuendá sá vă cúú càha<sup>n</sup> núú-í núú-gă ndihí núú ñáyiu ñuyíú-a.

<sup>17</sup> Te sa ní cuu titní cuía să ñà túú-gă sàhá<sup>n</sup>-í ñuú Jerusàlén, te ní sáhá<sup>n</sup> tucu-í néhè-í díhú<sup>n</sup> nĩ taxi ñáyiu ñuú xícá cuendá cuáñaha-í xii ñáyiu ñuú Jerusàlén. Te ní ndúcù-í sá cuăha táhù-í Yă Ndiöxí. <sup>18</sup> Te ní xíndecu-í veñúhu càhnu sá ío cùnuu ní quide-í nchaa nàcuáa ní xóo cada ñáyiu ní xíndecu ndéé sanaha cuendá nduu vétú iní Yă Ndiöxí. Te ñá túú chítú-yu ni sáhá<sup>n</sup>, te ni ñà túú nă ní cùu, te ní naníhí ñáhá ñ<sup>n</sup> úú cue tée isràel xii-í, cue tée véxi distritú Àsiá. <sup>19</sup> Te quixi mee-güedé iha cáhá<sup>n</sup>-güedé, te núu sá ndáá ní xini-güedé sá yúhú ndècuéchi-í ní cùu, <sup>20</sup> àdi ñáhá. Dico cachí tnúhu cue tée-á<sup>n</sup> năsa ní cuu òré ní xíndecu-í jundá-güedé nũu ndècuéchi-í àdi ñá túú ndècuéchi-í. <sup>21</sup> Dico ñá túú cuéchi-í chí ñ<sup>n</sup>di-ni tnúhu ni cáhá<sup>n</sup>-í ní xáha<sup>n</sup>-í xii-güedé sá sàndáá iní-í sá ndótó nchàa ñáyiu ní xíhí, te diu-ni núu xíá<sup>n</sup> cächí-güedé sá ndècuéchi-í — cächí té Păblú xăha<sup>n</sup>-dě xii té Juělí.

<sup>22</sup> Te té Juělí sa xíní váha-dé nàcuáa cuáhá<sup>n</sup> tnúhu Jèsús, núu xíá<sup>n</sup> ñá ní cuíní-gá-dé ndatnúhu-dé ndihí

té Păblú, te ní xáha<sup>n</sup>-dě:

—Sa ní cuu, cundetu-n na quèxio té Lìsiú té cùu capitá<sup>n</sup> cúnùu-gá, te òré-á<sup>n</sup> cundáá cuendá-n —càchí té Juělí xăha<sup>n</sup>-dě.

<sup>23</sup> Te ní xáha<sup>n</sup>-dě xii té cùu capitá<sup>n</sup>:

—Cundeé-n tĕ Păblú-ă<sup>n</sup>, te núu nása càchí-dé cada-n, te dañ-a-n na càhá<sup>n</sup> ndihí-dé cue té xíní tnáhá ndihí-dé nŭu cuăñaha-güedĕ nchaa sá xíní ñùhu-dé àdi nása cada-güedĕ —càchí té Juělí xăha<sup>n</sup>-dě xii té cùu capitá<sup>n</sup>.

<sup>24</sup> Te ní cuu titní nduu, te ní sáhá<sup>n</sup> té Juělí vechiù<sup>n</sup> ndihí ñadihí-dé, te ñaha-á<sup>n</sup> nání-á<sup>n</sup> Drùsilá, te ñaha isràél cúu-á<sup>n</sup>. Te ní xáha<sup>n</sup>-dě sá quǎngueñuhu-güedĕ té Păblú, te òré ní quexìo-dé vechiù<sup>n</sup>, te ní cáhá<sup>n</sup>-dé núŭ-yu ncháá-yu sá quìndáá iní-yu tnúhu Xítohó Jesucristú. <sup>25</sup> Te ní xáha<sup>n</sup>-dě:

—Mee-ni să văha cada-ndo. Te coto-ndo mĕe-ndo, te vá cadá-ndó nì ì<sup>n</sup> sá cuèhé sá dúhá, chí ì<sup>n</sup> nduu cáhá<sup>n</sup> Yă Ndiǒxí ndĕdacà ñáyiú váha iní-xi, te ndĕdacà ñáyiú úhú iní-xi —càchí té Păblú xăha<sup>n</sup>-dě.

Te sá dúcá<sup>n</sup> ñí xáha<sup>n</sup>-dě, te ní yùhú té Juělí, te ní xáha<sup>n</sup>-dě:

—Vá càhá<sup>n</sup>-gá-ó tnàvíí, cuàhá<sup>n</sup>, te òré cùyăchí-í, te cana ñaha-í xii-n —càchí-dé xăha<sup>n</sup>-dě.

<sup>26</sup> Te té Juělí ní quide-dé cuendá sá cuăñaha tĕ Păblú díhú<sup>n</sup> te vá ndĭhu-gá-dé vecaá ní cùu, núu xíá<sup>n</sup> titní xito ní cana-dé té Păblú vechiù<sup>n</sup> ní ndatnúhu ndihí tnàha-güedĕ, dico ñá túú ní chăhu-dé. <sup>27</sup> Te úú cuíá duca<sup>n</sup> ñí quide-güedĕ, te dătnùní ní xínu té Juělí chìu<sup>n</sup>-dé, te ní ngúnutní<sup>n</sup> té Pòrsiú Fĕstú. Te òré ní xínu té Juělí chìu<sup>n</sup>-dé, te ní

dándõo-dé té Păblú yíhí-ni-dě vecaá. Te duca<sup>n</sup> nĩ guide-dé cuendá ní cuiní-dé cudìu-dé núú cuè téé isràél.

## 25

### *Té Păblú càhá<sup>n</sup> ndìhi-dé té Fèstú*

<sup>1</sup> Te ní cuu úní nduu sá nĩ quexìo té Fèstú ñúú Cèsareá ní quehe<sup>n</sup>-dé chìu<sup>n</sup>, te ní quee-dé cuáhá<sup>n</sup>-dé ñúú Jerusàlén. <sup>2</sup> Te yàcá<sup>n</sup> ní naníhí tnáhá-dě ndìhi nchaa dútú cúnùu ndìhi nchaa cue téé tàxi tnuní ñáhá xii ñáyiú isràél, te xăha<sup>n</sup>-güedě xii té Fèstú sá ndàá ndècuéchi té Păblú. <sup>3</sup> Te ní cáhá<sup>n</sup> ndàhú-güedé núú-dě sá téndàha-dé sandàdú-dé quíngueñuhu ñaha-güedě vecaá xii-dé ndéé ñúú Cèsareá te candeca ñaha-güedě quíhí<sup>n</sup>. Te duca<sup>n</sup> nĩ cáhá<sup>n</sup>-güedé, chi ní ndatnúhu-güedé sá cáhní ñaha-güedé xii té Păblú ichi ni cùu. <sup>4</sup> Te té Fèstú ní xáha<sup>n</sup>-dě:

—Vá cúú quìxi-dé ndéé ndíha. Na cùndetu-dé ñúú Cèsareá chi sacú-ni nduu cuyaa-ĩ iha te dătnùní núhú-í yàcá<sup>n</sup>. <sup>5</sup> Te yáchí-gá quíhí<sup>n</sup> ndìhi-í cue téé cùnùu-gá, te yàcá<sup>n</sup> cuu cáhá<sup>n</sup>-ndó nñu ndáá ndècuéchi-dé àdi cáhá<sup>n</sup> méé-dě nñu ndáá ndècuéchi-dé àdi ñáhá, te cutnùní iní-ndó — càchí-dé xăha<sup>n</sup>-dě.

<sup>6</sup> Te ní xíndecu té Fèstú úná úxí nduu ñúú Jerusàlén, te dătnùní cuánuhú-dé ñúú Cèsareá. Te nduu tnéé cuáhá<sup>n</sup>-dé vechìu<sup>n</sup>, te òré ní quexìo-dé, te ní xáha<sup>n</sup>-dě xii cue sandàdú xínú cuèchi sá quíhí<sup>n</sup>-güedé queñuhu-güedé té Păblú vecaá te candeca ñaha-güedě quíhí<sup>n</sup> vechìu<sup>n</sup>. <sup>7</sup> Te òré ní quexìo té Păblú vechìu<sup>n</sup>, te sa ndècu cue téé isràél cue téé ní quee ñúú Jerusàlén, te cuánguihu-güedé ndéé dìñi té Păblú ní ngúnutnì-güedé, te xăha<sup>n</sup>-güedě xii

cue té cùchiu<sup>n</sup> sá ndècuéchi vîhi-dé, dico ñá túú ní cùndee tnúhu-güedé. <sup>8</sup> Te té Păblú ní xáha<sup>n</sup>-dě xii té Fèstú:

—Ñá túú ndècuéchi-í, ñá túú nă ní quide-í, chi ñá túú tnàhá iní-í cada-í ì<sup>n</sup> sá cächí lèi sá vă cúú càda-o. Te ni xîí veñúhu càhnu sá ìo cùnuu ñá túú nă quide-í, te ni té Cèsár té yîndaha cuéhé nació<sup>n</sup> ñá túú càhá<sup>n</sup> cuéhé-í cuendá-dé —cächí té Păblú xáha<sup>n</sup>-dě xii-dé.

<sup>9</sup> Te té Fèstú ní cuini-dé cada-dé nàcuáa cudîu-dé núú cuè tée isràél ní cùu, núú xîá<sup>n</sup> ní xáha<sup>n</sup>-dě xii té Păblú:

—¿Cundee iní-n quîhí<sup>n</sup>-n ñùú Jerusàlén-ă<sup>n</sup>? Te yàcá<sup>n</sup> cundáá cuéchi sá sàá díquí-n —cächí té Fèstú xáha<sup>n</sup>-dě xii té Păblú.

<sup>10</sup> Te xáha<sup>n</sup> tē Păblú:

—Dîu-ni ì<sup>n</sup> vechîu<sup>n</sup> té cùchiu<sup>n</sup> Cèsár ndécù-í iha, te dîu-ni iha cada ndáá-n nûu cuini-n ní cùu. ¿Te ná cuendá candeca ñaha-n quîhí<sup>n</sup> ingá xichi? Yòhó tnàhá-n xini-n să ñà túú nă quide-í ñá yiu isràél. <sup>11</sup> Chi núú dîcô yúhú ní quide-í ì<sup>n</sup> cuéchi càhnu, te ñá túú nă cada-xi cuéi na càhni ñaha-ndo xii-í ní cùu. Te sa ní cutnùní iní-n să ñă ndàá, chi mee-ni tnúhu ndehnde xîcáhá<sup>n</sup>-güedé, te ñá túú ndùu váha-xi duca<sup>n</sup> càda-n cúñaha-n să quîhí<sup>n</sup>-í ndîhi-güedé ingá xichi. Te xîá<sup>n</sup> cuini-í quîhí<sup>n</sup>-í núú tē Cèsár té yîndaha cuéhé nació<sup>n</sup>, te yàcá<sup>n</sup> cáhá<sup>n</sup> méé-dē nûu ndáá ndècuéchi-í —cächí té Păblú xáha<sup>n</sup>-dě xii té Fèstú.

<sup>12</sup> Te ní ndatnúhu té Fèstú ndîhi cue tée chîndee tnúhu ñaha xîi-dé, te dătnùní ní xáha<sup>n</sup>-dě xii té Păblú:

—Te sa ní cáhá<sup>n</sup>-n sǎ quíhí<sup>n</sup>-n quǐtnahá-n tǎ Cèsár te ðiu-ni quíhí<sup>n</sup>-n, te quini<sup>n</sup>-n nǎsa cáhá<sup>n</sup> tée-ǎ<sup>n</sup> yàcá<sup>n</sup> —càchí-dé xǎha<sup>n</sup>-dǎ xii té Pǎblú.

*Té Pǎblú càhá<sup>n</sup> ndihí-dé té Àgripá tée yìndaha nació<sup>n</sup> Isràél*

<sup>13</sup> Te sátá nǐ cuu cuéhé nduu, te ní quee té Àgripá tée yìndaha nació<sup>n</sup> Isràél cuáhá<sup>n</sup>-dé ñuu Cèsareá ndihí ñadihí-dé, te ñaha-á<sup>n</sup> nání-á<sup>n</sup> Berenicé te òré ní quexiò-yu, te ní cáhá<sup>n</sup> ndihí-yu té Fèstú. <sup>14</sup> Te sátá nǐ cuu tít ní nduu, te ní cáhá<sup>n</sup> té Fèstú cuendá té Pǎblú ní xii-dé té Àgripá:

—Ndècu ì<sup>n</sup> tée ní dándõ té Juéli vecaá nání-dǎ Pǎblú. <sup>15</sup> Te cútnàhá ní sáhá<sup>n</sup>-í ñuu Jerusàlén ní nanítnáhà-í ndihí cue dútú cúnùu ndihí cue tée cùu sacuéhé nùú ñǎyiu isràél. Te ní dácáá ðíquí-güedǎ té Pǎblú cuéchi, te ní cachí-güedǎ sá táúchìu<sup>n</sup>-í cahni ñaha-güedǎ xii-dé ní cùu. <sup>16</sup> Te ní xáha<sup>n</sup>-í xii-güedǎ sá vǎ cúu, chi ñá túu dùca<sup>n</sup> quide nchúhú cue tée ròmá cùtexínu cada castiú-ndí ñáyiu, chi díhna-gá ndúcú tnùhu-ndí núú ñáyiu sàá cuéchi díquí-xi cuendá quini<sup>n</sup>-ndí nùu nása cáhá<sup>n</sup> méé-yu ndihí ñáyiu sàcá<sup>n</sup> cuéchi cuendá-yu, te òré-á<sup>n</sup> cútnùní iní-ndí nùu ndáá ndècuéchi-yu àdi ñáhá, te duca<sup>n</sup> te nihí-ndí nàcuáa quide ndáá-ndí cuendá-yu, duha ní xáha<sup>n</sup>-í xii-güedǎ —càchí té Fèstú xǎha<sup>n</sup>-dǎ xii té Àgripá.

<sup>17</sup> Te ní xáha<sup>n</sup> tùcu té Fèstú:

—Te sátá nǐ quexiò-güedǎ ndéé ndíha, te nduu tnéé ní sáhá<sup>n</sup>-ni-ndí vechìu<sup>n</sup>. Te ní xáha<sup>n</sup>-í sá quíngueñuhu-güedǎ té Pǎblú candeca ñaha-güedǎ quixi, te òré ní quexiò-dé, <sup>18</sup> te ní ngüíta-güedǎ

xăha<sup>n</sup>-güedě sá ndècuéchi-dé. Te ní sani iní-í sá íí<sup>n</sup> cuéchi cǎhnu tee ñaha-güedé dico ñáhá, chi dícó-ni sá íí<sup>n</sup> tnũhu ní cáhá<sup>n</sup>-dé, xǎ<sup>n</sup> duca<sup>n</sup> nǐ quide-güedé. <sup>19</sup> Te ní tenàá ñáhá-güedě xii-dé, chi cǎchí-güedé sá ñà túú cǎhá<sup>n</sup> váha-dé cuendá ndiǒxí-güedě. Te tnàhá-ni cuendá íí<sup>n</sup> téé nàni Jesús cǎhá<sup>n</sup>-dé, chi cǎchí-dé sá nǐ xíhí téé-á<sup>n</sup> te ní ndoto-dé cǎchí-dé xăha<sup>n</sup>-dě xii-güedé, cǎchí-güedé. <sup>20</sup> Te ñà ní cùtnuní iní-í nása cúñaha-í xii-güedé cuendá téhndé cuéchi-dé. Te xǎ<sup>n</sup> ní xícá<sup>n</sup> tnúhu-í núú tě Pǎblú nũu cundee ìní-dé quíhí<sup>n</sup>-dé ñuú Jerusàlén, te ndéé ndíacǎ<sup>n</sup> cada ndáá-ndí cuendá-dé, te núu ndáá ndècuéchi-dé nàcuáa cǎhá<sup>n</sup>-güedé àdi ñáhá ní cùu. <sup>21</sup> Te dǎtnuní té Pǎblú ní cǎchí-dé sá cùndecu tnaa-dé vecaá te dǎtnuní quíhí<sup>n</sup>-dé núú tě Cèsár, te téé-á<sup>n</sup> cada ndáá-dé cuendá-dé. Te cuendá sá dúcá<sup>n</sup> nǐ cáhá<sup>n</sup> té Pǎblú, xǎ<sup>n</sup> nũu ní xáha<sup>n</sup>-í sá cùndéé ñáhá cuè sandadú xii-dé, nini na còto-í nása cada-í quíhí<sup>n</sup>-dé núú tě Cèsár, duha ní xáha<sup>n</sup>-í xii-güedé — cǎchí té Fèstú xăha<sup>n</sup>-dě xii té Àgripá.

<sup>22</sup> Te té Àgripá ní xáha<sup>n</sup>-dě xii té Fèstú:

—Te tnàhá yúhú ío cudíí ìní-í cundedóho-í tnúhu cǎhá<sup>n</sup>-dé —cǎchí-dé xăha<sup>n</sup>-dě.

Te ní xáha<sup>n</sup> tě Fèstú:

—Tneé cana-í-dé te cundedóho-n nása cáhá<sup>n</sup>-dé —cǎchí-dé xăha<sup>n</sup>-dě.

<sup>23</sup> Te nduu tněé ní quexìo té Àgripá ndihí ñadìhí-dé tá Berènicé vechiù<sup>n</sup>, te ío ní quide cǎhnu ñaha-güedé xii-yu. Te cuánguihú-yu vechiù<sup>n</sup> ndihí cue téé cùu capitá<sup>n</sup> cùnũu-gá ndihí cue téé cùnũu ñuú Cèsareá. Te té Fèstú ní xáha<sup>n</sup>-dě sá quíngueñuhu-güedé té Pǎblú vecaá, te òré ní

quexìo-dé, <sup>24</sup> te ní xáha<sup>n</sup> tĕ Fèstú xii té Àgripá ndihi nchaa ñáyiú xĩndecu-á<sup>n</sup>:

—Chí cúndèhe tée iha chí tée-a càchí cue tée is-  
ràél sá ndècuéchi-dé, te cútnàhá ní xĩndecu-í ñúú  
Jerusàlén ní cachí-güedé sá ndàá ndècuéchi-dé, te  
dìu-ni duca<sup>n</sup> càhá<sup>n</sup>-güedé iha. Te nchaa-güedé  
ní cuáá-güedé te càchí-güedé sá táuchìu<sup>n</sup>-í cahni  
ñaha-güedĕ xii-dé ní cùu. <sup>25</sup> Te sátá ñĩ ndihi cuendú  
ní cáhá<sup>n</sup>-güedé, te ní cutnùnì iní-í sá ñà túú ñì ì<sup>n</sup>  
cuéchi càhnu ñi guide-dé, núu ñá túú ní tàuchiu<sup>n</sup>-í  
cahni ñaha-güedĕ xii-dé. Te mee-dĕ ní cachí-dé sá  
quìhì<sup>n</sup>-dé núú tĕ Cèsár tée yìndaha cuéhé nació<sup>n</sup>,  
te ní xáha<sup>n</sup>-ĩ sá cúú quìhì<sup>n</sup>-dé. <sup>26</sup> Te ñá túú ní  
xìní váha-í nása ní guide-dé, núu xǎ<sup>n</sup> ñá ní ñhì-í  
nàcuáa cadúha-í tutú quíhì<sup>n</sup> ndaha té Cèsár, te xǎ<sup>n</sup>  
ní cana-í-dé véxi-dé iha cuendá nchaa-ndo cǎhá<sup>n</sup>  
ndihi-ndo-dĕ. Te duca<sup>n</sup> cànuu cadíhna-gá yòhó tǎtá  
Àgripá cáca<sup>n</sup> tnúhú-n nũú-dĕ nũu nása cáhá<sup>n</sup>-dé, te  
òrè-á<sup>n</sup> cutnùnì iní-í nása cada-í cadúha-í tutú quíhì<sup>n</sup>  
ndaha té Cèsár. <sup>27</sup> Chi sàni iní-í sá ñà túú ndùu  
váha-xi sá quìhì<sup>n</sup> ì<sup>n</sup> tée tàú cuéchi te núu vá códó  
tnùnì núú ì<sup>n</sup> tutú nàcuáa càa cuéchi tàú-dé —càchí  
té Fèstú xǎha<sup>n</sup>-dĕ xii-güedé.

## 26

### *Te Pǎblú càhá<sup>n</sup> ndihi-dé té Àgripá*

<sup>1</sup> Te dǎtnùnì ní xáha<sup>n</sup> tĕ Àgripá tée yìndaha nació<sup>n</sup>  
Isràél xii té Pǎblú:

—Te vitna cáhá<sup>n</sup>-n nũu nása ní cuu cuendá-n —  
càchí-dé xǎha<sup>n</sup>-dĕ.



Te té Păblú ní ndacani-dé ndaha-dé sá cùndèdóho-güedé, te ní xáha<sup>n</sup>-dě xii té Àgripá tée yìndaha nació<sup>n</sup> Isràél:

2-3—Tătá Àgripá, ío cùdí<sup>n</sup> ìní-í sá nǐ naníhí tnáhá-ó vitna, chí yòhó ío váha xìní-n nchàa nacuaa quide ñáyiú isràél quidé càhnú-yu Yá Ndiǒxí, te ío váha xìní-n nchàa tnúhu xǐtnáhá-yu. Te vitna cundee ìní-n cùndedóho-n ì<sup>n</sup> úú tnúhu na càhá<sup>n</sup>-í. Na càchí tnúhu-í sá ñǎ ndáá ní quide-í nchaa sá càhá<sup>n</sup> cue tée isràél.

*Té Păblú càhá<sup>n</sup>-dé nàcuáa ní quide-dé cútnáhá vátá túhá-gǎ-dé ichi Yá Ndiǒxí*

4 Te sa nàha nchaa cue tée cùnūu núú ñáyiú isràél nàcuáa ní quide-í ñūú-í ndíhí ñūú Jerusàlén cútnáhá ní cuu landú-í. 5 Te mee-güedě náhá-güedě sá ndèé lìhli-í ní chitnahá-í cue tée cùu fariséú. Te núu cuìní-güedé cáhá<sup>n</sup>-güedé sá tée fariséú cùu-í àdi ñáhá dico nchaa-güedé sa nàha-güedé sá cùe tée-á<sup>n</sup> nǐ chitnahá-í. Te cue tée cùu fariséú-á<sup>n</sup> ío cuìní-güedé cada-güedé nchaa nàcuáa nchìcú<sup>n</sup> nihnu ñáyiú quidé-yu. Te yúhú nchaa sá nchìcú<sup>n</sup> nihnú-yu quidé-yu-á<sup>n</sup> nǐ quide-í. 6 Te vitna ndècu-í iha, te cáhá<sup>n</sup>-n nūu váha-ni quide-í àdi ñáhá, chí cue tée-á<sup>n</sup> tée ñàha-güedé cuéchi xii-í cuèndá sá sàndáá ìní-í sá ndótó nchàa ñáyiú ní xíhí. Te ðiú-ni duca<sup>n</sup> nǐ xáha<sup>n</sup> Yá Ndiǒxí xii nchaa ñaní tnáhá-ó nǐ xíndecu ndéé sanaha. 7 Te nchaa ñáyiú-á<sup>n</sup> xíndetú-yu nduu ndòto ñáyiú ní xíhí ní cùu. Te ðiú-ni duca<sup>n</sup> ndètu nchaa ñaní tnáhá-ó ndècu ñuyíú-a ndéé vitna, te xíá<sup>n</sup> nūu cuèi nduu cuèi niú càhá<sup>n</sup> ndíhí-yu Yá Ndiǒxí. Te sá sàndáá ìní-í nūu xíá<sup>n</sup> ní cáhá<sup>n</sup>-í, te tèè ñàha cue tée isràél cuéchi xii-í. 8 ¿Te ná cuèndá

nchòhó cue tée isràèl ñá túú cuení-ndó quìndáá iní-ndó sã dándòto Yá Ndiõxí nchaa ñáyiú ní xíhí? —càchí té Pãblú xãha<sup>n</sup>-dẽ.

*Té Pãblú cání-dẽ cuèndú sá ñí xóo chihi-dé ñáyiú sàndáá iní tnúhu Jèsús vecaá*

<sup>9</sup> Te ní xáha<sup>n</sup> tucu té Pãblú:

—Ndéé dàvá-á<sup>n</sup> ñí quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní cáhà<sup>n</sup>-í sá vãha-ni ní quide-í sá dúcá<sup>n</sup> ñí quide-í. <sup>10</sup> Te ðiú-ni duca<sup>n</sup> ñí quide-í ñuú Jerusàlén. Te cue dútú cúnùu ní taxi-güedé ì<sup>n</sup> tutú cuèndá tñi-í ñáyiú ní sàndáá iní tnúhu Jèsús, te vãi-yu ní chihi-í vecaá. Te òré ní cáhá<sup>n</sup>-güedé sá cáhni-güedé ñáyiú-á<sup>n</sup>, te tñàhá-í ní cáhá<sup>n</sup>-í sá cúú càhni ñaha-güedé xií-yu. <sup>11</sup> Te tñí xito ní sáhá<sup>n</sup>-í nchaa veñúhu ñáyiú isràèl, te ní cani-í-yu te ní xáha<sup>n</sup>-í sá dáñã-yu ichi Jèsús. Te cuèndá ío ní cudéè<sup>n</sup>-í núñ-yu, xíã<sup>n</sup> ní sáhá<sup>n</sup>-í nchaa ñuú xicá ñí sánúndúcù-í dava-gá ñáyiú sàndáá iní tnúhu-gá cuèndá dandòho ñaha-güedé xií-yu.

*Té Pãblú càhá<sup>n</sup> tucu-dé nása ní cuu ní tuha-dé ichi Yá Ndiõxí*  
(Hch. 9:1-19; 22:6-16)

<sup>12</sup> Te cuèndá xíã<sup>n</sup> ní xica tucu-í cuáhá<sup>n</sup>-í ñuú Dàmascú, néhè-í tutú ní taxi cue dútú cúnùu cuáhá<sup>n</sup>, cuèndá sá ndácù-í tñi-í nchaa ñáyiú sàndáá iní tnúhu Jèsús ní cùu. <sup>13</sup> Te òré caúxúú nduu ñùhu-í ichi cuáhá<sup>n</sup>-í, te uu<sup>n</sup>ni ní quee ñuhú andiú ñí dáyèhé-xi ndéé núú nútñi-í ndihi cue tée ndèca tñaha ndihi-í, te níhi-gá ní dáyèhé-xi dàcúúxí nchĩcanchii. <sup>14</sup> Te nchaa-ndí ní nduá-ndí ndéé ñuhu, te ní tecú dóho-í càhá<sup>n</sup> ì<sup>n</sup> sá càhá<sup>n</sup> tnúhu ñáyiú isràèl, te càchí-xi: “Yòhó Sàulú, ¿Ná cuèndá cúú ùhú

iní ñáhá-n xì-í dándòho ñaha-n? Te ío dándoho-n mee-n, chi dàtná cuíní-n quìde ndicutu quide-n chi quiti-á<sup>n</sup> òré cǔxi-güedé-di pùyá te sǎha-di patadá núú-xi, te sá dúcá<sup>n</sup> quide-di te quide úhú-di mee-di. Te duca<sup>n</sup> sǎtnahá-xi cùu yohó chi ñá túú sàndáá iní ñáhá-n xì-í”, cǎchí sá ñí cǎhá<sup>n</sup>-á<sup>n</sup>. <sup>15</sup> Te ní xáha<sup>n</sup>-í: “¿Ná cúú yòhó sá ñí cǎhá<sup>n</sup>-ái<sup>n</sup>?”, xǎha<sup>n</sup>-í. Te cǎchí sá cǎhá<sup>n</sup>-á<sup>n</sup>: “Yúhú cúú-í Jèsús Yaá cúú úhú iní-n”, duha ní cachí sá cǎhá<sup>n</sup>-á<sup>n</sup>. Te xǎ<sup>n</sup> ní cutnùní iní-í sá Jèsús cǎhá<sup>n</sup>. <sup>16</sup> Te ní cachí-gá: “Ndacuñí-n chi yúhú cǎhá<sup>n</sup>-í chi cuíní-í quíhí<sup>n</sup>-n cǎda-n chiu<sup>n</sup>-í, chi quíhí<sup>n</sup>-n cǎhá<sup>n</sup>-n núú ñǎyiu nàcuáa ní cuu ní xiní ñáhá-n xì-í vitna, te quixi tucu-í cǎhá<sup>n</sup> ndihí ñaha-í xii-n, te cúñaha-n xì-yu nàcuáa cǎhá<sup>n</sup>-í. <sup>17</sup> Chi cuíní-í quíhí<sup>n</sup>-n cǎhá<sup>n</sup>-n tnǔhu-í núú ñǎyiu isràél ndihí núú ñǎyiu ñá túú cùu ñáyiu isràél, te coto ñaha-í xii-n cuèndá vá cǎhní ñàhá-yu xii-n. <sup>18</sup> Te cuíní-í quíhí<sup>n</sup>-n cǎñaha-n xì-yu sá dáñǎ-yu nchaa ichi cuèhé ichi duha ndècú-yu, te tuhá-yu ichi váha cuèndá vá quíndáá iní-yu cadá-yu sá cǎhá<sup>n</sup> yucu ñǎvǎha, te quíndáá iní-yu cadá-yu nchaa nàcuáa cǎhá<sup>n</sup> Yǎ Ndiǒxí. Te núu na quíndáá iní-yu tnúhu cǎhá<sup>n</sup>-í, te cada cǎhnu iní-í nchaa cuéchi-yu, te naníhí tàhú-yu ndihí dava-gá ñáyiu sa ní xócuíñí nchaa sá cuèhé sá dúhá ñí xíndecu iní-yu”, duha ní cachí-gá xii-í —cǎchí té Pǎblú xǎha<sup>n</sup>-dě xii té Àgripá té yíndaha nació<sup>n</sup> Isràél.

*Té Pǎblú quíde-dě nchaa nàcuáa ní xáha<sup>n</sup> Jèsús cada-dé*

<sup>19</sup> Te ní xáha<sup>n</sup> tucu té Pǎblú xii té Àgripá:

—Ñá túú dàña ndeé-í quidè-í nchaa nàcuáa ní cáhá<sup>n</sup> Jèsús òré ní cáhá<sup>n</sup>-gá andiu. <sup>20</sup> Te díhna-gá ñáyiú ñuú Dàmascú ní cáhá<sup>n</sup>-í tnúhu-gá núú-yu, te ní xáha<sup>n</sup>-í xii-yu sá dáñã-yu nchaa sá cuèhé sá dúhá quidè-yu, te cáhá<sup>n</sup> ndihí-yu Yá Ndiöxí, te cadá-yu mee-ni sã vãha cuendá cutnùní iní dava-gá-yu sá ñí dáñã-yu nchaa sá ñà túú vãha ní xóo cadá-yu. Te duca<sup>n</sup>-ni nì xáha<sup>n</sup>-í xii ñáyiú ñuú Jerusàlén ndihí ñáyiú nihíi nació<sup>n</sup> Isràél ndihí nchaa ñáyiú ñá túú cùu ñáyiú isràél. <sup>21</sup> Te cuendá sá dúcá<sup>n</sup> ñí cáhá<sup>n</sup>-í nùu ní tñii ñaha cuè téé isràél xii-í cútnàhá ní sáhá<sup>n</sup>-í veñúhu càhnu sá ïo cùnuu cahni ñaha-güedé ní cùu. <sup>22</sup> Te ñu-ni mee Yã Ndiöxí ní chindee ñàha-gá xii-í nùu ndècu-í iha tnàvíí càhá<sup>n</sup>-í tnúhu-gá, te mee-ni tnúhu-gá càhá<sup>n</sup> ndihí-í ncháa-yu, cuèi ñáyiú cuica, te cuèi ñáyiú ndàhú. Te ndíi Moisés ndihí dava-gá cue téé ní xóo cáhá<sup>n</sup> tnúhu Yá Ndiöxí ndéé sanaha ñí cáhá<sup>n</sup>-güedé nàcuáa cada-xi vitna, te ñu-ni duca<sup>n</sup> càhá<sup>n</sup>-í nchaa-ni nduu. <sup>23</sup> Te cue téé-á<sup>n</sup> ñí cachí-güedé sá Crístú Yaá tendaha Yã Ndiöxí quixi ñuyíú-a ndoho tnahá-gá, te cuú-gá, te dàtnùní ndoto-gá. Te duca<sup>n</sup> càda-xi nchaa ñáyiú ní xihí ndotó-yu núu na sàá nduu chi duca<sup>n</sup> càda-xi ní cachí méé Yã Ndiöxí. Te cuendá sá dúcá<sup>n</sup> ñí ndoto-gá, xíã<sup>n</sup> cútnùní sá cúú nàníhí tàhú ñáyiú, cuèi ñáyiú isràél, te cuèi ñáyiú ñá túú cùu ñáyiú isràél. Te dàtná-ni ndùu tnúhu ní cáhá<sup>n</sup> cue téé ní xóo cáhá<sup>n</sup> tnúhu-gá ndéé sanaha-ã<sup>n</sup>, te ñu-ni duca<sup>n</sup> càhá<sup>n</sup> yúhú tucu —càchí té Pãblú xáha<sup>n</sup>-dè.

*Té Pãblú xáha<sup>n</sup>-dè xii té Àgripá sá quíndáá iní-dé tnúhu Jèsús*

<sup>24</sup> Te sá dúcá<sup>n</sup> ñí cáhá<sup>n</sup> té Păblú, te ní cáhá<sup>n</sup> níhi té Fèstú, te xăha<sup>n</sup>-dě:

—Păblú, jó lùcú càhá<sup>n</sup>-n! Cuendá ío vâi ní dâcuáhá<sup>n</sup>-n, núu xǎ<sup>n</sup> ndádá lùcú ñáhá-xí xì-n —câchí-dé xăha<sup>n</sup>-dě.

<sup>25</sup> Te ní xáha<sup>n</sup> tĕ Păblú:

—Ñáhá, vá dúcá<sup>n</sup> căhá<sup>n</sup>-n chi ñá díú sǎ lùcú-í duha càhá<sup>n</sup>-í, chi tnúhu ndáá càhá<sup>n</sup>-í. <sup>26</sup> Te té Àgripá-a sa nàha-dé ndihì nchaa ñáyiu isrâél nâcuáa ní cuu, chi sa ní níhí-dĕ tnúhu ndihì dava-gá-yu nâcuáa ní cáhá<sup>n</sup>-í, núu xǎ<sup>n</sup> cùyî-í càhá<sup>n</sup> ndihì-í-dé —câchí-dé xăha<sup>n</sup>-dě xii té Fèstú.

<sup>27</sup> Te ní xáha<sup>n</sup>-dĕ xii té Àgripá:

—Yúhú sa xìní-í sá sândáá iní-n tnũhu ní chídó tnùní cue tée ní xóo cáhá<sup>n</sup> tnúhu Yá Ndiõxí ndéé sanaha —câchí-dé xăha<sup>n</sup>-dě.

<sup>28</sup> Te ní xáha<sup>n</sup> tĕ Àgripá:

—¿Quide-n cuendá sá ĩ<sup>n</sup> ũú tnúhu ní cáhá<sup>n</sup>-n te quindáá iní-í tnúhu Jèsús cáhá<sup>n</sup>-n-ă<sup>n</sup>? —câchí-dé xăha<sup>n</sup>-dě.

<sup>29</sup> Te ní xáha<sup>n</sup> tùcu té Păblú:

—Cuĕi vitna te cuĕi ndéé cuĕé-gá dico cuiní-í sá dàcuítí sǎ quindáá iní-n tnũhu Jèsús. Te diu-ni duca<sup>n</sup> xìcá<sup>n</sup> táhù-í núú Yă Ndiõxí sá ncháá ñáyiu ndècu ndihì-o iha quindáá iní-yu tnúhu-gá dàtná cuiní-n ñí quide yúhú, duca<sup>n</sup> càdá-yu. Dìcò-ni sá nõu vá quihì<sup>n</sup>-ni-yu vecaá dàtná cuiní-n ndòho yúhú —câchí-dé xăha<sup>n</sup>-dě xii té Àgripá.

<sup>30</sup> Te sátá dúcá<sup>n</sup> ñí cáhá<sup>n</sup>-dĕ, te ní ngúnutnĕi té Àgripá tée yîndaha nació<sup>n</sup> Isrâél, ndihì té Fèstú tée cùu gobiernú, ndihì tá Berènicé ndihì dava-gá ñáyiu xñucóo yatni. <sup>31</sup> Te ní tnahá-yu ndèca tnahá-yu cuáhá<sup>n</sup> ĩ<sup>n</sup> xio. Te ní xítnahá-yu:

—Tée-ǎ<sup>n</sup> ñá túú nǎ cuéchi ni quède-dé nǔu chihi ñaha-güedě vecaá àdi cahni ñaha-güedé —càchí-yu xǐtnàhá-yu.

<sup>32</sup> Te té Àgripá ní xáha<sup>n</sup>-dě xii té Fèstú:

—Cuéchi mee-dě chi ní cachí-dé sá quǐtnahá-dé té Cèsár, xǐǎ<sup>n</sup> nǔu ndíhu tucu-dé vecaá, te núu ñá túú dùca<sup>n</sup> ni cáhá<sup>n</sup>-dé, te cácu-dé ní cùu —cachí-dé xáha<sup>n</sup>-dě xii té Fèstú.

## 27

### *Té Pǎblú cuáhá<sup>n</sup>-dé ñuú Ròmá*

<sup>1-2</sup> Te ní ndatnúhu-güedé sá quíhí<sup>n</sup> té Pǎblú ndíhi bàrcú nàció<sup>n</sup> Itàliá, te tnàhá yúhú quíhí<sup>n</sup>-í ndíhi-dé. Te tnàhá ì<sup>n</sup> té nàni Aristarcú cuíní-dé quíhí<sup>n</sup> ndíhi-ndí-dé, te cùu-dé té ñuú Tesalónicá, te ñuú-á<sup>n</sup> yíndèhu-xi distritú Macèdoniá. Te ní sáha cuèndá-güedé té Pǎblú ndíhi ì<sup>n</sup> úú-gá cue té xìxíhi vecaá ní quehe<sup>n</sup> cuèndá ñáhá tǎ Jǔliú té cùu capitá<sup>n</sup>, té yíndaha nchaa sandadú nání Àugustú, te ní quée-ndí nchaa-ndí bàrcú ñuú Adràmitiú. Te ní xica bàrcú-á<sup>n</sup> cuáhá<sup>n</sup>-ndí ndíhi-xi te cuita yáha-ndí ì<sup>n</sup> úú ñuú yíndèhu distritú Àsiá quíhí<sup>n</sup>.

<sup>3</sup> Te nduu tnée ní quexìo-ndí ñuú Sìdón. Te ío váha ní quide té Jǔliú, chi ní dáñá-dě ní quene té Pǎblú ní sáhá<sup>n</sup>-dé ní cáhá<sup>n</sup> ndíhi-dé cue té ío váha tnàhá tnúhu ndíhi-dé nǔu cudana cundàhú iní ñáhá-güedě cuáñaha-güedě nchaa sá xíní ñúhu-dé.

<sup>4</sup> Te dàtnùní ní ndée tucu-dé bàrcú cuáhá<sup>n</sup>-ndí. Te ío níhi táchí te ñá ní dàña-xi caca ndáá bàrcú, te ní sáhá<sup>n</sup> bàrcú ndée yatni yuhu dìstritú Chìpré, te distritú-á<sup>n</sup> cáá cuădava xití làmár, te xǐǎ<sup>n</sup> ñá túú cuèhé táchí ni yáha-ndí. <sup>5</sup> Te ta yáha-ndí cuáhá<sup>n</sup>, te

ní yáha-ndí ìḡn xio yuhu d̀̀stritú C̀̀licia nd̀̀hi yuhu d̀̀stritú P̀̀nfilia, te ní sáá-ndí ndéé ñuú Mírá ìḡn ñuú yíndèhu d̀̀stritú L̀̀cia.

<sup>6</sup> Te ní quene téè c̀̀u capitá<sup>n</sup> cuándúcú-dě ingá bàrcú, te ní níhí-dě ìḡn bàrcú téè ñuú Alejandriá, ñúhú ìchi-xi quíhí<sup>n</sup>-xi nàció<sup>n</sup> Itàliá. Te ní ndicuaca ñaha-dě xii-ndí cuáhá<sup>n</sup>-ndí ní quée-ndí bàrcú-á<sup>n</sup>, te ní xica-xi cuáhá<sup>n</sup>-xi. <sup>7</sup> Te ío cuèè cuáhá<sup>n</sup> bàrcú-á<sup>n</sup>, cuéhé nduu ní xúhu<sup>n</sup>-xi ichi, te yica-ni ñí quexìo-ndí yuhu ñuú Nidú, te ñá ní dàña-gá táchí quíhí<sup>n</sup> ndáá bàrcú ñuú ní xícó nduú-xi. Te ní yáha-ndí ìḡn xio yuhu d̀̀stritú Crètá núú ñà túú quène vihi táchí, te ñu-ni cuádava tucu lámár cáá d̀̀stritú-á<sup>n</sup>. Te ní yáha-ndí yuhu ñuú Sàlmón, te ñu-ni Crètá yíndàha-xi ñuú-á<sup>n</sup>. <sup>8</sup> Te ní yáha-ndí cuáhá<sup>n</sup>-ndí mee-ñá núú ràyá d̀̀stritú Crètá, te ío ní ndoho-ndí ní sáá-ndí ìḡn xichi núú nání Puèrtú Váha, yatni vií-ni-gá ñuú Làseá.

<sup>9</sup> Te ní cuyaa vihi-ndí ichi, duca<sup>n</sup>-ni c̀̀u-ndí ní tnahá yóó cúú<sup>n</sup> dǎú táchí, te ío úhú yáha bàrcú ñuú na quíhí<sup>n</sup>-ni-xi. <sup>10</sup> Te ní xáha<sup>n</sup> tẽ Pǎblú xii-güedé:

—Nchaa-ndo c̀̀ndedóho-ndo tñhu na cáhá<sup>n</sup>-í-a. Ío úhú núú na cáda yica-o quíhí<sup>n</sup>-ó nd̀̀hi barcú chi cuíta càrgá te cuíta bàrcú, te cuu-ni iní-xi tnahá-ni mee-o cúú-ó chi cáhá-ó ñuú na ngàunihnu-o xití ndute —càchí-dé xáha<sup>n</sup>-dě xii-güedé.

<sup>11</sup> Te téè c̀̀u capitá<sup>n</sup> ñá ní sàndáá iní-dé tñhu ní cáhá<sup>n</sup> tẽ Pǎblú. Dico tñhu ní cáhá<sup>n</sup> téè dàcaca barcú nd̀̀hi xitohó-xi chi ní sàndáá iní-dé. <sup>12</sup> Te ñá ní tnahá iní-güedé Puèrtú Váha cuèndá sá ñí tnahá yóó cúú<sup>n</sup> dǎú táchí, te ñá túú dǎhu váha

táchí xǎ<sup>n</sup>, núu vài-güedé ní cuiní-güedé yáha-güedé quíhí<sup>n</sup>-güedé sáa-güedé ndéé ñuú Fènicé ní cùu. Te yàcá<sup>n</sup> cundecu-güedé yóó cúú<sup>n</sup> dǎú táchí cuèi ñá túú cáváha vihi, chi nchìi nàcuáa yáha bàrcú, te yàcá<sup>n</sup> quíhu táchí, dico dǎhu-gá. Núu xǎ<sup>n</sup> ndéé ndíacǎ<sup>n</sup> nátacá bàrcú yóó cúú<sup>n</sup> dǎú táchí, te ñu-ni Crëtá yíndàha-xi ñuú-á<sup>n</sup>.

*Nitùhú làmár cúú<sup>n</sup> dǎú táchí*

<sup>13</sup> Te duha ní quene nuu luha táchí, xǎ<sup>n</sup> ní sani iní-güedé sá ndácú-güedé quíhí<sup>n</sup>-güedé, núu ní natava-güedé caá ndètní ndéé bàrcú, te ní xica-xi cuáhá<sup>n</sup>-xi ní yáha-ndí yatni víi yuhu dìstrítú Crëtá. <sup>14</sup> Te tnaa-ni ní cuu sá ñi xica bàrcú, te duha ní cunuu dǎú táchí ñ<sup>n</sup> xio yuhu ñuú-á<sup>n</sup> <sup>15</sup> te nchìta ichi cuáhá<sup>n</sup> bàrcú. Te ñá ní ndàcu-gá-xi quíhí<sup>n</sup> ndáá-xi nàcuáa cuáhá<sup>n</sup>-xi ní cùu, núu ní dáñá-ndí cuáhá<sup>n</sup> méé-ñǎ bàrcú. <sup>16</sup> Te ní yáha-ndí ñ<sup>n</sup> ñuú nání Clàudá, te ñuú-á<sup>n</sup> caá cuǎdava xití làmár. Te ñ<sup>n</sup> xio yuhu ñuú núú ñà túú quène vihi táchí ñi yáha-ndí, te bàrcú líhli sá nchìcú<sup>n</sup> sátá bàrcú cáhnú, chi ní ndacu-ndí ní taxúha-ndí xití bàrcú cáhnú. <sup>17</sup> Te sátá ñi ndacu-ndí ní taxúha-ndí bàrcú líhli, te ní ducu<sup>n</sup> nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cǔchí yuhu ñuú Sirté, núu xǎ<sup>n</sup> ní ndíhi dóó nchítá dǐquí bàrcú ní nuu nehe-güedé, chi dóó-ǎ<sup>n</sup> ío níhi chìndaha táchí, núu xǎ<sup>n</sup> cuáhá<sup>n</sup> bàrcú ñ<sup>n</sup> xio. Te ní dáñá-güedé ñá túú-gǎ ní dàcaca-güedé, núu cuáhá<sup>n</sup> méé-ñǎ-xi ta chìndaha táchí cuáhá<sup>n</sup>. <sup>18</sup> Te ío níhi dǎú táchí, te ñá ní cuiní tnàhí-xi yáha. Te nduu úú sá dúcá<sup>n</sup> ñà túú-gǎ ní dàcaca-güedé bàrcú te ní



ngüíta-güedé ní dǎngöyo-güedé sá nchídó-xí cuendá cuiní-güedé nduu ñamá-xi. <sup>19</sup> Te nduu úní ní dǎngoyo-güedé ncha ndachìu<sup>n</sup> cánehe chiu<sup>n</sup>-güedé xití bàrcú. <sup>20</sup> Te cuéhé nduu ñá túú ní xìní-ndí ní chòdíní ní nchìcanchii, chi ío níhi ní cuu<sup>n</sup> dáú táchí, núu ní cáhá<sup>n</sup>-ndí sá vǎ cǎcu-ndí, chi ndìhi-ndí cáhá ní cáhá<sup>n</sup>-ndí.

<sup>21</sup> Te ní cuu titní nduu ñá túú-gǎ xéxí-ndí, núu xíǎ<sup>n</sup> ní ngúnutnì té Pǎblú núu-güedé, te xǎha<sup>n</sup>-dě:

—Quindáá iní-ndó tnǎhu ní cáhá<sup>n</sup>-í, te cundecu nahi-o Crétá ní cùu. Te núu ni tnì-ndo tnúhu-í, te vǎ dácuíta-o càrgá ndìhi dava-gǎ ndàchiu<sup>n</sup> ni cuu.

<sup>22</sup> Te vǎ yùhú-ndó chi vǎ cùú ni ì<sup>n</sup>-ndo dico bàrcú chi cuíta. <sup>23</sup> Te nàha-ndo sá yùhú càhá<sup>n</sup> ndìhi-í Yǎ Ndiöxí te quide-í nàcuáa càhá<sup>n</sup>-gá. Te òu-ni mee-gǎ ní techiu<sup>n</sup>-gá ì<sup>n</sup> espíritú xínú cuèchi núú-gǎ ní quixi, <sup>24</sup> te ní cachí-xi xii-í: “Vǎ yùhú-n chi vǎ cùú-n, dico dacuítí quìhì<sup>n</sup>-n cáhá<sup>n</sup> ndìhi-n tǎ Cèsár. Te ni ì<sup>n</sup> té ndìhi-n vǎ cùú, chi ío cùdíí iní ñáhá Yǎ Ndiöxí xii-n”, duha ní cáhá<sup>n</sup> espíritú xínú cuèchi núú-gǎ ní cachí tnúhu-xi xii-í. <sup>25</sup> Núu xíǎ<sup>n</sup> càchí tnúhu-í sá vǎ yùhú-ndó, chi sa cùnuni iní-í sá cadá Yǎ Ndiöxí nàcuáa ní cáhá<sup>n</sup> espíritú xínú cuèchi núú-gǎ. <sup>26</sup> Te mee táchí chindaha-xi bàrcú daquìhì<sup>n</sup>-xi ndéé yuhu ndùte —cachí té Pǎblú xǎha<sup>n</sup>-dě xii-güedé.

<sup>27</sup> Te sa ní cuu sáhú<sup>n</sup> nduu sáhú<sup>n</sup> niú sá ñí ngüíta-xi cùu<sup>n</sup> dáú táchí, te ñá túú-gǎ dácàca-güedé bàrcú, chi mee-nǎ táchí tá chindaha-xi barcú cuáhá<sup>n</sup> núu ndute làmár Àdriá. Te sátá ñí cuu dava niú, te ní quide cuendá cue té dácaca barcú sá tá cùyatni-güedé ñuhu yìchí. <sup>28</sup> Te ní

chicuàhá-güedé ná daha-gá mëtrú néhé-xí sǎ cùnú xítí ndute cuèndá cutnùní iní-güedé sá tá cùyatni-xi ndéé yuhu làmár, te nèhe-xi ócò sáhú<sup>n</sup> ì<sup>n</sup>-ni-gá mëtrú. Te ní xica tucu bàrcú luha-gá, te dǎtnùní ní chucuàhá tucu-güedé, te xía<sup>n</sup> néhé-xí ócò úsá-ni-gá mëtrú. <sup>29</sup> Te ní yùhú-güedé sá candaundeé-xi cava, te ní quehe<sup>n</sup>-güedé cúmí caá náhnú sǎ nchìcú<sup>n</sup> yoho, te ní dáquëe-güedé xítí ndute ndàa sátá bàrcú, te dǎtnùní ní ngüíñí-xi ñá ní xica-gá-xi, te ní cuiní-güedé sá òré-ni tũndaá ní cùu. <sup>30</sup> Te cue téé dácaca barcú ní natava-güedé bàrcú lĩhli dǎndéé-güedé núú ndute ni cùu, te ní cachí-güedé sá quíhí<sup>n</sup>-güedé ndàa núú bàrcú dàquëe-güedé úú-gá caá cuèndá cuita candeé-xi bàrcú cáhnú cuèndá sá vǎ cáca-xí. Te cuiní-güedé dandàhú-güedé dava-gá nchúhú cue téé ñũhu ndĩhi-güedé bàrcú, chi ní ndatnúhu-güedé sá cúnú-güedé ní cùu. <sup>31</sup> Te té Pǎblú ní xáha<sup>n</sup>-dě xii téé cùu capitá<sup>n</sup> ndĩhi dava-gá sandàdú:

—Te núu na dǎndóo ñaha cuè téé dácaca barcú cunu-güedé, te vǎ cǎcu-o —cachí-dé xáha<sup>n</sup>-dě.

<sup>32</sup> Te sá dúcá<sup>n</sup> ñĩ xáha<sup>n</sup>-dě nõu ní sáhá<sup>n</sup> sandàdú ní xehndé-güedé yoho nchìcú<sup>n</sup> bàrcú lĩhli dǎngáúnhnu-güedé xítí ndute cuáhá<sup>n</sup>-xi.

<sup>33</sup> Te váha váha-ni ta tũndaá cuáhá<sup>n</sup>, te ní xáha<sup>n</sup> tẽ Pǎblú:

—Sa ní cuu sáhú<sup>n</sup> nduu ñá túú tnàhí xèxi-ndo sá ndĩhú iní-ndó. <sup>34</sup> Te vitna yáchí-ndó, chi caxi-ndo cuèndá naníhí ndéé-ndó, te vǎ yùhú-ndó chi ñá túú nǎ tnahá ni ì<sup>n</sup>-ndo —cachí-dé xáha<sup>n</sup>-dě xii-güedé.

<sup>35</sup> Te sátá dúcá<sup>n</sup> ñĩ cáhá<sup>n</sup>-dé, te ní quehe<sup>n</sup>-dé ì<sup>n</sup> pàá, te ní ndacá<sup>n</sup> táhú-dě núú Yǎ Ndiõxí,

te núu-güedě nchaa-güedé duca<sup>n</sup> nĩ quide-dé, te dătnùní ní táhú-dě luha ní xexi-dé. <sup>36</sup> Te duca<sup>n</sup> te dătnùní ní cuyi-güedě ní xexi-güedé nchaa-güedé. <sup>37</sup> Te úú ciendú únídico sáhú<sup>n</sup> i<sup>n</sup>-ndí ñúhú bàrcú núú tnàhá té Păblú, te nchaa-ndí ní xexi ndi<sup>hi</sup>-ndí-dé. <sup>38</sup> Te ní xexi-ndí ní ndahá xití-ndí. Te dătnùní ní ngúita-güedé ní tava-güedé nchaa ngohnchi triú ní dăngoyo-güedé xití ndute cuendá nduu ñamá-gá bàrcú.

*Ní dáhu bàrcú xití làmár*

<sup>39</sup> Te sátá nĩ túndaá, te ñá ní cùtnuní-gá iní-güedé ndèè cúu-xí nũú nĩ sáá-güedé, te ní xiní-güedé i<sup>n</sup> xichi núú nĩ xícó ndúú luha yuhu làmár, te vâi vihi cúchí dándáá-xí yùhu ndute, te xíá<sup>n</sup> ñà túú dàcandá víhí tăchí ndute. Te ní ndatnúhu-güedé sá ndácú-güedě dacàca-güedé bàrcú quíhí<sup>n</sup>-xi ndéé núú ñúhú cŭchí. <sup>40</sup> Te xíá<sup>n</sup> nũu ní sáhá<sup>n</sup>-güedé ní xehndé-güedé nchaa yoho nchícú<sup>n</sup> caá tácàndéè bàrcú ní ndóo xití làmár, te ní nadatáyá-güedé vítú sã dăcuico-xi barcú, te ní nacata caa-güedé i<sup>n</sup> dóó dǐquí bàrcú, te ta chìndaha táchí cuáhá<sup>n</sup> yuhu làmár tá cùyatni-xi ñuhu yichí cuáhá<sup>n</sup>. <sup>41</sup> Te ndècu i<sup>n</sup> xichi ní natacá víhí cŭchí xití ndute, te xíá<sup>n</sup> nĩ nguíndŭxi nihnu bàrcú-güedé, te ní cuti<sup>hi</sup>-xi xití cúchí, te ñá ní ñíhí-gă-güedé năcuáa cada-güedé nene-xi. Te ío níhi ní dăcandá táchí ndute, te ní chúcú ndéé-xi ndàa sátá bàrcú, te ní ndi<sup>hi</sup> ní táhú-xí. <sup>42</sup> Te cue sandàdú ní xítñaha-güedé sá cáhní-güedě nchaa cue téé ní xíhi vecaá cuendá sá vă quíhí<sup>n</sup>-güedé núú ndute te cunu-güedé. <sup>43</sup> Te téé cùu capitán ñá ní dàña-dé cahni-güedé cue téé ní xíhi vecaá, chi ñá

ní cùndee iní-dé cahni-güedé tnàhá té Păblú. Te ní xáha<sup>n</sup>-dě xii-güedé sá cuè tée xĩcuu cada quíhí<sup>n</sup> núú ndute te na yăha-güedé ndute quene-güedé yuhu làmár. <sup>44</sup> Te dava cue tée ñá cúú càda, ní xáha<sup>n</sup>-dě nanducu-güedě vítú ñí àdi vítú ñĩ táhú sã ñĩ xíhi bàrcú, te núú xĩă<sup>n</sup> caundodo-güedé yáha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

## 28

### *Té Păblú ndécú-dě ñuú Măltá cáá cuădava làmár*

<sup>1</sup> Te sátá ñĩ cácu-ndí ní nene-ndí ñuhu yìchí, te ní níhí-ndí tnúhu nàcuáa nàni ñuú núú ñĩ sáá-ndí, te ñuú-á<sup>n</sup> nání-xí Măltá, te càa-xi cuădava làmár. <sup>2</sup> Te ío quide víxi<sup>n</sup>-xi cuèndá ío cùu<sup>n</sup> dáú. Te ñáyiu ñuú-á<sup>n</sup> ñĩ cundàhú iní ñáhă-yu xii-ndí, ní dáttnàhá-yu ñuhú te ní cana ñàhá-yu ní sáhá<sup>n</sup>-ndí ní nacuídí-ndí. <sup>3</sup> Te té Păblú dátacá-dé nducú, te tnàhá-ni ñ<sup>n</sup> cóó děé<sup>n</sup> ñĩ tn<sup>ñ</sup> nihnu-dé-di, te òré cuáhá<sup>n</sup> ndaha-dé chucu-dě núú ñùhú, te ní ñáni-di cahni, te ní ndee-di xití nducú ní sánduu-di ndaha-dé, te ní xexiha<sup>n</sup>-di xii-dé. <sup>4</sup> Te nchaa ñáyiu ndèhé-yu sá tácàndeé-di ndaha-dé, te ní ngüíta-yu ní xíttnàhá-yu:

—Váa ndíyí ní sahani téa, te ñá ní xíhí-dé làmár, te dacuítí sã cùú-dé vitna, chi sa nàha Yá Ndiöxí ná ní quide-dé ñuyíú-a —càchí-yu xíttnàhá-yu.

<sup>5</sup> Te té Păblú ní quidi-dé ndaha-dé ní ngau-nihnu-di núú ñùhú, te ñá túú tnàhí ná ní cùu núú ñĩ xexi-di. <sup>6</sup> Te ñáyiu ñuú-á<sup>n</sup> xĩndéhě-yu núu daquíhí<sup>n</sup>-xi chúhú<sup>n</sup> àdi nduá-dé cuú-dé. Te naha ñĩ xíndéhé ñàhá-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xíttnàhá-yu:

—Váa ndiöxí cúú tēe-a núu dàcá<sup>n</sup> ñá túú tñàhí ná ní quide-xi ndaha-dé núú nǐ xexi cóó —càchí-yu xǐtñàhá-yu.

<sup>7</sup> Te yatni núú dúcá<sup>n</sup> nǐ xexiha<sup>n</sup> cǒó-ǎ<sup>n</sup> cáá ñùhu xitu téé nàni Publiú, te téé-á<sup>n</sup> táxí tñùní-dé nǐhìí ñuú cáá cuädava xití làmár núú ndécú-ndǐ nduu-ǎ<sup>n</sup>. Te ío váha iní-dé chi ní cana ñaha-dě ní sáhá<sup>n</sup>-ndí ní xíndecu-ndí úní nduu vehe-dé. <sup>8</sup> Te tǎtá tē Pùbliú-á<sup>n</sup> cáá-dě cùhú-dé ñùhú-dě cahni, te tñàhá-dé daxi. Te té Pǎblú ní sáhá<sup>n</sup>-dé núú cáá-dě, te ní cáhá<sup>n</sup> ndihí-dé Yǎ Ndiöxí, te ní sacá<sup>n</sup> ndodo-dé ndaha-dé díquí tē cùhú-á<sup>n</sup>, te duca<sup>n</sup>-ni nǐ quide-dé, te ní ndúha téé cùhú-á<sup>n</sup>. <sup>9</sup> Te sátá dúcá<sup>n</sup> nǐ quide té Pǎblú, te ní quixi nchaa ñáyiú cùhú núú ndécú-ndǐ, te ní quide tátna ñaha tē Pǎblú xií-yu te ní ndúha-yu. <sup>10</sup> Te òré ndécú-ndǐ xíá<sup>n</sup>, te vǎi sá nǐ taxi táhú-güedě, te òré ní xica-ndí ní taxi tucu-güedé nchaa sá xíní ñùhu-ndí ichi.

### *Té Pǎblú ní quexìo-dé ñuú Ròmá*

<sup>11</sup> Te yàcá<sup>n</sup> ní xíndecu-ndí úní yóó, te sa ndècu ñ<sup>n</sup> bàrcú téé ñuú Alejàndriá òré ní quexìo-ndí, te ní xíndecu-xi nǐhìí yóó cúú<sup>n</sup> dǎú táchí. Te núú-xi càndodo sandú sá dánàni-güedé Càstór ndihí sàndú sá dánàni-güedé Pölux, te xití bàrcú-á<sup>n</sup> nǐ quée-ndí cuáhá<sup>n</sup>-ndí. <sup>12</sup> Te ní quexìo-ndí ñuú Siràcusá, te yàcá<sup>n</sup> ní xíndecu-ndí úní nduu. <sup>13</sup> Te ní xica tucu bàrcú cuáhá<sup>n</sup>-xi, te ní quexìo-ndí ñuú Règiú. Te nduu tñéé duha ní quene nuu táchí. Te ní xica bàrcú cuáhá<sup>n</sup>-xi, te ndéé nduu úú ní quexìo-ndí ñuú Pùteolí. <sup>14</sup> Te yàcá<sup>n</sup> ní naníhí tñàhá-ndǐ ndihí ñáyiú sàndáá iní tñúhu Jèsús, te ní cachí-yu sá

cúndècu-ndí úná nduu, núu xíǎ<sup>n</sup> ní xíndecu-ndí úná nduu ndihí-yu. Te ní xica tucu bàrcú cuáhá<sup>n</sup>-xi, te ní quexìo-ndí ñuú Ròmá. <sup>15</sup> Te ñáyiú ròmá ñáyiú sàndáá iní tnúhu Jèsús, ní níhí-yu tnúhu sá cuáhá<sup>n</sup>-ndí, te ní quixí-yu ní quixi tnahá ñáhă-yu ichi. Te davá-yu ní naníhí-ndǐ ñuú Fòrú Àpiú, te davá-yu ní naníhí-ndǐ ñuú Úní Tàbernás. Te òré ní xiní té Păblú nchaa ñáyiú véxi tnahá ñáhá xii-ndí, te ndee ndèe ní cuu iní-dé, te ní ndacá<sup>n</sup> táhú-dé núú Yă Ndiǒxí sá dúcá<sup>n</sup> ní quidè-yu. <sup>16</sup> Te sátá ñǐ quexìo-ndí ñuú Ròmá, te cue téè cùchiu<sup>n</sup> ní xáha<sup>n</sup>-güedě xii té Păblú sá cúndècu dǐ<sup>n</sup>-dé, te ní xíndéé ñáhá cuàa sandadú xii-dé.

*Té Păblú càhá<sup>n</sup>-dé tnúhu Yă Ndiǒxí ñuú Ròmá*

<sup>17</sup> Nduu úní sá ñǐ quexìo té Păblú, te ní cana-dé cue téè cùnuu núú ñáyiú isràél ndécú ñuú Ròmá, te ní sáhá<sup>n</sup>-güedé núú ndécú-dě, te ní xáha<sup>n</sup>-dě:

—Nchòhó cue téè isràél, càchí tnúhu-í sá ñă túú ñă ní quide-í ni ñ<sup>n</sup> ñáyiú cútnàhá ní xíndecu-í ñuú Jerusàlén. Te ñă túú ní cǎhá<sup>n</sup> cuèhé-í sá quidě-yu nchaa nàcuáa ní xóo cada cue ñaní tnáhá-ó ñǐ xíndecu ndéé sanaha, te ñă túú ñă ní quide-í te ní tnǐ ñaha-güedě ní sáha cuèndá ñáhá-güedě xii-í núú cuè téè ròmá, cue téè ndècu yacá<sup>n</sup>. <sup>18</sup> Te cue téè-á<sup>n</sup> ñǐ ndúcú tnúhu-güedé ñuú ndáá ndècuéchi-í, te ní cutnùní iní-güedé sá ñă túú ñă ní quide-í, te xíǎ<sup>n</sup> cuiní-güedé queñuhu ñaha-güedě xii-í vecaá ní cùu. <sup>19</sup> Te diu-ni cue téè isràél ñă ní dàña-güedé cácu-í, chi cuiní-güedé sá cáhni ñaha cue téè ròmá, cue téè xíndecu yacá<sup>n</sup> xii-í ní cùu, te xíǎ<sup>n</sup> ñuú ní xáha<sup>n</sup>-í sá quixì-í cǎhá<sup>n</sup> ndihí-í té Cèsár cuèndá iha cada ndáá méé-dě cuèndá-í, te vá yǒo ñ<sup>n</sup> tee-í cuéchi. <sup>20</sup> Núu

xíã<sup>n</sup> ní cana ñaha-ĩ xii-ndo cuendá cunaha-ndo nàcuáa ní cuu. Te ní xáha<sup>n</sup>-ĩ sá sàndáa iní-í sá ndótó ñáyiú ní xíhí, te ðiu-ni ðuca<sup>n</sup> càhá<sup>n</sup> dava-gá ñáyiú isràél, te sá ðúcá<sup>n</sup> ñí cáhá<sup>n</sup>-í, te ní chihi ñaha-güedě vecaá, te xĩndeé ñáhá-güedě ndéé vitna —càchí té Pãblú xãha<sup>n</sup>-dě xii-güedě.

21 Te ní xáha<sup>n</sup>-güedě xii-dé:

—Ñá túú tnahí tutú ní tëndaha cue téé ðistrítú Jùdeá quixi cuendá-n. Te ní cuè téé isràél ñá túú ní quixi-güedě cáhá<sup>n</sup> cuèhé-güedě cuendá-n.

22 Te cuìní-ndí cundedóho-ndí nása cunduu tnúhu cáhá<sup>n</sup>-n, chi sa ní níhí-ndí tnúhu sá ncháá xìchi ío xícáhá<sup>n</sup> cuèhé-yu cuendá nchaa ñáyiú sàndáa iní tnúhu Jèsús —càchí-güedě xãha<sup>n</sup>-güedě xii té Pãblú.

23 Te ní xáha<sup>n</sup>-güedě nduu cùyáchí-güedé te quixi-güedé cundedóho-güedé dava-gá cuendú cáhá<sup>n</sup> té Pãblú. Te ní tnahá nduu ñí ndatnúhu-güedé quíhí<sup>n</sup>-güedé núú quidé vèhe-dé, te vài-yu ní sáhá<sup>n</sup>-yu ní xĩndedóho-yu tnúhu ní cáhá<sup>n</sup>-dé, te nchàca nchaa ní cáhá<sup>n</sup> ndíhi-dé-yu. Te ní xáha<sup>n</sup>-dě xii-yu sá ndíi Moisés ndíhi dava-gá cue téé ní xóo cáhá<sup>n</sup> tnúhu Yá Ndiõxí ndéé sanaha ñí chídó tnùní-güedé núú tütú-güedé sá ðíú-gã tendaha-gã Crístú quixi-gá ñuyíú-a. Te ní chídó tnùní-güedé nchaa nàcuáa cada-gá, te ðiu-ni nàcuáa càhá<sup>n</sup> tutú-güedé cada Crístú, te ðuca<sup>n</sup> ñí quide-gá cútnàhá ní xica cuu-gá ñuyíú-a, núu xíã<sup>n</sup> ní cutnùní sá ðíú Jèsús cúú-gã Crístú Yaá ní tendaha Yã Ndiõxí ní quixi ñuyíú-a. Te núu quĩndáa iní-yu, te ndíhu ndaha ñaha Yá Ndiõxí xii-yu. 24 Te davá-yu ní sàndáa iní-yu tnúhu ní cáhá<sup>n</sup>-dé, te davá-yu ñá túú ní sàndáa iní-yu. 25 Te

cuendá sá ñă ĩ<sup>n</sup>-ní tnũhu ni cǎhá<sup>n</sup>-yu, núu xǎ<sup>n</sup> cuiní-yu núhú-yu ni cùu. Te ní xáha<sup>n</sup> tẽ Pǎblú sá cùndètu tnaá-yu cáhá<sup>n</sup>-dé ìngá tnúhu, te xǎha<sup>n</sup>-dẽ:

—Ní xáha<sup>n</sup> Espíritú Yǎ Ndiõxí xii ndíi Chàíá nàcuáa cáhá<sup>n</sup> ndíi núu nchàa ñaní tnáhá-ó ñí xíndecu ndéé sanaha. Te ní cáhá<sup>n</sup> Espíritú-gá ĩ<sup>n</sup> sá ndàá ní xáha<sup>n</sup>-xi xii ndíi, te duha ní xáha<sup>n</sup>-xi:

<sup>26</sup> Quíhí<sup>n</sup>-n te cúñaha-n xii ñáyiu:

Nchòhó mee-ni cùndedóho-ndo tnũhu cǎhá<sup>n</sup> Yǎ Ndiõxí, dico ni vǎ tẽcú tnùní-ndó.

Te cada-gá tĩtní núu sǎ vǎ yõ tnàhí ndàcu cada, dico ni vǎ cútnùní iní-ndó nàcuáa ndùu sá cádá-gǎ,

<sup>27</sup> chi cuendá sá ïo sàá iní-ndó,

xǎ<sup>n</sup> duca<sup>n</sup> ñà túú sǎha-ndo cuendá nása cuáhá<sup>n</sup> tnúhu cǎhá<sup>n</sup>-gǎ,

chi ñá cuiní-ndó cùndedóho-ndo, te ni ñǎ sàndáá iní-ndó.

Te ni ñǎ cuiní-ndó dàña-ndo nchaa sá cuèhé sá dúhá quide-ndo

cuendá xocàni-gǎ nchaa xǎ<sup>n</sup> iní-ndó,

duha cúñaha-n xii-yu.

Càchí Espíritú-gá xǎha<sup>n</sup>-xi xii ndíi. <sup>28</sup> Te na càchí tnúhu-í sá quíhí<sup>n</sup> cue tée cǎhá<sup>n</sup> tnúhu Yá Ndiõxí cáhá<sup>n</sup>-güedé tnúhu-gá núu ñáyiu ñá túú cùu ñáyiu isràél, chi ñáyiu isràél ñá túú cuiní-yu cùndedóho-yu. Dico ñáyiu ñá túú cùu ñáyiu isràél chi cùdíi iní-yu cùndedóho-yu, núu xǎ<sup>n</sup> naníhí tàhú-yu —càchí tẽ Pǎblú xǎha<sup>n</sup>-dẽ xii-yu.

<sup>29</sup> Te sátá ñí ndihí cuendú ní xáha<sup>n</sup>-dẽ, te ní ndeé-yu cuánuhú-yu ta ndàtnúhu-yu cuáhá<sup>n</sup>.

<sup>30</sup> Te úú cuíá ñí xínu ní xíndecu tẽ Pǎblú ĩ<sup>n</sup> vehe ní cháhu-dé. Te ní xóo cáhá<sup>n</sup> váha-dé ndihí nchaa



ñáyu ní xóo quíhí<sup>n</sup> vehe-dé. <sup>31</sup> Te ní xáha<sup>n</sup>-dě sá ndíhu ndaha ñàha Yá Ndiõxí xií-yu núu quindáá iní-yu tnúhu-gá, te vá yõo ì<sup>n</sup> ni sàdí yuhu-dé. Te mee-ni tnúhu Xítóhó Jesucristú ní cáhá<sup>n</sup>-dé núŷ-yu.

**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022

872f7754-0986-5ecd-a059-925a708a6939